

СОБИР РУСТАМХОНЛИ

ЎФУЗ ХОН БҮЙИДАН СҮЙЛАР

КЎК ТАНГРИ

Р о м а н

Озарбойжончадан Усмон Кўчқор таржимаси

«SHARQ» НАШРИЁТ-МАТБАА
АКЦИЯДОРЛИК КОМПАНИЯСИ
БОШ ТАҲРИРИЯТИ
ТОШКЕНТ – 2010

821.512 162 - 31

Озар. Сийл
байтада, 2010

P-92

Рустамхонли, Собир.

Кўк тангри: роман / Собир Рустамхонли; озарбойжончадан Усмон Кўчқор тарж. – Т.: «Шарқ», 2010. – 320 б.

Таниқли озарбойжон шоири, ёзувчиси, драматурги, публицисти Собир Рустамхонлининг ушбу романида Шарқ тарихида буюк аҳамият қасб этган Ўғуз хон тимсолида қадим туркий халқларнинг турмуш тарзи, орзу-интилишлари, яkkatanгричиликка бўлган ишонч-эътиқодлари ва бу эътиқодни кенг минтақаларга ёйиш учун олиб борган курашлари ҳақида ҳикоя қилинади. Асар ўзининг ўткир сюжети, тилининг содда ва равонлиги, қаҳрамонлар характеристерининг теран ёритиб берилганлиги билан китобхонларга манзур бўлади, деган умиддамиз.

ББК 84(50з)

ISBN 978-9943-00-445-0

31431
3

Alisher Masayev

© «Sharq» нашриёт-матббаа акциядорлик компанияси
Бош таҳририяти, 2010 й.

2016/24

6453

zvezdazion m.k.

гуфд

КИРИШ

Кунчиқардан Кунботарга қадар ҳали фақат бир томони маълум бўлган ерда юзида Тангрининг ўз ишқидан яратдиги бир улус яшар эди... Қайси мингийилликнинг қайси юз йиллиги эди – аниқ эмас... Бошидан асрлар сакраб ўтаркан, минг йил ҳам бир йил каби қисқа кўринади... Тарихнинг дафъалар-ла тақрорланган воқеотлари яхлит тортади; икки минг етти юз йил аввалги даврнинг бир япроғи айни пайтда уч минг етти юз йил наридан келган бир қўшиқни куйлади; минг йилдан бери қўриниб-асралган кичкинагина гил лавҳа ўзидан жуда-жуда олис замонларнинг ҳодисотларидан хабар бера олади.

...Дунё уларники эди. Бироқ дунё деган сўзни истифода этмасдилар, ер-сув ва ёки очун дер эдилар. Ошилмас тоғлардан ошган, сўнгсиз бўлиб кўринган саҳроларнинг сўнгига қадар борган, йўлларни ўриш-арқоқдек эшиб, қора шимолнинг муз тоғларини эритган, жазира маҳалларнинг маржон денгизларида, кунчиқарнинг қуёш дояси бўлмиш сувларида чўмилган, борса келмас кунботар йўлларининг охиргача етиб борган, ниҳоят ернинг нақ уртасига келиб, «Шу ердан яхшиси йўқ, қаёққа чўзсан қўлимиз етади», дея ушбу жойга юрт солган эдилар. Ер қўёшнинг бошига парвона бўлгани каби улар ҳам ернинг бошига парвона эдилар. Тоғма-тоғ, ирмоқма-ирмоқ, кўлма-кўл – ҳар бир кўрган нарсаларига ном бера-бера шуҳрат қозонган эдилар. Яратганинг илк каломидан ва илк нуридан яралган эдилар, бу калом ва бу нурни атрофга тарата-тарата, кўк севгисини ерга, ер қарзини кўкка етказа-етказа, кўк билан ернинг бирлигидан туғилган буюк, кутсол¹ бир йўлдан юрар эдилар... Бош бўлмоқ, бошланғич бўлмоқ, ибтидо уларнинг манглайига битилган эди. Қуёш билан ойнинг, кўк билан ернинг, тоғ билан адирнинг, кеча билан кундузнинг экизлигини ҳам худди ота-она бирлиги каби яралишнинг, мавжудликнинг бош шарти деб билганликла-

¹ Кутсол – муқаддас

ридан, руҳларини ялакат этган құш дарёларни, құш денгизларни, құш тоғларни танлашган, илк ұчоқларини ана шу ерларга қурган әдилар.

Довулларини¹ гумбурлатиб чалғанларида яратық² оғзига талқон солған каби ҳайрат билан тинглар, чақмоқ қиличлари парчаламаган қалқон, оқ патли, уч тиғли үткір үқлари етиб бормаган нишон қолмаган әди. Тангрининг буюк деңқон құли ила әнг сара уруғ каби ер юзига сочилған әдилар. Бобил сарҳадларидан тортиб Тинч уммонга қадар чексиз-чегарасиз бир юртлари бор әди. Бу қадар бепоён худудларда яшайдиган құшни-қардош уруғларни, халқдарни бир байроқ остига түплаш имкони йўқ әди. Бу чеккадан у чеккага боргунча битта умр етмас әди. Ҳар бири ўз йўлини танлаб, ўз тақдирни билан яшар әди.

Минг йиллардан бери улар она қучоғидек яшаб келған бу кенгликларнинг сарҳадларини ким, қачон чизған – аниқ эмасди.

Биз уларнинг фарзандлари, набиралари, эваралари, чеварадлари, бутоқ ва япроқларидирмиз...

Уларнинг тилида сұзлашамиз...

«Тангри ҳаққи» деб улар ичиб келған онтни ичамиз...

Уларнинг мовий осмонларига боқамиз, дунёмизни ўзгартириб учеб кетганда ҳам уларнинг ҳузурига юксаламиз...

Узоқ умр кўрган, ёшини яшаб, ошини ошаган боболар ўзларини ер юзининг илк инсонларидан бўлмиш Улжойхоннинг авлодлари деб билар, илдизларини бир бошадан Улуғ Яратганга, қўкка боғлар, ўзларини кўқдан келган ярангулар³, яъни кўк одами ҳисоблар әдилар. Улуғ оталари Тарғитойни ҳам Тангрига боғлар әдилар. Тангридан келган йўл йўлчиларининг ҳисобини Тангридан бошқаси билмайди. Нечанчи бўғин эканлигини фақат Тангри билган Тарғитой, Тарғитойнинг яна неchanчи бўғин эканлигини ёлғиз Тангри билган ўғли Диб Ябғу, Диб Ябғунинг ўғли Қора хон... Бу шажара занжири минг йилликларга уланиб кетарди.

Албатта, бу силсила кўпроқ рамзий бўлиб, асотирлар-

¹ Довул – йирик маросим ногораси

² Яратық – табиат, хилқат

³ Ярангу – инсон

га таянар, ёнма-ён тизилган ўнлаб чўққилардан фақат энг юксаклари алоҳида аталгани каби, ўтмишдан ҳам энг буюк зотлар, тарихнинг бурилиш нуқталаридан туғилиб яшаган, тўғрироғи, фақат ўз халқининггина эмас, умуман инсоният тақдиррида мислсиз ўрин тутган, тарихнинг яратувчиши бўлган буюклар хотирланар, уларга қадар ва улардан кейин минглаб юрт бошлиқлари, ҳокимлари, саркардлар келиб-кетса-да, барчасининг борлиғи, амали, номи бир Буюк Зотнинг кўлкасидан жой олади. Диб Ябғу юзлаб Диб Ябгуларнинг, Қора хон юзлаб Қора хонларнинг умумий номи, барчасининг тимсоли, рамзи бўлиб қолади...

Уларнинг биридан иккинчисигача кечиб ўтадиган муддатнинг минг йилликлар билан ҳисобланиши ҳам шундандир.

Тарихга ном берган зотларнинг ораларидаги йўллардан юзларча бўй-бўғум¹ кечиб ўтган бўлса-да, ўт-ўтлак², яни замона фақат алоҳида-алоҳида буюк номларнигина асрай олади; муҳими ҳам ана шу бўлса керак, эҳтимол. Улардан ҳар бирининг минг йиллаб яшаганликлари ҳақидаги қадимий ривоятлар ҳам осмондан тушган эмас. Тангри дастлабки авлодларга узоқ яшамоқ ҳақини берганди. Минг йил, икки минг йил... Шумер шажараларида давлат бошлиқларининг йигирма, йигирма беш минг йил яшаганликлари ҳам кўрсатилган. Сўнгра Тангри ўз яратидан фазабланди ва умрларини қисқартиб қўйди. Бизнинг англадигимиз, тасвир этдигимиз инсонлар ҳам узоқ умр кўрар эдилар...

Демак, ҳали Тангри ҳузурида мартабалари баланд эди. Қайси замоннинг воқеалари бу? Буни ҳам Тангрининг ўзи билади... Яралишнинг болалик чоғларидан сўз юритамиз... Яшаб ўтганлари шубҳа түфдирмайдиган, фақат вақт ўтган сари замонлар оғушида асотирга айланган бу зотларнинг ҳар бири абадий яшаб қоладиган элимизнинг мангулик тамал тошидир.

¹ Бўй-бўғум – насл

² Ўт-ўтлак – замон, давр

Биринчи бүлім

ТУРК ТАНГРИСИ

Үша йили ҳали қишиң адокланмасдан әлбоши Қора хоннинг чопарлари бутун турк әлларини кезиб юриб, улус бекларини қўкламда ўтказиладиган қурултойга чақирад әдилар. Йил барокотли келганидан, ҳалқ йўқчиликдан чиқиб олганидан хоқоннинг димоғи чоғ эди. Йилқилар, сурувлар чўлларга сифласди. Дарё-сой бўйларида битган ҳосилни эплаб бўлмасди. Бориб эгаллаган, тасарруфига олган ерларидан оқиб келаётган бож эл-юртини йиллаб едириб-ичирмоққа етар эди. Хоқон ўз қувончини беклар билан баҳам кўрмоқ, уларнинг ҳол-аҳволини сўрамоқ истарди.

Яширин бир ўй-нияти ҳам бор эди. Ўттиз йил элга бош бўлган, ваҳима-қўрқувни билмай ёғийлар устига юришлар қўлган, ўлкаларни забт этган, энг оғир жангларда ҳам комил ишонч билан ғалаба қозонган, юз бора ажал билан юзма-юз келиб, ўз жасорати ила Буюк Яратганинг Жонолғонини¹ ҳам чўчитган, кескир нигоҳлари ила уни ортига қайтариб жўнатган Қора хон бу қўклам илк дафъя қўёшнинг тоғлар томон эниб боришини ҳис этиб, ҳаловати бузилган эди. Ўз қон-қариндошлари, эл донишмандлари билан созу сұхбат қилиб, ўтган кунларнинг унтуилмас, баҳтиёр дамларини яна бир бор эсламоқни, бу хурсандчилик билан юрагидаги фам-ғуссаларни қувиб юбормоқни, у дунёга енгил тортиб кетмоқни истарди. Буни бекларга сездирмоқчи эмас, фақат ўз кўнглига тасалли топмоқчи эди, холос.

Тагин хоқонлик ўзидан кейин кимга қолажагини, ҳокимият кимнинг қўлига ўтажагини билдириб қўймоқчи эди уларга. Тўрага² кўра унинг ўрнига ким чиқажаги маълум эди. Ёш, бақувват ўғли Ўғуз хоннинг кучини, ақлу заковатини кўрмоқ бекларни жасурлантирар, ҳокимият учун

¹ Жонолғон – Азроил

² Тўра – қадимги турклар бу сұз билан бош қонун, низом, ҳалқни идора этмоқ каби кенг маъноларни ифода этганлар.

келиб чиқиши эҳтимоли бўлган низо-жанжалларнинг олдини олар, эл-юрт таянчини мустаҳкамлар эди. Бу машваратни у атай эл-улуснинг яйловга кўчиши арафасида, баҳорда, тангриларга қурбонлик қилинадиган Топиқ байрами¹ кунларида чақирган эди. Шўлан² тугагач, беклар билан бирга, эҳтимолки, умрининг сўнгти юришига чиқмоқчи эди. Улуснинг энг буюк топиноғи³ – маъбади бўлган муқаддас унгурга⁴ – Ота Мафорага йўл олмоқчи эдилар.

Тоғу адирларда гул-чечаклар очилган чоғлар эди. Яйловларда булат тўдаларига менгзар минглаб ўтовлар тикилганди. Қорлари эриб, сувлари шиддатга минган, бағри минг бир рангда товланиб турган тоғлар гўё «кел-кел» дея чорларди. Эл-улуснинг яйловга кўчган, осмон билан кўшни тутинган дамлари эди.

Күёшнинг ол ёноқлари ёнган ана шундай кунларда қуноқлар оқиб кела бошлиди. Узоқ-узоқ аймоқлардан от чоптириб келган бу беклар, кўрайликчи, кимлар экан.

Аввал байроқларини ҳилпиратиб хоқоннинг қариндошлари – Ўр хон, Кур хон, Куз хон ўzlари бошчилик этадиган юрт вакилларини бошлаб келдилар. Улар бағирлашиб, кучоқлашиб кўришганча хоқоннинг ёнидан жой олдилар.

Сўнг кунботар ўлкаларнинг суянч тоғи Алпэр ўғли Муғон хон келди.

Сўнгра Канчар улусининг бошлиғи Табакхон ўғли Эркин келди.

Сўнгра Кобул, Сейистон беги, Халаҷ улусининг бошлиғи Эрдўғмуш ўғли Тўрамакбек келди.

Сўнгра Табғаҷ ва Чинликларни тиз чўктирган шоҳли Уйғур улусининг бошлиғи Алунча ўғли Алпдўған хон келди.

Сўнгра шимол қабилаларининг фахри, қирқ жуфт итдан чанаси, беш кийик терисидан пўстини бўлган Тўбаҳон ўғли Туманбек келди.

Сўнгра елкасига қўнғир қуш қўндириб олган Қора қирғизларнинг беги Тардуш ўғли Тенгиз хон келди.

Сўнгра Олтой сойлари каби кўпириб-тошган Буғухон ўғли Эник бек келди.

¹ Топиқ байрами – қурбон байрами

² Шўлан – зиёфат, машварат

³ Топиноқ – зиёратгоҳ, маъбад

⁴ Унгур – фор, мафора

Санаган билан тугамайди. Сұнгра Қарлуқ, Тулу, Күмөн, Талас беклари, Олатов, Олтой, Хонтангри тоғларидан шунқор каби учиб, дашту саҳролардан яшин каби күчіб гурас-гурас алп йигитлар келдилар.

Жаңға кирған үрдуда ким қайси жабхада, ким билан ёнма-ён тұрса, күк қуббасига үхашаш бу чодирда, мажлисларда ҳам шу тартибда жой оларди. Бу бирдамлик оғушида илдизи бир бұлған хонларнинг, эл бекларининг севинчи ичига сиғмасди.

Довуллар қоқылди, қонлар жұнбушга келди, сұрнайлар янгради. Илон оғзидан чиққандек чин қыздари, чүрилар шароб сұздилар.

Қора хон құноқларига деді:

— Узоқ йүллар кечиб хуш келдингиз, беклар. Олис-яқин элларнинг ҳол-ақволидан хабар сұраб, яхши-ёмөнімизни биргаликта үрганайлық, муҳомаға этайлық. Ҳамжихатлиқда соз-суҳбат күрайлық, ейлик-ичайлық! Ов овлаб, құш солиб, ундан сұнг Ота Үнгурға йўл олайлық! Топиқ беріб, отамизга бош эгиб үзимизга зафарлар сұрайлық. Улуғларимизни шод этайлық!

Дастурхонга бузоқ, кийик, құй этлари тўкиб ташланди, ичкиликлар сув бўлиб оқди.

Навбати билан ҳар бир бек охирги йиғилишларидан сұнг үзи бошчилик қилаётган эл-аймоқдаги үзига құшни бўлган ёт юртларидаги хуш-нохуш хабарларни, маълумотларни сўзлаб берар, бу айтганларига бошқа бекларнинг ва охирида Қора хоннинг муносабатини эшитар, шу тариқа эл-юртнинг тақдириси билан боғлиқ ҳар бир масалада мажлис аҳлининг муносабати аён бўлар эди. Кўп нарсаларни сўзлашдилар, бироқ бу йиғилишда энг кўп мунозарага сабаб бўлған масала элнинг кунчиқар сарҳадларидан туғиладиган таҳлика эди.

Бу таҳликани дастлаб Алинча ўғли Алпдўған эсга олди. У беклар билан жуда сийрак содир бўладиган бундай учрашувлар соғинчини таъкидлаганича ҳар бир бекнинг номини алоҳида-алоҳида тутиб саломлашиб чиққач, не-не замонлардан бери бош оғриғи бўлиб келаётган ҳийла уяси – Чиндан келган хабарларни етказди:

— Кунчиқарда йил йилдан оғир келаётир, беклар,— деди у,— курғоқчилик Чинни ҳолдан тойдирди. Ёмғир йўқ.

Үрмөнлар ўчоқдек ёнаётир. Дарёларнинг суви тортилган. Кемалар тўхтаб қолган. Улар бизга кўз тикмоқда. «Бизнинг баркотли юртларимиз ёғин-сочинсиз қолиб, экин-тикинимиз кул бўлса-ю, бироқ Буюк дашт гуллаб ётса, бу қанақаси бўлди?» – дея ҳайрон улар. Бизнинг мўл-қўлчилигимиздан жонлари талвасада. Кўзлари ваҳимага тўлган, то ўзларини ўнглаб олгунларича бизнинг бостириб боришимиздан қўрқаётирлар.

Қораҳон қимиз тўла аёғини¹ ерга қўйиб, ўйчан қиёфада:

– Чин чўкса, биз ҳам чўкамиз, – деди. – Ер юзининг нариги чеккасига қадар қатнайдиган ипак арғишлари² келмай қўйса, борди-келди сийрак тортса, биз ҳам заифлашамиз. Бу йўл юз йиллардан бери бизнинг қўлимизда. У Чинни бойитгани каби бизни-да боқиб, олтини оқиб келмоқда. Чин билан Кунботар ўртасида элчилик қилиб, бирининг мақсадини иккincinnисига етказувчи кўприк биз бўламиз, бошимизга бало бўлса-да, Чиннинг чўкиши бизга севинч бермайди, – деди.

Алпдўған уни тинглаб бўлгач, тағин деди:

– Бироқ шу билан иш битмайди. Ипак арғишлари сийракланса-да, барибир келаверади.

Табак хон ўғли Эркин гапга қўшилди:

– Мени ҳам эшитинг. Биздан ўтаётган арғишлар сони камайди. Бунинг сабаби қурғоқчилик эканлигини Алпдўғандан билиб олдик. Ипакни ўзимиз етиширийлик, ипак қуртини ўзимиз чиқарайлик, дедим. Чинга вакил жўнатдим, ҳамон дараги йўқ. Ипак мато тўқишини ўрганиб олсан, Чиннинг Кунботарга чўзилган қўлини кесамиз, ипакни биз ўзимиз етказиб берамиз.

Алпдўған сўзини якунлаб деди:

– Мен фақат ипакдан, шойидан сўзламадим, беклар. Қурғоқчилик жуда ёмон оқибатларни келтириб чиқариши мумкин. Ёмғир тошининг³ хабари Чинга ҳам етиб борди. «Саду тоши» дейдилар бу тошни. «Уларни «Саду тоши» қутқариб қолади, бу тош уларнинг қўлида экан, биз сувсиз қолаверамиз, кўкни, ёмғир-сочинни улар идора эта-

¹ Аёғ – қадаҳ

² Арғиш – карвон

³ Ёмғир тоши – турк мифологиясида бу тош Муқаллас тош ёки Тангри тоши ҳам дейилади, у ҳокимият рамзи ҳисобланади.

ди», — дейди чинликлар. Ана шунақа гаплар! Шу туфайли юртларимизда юзлаб Чин жосуслари изғиб юрибди. Балки сизнинг чодирларингизга ҳам кириб олгандирлар.

Беклар ерга тикилиб қолдилар. Қошлари уюлди. Юракларига тушган шубҳа остида аввал бир-бирларига, сўнгра орада кезиб юрган канизларга, эшикда қотиб турган қорувулларга боқиб чиқдилар.

Алпдўған бир оз тин олгач, давом этди:

— Ёмғир тошини ўғирлаш, биздан олиб Чин императорига етказиш пайида юрибдилар. Императорнинг бу тошга қўли етмаса, уруш бошлайди. Улуф Хоқонимиз элимизга насиб этган Ёмғир тошини қаттиқ қўриқламофи лозим.

Қора хон кулди:

— Қутсол тош — қўкнинг ҳақи. Қўқдан тушганни қўкнинг ўзи қўрийди, — деди. — Ерлар-сувлар¹ яралган кунданоқ бу тош бизнинг улусга юборилган. У очун беклигининг² рамзи бўлмиш бизнинг қўлимиздадир...

Бу сўзлар шўландагилар бошидан шамолдек елиб ўтди. Фала-ғовур бошланди. Ер билан қўк орасига кўпприк кола билган, улуснинг ниятини рўёбга чиқарган, дунё ҳокимиётининг калити бўлган бу тош борасида эшитмаган, билмаган кимса йўқ эди. Унинг хоқон қўл остида эканлиги ҳамманинг юрагига таскин берар, фуур уйғотарди. Айни пайтда юракларига шайтон ин қурган кибрли беклар ҳам бор эдики, ҳокимиётнинг узоқ йиллардан бери хоқон ихтиёрида эканлиги, сўнгра эса унинг ўғилларига ўтажаги уларни безовта этар, улар зимдан хоқонга ҳасад қилар, тошга эга бўлмоқ йўлларини излар эдилар... Уларнинг аксарияти хоқоннинг куч-қудратини қўшиндан, юртни идора этмоқ усулидан кўра кўпроқ шу тошда кўрар эдилар. «Ёмғир тоши менда бўлганида қўшниларнинг дами ичига тушиб кетарди, ер юзида бизга бош эгмаган бирон-бир ўлка қолмасди», — деган фикрда эдилар.

Хоқон тузадиган шўланларнинг энг унуглиларни пайти емак-ичмакдан сўнг ўтказиладиган пойга эди. Аввал бе-заклари кўзни қамаштирган, қўкларга сапчиган отларнинг кишинашига қўшилиб руҳга мардона бир шиддат баҳш этув-

¹ Ерлар-сувлар — бу ибора орқали Ер курраси тушунчаси ифодаланаар эди.

² Очун беклиги — дунё ҳокимлиги

чи жанг сурнайларининг саслари остида чавандозлар ўртага чиқиб келишди.

Эгар қошини ушлагани ҳамоно сакраб отга миниб олган йигитлар шиддати еру кўкка сифмаётган отларини бир сафга тиздилар; бир нафасдан сўнг ўрдадан узоқлашиб, адирни елдек ошиб ўтдилар. Адирнинг нариги бетидаги ўрмонга етгач, яна ортга қайтишлари керак эди. Бир оздан сўнг бу томоша майдонига йиғилганларнинг еру кўкка ларза солувчи ҳайқириқлари остида пойгачилар адирда пайдо бўлишди. Гўё каттакон бир қуш тўдаси замину фалак ўртасида шиддат билан бостириб келмоқда эди. Олдинда келаётган тулпор ҳар сакраганида қуёш шуълалари остида пар-пар ёнар эди. Шу шиддати билан у ҳеч тўхтамайдиганга ўхшарди. Аммо Қора хоннинг олдига етиб келганида ерга михлангандек таққа қотди. Сочлари шамолда тўзғиган оқ либосли, оқмағиз йигит ерга сакраб тушди.

Томошабинлар бараварига ҳайқириб юборишли:

— Ўғуз, Ўғуз!

Сўнгра бошқа турли-туман элларнинг йигитлари етиб келишди. Элларни, улусларни либосидан танийдиган кишилар учун ҳар бир чавандоз қайси элнинг вакили эканлигини фарқлаб олиш қийин эмас эди. Пойга қизигандан қизиб борар, отларнинг сафриларидан буғ кўтарилар, қулоқлари терга ботган эди. Қони жўшган асов тулпорлар живловга бўйсунмас эди. Пойгадан сўнг човгон бошланди. Ўқ отдилар, найза улоқтиридилар, кураш тушдилар; ҳар бир мусобақа сўнгиди «Ўғуз, Ўғуз!» деган садолар янграр эди.

Эндиғина йигитлик ёшига етган оқ либосли, оқмағиз Ўғуз мусобақанинг бошқа ғолибларини, сара йигитларни ёнига олганича Қора хон олдига бориб тиз чўқдилар, юрт катталарига бош эгиб таъзим қилдилар. Қора хоннинг кўзларида ёш порлар эди. Ўрнидан туриб, ўғлига юзланганча деди:

— Мусобақа ғолиби сенсан! Бу ўдулни¹ йигитчасига қозона билдинг!

Сўнгра ўнг тарафидаги ўнг қўл бекларга, сўл тарафидаги сўл қўл бекларга, бутун қўноқларга қаратса:

— Бу йил пойгода ўғлим Ўғуз ғолиб келди, беклар! — деди.— Мен икки карра севинаман, сиз-да бир карра се-

¹ Ўдул — мукофот, соврин

вининг. Ўузнинг тиззасини ерга тегизадиган мард топилмайди. От чопища, қилич солища, каманд отища унинг эши¹ йўқдир. Сўз пойгасида ҳам худди шундай... Элда ҳамма билади, барча бунинг танифидир...² Менинг бошим жангдан чиқмади. Ўгуз ҳам болалигиданоқ мен билан ма-шақатли йўлларни босиб ўтди. Юрт билгинларидан³, хожаларидан ўғ⁴ олди. Сизнинг номингиздан мусобақа армасини⁵ унга топшираман, — деди.

Юзасида юрт тамфаси бўлган олтин нишон Қорахон кўлида ялт-юлт порларди. Уни Ўузнинг бўйнига осди. Сўнг ўғлига бўри калласи тасвиранган кўк-қизил рангли туғ ҳадя этди.

Ўгуз яна бир бор таъзим қилиб, мусобақа қатнашчила-ри, пойгадош дўстларининг олдига бориб турди. Қора хон:

— Мени тингланг, беклар! Ўлимдан қочиб бўлмайди. Менинг инолим⁶ — ворисим Ўуздир. Элнинг тўр бошчи-лиги, тож-тахт мендан сўнг унга тегади. Гурмизнинг тартиби шундай. Албатта, эл-юртимизнинг, сизларнинг хо-ҳиш-истагингиз билан!.. Биз толиқдик, у толмайди, биз янглишдик, у янглишмайди! Элимизнинг шон-шуҳрати-ни ер юзига ёяди, асло енгилмайди! Фалак уни ўз муҳабатидан яратган. Ишонинг бунга! Мени севганлар уни ҳам севсин. Менга ишонгандар унга ҳам ишонсин! Бир бўлинг, бирга бўлинг! Қон тўкиб эришган тупроғимизни асранг! Ер юзининг эгаси сиз бўласиз! — деди.

— Улуғ Хоқонга шарафлар бўлсин! Кўк сизни ўз пано-ҳида асрасин! — деган олқишиб садолари дашту саҳролар-дан, тоғлардан янгу⁷ бериб қайтар эди.

Бутун майдонга, халойиқ орасида ҳайқириқлар янгради:

- Яшасин улус арслони Ўгуз!
- Яшасин, яшасин!

Ўузнинг нур ёғилиб турган юзларига қизиллик югурди. У фуурланар, мусобақани ютиб чиққанидан севинар, аммо шўлан ичида сиқилмоқда эди. Бу издиҳомда у ўз

¹ Эш — тенг, баробар

² Таниқ — шоҳид, гувоҳ

³ Билгин — олим, донишманд

⁴ Ўғ — таълим, тарбия

⁵ Арма — мукофот, армуғон

⁶ Имол — ворис, ўринбосар; дуст

⁷ Янгу — акс садо

кучини яккама-якка синааб күришни истарди. Мўйловлари эндиғина сабза урган бўлса-да, у сон-саноқсиз жангларни кўрган, ўзидан анча улуғ баҳодирларнинг тизини ерга теккизган эди. Бугун ҳам узоқ-яқин эллардан келган баҳодирлар мусобақасида у ўзини яна бир бор синовдан ўтказган, унинг тенг-баробари йўқлигини бутун турк улуслари англаб етган эдилар. Айни пайтда отаси барча қўноқлар олдида уни ўз иноли – вориси деб эълон қиласхагини кутмаган эди.

Кўзлари ола-кула бўлиб кетди. Отасининг сўзларидан юраги орзиқиб кетмоқда эди. Ҳаёти охирлаб, умри тугаб бормоқдами отасининг? Соғлом, чарчоқ нималигини билмайдиган хоқон нега тилга олди ўлимни? Дўст ичида душман ҳам бор, ахир! Чин жосуслари бугуноқ ушбу хабарни етказадилар: «Турк хоқони яшамоқдан толиқди, жанглардан безди, ўлимга ҳозирлик кўрмоқда, кўз-қулоқ бўлиб туринглар!» Унинг билганини билмайман, қилганини қила олмайман... Сўнгра: «Тангри, отамга мадад бер!» – дея пи-чиirlади. Бу сўзларни кўнглидан кечирди, пичиirlаб айтди у, чунки барадла айта олмасди. Эл-улус ҳали унинг Тангрисини танимас эди. Элнинг тўқсон тўққиз бут-тангрилари бор эди. Ҳар нарсага топинаверар эдилар: дарёга, кўлга, тоққа, йўлга, бўрига, кийикка, илонга, тошбақага... Ҳар уруғнинг ўз топиноғи, ўз бути бор эди. Биру бор бўлган Кўк тангридан бошқа ҳамма нарсага топиниб кетаверар эдилар! Ҳалойиқ орасида ҳеч кимса унинг Кўк тангрининг элчиси эканлигини, Ўғуз Ундан бошқа Яратганни танимаслигини билмас, билса эл-улус бузилар, юрт пароканда бўлар, отаси ҳам ворисликни унга бермас, унинг ўрнига иниларидан бирини лойиқ кўтар, унинг ўзини эса юртдан қувиб соларди. Ҳоқоннинг, элнинг инончига қарши бормоқ, хоқон оиласининг анъаналарига орқа ўтироқ ўлимга лойиқ жазо эди. У ҳозир кўнглидагини ошкор этса, ўз орзулагига ета олмасди. Отасига Тангридан узундан-узоқ умр тиласа-да, юрагида тахтга чиқишнинг буюк истаги борлигини ўзи ҳам ҳис этиб турарди. Буни мутлоқ Тангрининг амри деб биларди. У тахтга эга бўлсагина Тангри амрини эл-улусга етказмоқ, ер юзида Тангри битта эканлигини, Кўк тангридан бошқа яратувчи йўқ эканлигини узоқ-яқин аймоқларга ёймоқ, бутун ўлкани ўз инон-

чиға киритмоқ имконига эга бўларди. Буни амалга оширмоқ фурсати етганлигини билар эди Ўғуз.

Отасининг вориси бўлмоққа уни кўкларнинг ўзи танлаганини илк бора у устози Услу Хожадан эшитган эди. Сўнгра отаси сингдирди унга бу фикрни. Шунинг учун ҳам Қора хон йиллар бўйи уни ўз ёнидан ажратмади. Жанг бўлса – жангга, ов бўлса – овга, пойга бўлса – пойгага олиб борди. У ана шундай синовларда вояга етган эди...

ЁМФИР ТОШИ

Баҳорнинг авж палласи, кеча ва кундуз тенглашиб, янги йил байрами нишонлагандан сўнг орадан бир яrim ойлар ўтгач, тоғларда бутларнинг қўриниб сақланаётганлиги, айни пайтда туркнинг ҳалоскори ҳисобланганлиги учун муқаддас саналган мағораларга чиқиб топуқ бериш, қурбонлик қилиш эл-юртнинг қадимий тартиб-тўраси эди. Эл ўз қурултойини ҳам, улкан кенгаш-машваратини ҳам ушбу кунларда ўтказар эди. Беклар, эл бошлиқлари ўлканнинг ғам-ташвишларини бўлишмоқ, маслаҳатлашмоқ учун неча кунлаб от чоптириб, ақл бовар қилмас олисликлардан қанот чиқариб учиб келар, бир-бирлари билан бўлган учрашув, сухбатлардан қалблари фараҳга тўлиб, бутун кинкудуратларини, жанг мاشаққатларини унутар эдилар.

Бу шанликлар Ота Мағорага юриш бошлаш билан оёқланар эди. Қора хон билан унинг қўноқлари тантананинг сўнгги оқшомини дастурхон атрофида ўтказаётган бўлсалар-да, ҳамма тик оёқда, юриш ҳавоси эл-улусни сеҳрлаб олган эди. Эрта тонгдаёқ улкан бир тўп Тангри тоғига қараб йўлга тушадиган эди.

Ўғуз ўз устози Услу Хожага юзланиб деди:

– Отам мени турк улусларига танитди, ворисим шу, деб айтди.

Услу Хожа уни бағрига босди:

– Кутлуғ бўлсин!

– Тўрамизга кўра шундай эканлигини биламан, бироқ буни бу қадар тез эълон этади деб кутмагандим. Эплай олармикинман?

– Сен хоқонлик учун туғилгансан! Фурсати етганда отангнинг ўрнига ўтирасан. У қилганидан кўра ҳам яхшироқ ишларни эплай оласан! Эл шарафини кўкларга кўта-

риб, унинг номини бутун жаҳонга ёясан! Манглайга ёзганидан қочиб бўлмайди, ўғлим! Сен комил бир йигитсан. Яратган юрагингни нур билан тўлдирган. Эл-юртимиз сен билан фаҳр этади. Отанг ҳам буни жуда яхши англайди!

Ўғуз ғамгин эди:

– Устимизга қора булатлар босиб келмоқда, устозим! Юртни оғир кунлар кутиб турибди. Кундан-кунга катталашиб бормоқда бу қўрқув. Алпдўғон тўғри айтди. Курғоқчилик Чиннинг тинкасини қуритди, тиз чўқтириди. Шунинг учун ҳам у тобора қутуриб кетмоқда! Агар истаса отам бунга чек қўяр эди. У эса ҳар галгидек: «Душман бўлсада, қўшнимиз. Курғоқчилик машаққатини чекиб турганларида устларига бостириб борсак мардлик бўлмас», дейди. Улар эса шу аҳволда ҳам ҳийалаларини қўймайдилар. Энди эса ёмғир тошининг изидан тушганлар. Жосуслари чумолидек қайнаб ётибди.

Услу Хожа шогирдининг мулоҳаза иқтидорини кўплаб кузатганди. Унинг янглишмаслигини биларди. Қўшнилари борасида ўзининг ҳам айтадиган сўzlари кўп эди. Чинни эгаллаб, салтанатига қўшиб олмоқ турк хоқонлари учун мушқул эмас эди, аммо бу ишнинг бир қисми эди, холос, муҳими – ўзи босиб олган, бўйсундирган ерларни тўрага мос равишда бошқармоқ эди. Йўл машаққати, халқининг кўплиги Чинга юришни қийинлаштиради. Турк халқи чинликдан оз бўлганлиги учун ҳам улар орасида сингиб-эриб кетиши мумкин эди. Услу Хожа ана шу мулоҳазаларини баён этиб бўлгач, деди:

– Ёмғир тоши – эл қувончи. У қаттиқ қўриқланиши, ёғий қўлига тушмаслиги керак. Бироқ ўзинг гап очиб қолдинг, энди айттай! Тошга бўлган бу ишончнинг манбаси нима эканлигини ҳеч ким билмайди. Қорача тоғларининг этакларида порлоқ қора тошлар бўлар эди. Сигирлар сув топмаганда у тошларни оғизларига олиб туёқлари билан ерни тимдаласалар чанқоқлари қонарди. «Жоду тош» фовфаси ана шундан бошланган...

– Сенинг ҳар бир гапга ишонмаслигингни, ҳар ишнинг илдизини, чин моҳиятини излаганингни кўп кўрганман, устозим. Бироқ Ёмғир тоши – ҳақиқат. Болалигимда бир бор кўргандим уни отамнинг қўлида. Устида тамфаси бор: саккиз қиррали. Тангри тамфаси.

— У тош ер-кўклар яралгандан бери туркнинг қўлида. Табғачлар тўғри айтади, Ёмғир тоши эмас, «жоду тоши» у. Чунки инсонларни, элларни бир-бирига қарши қўяди, қариндошлини қариндошдан ажратади... Ҳар кимса жон-жаҳди билан унга интилди. Бизларни юксалтирган у тош эмас. Жангларда оқизган қонларимиз, ҳақиқатни севишимиз, катта-кичик ўз ўрнимизни билишимиз, тўрага риоя қилишимиздир.

Ўғуз деди:

— У тошнинг нималигини биламан! У сон-саноғи йўқ майда, ясама баятлардан, чалаблардан, тўзлардан¹ бири эмас, на ибтидоси, на интиҳоси маълум бўлган, ер-кўкларни яратган зот, турк отаси бўлмиш Кўк тангрининг тошидир. Яккаю ёлғиз Тангрига топинганларнинг қут тошидир. Мендан аввал келган у, бироқ унинг эгаси биз бўламиз. Мен бўламан! Унинг тилини мендан бошқа билмайди. У тош менинг қўлимдагина ўз қудратини намоён этади. Ҳар улусни ҳам мутлу² қиласкермайди у!

Услу Хожа эндиғина эр етган шогирдининг етуклигини биларди. Ўз билимини унга ўргатгани каби ундан ҳам ниманидир ўрганаарди. Олдинни кўра билиш, башорат қила олиш иқтидорини, руҳи, ақлу идроки юксак эканлигини кўп бора синаган, унинг бу қобилияти кўк билан боғлиқ эканлигини ҳис этар эди.

Унинг иончи тўғри эканлигини англаб етиб, уни қабул этган, Тангричилик йўлига кирганлигини Ўғузга сездирмас, ишнинг пишиб етилишини кутмоқда эди. Бу кекса донишманд, еру қўкнинг барча сирларидан воқиф бўлган юрт оқсоқоли, улкан бўғу³ Ўғуз дунёга келиб кўрган энг нуроний инсон эди. Тўғриликдан бошқасини билмасди. Сўзи билан амали бир эди. Юраги эл-юрт ишқи билан ёнарди. У билан бир бора юзма-юз келган, суҳбатлашган кимса умр бўйи унинг таъсирида юнарди.

Йиллар давомида Ўғузга еру қўкнинг сирларини ўргатган, куну тунларни у билан бирга ўтказган Хожа ўз шогирдининг тўғридан-тўғри кўкларга боғлиқ эканлигини, ягона Тангридан куч-қувват, ўг олганлигини, туғилиши биланоқ элга бошчилик қилиш йўли унинг зиммасига

¹ Баят, чалаб, тўз – яратган, тангри, эга маъносидаги сўзлар

² Мутлу – баҳтиёр

³ Бўғу – файласуф

юкланганини сезмаслиги мумкин эмас эди. У билан ке-чирган кунларини ана шу йүлдаги қадам деб билар эди. Турк зотан күкка боғлиқ эди. Күкни ота, ўкни¹ она деб атар, күкни ибтидо, ерни эса унга боғлиқ деб ҳисобларди. Аммо Үгүз Тангрини күкдан ҳам юксак тутар, уни күк ва ерларнинг яратувчиси деб биларди. Битта Тангри – битта хоқон дер эди у... Бироқ тақдиридининг кимгадир боғлиқ бўлишини истамайдиган эл-улус катталарига ёқмас эди бу... Ягона Тангрига топиниладиган бўлса, кибрли хонларнинг, хоқонларнинг сон-саноқсиз, ясама тангричаларига ҳеч ким ишонмай қўяр эди. Шунинг учун ҳам буюк Тангрига элтадиган йўлнинг очилишини, ҳар бир кимсанинг бу йўлдан воқиф бўлишини истамасди улар; ер юзи-ни бўлак-бўлак қилиб олганлари каби, Улуг Яратганинни юзлаб тангричаларга, мингларча бурҳонларга, тўзларга, чалабларга, бутларга айлантириб қўйган эдилар.


Ўзи яккаю ягона Тангри иродаси ила яратилгани ҳолда ўзининг сополдан, ёғочдан ясаб олган бутларига ишониши инсон боласининг энг шармандали амали бўлмоғи лозим эди. Ер юзининг беги бўлган улуснинг кечмишини яхши биларди Үгуз. Ўз улуси илк хабари ўн минг йилнинг нарисидан келган «Ягона тангри» инончидан воз кечиб, кўшиналари ўйлаб топган қаланғи-қасанғиларга топинишнинг илдизини ўрганиб чиққан ва ана шундан сиқи-ларди у. Юзлаб тангричилик – юзларча йўл, юзларча йўна-лиш, охирида эса улуснинг парча-парча бўлиб кетиши демакдир. Бу руҳий бирдамлик эмас. Бу нифоқдир, жанг-жадалдир, улусни ичдан кемирмоқ, ишғол этмоқ ва уни тиз чўктирмоқдир. Үгуз буни яққол қўриб туарди.

Ёғийлар жанглардаги мағлубиятлари, енгилишларининг үчини шу усул билан олмоқчи, муаммони шу йўл билан ҳал этмоқчи эдилар. Турк улуси ҳам кўр-кўронана ана шу йўлни тутган эди. У илк инончини унутиб қўйган, унинг кўк авлоди эканлиги, кўкдан энгандлиги энди фақат бир ҳовуч қамларга², олимларга, донишмандларгагина маълум эди. Юрт бутларга тўлиб кетган эди. Эл маънисиз жони-вору қушларнинг руҳига боғланиб қолган эди.

Ўғузнинг ҳис этганлари шулардангина иборат эмас эди.

¹ Ўк – ер

² Қам – донишманд



У Тангри деб тил чиқарган, ўз тенгдошларини, катталардан яширин, кўкка томон юз бурмоққа, ягона яратганга топинмоққа даъват этиб келган эди. Дунёни қутқариб қолмоқ йўлини Яkkатангриликда, ер юзининг барча инсонларини ана шу ишонч атрофида бирлашмоқда кўрган, ҳаётининг, идрокининг илдизи, мазмун-моҳияти шундан иборат эди. Онасидан бошлаб бир неча энг яқин кишиларига, дўст-сирдошларига кечаю кундуз ана шу ҳақда сўзларди. Уларнинг орасида энг каттаси Услу Хожа эди. Бироқ бу борада яккам-дукам кишиларнинг билиши кифоя қилмас эди. У энди буни англаб етган эди. Инончни ўзгартириш ҳаёт-мамот масаласи эди. Буни хоқонлардан бошласа, охири ўпқон билан тугар эди. Зеро, бошқа йўл ҳам йўқ эди... Ўғуз ўз отасининг ўрнига чиқажагини ҳам Кўк Тангрининг иродаси деб билар, «мен хоқон бўлсан, улуснинг юзини кўкка қаратаман, элнинг ягона ишончи, ягона топинчоғи бўлади», – дер эди.

Хон отаси таҳтда экан, давлатнинг идора ишларига аралашмоқ юрт анъаналарига беписандлик бўлур эди; турк тўрасида бунга йўл қўйилмасди; бироқ ворис-валиаҳд бўлганидан сўнг бошқа йўл қолмасди, отасидан сўнг ўзи дуч келадиган мушкулотларни ҳис этар экан, ўшанда кимга суюниш мумкинлигини чамалар, машваратда эшитганларини бир-бир ҳаёлидан ўтказар, қўшилари бошлайдиган ўйинларнинг оқибатлари, фалокатлари ҳақида ўйларди.

Кўкнинг қудратига, муқаддаслигига ишонч қадим-қадимдан туркларнинг руҳига бегона бўлмаганлигини, минг йиллардан бери улус тақдири қўёшга, кўкка боғлиқ эканлигини, бу инончни ёймоқчи бўлган зотлар авваллари ҳам келиб кетганларини турк эли орасида кўплар билар эди. Услу Хожа бу борада ўз шогирди билан анча сухбатлашган эди. Лекин Ўғузнинг Кўк Тангрига бўлган инончи – яхлит, инсоннинг юрагини нур билан, умид билан тўлдирадиган инонч эди, бунда тараддуду иккиланишга ўрин йўқ эди – ё ҳа, ё йўқ! Биттасини танламоқ лозим! Ўғуз заминий ясама инончлардан, тош, ёғоч, сопол бутлардан ажабланар, баъзан уларга нисбатан изоҳлаб бўлмайдиган бир нафрат туяр, ич-ичдан улардан жирканар эди. Булар яратувчи бўла олмасликларини, чунки ўzlари яратилган эканини, йўл кўрсатувчи бўла олмасликларини, чунки

ўзлари йўлга муҳтож эканини наҳотки халойиқ кўрмайди?! Кўкнинг чақини дарахтни куйдиради, ёмғири дарёларни тоширади, юлдузи йўл кўрсатади, қуёши ёз-қиши олиб келди, ер юзига ҳаёт бахш этади. Оғоч, лой, тош, қумдан ясалган топинчоқлар Кўк қаршисида ожиз, заиф бир ашёлардир. Демак, бутун руҳларнинг Отаси илк илдиз, ибтидо, муқаддас бўлган Кўкдир. Кўкда ўтирган, ерларни, сувларни, юлдузларни яратган Улуғ Тангридир! Фақат У ибтидо ва интиҳоси бўлмаган, инсон фарзандининг яхши-ёмонлигидан юқори турган, қўл етмас ва гўзал зотдир. Барча яратилганлар эса унинг нури, шоҳобчалири, тажаллисидир. Саҳар-оқшом, ёз-қиши, яхшилик-ёмонлик, туғилиш-ўлиш ўша зотга боғлиқдир. Оғочдан, тошдан тангрича ясад олиб унга топинганлар Тангри авлоди бўлмиш улуғ улусимизнинг илдизини қирқмоқ, бизни кўқдан ажратиб олиб ернинг илон-чаёнларига айлантиromoқ, қисматимизга тушган Тангри қудратидан бизни мосуво этмоқ, туркни ожизлантиromoқ истаган кимсалардир. Олов бўлмаса, тутун чиқмас! Улуснинг кўкларга боғлиқ эканлигини ҳаётнинг ҳар бир лаҳзасида юраги кўк билан ҳамоҳанг тепишидан, кўкларнинг авзосини ўз ичи каби ҳис этганлигидан, кўк ҳам уни англаб, уни эшитиб турганлигига бўлган ишончидан кўрарди. Турк улуси табиатан, ич-ичдан Қуёшпараст, Кўкпараст, Тангрини параст эди, Тангрининг ягоналигига ишонар эди. Зеро, бут-санам қаллоблари руҳ-ишонч масаласини заминий ўйинга айлантирган эдилар. Кўркли улусини қайтадан ўз кўкига, тангрисига, юксаклигига қайтармоқ лозим эди!

Ўғуз хон кўз очиб дунёга келганидан ичи ана шу туйфу, ана шу нур ила тўлиқ эди. Юзидаги нурдан танг қолиб уни Оқ юз деб атаган эдилар. Қийик, қисиқ кўзли, думалоқ юзли кимсалар унинг чўзиқ, олдинга туртиб чиққан сарт юзларини ўққа ўхшатиб, Ўқуз деб атар эдилар.

Ёмғир тошига нигоҳи тушар экан, унинг оддийгина бир дарё тоши эмаслигини, тамғасидан нур ёғилиб турганини ҳам фақат у пайқаган эди.

Болалик хотирасида муҳрланиб қолган илк излар ҳам Хон отасининг бу тошга ишончи эди. Ер юзининг тенгсиз буюги деб билган отасининг тошга кўзлари ёниб боққанлари боланинг эътиборидан четда қолмаган эди; унинг

тошни эъзозлашида, қўриб-асрашида жиндай қўрқув бор эди; мушт катталигига бўлган бу тошни у кула-кула Ўғузга узатган эди:

— Ол буни, қўрайликчи, кучинг етадими?

Тош оғир эди, бироқ Ўғуз бу оғирликни сезмасдан қўлида отиб-тутиб ўйнаган ва ана шунда тош унинг ҳам юрагига қўрқув соглан эди. Қоп-қора кўмирга ўхшаш бу тош гўё пулланган чўф каби ич-ичидан ёришиб нурлана бошлаган, йирик бир қўзга айланиб Ўғузга тикилар эди. Бу Тангрининг қўзи эди, унда ер юзининг энг сирли, энг муқаддас, энг улуф сўзи битилган эди. Ўғуз бола идроки билан бу тош ёлғиз унинг учун нурланганини, ёлғиз унга тикилганини англаб етган эди. Бу Кўк Тангрининг мингларча қўзларидан бири эканлигини ҳис қилганди. Тошга тўқинган ўша илк кунда у бошқа кимсалар билмайдиган жуда кўп нарсаларни англаб етган эди.

Бу бир лаҳзалик нурланишни отаси ҳам кўрдимикан? Кўрса ҳам ўзини кўрмаганга согандир. Эҳтимол, бу тош фақат Тангри элчилари қўлида нурланишини Қора хон ҳам биларди, балки бу ҳодисотни у фақат хоқонлик билан боғларди, у эл бошчилигидан бу қадар тез ажralишни истамасди. Кўрдими, кўрмадими, ҳар қалай, буни сездирмади, Ўғуз қаердан тошиб келаётганлиги ўзига ҳам маълум бўлмаган бир туйғу билан тошнинг ўз қўлида жонланиши Тангрининг амри эканлигини, Тангри каломи унинг манглайидаги ёзув эканлигини, келажаги шунга боғлиқ бўлишини анлаган, бироқ отасининг жимлигини кўриб, у ҳам жим қолган эди.

Қора хон тошнинг чўғга айланганини кўрмаган, устидаги тамғанинг маъносини англамаган бўлса-да, тошнинг қудратига, кутсоллигига¹, кўкдан тушганига, ер юзига эга бўлмоқнинг ягона йўли шу эканлигига ишонар эди.

Бу думалоқ тош ер рамзидир, у кимнинг қўлида бўлса, ер юзи ўшаники бўлади. Демак, мовий кўкни, қора ерни, кунни, ойни, кечани, жонзотларни, оловни, сувларни тұратган Тангри унинг улусини севади.

Қудратли, абадий, бетимсол, ибтидоларнинг ибтидоси, улуф Тангри, Оталарнинг Отаси, хон Тангри, хоқон Тангри, турк Тангриси, жоним сенга қурбон бўлсин!

¹ Кутсол — муқаддас

Ўузнинг бутун ўсмирилиги ана шу туйфу, ана шу қувонч билан тұлиб-тошган эди. Тошни күрмаса-да, унинг қаттық күриқданишини, фақат отасига маълум бўлган бир жойда сақланишини яхши биларди. Шундоқ ҳам келажакда хоқон бўлганидан сўнг тошнинг қаерда сақланишидан дарҳол у воқиф қилинарди... Бу сир фақат унга айтилар эди. Элнинг тўраси шундоқ эди.

Самодан Кўк Тангрини ўзи яратган юлдуз қўзлари билан Ўузга, болалигидан бери унга отабеклик¹ қилиб келаётган Услу Хожага боқарди. Олдинда эса эртанги куннинг узундан-узоқ сафари кутмоқда эди...

ЧИН МАҲБУСИ

Тулу чодирини ўрданинг бир чеккасига тиккан эди. Чин маҳбуслигидан қайтиб келганидан бери элга аралаша олмас, ўзини олиб қочарди. Унинг қайтиб келганидан эл севинса ҳам, ўзи севинмас эди. Юртига тўққиз йиллик жудоликдан кейин қайтган эди. Камдан-кам киши Чиндан қайтади. Маҳбусликдан озод бўлганлар ҳам даштга кўнгилсизлик билан қайтишади. Эл ғазабидан қўрқишиди. Жангдан, юришлардан, дашт ҳаётининг мاشаққатидан безган кимсалар ҳам учраб туради, улар улусга қайтиш ўрнига ундан бир қадар узоқлашишади, ўзи маҳбуси бўлган ўлканинг овлоқ қишлоқлари сукунатида йитиб, кўзга ташланмасликка уринишади. Ўзлигини, бу ерларга бегона эканлигини яшириш билан, ўзлигини ҳам унумоқчи бўлишади. Ортга қайтмасликларининг сабабини англаш мушкул эмас. «Душман қўлига тушгунча ўлгани яхши эди! Нега асир тушади?» каби саволларга жавоб бермоқ, халқни ўз гапига ишонтироқ қийин кечади уларга, сотқин бўлиб кўрингандан, ўз элида бош эгиб, шубҳа остида яшашдан кўра ришталарни бир йўла узиб, бегона элларда қолмоқни афзал биладилар. Номус юртга қайтадиган йўлларни боғлаб қўяди...

Бироқ ёт элларга яширинмоқ, кўзлардан панада яшамоқ ҳам осон эмас. Душман жангда яраланиб асирга тушганлар у ёқда турсин, тасодифан, йўлидан адашиб асир тушганларни ҳам аяб ўтирумайди. Ахир, сойларни кимга

¹ Отабек – бу ўринда: устоз, муаллим

қаздирсин, қалъаларни кимга қурдирсин? Қоронғи зин-дондан чиққанлар құл каби сотилади, саҳардан оқшомга қадар ишлатилади, минг хил ҳийла билан уларни үз юртига қайтаришмайди. Бу ҳийлалар йиллар бүйі түрт де-вор орасидан чиқмай келгандарни гангитиб құяды. Бунинг устига, үз элларига қайси юз билан қайтсиналар, ахир? Дөң тушган ном, синиб қолған фуур... ким ҳам қарайди уларнинг юзларига? Қайтмасанг, үлдига чиқарадилар. Шуниси яхши. Манглайга ёзгани шу экан. Эл сени унуди, сен ҳам уни унту!

Бироқ Тулу қайтиб келди. Қайтганда ҳам ёлғиз эмас, чин қизи Дон Хи билан, ёнларида бир фарзандлари билан.

У асирикда кечган кунларини, чинликларнинг файриинсоний зулмларини эслашни хоҳдамасди. Уч йил давомида ҳар куни үз уруғ-аймогидан бұлған кишиларнинг қанчалик хұрланғанликларини күрганди у. Сүнгра олти йил қамчи, калтаклар остида эрта тонгдан оқшомгача ишлади, тупроқ отди, қалъа деворларини тиклади, ёғий уйларига нақш берди; яратғандан үзиге үлім тиламаган куни йүқ әди. Ажал үрнига Дон Хига дуч келди. Қалъага тош кутариб чиқаётганида йиқилиб үлар қолатида ётганида уни бир чеккага тортиб чиққан, қоронғулик тушганида үз уйига олиб борган, неча кунлаб унинг боши узра тик оёқда турганича даволаган, сүнгра эса асирикдан күтқариб олган шу қыз әди. Сүнг турмуш қурдилар. Тулуни үз юртига олиб келған ҳам Дон Хи әди. «Сен дашт одамисан, тоғ-адирларга үрганғансан, фикру ёдинг үша ёқда. Ростини айтсам, мени ҳам дашт үзиге тортади». Ярим чинли, ярим қуриёли бу қыз нега унинг ортидан келганига изоҳлар берар, охирида үз томирида турк қонини ҳам топарди:

— Сен қайда бұлсанг, мен ҳам үша ердаман!

Тулуни үз юртига қайтариш учун унинг хәелига келмаган нарсаларни ҳам үйлаб топарди. «Сен на бириңи-сан, на охири. Бегона элдан үйланиш сизнинг эски ода-тингиз, анъанангиздир. Озмунча қызларимиз борми сизнинг кенту қишлоқларингизда?»

— Бунинг анъана эканлыгини сен қайдан биласан? — дея сүрарди у.

— Чинда туркнинг ҳар бир қадами кузатилади, ҳар сүзи оғиздан оғизга күчиб юради. Қадим замонлардан бери

шұнақа. Эрганакон ривоятларини биз ҳам әшитғанмиз. Турк уруғларининг аксариятида әркак қавм ичидан чиққан, она эса даштдан келган бўридир. Шунинг учун ҳам кўпинча уйлангани чеккадан қиз ахтарасиз. Пуштдан ўтган сизга бу одат. Ўзингизни таниган заҳоти ёпирилиб кела-сиз бизнинг устимизга. Чин хоқонлиги тепасига турклар чиққан даврларда ҳам шундай бўлган.

Тулу Дон Хининг турк эл-юрти ҳақида бу қадар кўп нарсаларни билишини унинг ўзига бўлган севгиси билан боғлар, қизнинг самимилигига ишонар эди. Унинг ўргатилганлигини, ўз бошига тушган савдолар атай уюштирилганлигини Тулу ақлига сифдиролмас эди. Турк эл-улусига қизнинг бу меҳрини қўриб у ўртаниб кетар, бу меҳр сабабини у Дон Хининг она томондан қуриёли эканлиги билан боғлар, уни ер юзининг энг гўзал аёли деб ҳисоблар эди.

Юртда ҳаммадан қочиб ёлғизланиб қолганида Дон Хи унинг қариндош-уруғлари эшигига йўл очганлигини, бундан шўнғиб ундан чиқишини, сўраб-суриштириб ўрдадаги барча чинликлар билан алоқа боғлаганини ҳам бу аёлнинг эпчилигига йўяр, пешонасига шундай аёл битилганидан севинар эди.

Беклар саройга тўпланган тунда Дон Хининг уйқуси қочди. Чодир олдидаги ўчоқни ўчгани қўймай, гиламустига бордош қуриб ўтириб, тун шиллиққуртлари ва чигрткаларнинг овозига ўхшаш бир оҳангда Чин қўшиқларини хиргойи этганча Тулуга пайпоқ тўқир эди.

Ярим тунда зулмат оғушидан ўзига ўхшаш бир қиз чиқиб келди, аввалдан келишиб олганлари каби, сўрашмасдан ўчоқ четига у билан ёнма-ён ўтириди. Бош эгиб узундан-узоқ пичирлашдилар. Бу қиз Қора хоннинг чодирида емак-ичмак ташийдиган қирноқ¹ – чўрилардан бири эди. У сарой ичидаги кўлка каби кезиб, ҳамма нарсани қурибилиб оларди. Чиндаги қурғоқчиликдан тортиб карвонлар босиб ўтадиган йўлларга қадар... Чиндан келиб олис Кунботар ўлкалар томон кетадиган карвонларнинг йўли эндиликда ер юзининг энг узун савдо, айирбошлиш, хабарлар етказиш йўли эди. Тўғри, Шимолда Бошқирд юртидан ўтиб Кунботарга кетадиган Хаз йўли ҳам бор эди.

¹ Қирноқ – каниз

Бироқ у ушбу Ипак йўли каби гавжум эмас эди. Ипак йўли устидаги улусларнинг турмуши, тафаккурида қандай теран излар қолганлигини охиригача англаш, изоҳлаш қийин. Бу шундай бир йўл эдики, бир карвон келиб қўнган жойдан иккинчиси йўлга тушар эди. Ипак йўлининг молашёси охирги манзиллардан шохаланиб кетган йўллар орқали ер юзининг энг олис нуқталаригача бориб етарди. Бу йўл олди-сотти йўли бўлиши билан бирга, айни пайтда бир-биридан олисларда яшаган инсонларнинг ўзаро хабарлашув, билим алмашув, турли-туман билимларни дунёning бу четидан нариги чеккасига етказув йўли ҳам эди. Чиндан чиққач, қўшни улуслар Понт деб атайдиган Қора денгиз орқали Кунботар деб ном олган Ўртаер денгизи қадар узаниб ётган бу йўл турк улусларининг устидан кечиб ўтар эди. Йўлнинг минг йиллардан бери очик, хатарсиз эканлигига сабаб туркларнинг некбинлиги, ҳалоллиги, бутун элларга ёрдам беришга тайёрлиги эди. Улар бу йўлни Ипак йўлидан кўра кўпроқ Турк йўли деб билардилар. Шундоқ кўз олдиларидан кечган бу йўл орқали Чиндан Кунботарга, Кунботардан Чинга қанақангি қармоқлар ташланишини англамасдилар. Юз йиллардан бери кўпгина ўлкалар Чиндан ипак олсалар-да, унинг нимадан, қандай яралишини билмас эдилар. Ипак савдосига киришганлар орасида гоҳ-гоҳ бу сирни ўрганмоқ истаганлар ҳам учраб туради. Чин буни билар, билгани учун ҳам ипакчилик ишини улардан сир сақларди. Фақат буни турклардан яшира олмасди. Турклар учун пинҳона ҳеч нарса йўқ эди. Зеро бу яқин, хатарли қўшни ёзилмаган бир анъянага кўра Чиннинг ушбу сирини ошкор этмас эди. Сотқинлик, бирорнинг гапини иккинчисига етказмоқ турк тасаввуридан узоқ бир нарса эди. Чиннинг қўшнилар билан аралаш яшаши, ҳар ўрдада, ҳар қишлоқда элчи тутиб туришининг сабабларидан бири ҳам бу ердан Кунботарга қадар билимларни ўрганиш, Чинга хавф солиши мумкин бўлган эҳтимолларнинг олдини олиш, айни пайтда аввалио турк орасида, қолаверса қўшни элларда яратилган барча янги жанг қуролларини хоқонликка етказиш эди.

Бу маҳфий чин тузогининг бир учи ўз хонадонида эканлигига Тулу ишонмасди.

Гулхан шуъласида Дон Хи билан сарой чўрисининг

чеҳралари қінғир ишлардан жұда йироқ, малаклар каби покиза күринар эди. Бу гұзаллик билан турк әрлариниги-на эмас, Тангрининг үзини ҳам йўлдан оздириш мумкин эди. Құноқ Дон Хини қучди-да, сұнг зулмат оғушыда ғойиб бўлди.

ТАНГРИ ТОҒИГА ЮРИШ

Эрта тонғда, тоғларнинг ёзин-қишин оппоқ турадиган зирваларига ҳали қуёш шуълалари тушмай туриб Қора хон құноқ бўлиб келган беклари билан биргаликда ўрдан чиқди. Ер-замин титроққа тушди гүё. Ота Мағорага етиб бориб, у ерда қурбонлик қилиш ҳар бир кимсага ҳам насиб қиласверадиган иш эмас эди... Эл-юртинг билан бирга бўлганингда бу сафарнинг кўрки янада ортади. Ота Мағора у ёқда турсин, босиб ўтилган йўллар ҳам муқаддаслик касб этади. Турк элбошиларининг, номдор бекларнинг бир сафда бўлиши бу сафарга алоҳида бир руҳ ва чирой берар, кўчдагилар¹ узоқ вақт унинг таъсирида юрар эдилар.

Сафарда Қора хоннинг хоқон оиласидан иниси Куз хон билан Ўғуз иштирок этмоқда эди. Юртда қолган аҳолининг мудофааси Кур хон билан Ўр хонга топширилган эди, улар кўчириш қийин бўлган молларни, йўлга чиқа олмаган қарияларни, сурувларни, хазинанинг ортда қолган қисмини яйловда қўриқлаб қолган эдилар.

Кунчиқардан Кунботаргача улуснинг турли уруғларига ватан бўлган Олтой, Хонтангри, Кўтман-Саён тоғларининг, Олатов билан Қоратов, Тибет-Танкут яйловларининг муқаддас саналишига бир сабаб, эҳтимол, олтин-кумуш, қимматбаҳо тошлар хазинасидан ҳам кўра кўпроқ бу ерларда фақат хоқонларгина биладиган битикларнинг, ёзувларнинг, халққа тааллуқли бўлган маҳсус меросларнинг сақланиши эди.

Мағораларни ҳар кўкламда минглаб инсонларни бир жойга тўплайдиган, халқни бирлаштирадиган сехрли бир топиноқ, бир инонч макони, қутсол зиёратгоҳ дея қўрийдиганлар унинг миллат тақдиридаги аҳамиятини ҳам эсдан чиқармас эдилар.

Бу мағоралар оғир кунларда эл-юртни қўриб келган

¹ Кўч – кўчиб бораётган гуруҳ, тўда, издиҳом

туркнинг бешиги эдилар. Шунинг учун ҳам йилнинг ана шу пайтида барча бешик-унгурларга борилар, қурбонликлар қилинар эди.

Қора хон улуси энг севадиган жой, доимий қурбонлик қиласидиган макон – улар ҳозир йўл олган, Ота Унгур деб аташадиган Ота Мафора эди... Бироқ Қора хон бошқа Турк тоғларидағи мағораларга ҳам бориб қурбонлик қиласидиган эди.

Қоратоғ этакларидан кечиб ўтиб, кунчиқар томон юрдилар. Сувлари мұл Талас дарёсини, Мұюнқұмни босиб ўтгач, кунчиқар томондаги икки тизмаси бир-бирига юзма-юз турған, боши булутлардан ошиб кетгандар оқ қалпоқли, ён бағирлари ям-яшил Олатов оғушидаги кенг сайхонникка етиб келдилар. Күз илғамас олисликларга чўзилган бу сайхонлик жониворлар – илвасинларга жуда бой, баҳрали бир жой бўлиб, кўч борган сари толиқиш ўрнига енгиллашиб борарди. Сайхонникнинг шимолий томонидан Буюк Олатовнинг этаги бўйлаб Чу дарёси тўлиб-тошиб оқар, у Иссиққўл сувларини кунботарнинг чанқоқ далаларига ташиб борарди. Дарё ёқаси, тоғ этаклари ва ён бағирлари ерли аҳолининг оппоқ ўтовли овуллари билан безангандар эди. Дарё бўйлаб юқориляб борган эски карвон-аргиш йўли уларни тор дарага бошлаб борарди.

Сафардагилар оқими дарани, Чунинг соғ-сўлидаги адирларни тўлдиради. Юқорилашганлари сари сой ўзани кенгайиб борди, кўч ён бағирлардан эниб келиб бирлашди, довон ошиб, Иссиққўлга юзма-юз келиб тұхтади. Бу неча кунлаб кўзланган, ҳар йили такрорланса-да, қайтакайта жунбушга келтирадиган, кўчнинг ичидан ларзалар солиб кечадиган дақиқалар эди.

Беклар билан бирга бўлганлиги, жангга, юришларга эмас, зиёратга бораётганликлари учун ҳам Қора хон шошмас, йўлнинг узофини, оғирини танлаган эди. Кўлнинг юқорисидан ўтадиган қадимий йўлдан бурилиб, шимолга томон юрдилар. Шимолий Олатовнинг этакларида чодир тикиб, йўл ҷарчофини чиқардилар; отларни кўлда чўмилтирдилар, сўнгра кўлнинг қарама-қарши соҳиллари бўйлаб юксалган, худди ўzlари этакларидан кечиб келган тоғларнинг экизи каби юксак, ўшандоқ боши қорли, зирвалиари ҳар куни неча бор булутларга бурканиб-очилган

тоғларни томоша қила-қила ўз йўлларида давом этдилар. Отларни толиқтирмасдан, хуш кўрган жойларида дам олиб, йўл бўйи мусобақалар қилиб, ов овлаб, қуш қушлаб, бу жангсиз баҳорнинг, бу бирдамликнинг баҳтиёргидан завқларга тўлиб борардилар. Ҳар замон чодир тикиб, тунлари ором олганларида ўрдада ёқилган гулханларнинг боши-охири кўринмасди. Ҳайвонларга ем, отларга арпа берилар, гулханлар атрофидаги ўтиришлар тонгга қадар давом этар, қимиз, шароб, бўзалар сув каби оқар, ой ёруғида болалар бекинмачоқ, чангили-мангили¹ ўйнардилар. Кўйларнинг маъраши, говмишларнинг мўраши, эчкиларнинг баъраши, туяларнинг бўкириши, отларнинг кишинани бир-бирига қоришиб кетар эди. Аммо унда-бунда созу чолгулар янграб қолганида билгисиз бир кўникмага қўра барча сас-садолар тинчиб қоларди. Кўрайлик-чи, нималар ҳақида чалиб-куйлар экан гулхан атрофида ўтирганлар.

Бир гулхан атрофида жангчи йигитлар йиғилишган эди:

*Қалқди қизил байроқ,
Кулди қора тупроқ,
Учди ўқу мизроқ,
Сени эслаб савашдим.²*

Бир тўп айрилиқлар ҳақида куйларди:

*Нечун унга ёвшдим,
Қучоқлашиб қовушдим,
Ёрим билан севишдим,
Бузди менинг ёйимни.*

*Пинҳон тутдим севгини,
Ёнди бағрим, қоврилди.
Боғли тутдим қўзимни,
Кўз ёшларим соврилди.*

Бир тўп ўгит-насиҳат қиларди:

*Қилич бўлса қўлингда,войдир Азройил ҳоли,
Киши тупроққа кирса кимга қолгайдир моли?*

Кечалар ана шундай уйқу, фарагатсиз тонгларга улануб кетарди. Сўнг яна кўч қўзгаларди. Беклар отларга ми-

¹ Чангили-мангили – болалар ўйини

² Савашмоқ – урушмоқ, жанг қилмоқ

нар, йигитлар белларини тортиб боғлар, томирларда қон күпирар, күзчилар¹ олдинга тушар, сувлар тоғлардан айқириб пастга отилар, қушлар күкларда қанот қоқиб сайрашар эди. Эл яна йўлга тушарди...

Тоғларнинг Иссиккўлга эниб келган этаклари минг хил рангда товланарди. Кўл бўйлаб тағин икки кун юрдилар. Шу тариқа Шўрбулоқ, Оқсой, Қизилтурк, Оқтерак, Қоратала, Қизилсув, Сутбулоқ, Тошқудуқ, Оқсув ортда қолди. Кўпикли сувлари тоғдан айқириб тушиб кўл томон шошган икки дарё орасига, кўл бўйининг кенгиш бир қирфогига, Қора хонга ёқиб қолган Тошбулоқ деган манзарали бир манзилга чодир тикдилар. Аввал ҳам хон бу ерда бир неча бор тўхталган, сурувларни адирларга ҳайдатиб, ором олган эди. Йилқиларини кўл сувларида чоптиришар, топтоза бўлган отларнинг қуёш шуълаларида ялт-ялт товлашишини кўриб кўнгиллари олам-олам завқقا тўлар эди. Бу манзилда энди бошқача бир ҳаво бор эди. Олтин бошли хоқон чодирнинг сўлу соғида эл беклари ўз чодирларини тикиб, ўз туғларини ўрнатдилар. Байроқлар тоғларнинг гул-чечак денгизи билан қоришиб кетган эди. Кўл соҳиллари бугунги қадар бундоқ бир тантанани кўрмаганди. Маҳаллий қашқар, қирғиз, уйғур беклари бир тўп йигит билан бирга номдор қуноқларни сийламоқ учун сурув-сурув қўй, от, тия келтиришар, Қора хон бошқа, туғишган улусларининг бекларини бир даврада кўриб кўкси тоғ бўлар, уларни меҳмон қилишда ўз юртининг саховатини намойиш этар, кўплар аввал фақатгина отини эшитган қариндош-урӯғлари билан шу ерда топишиб, яратганга шукроналар айтар эдилар. Оқшомлари Қора хоннинг чодирига йиғилсалар-да, кун бўйи ҳар ким ўз авлоди, ўз уруғининг орасида бўлар, икки бир, уч бир бўлиб кезиб юардилар.

Ўуз ва унинг тенгдошлари ёшликтининг энг гўзал дамларини кечирмоқда эдилар. Отларини кўл ёқасига ўтлатиб қўйиб, ўзлари қиличбозлик, найзабозлик, ўқ отиш, каманд ташлаш каби мусобақалардан тинмас эдилар.

Бугун овга отланган эдилар. Ўуз бошчилигидаги қирқ йигит аввал қора арча бутазорларидан, сўнгра сийрак ўсан болид, қайин, қарағай ўрмонларидан кечиб, довон ошди-

¹ Кўзчи – кузатувчи

лар. Қорли тоғнинг гўзал чўққилариға чиқиб бордилар. Чиройи кишини лол қилиб қўядиган жойлар эди бу ерлар. Йигитлар ов ортидан от солишиди. Ўғуз ҳам олқор тўдасининг ортидан қувиб борар экан, пастқамда тўдани кутиб турган, ўқ отиб қулатмаса тўдага ундан олдинроқ етиб борадиган бир бурини кўриб қолди, унга қаратса от солди, қояга чиқиб ўқ узди. Бўрига ундан олдин йигитлари етиб боришиди. Унинг терисини шилиб олдилар. Ов оқшомга қадар давом этса-да, Ўғузнинг қархисидан бошқа жони-вор чиқмади. Ҳамма ўз ўлжасини отга ўнгариб, манзилга қайтди. Олқор, кийик, қуш – барча ўлжа хоқон чодири-нинг қархисига уйиб қўйилди. Қора хон билан Куз хон чиқиб келишиди:

– Қўрайлик-чи, Ўғузнинг ови қандоқ бўлибди?

Олқор, кийик, қушлар қаторида бўри терисини кўрган Қора хон ғазабланди:

– Бўз бўрининг уволи бизни тутади, ўғлим, – деди у, – унга қўл теккизма!

Ўғуз пинагини бузмай:

– Ўрмон бўз бўрига тўлиб ётибди, ота! – деди. – Бўри улусимизни асраб қолганлигини биламан. Бўри бошли байроқларимиз дунё бўйлаб ҳилпирамоқда. У кутсол санала-ди, эл уни яхши кўради, бунга гап йўқ. Бироқ олқорларни ғажиб ташлайдиган, сурувни ҳол-жонига қўймайдиган ҳар бир бўри ҳам муқаддас бўлавермайди. Қўпайиб кетиб, су-руву йилқиларимизни босмоқда. Улар қириб турилмаса элда мол қолмайди, ахир.

Хоқон ўғлининг ўз сўзида туриб олганини кўриб, ба-ланд кетмади, ётифи билан деди:

– У ҳам ўз ризқ-насибасини излайди. Сурувнинг битта кўйи бошига садқа бўлсин унинг! Тўйгач, ўзи кетади. «Бўри қўшнисини емас», деганлар. Эл ўтади, тўра қолади...

Ўғуз маъюс тортиди:

– Жонинг соғ бўлсин, ота! Сенинг ҳар сўзинг мен учун бир ёрлиқдир! Бироқ бўрининг муқаддаслиги эски замонларда қолиб кетган. Бахшилар бундай дейди:

*Кечা туриб юриб эрдим,
Қора, қизил бўри кўрдим.
Уни нишон олиб турдим,
Мени кўриб довон ошди.*

Боболаримиз ҳам бўрини кўрганда садоқдан ўқ олиб, ёй бўшатганлар. Отма десанг, отмайман! Бироқ барча яратилганлар бир-бирининг кушандасидир.

Қора хон бўрининг ўлдирилиши фалокат олиб келишини ҳис этди. Ўғли эл халоскорига, умид рамзига қўл кўтарган эди... Хоқоннинг ичи ёнди, аммо дўстлари ёнида уни аяди:

— Отибсан, майли, уни байроғимизга қадаб қўямиз! Бироқ унутма, инончингни қаттиқ тутмасанг, эл сенга ишонмайди!

Шу билан бу суҳбат тугади, деган бир оҳангда:

— Энди дам олинглар, эртага жўнаймиз, — деди.

Хон сиртига чиқармади, аммо ич-ичидан ўғлидан ғазабланди. Элнинг инончига қарши чиқиш тўрада ясоқ¹ эди. Қора хоннинг сўзига қулоқ солмаса, отасига, онасига парво қилмаса, бу нима гап, ахир?

У Куз хон билан хоқон чодирига қайтди. Ўғлидан ғазабланганини инисидан яширмади:

— Умримиз жангда ўтди. Фарзандларимизнинг боши ўқ отмоқ, қилич чопмоқдан чиқмади, тўраларимизни унтиб қўйдилар.

— Хато қилганини ўзи ҳам тушунди!

— Жилов кўрмаган тулпорга ўхшайди... Яқин борсанг, ортини ўтиради. Бир оз бўш келсанг, тақаси билан қаншарингга тепади. Бўйнига каманд отиб, аста-секин қўлга ўргатиш керак.

— Онаси эплайди буни!

— Йўқ, у ёшдан ўтди. Она қучогидан чиққанига анча бўлди. Бошқа бир йўлни излаб топишимиз лозим.

У жим қолди, сўнгра ниманидир ўйлади, шекилли, инисининг қўлини сиқиб илова қилди:

— Анъаналардан юз ўтира олмаймиз. Юрагимда бир ниятим бор. Бу сенга боғлиқ. Мен хоқон бўлсанм-да, сен менинг иним бўлсанг-да, эшигингни сўраб бормоқчиман. Ўғил ҳам сеники, қиз ҳам. Бонуни бер Ўғузга, унаштирайлик, янада яқинлашайлик, тўй қилайлик, шунда у ўз ташвиши билан ўралашиб қолади. Унинг жиловини Бону торта олади. Биламан, қизингни инончли, эътиқодли қилиб ўстирдинг.

Куз хон гап нишаби бу томонга бурилиб кетишини

¹ Тўрада ясоқ — қонунан тақиқланган

кутмаган эди. Аввал шошиб қолди, сиртига чиқармасада, катта оғасининг ўз қизига совчи бўлиб чиқаётганидан севинди. Шундоқ ҳам қайдан совчи чиқса, Бонунинг ихтиёри Қора хонда эди. Бу оиланинг қадимдан келаётган таомили, анъанаси шундоқ эди. Катта оға турганда инилар ўз қизларининг совчиларига на «ҳа», на «йўқ» дея олардилар. Амакиси Ўғузни ёқтирап эди. Ўғузнинг бошқа тенгтўшларига ўхшамаслигини у ҳам ҳис этарди; ҳар куни бир арпа бўйи ўсар, эл-юрт орасида фаҳму фаросат, жасорат, мардлик борасида тенги йўқ йигит эди. Куч-қувватда ҳам унинг олдига тушадигани топилмайди. Энг яхши устозлардан, олимлардан сабоқ олган эди. Юзидаги тонг нуридек мусаффолик амакисига ҳам руҳ бағишларди. Тўнгич оғаси ўрнини Ўғуз каби етук бир ворис олишидан севинар, унинг қадами қутлуғ келажагига ишонар эди. Бону ҳам эътиroz билдирамади. Бир йил аввал қаршисидан чиққан бир Танқут фолчисининг сўзларини ҳамон унутмаганди. Фолчи шундай деганди:

— Уйингизга нур ёғилибди, бир элчи, ялавоч¹ туғилибди, сезмай қолибсиз. У байроғингизни қўкларга кутарди, шухратингизга шуҳрат қўшади.

Куз хоннинг ўтакаси ёрилаёзди. Қайси фолчидан, қайси ромчидан сўрасалар шу гапларни айтди. Зимдан синча солиб, тўнгич оғасининг ўғли бошқаларга ўхшамаслигини, ёшига мос келмайдиган даражада ақлли, тадбирли, йўл-йўриқни биладиган, сўзлари билан тингловчиларни маҳлиё этиб қўядиган йигит эканлигини кўрди. Унинг илоҳият томонидан танланганлигига шак-шубҳа йўқ эди. Фолчининг таърифига фақат у мос келарди. Яратганнинг элчилиги ёлғиз унга ярашарди. Куз хоннинг юраги таскин топган эди. Бонуга ундан яхшироқ қайлиқ қайдан ҳам топиларди?

— Элимизнинг ҳам, хонадонимизнинг ҳам улуғи, оғабегимиз сен бўласан, — деди. — Бону чўриси бўлсин Ўғузнинг. Йўргакдан бир чодирда ўсиб, бир туюнинг устида вояга етдилар. Болаликлари ҳам бирга ўтган.

Қора хон кулди:

— Бу манглайга битилганидир! Иккаласи ҳам ўзимизники.

¹ Ялавоч — пайғамбар, Оллоҳнинг элчиси

Үрда тин олганида, кечалари гүё юлдузларни ҳовуч-ховуч олиб ерга сочганга ўхшарди. Гулхан шуълалари, баҳши наволари... Ҳар уруғнинг ўз чолғуси, ўз қўшиғи бор эди. Шунга кўра қайси уруғнинг қайга тушганини билса бўларди. Бўри увлашидан от кишинашигача, момақалди-роқ каби ер юзининг бутун сас-садолари қайнаб-қоришиб, кўчнинг улкан ҳайқириғига айланган эди. Кўз юмиб тингласанг, бу қўшиқларда юлдузларнинг севги шивирини, шуъланинг ойдин таронасини, олис мингийилликларнинг очилган сирларини ҳис этардинг. Шимолдан келганларнинг она бугудек бўғизда бўзлаши билан Олтой бургутларининг қийғир саси, даштикларнинг изтиробга тўла чексиз ингрози, жанубликларнинг чинграниб чопган от дупурларини эслатадиган чингирови бир-бирига қоришиб кетган эди. Торли дўмбираалар юракка фараҳлар солса, пуфлама чолғулар, чанқовузлар кимсасиз яйловларнинг ўт-ўланларига жон баҳш этувчи еллардан кўйларди. Қайсирид гулхандан бўри увлашига менгзар бир сас янгар эди:

*Мўлу кўл қўйинг бўлсин,
Бўкканча тўйинг бўлсин,
Буз бўри, ҳув!
Қариндошим, ҳув! Иноғим, ҳув!
Чақир мени ер юзининг сўнгига.*

*Қиличим, камоним,
Қанотим, қалқоним,
Оқ отим, ҳув!
Ғир отим, ҳув!
Етказ мени ер юзининг сўнгига.*

*Олтин ёйимдан учган,
Қора темирдан кечган,
Утқир ўқим, ҳув!
Кескир ўқим, ҳув!
Учир мени ер юзининг сўнгига!*

Бошқа бир оҳанг ҳаёт ишқи билан тўлиқ, янгроқ ва ўқтам эди:

*Отимни тоқقا бурдим,
Тоғ йўлим очиб берди,
Отимни сойга сурдим,*

*Сой менга кечик берди,
Отимни юртга сурдим,
Сен ҳам улгу бергин, қиз.*

Күл қирғоғидаги бир гулханда баҳши интиҳосиз бир севги ила азалдан туркнинг таянчи, топинчоги бўлган тоғларни куйларди:

*Беклар қўноқ бўлиб келди,
Ўйнаб-ўйнаб тўйинг, тоғлар!
Ўзан¹ қўлга созин олсин,
Тұхтамасин тўйинг, тоғлар!
От уйғотсин йўлларини,
Гул яшнатсин чўлларини,
Бун² бузмасин элларни,
Кулсин ўбанг³, кўйинг, тоғлар.
Унда чўққилар қордадир,
Бунда боғлар баҳордадир,
Сўрсалар, жаннат қайдадир?
Дейинг: тоғлар! Дейинг: тоғлар!*

Кечкурун беклар очиқ ҳавода, кўл қирғоғига тўшалган қалин гиламлар устида еб-ичиб хурсандчилик қилдилар. Кўқдан тўлин ой ёфду сочарди. Қаршида сўнгсиз-сарҳадсиз бир кумуш денгиз долғаланиб ётарди. Эрталаб йўлга тушажакларини билган ўсмиirlар йилнинг ушбу пайтида кечалари ҳам илиқ бўладиган сувдан тўймагандек отларини кўлга солган эдилар. Кўлдан чиқиб келаётгандари сувдан туғилганга ўхшарди гўё.

...Яна бир неча кун йўл босдилар. Бу неча йиллардан бери қўриб келганлари кўч эмас, балки жангсиз, қурбонсиз ёз сукунатидан туғилган бир баҳтиёрлик эди. Яна бир бор насиб этармикан бунақанги сафар? Ким билсин? Тоғу дарёси, ови, пойгалари, юришлари билан ҳар бир кимса кўрса ўн йилда бир кўрадиган, йўқса шунда ҳам кўрмайдиган бекиёс кунлар эди бу.

Туркнинг улуғ топиноғига кетаётган улкан бу элат Олабелдан ошганда, қўққисдан ҳамма ҳайратдан қотиб қолди.

Улар табиатнинг таърифларга сифмайдиган, тасвирлаб

¹ Ўзан – баҳши

² Бун – ғам, дард, кадар

³ Уба – қишлоқ

бўлмайдиган бир мўжизаси билан юзма-юз келган эдилар. Ҳозирга қадар ўзлари этакларидан кечиб келган, ҳар бири ўзича гўзал бўлган пурвиқор тоғларнинг энг гўзали, энг буюги бўлмиш Тангритоғ улкан бир ўқнинг тифи каби булатларни тешиб ўтиб кўкка санчилган эди. Кўч Саричноқ ёқасидан эниб, Тангритонинг тилим-тилим нишабликларидан юқорига боқди. Йўл уларни тоғнинг дунё яралгандан бери қори-музи эримай ётган зирваларига бошлаб келди, бироқ қўққисдан ўтиб бўлмас қояларга дуч келдилар. Қора хон илк дафъя келаётган ва бу ерларни билмайдиган кишиларга изоҳ берди:

— Қўрқманг, қоялар йўл беради. Йўқса бу дарё қаердан оқиб тушаётир?

Сув ёқалаб илгарилардилар. Бундан бу ёғига кафтдек теп-текис дарё ўзанининг ўзи йўл эди. Қоялар орасидан, теран тоғ ичидан оқиб келаётган сув текисликдан ёйилиб кечув ҳосил қилган эди. Чор атрофни юксак қоялар қуршаб турарди. Бироқ қайдандир шуъла ёғилиб турар, от туёқларидан сачраган сув томчилари бу шуъла остида ялтюлт товланар, текислик қимматбаҳо тошлар хазинасига ўхшарди. Мингларча от туёқларидан қўпган сас ҳали ҳеч ким эшитмаган, кишининг юрагига фалаён соладиган бир оҳанг касб этарди. Кечув аввал торайди, бир оздан сўнг кенгайиб, ёришиб борди, яна бир муддатдан сўнг қаршиларидан бир учи тоғларнинг қорли чўққиларига қадар чўзилиб кетган, ҳар томонидан ўтиб бўлмас қоялар, тоғ тизмалари билан куршалган, афтидан, ана шу ўзандан бошқа йўли бўлмаган бир кенглик, ўрмонзор нишабликлари, ирмоқлари, ирмоқли даралари, бўйи отни яширадиган ўт-ўланлари бир-бирига уланиб кетган бир беҳишт, жаннатни ҳам лол қолдирадиган ажойиб бир водий, ўша замонларнинг тили билан айтганда гўзал бир сизра¹ намоён бўлди.

Қора хон от белида тик турганича:

— Оҳ-ҳо! Гўзал Эркўн, сен билан яна кўришдик, — дея жиловни қўйиб юборди. Йўл бошловчиларнинг, кузатувчиларнинг ҳамиша олдинда юриши лозимлиги ҳақидаги турк қўшин тўраси, кўчнинг барқарор қоидаси бу дақиқаларда унутилган эди. Афтидан, турк беклари, йигитлар бунга кўнишиб қолган эдилар. Четлашиб, Қора хонга йўл

¹ Сизра — водий

бердилар. Хоқон наслдор отини қичаб олдга ўтди ва таниш йулидан илгарига елиб кетди. Даранинг ўртасига, Етибулоқнинг суви ён-атрофга тарагиб ётган жойга етиб бориб, қўл кўтарди:

– Шу ерга қўнамиз, беклар! Йигитлар Эркунга қўнсин. Ҳар бир турк тоғининг бир эрки, бир Эркуни бор; бу дара фақат биз учун очиқдир. Кўч шу ерда қўним топади. Эл беклари эса Ота Унгурга боришади...

Эртаси куни ўрдадан чиққан улус бошлиқлари отларининг бошини тоғ тўшидан сут каби сизиб чиқаётган кичикроқ сой бўйлаб илгари солдилар. Эrimas муз қатламларнинг остидан отилиб чиқаётган булоқ ёнидан шимолга юзланиб, яна қоялар орасидан бурила-бурила олға юрдилар. Бир кун аввал ўзлари кечиб ўтган гумбазсимон, аммо фақат битта отлиқ сифадиган тешик олдида отдан тушдилар. Жиловни ортдан келаётган отбоқарларга тутқаздилар. Қора хон бу ерларга бир неча бор келган бўлса-да, гўё илк дафъа келаётгандек қаттиқ ҳаяжонда эди. Юраги кўксига сифмасди. Бу жойларни кўрмаган қўноқлар эса шошиб қолган эдилар. Энди улар элнинг муқаддас зиёратгоҳига киришлари керак эди. Уларнинг болалиқдан эшитиб-билиб юрган Ота Мағоралари – элнинг бешиги шу экан-да! Бу ернинг охиригача аён бўлмаган, мубҳам сирасори ҳар бир турк зотининг юрагида яшар, шу зотлар билан бирга ер юзининг турт томонига тарқар эди... Бу ер ибтидо эди, балки интиҳо ҳам шу ер бўлар. Қора хон деди:

– Бўз бўри бизни бу унгурда парвариш қилмаган, йўқ! Ота Унгур деганда бутун бу дарё бўйидаги водийни, кечувнинг юқорисидаги кечадан бери кўриб келганимиз жойларни тушунганлар. Бўз бўри биз остидан ўтиб келган қоялардан йўл солган. Қаранг! Бу кенгиш водийда неча минглаб киши яшай олиши мумкин. Бу ерда дунёдан хабарсиз, хатарсиз, ҳеч кимга билдирмай юз йил ҳам яшаса бўлади. Ушбу макон нақадар катта бўлса-да, бир ҳовли каби беркдир. Тангрининг уйи, тангрисеварларнинг бешиги, турк улусининг яратганлар билан учрашув жойидир бу жойлар!..

Беклар қўлларини олдинга чўздилар. Бўри увлашига ўхшаш бир сас қояларга урилиб узоқ-узоқларга ёйилди. Шу аснода Қам Ота, унинг ортидан ўрта ёшли қамлар мағорадан чиқиб, қўноқлар олдида таъзим қилдилар.

Ота Мағорага анчадан бери бу қадар күп құноқ келмеган эди. Йүл бошловчи қамлар ортидан кенгиш бир тош хонага кириб бордилар. Хонанинг ён-ёнбоши, остию усти йұнилгандек сип-силлиқ эди. Кираверишдан тушаётган ёруғылда мағоранинг үтов томига үхашаш гумбази яққол күриниб турарди. Сүл томонда томчилиб турған булоқ суви тош устида кичкина күлча ҳосил этған эди. Сув қоя остига кириб күздан ғойиб булауди.

Қаёққа боқма, қатор қилиб терилған бүри, кийик, олқор уюқларига¹ күзинг тушарди. Шу ернинг үзида унгурнинг үз тошларидан ясалған бутлар ҳам бор эди. Уюқларнинг бир нечаси шунчаки тери ичига похол тиқилған тулуп эди. Беклар хонани кезиб юрганча таъзим қилиб, құтсол бутларга олқиши айттар, дуо үқир әдилар. Биринчи хонани томоша қилиб бүлгач, юқоридаги девор ёриғидан иккінчи хонага үтдилар. Мағора оғушида құноқларнинг овози ҳам бүри улишига үхшар эди. Құрганларидан таъсирланиб кетған бекларнинг үzlари ҳам увлашга түшдилармиカン? Қора хонни қаршилаб олған, у билан бирга кезиб юрган, үзи ҳам қояға үхшаган, оёғига чизма², эгнига капанак³, бөшиға каттакон бүрк кийиб олған мағора қоровули Қам Ота құноқларига Ота Мағоранинг эл зиёрратгоҳига айланыш тарихини сұzlар эди. Бу ер фақат бутлар сақланадиган жой эмас, айни пайтда билги⁴ хазинаси ҳам эди. Турк ижодкорларининг тангрисол⁵ ишларидан намуналар сақланар эди. Бу ҳаммага маълум эди. Қам Отанинг овози гүё минг йиллар наридан келаётгандек таъсирли ва жозибадор эди:

— Бу унгур Тангрилар билан ота-боболаримиз үз мұқадdas дамларини, руҳларини бирга, ёнма-ён яшаб үтказған, үзаро құшни бүлған жойдир.

Қайдандир нур йүл топиб ичкарига сизиб кирап, сеҳрли ой ёғдусига үхашаш жозибали бир ойдинлик бор эди бу гүшада, бу нур қояларни қандоқ тешиб үтади, бу ерга қандай йүл топған — билиб бүлмасди. Мағоранинг тош деңгөлари, гумбази қиздирилған темир рангидә эди.

¹ Үюқ — боғларга ясаб қўйиладиган қўриқчи. Бу ерда бут маъносида

² Чизма — пойабзал, ковуш

³ Капанак — эркаклар либоси

⁴ Билги — билим

⁵ Тангрисол — илоҳий

Қам Ота уларни учинчи, тұртинги хоналарга ҳам бошлаб борди. Хонадан хонага үтадиган йұллар дүланбачға¹ үхшар, олдинда Қам Ота бұлмаса құноқтар унинг ичидә адашиб қолған бұлур әдилар. Ички хоналар янада катта әди. Құлларига мойли чироқ тутиб олган, үzlари ҳам «чироқ» деб аталадиган ёрдамчилар деворлар узра саф тортиб, хоналарни ёритиб турардилар. Улар кутилмаганда юзма-юз келған құноқлардан шошиб қолған әдилар. Ичиға минглаб ёнар қүш құнгани каби юлдузлардек ялтираб турған гранит қоя гүё яратғаннинг амри биланми ёки инсон құли биланми бунёд этилған сүйри юракка үхшарди. Бу ерда ёши ҳам номаълум, олис даврларда битилған шакллар, ёзувлар бошдан-оёқ деворларни зғаллаб олған әди. Қора хон бут-санамлар оғы деб ном олған бұлса-да, улуснинг буюк ижодкорлик иқтидорини намойиш этувчи, үтмишнинг сеҳрли изларини, ёзувларини асраб келған, шу боис ҳам құтсол ҳисобланған, асл тангрилиқ² макони бұлған бу мағора шаҳарчасини үз құноқларига ич-ичдан тошиб келаётған бир севинч билан намойиш этарди. Буларни ҳаммадан аввал Үғуз күришини истарди. Бу ерда кечирған түйфулари, боболарининг улуғ руҳлари Үғузнинг янгилиш йұлдан қайтаржагига, отасининг буюк инончига бош әгажагига, әхтимолки, ортга қайтишаркан, отасига ёндашиб, «қылдан нозик бүйім билан бошимдан катта гап қилиб қўйибман», дея унинг қўнглини кўтаражагига Қора хон ишонар әди. Аммо Үғузнинг нурли юзидан унималарни хаёл қилаётганини уқиб бұлмасди.

Қам Ота үз изоҳида давом этарди:

— Булар бепоён билимга эга бўлған уруғ-аймоғимизнинг энг юксак намуналари, элнинг муқаддас тош китоблари, мангуда яшаб қоладиган құтсол битиклардир³. Улар орасида буюк мозийда Кўк элчилари ва қамлар тушунадиган — Инсон фарзандининг умумий сўзлашма тили бўлған муқаддас Сензар⁴ тилида ёзилғанлари ҳам, бутунги

¹ Дўланбач — лабиринт

² Тангрилиқ — илохий, муқаддас

³ Құтсол битик — муқаддас китоб

⁴ Сензар — баъзи эхтимолларга кўра бошда ер юзида фақат бир тил — Яратган ва унинг пайғамбарларининг тили бўлған, бу рамзлар тилини фақат қадимги коҳинларгина билар эканлар. Улар маҳв бўлгач, бу тил ҳам унутилган.

тилимиизда ёзилғанлари ҳам бор. Улардан энг муҳими – будун¹ шажарасидир. Бу шажарада эл-юртимизнинг, улусимизнинг илдизи, шох-шохобчаси, босиб ўтган йўли, уруғлар ўртасидаги тафовутлар кўрсатилган. Унинг ёнидагиси – ер юзининг шакли – унда Тангриларнинг бизга берган ерлари, сувлари, тоғлари, йўллари тасвир этилган. Илдизимизни, юртимизни унутмаслигимиз учун... Қаранг, нима деб ёзилган бу ерда.

Қора хон бўй чўзиб қаради. Гүё у узундан-узоқ йўлларни фақат ана шу сўзларни эшиитмоқ учун кечиб келган эди: «Турк хоқони Ер-Сув эгасиз қолмасин деб юборилди. Бу ер-сувлар фақат Турк хоқонларининг қўлида бўлмоғи лозим эди. Туркларнинг ота-боболаридан қолиб келган эди бу ерлар, бу сувлар».

Қўзлар Қам Отага тикилган эди. Энди унинг овози қўклардан келаётган каби юракларда янграш эди:

– Элимизнинг, тўрамизнинг тартиб-қоидасини сақлаган ёзувлардир улар. Буларни унутсак, улуғларимизни, уларнинг руҳларини унугтан бўламиш. Ота Унгурнинг саноғи йўқ хоналаридаги саноғи номаълум битиклар, ёзувлар биз учун фоят қимматлидир.

Шу ўринда Қам Ота негадир ўйчан сукутга чўмди, сўнг кўзини Қора хонга тикиб секин илова қилди:

– Ер юзининг илк ёзув белгиларини ҳам улар яратган эди. У белгилар бизнинг ёдгорлигимиздир. Кунчиқардан кунботарга қадар биз биладиган бутун ўлкаларга тарқаб кетган улар... У ёзувларнинг энг қадимийлари ҳам шу ерда!

Ота Мағоранинг қимматини, отасининг бу ерга боғланиб қолганлигининг илдизи қаерда эканлигини Ўғуз энди англаб етган эди. Бошқа овозлар бўлмаганида у ўз юрагининг дук-дукуни, томирларида жўшаётган қон шиддатини эшитиши аниқ эди. «Тангрининг ягоналигига, буюклигига яна бир бор шоҳид бўлдим, – дея ўйлар эди у.

– Бу бутлар, тулуплар қўғирчоқдан бошқа нарса эмас. Ер-қўкларни яратган – Тангридир. Эй топганим, севганим, сифинганим Буюк Тангirim, сен отамнинг қора кўнглини нурга тўлдир. Ҳақ йўлига кириб, мени англасин! Жойи жаннатдан бўлсин. Отам билан орамиздаги бу фарқни ўзинг ҳал эт, Улуғ Тангirim! Оқ манглайи тиришмасин.

¹ Будун – халқ, миллат

Кўнглига ёмон хаёллар ин қурмасин. Мендан ғазаблан-
масин, тия каби бўкирмасин. Бу санамлар қутқусидан халос
бўлсин! Бу ясама ёғоч қўғирчоқлар, бу сомон тиқилган
терилар, лойдан ясалган бутларни тангри деб ардоқламасин.
Уларнинг руҳлари борлигига ишонмасин! Сенга чарчамай-
толмай юкунч юкунаман¹, Тангрим! Юксаклардан ўзинг
юксаксан! Сен онадан туғмагансан! Отадан бўлмагансан!
Кимсанинг ҳақини емагансан. Кимсага қаҳр этмагансан.
Кўтарганингни кўкка етказгансан, гўзал Тангрим! Буюр-
ганингга сифиндим. Бир бўлган, бор бўлган Тангрим!»

Ота Мағора Ўғузнинг фикрларини алғов-далғов этиб,
уни беклардан ажратиб қўйган эди. Эндиликда у Тангрига
юзланган эди. Тангри билан сўзлашар, Тангрини тинглар
эди. Ягона бўлмиш Тангрининг элчиси, қудрати, қиличи
бўлиб майдонга чиқишидан энди қочиб бўлмаслигини ҳис
қилиб турарди. Бу туйбу унинг юзларига ҳам қалқиб чиқ-
кан эди.

Қора хон ўғлининг чехраси нурланиб кетганини кўрди.
Қоронгуликда Ўғузнинг кўзлари чироқ каби ёнарди. Бек-
лар ҳам буни сезмасдан қолмадилар. Бу нур топинчоқ-
нинг таъсиридан эмас, Ўғузнинг фалаёнга келган юраги-
дан, ўзга бир ҳаводан қалқиб чиққанлитини англаб етган-
лар ҳам бор эди...

Қам Отанинг изоҳлари охирлаб борарди:

— Ота-боболаримиз темирни шу ердан олиб, шу ерда
эритганлар, ер юзига шу ердан тарқатганлар. Чиннинг
Ипак йўли дегани Туркнинг темир йўлидир, қадим-қадим-
да бу йўл ана шу ердан бошланган...

Ота Мағора билан танишув ниҳоясига етгач, ҳаммала-
ри катакон бир хонага йиғилиб, ушбу ясама бутларнинг,
ота-боболари, Турк улуғларининг руҳига дуо ўқидилар.
Овозлар мағоранинг тош курсофини довул каби қоқар, гул-
дур-гулдур садолар бутун водийга тараалар эди. Ушбу лаҳ-
заларда Еттибулоқда қолиб чодир тиккан, ўчоқ осган кўчда-
гилар ҳам аҳён-аҳёнда ёнларида олиб юрадиган тупроқ
қаршисида муножот этардилар:

— Улуг чалабийлар будунимизга ёр бўлсин, улусимиз-
ни асрасин. Йўлдан озганни йўлга солсин. Ҳақиқатни
кўрмаганларнинг кўзига нур ато этсин.

¹ Юкунч юкунмоқ — дуо қилмоқ, олқиши айтмоқ, ёлвормоқ

Эй боболар, эшитинг! Бизга бир ҳовуч дон бердингиз, биз уни ер юзига сочдик. Томчи эдик – денгиз бўлдик!

Номингизни, шонингизни ер юзига танитдик. Ота номини, она ўгитини юксак тутдик.

Юртимизни идик¹ билдик! Еру сувларнинг танҳо беги бўлдик.

Қаерга борсак яхшилик олиб бордик!

Эгилмаган бошларни эгдик, букилмаган билакларни буқдик!

Шодланинг, бизни ҳам шод этинг!

Бизга ва юртимизга мадодкор бўлинг!..

Ота Мағорадан ортга қайтиб, ёруғликка чиқсан илк лаҳзаларида Эркўн бутун кўрки, бутун гўзаллиги билан нигоҳлари қаршисида намоён бўлди. Қорли тоғлар тўрт ёндан қуршаниб, Эркўнни ўз ҳовучига олган эди. Водий кун нури билан, қор ёғуси билан, Ота Унгурдан оқиб чиқсан билгилар, сир-синоатлар шуъласи билан, эл бирдамлигидан туғилган қудрат, Топиқ байрамининг жилоси билан тўлиб кетган эди.

Ота Мағорадан туриб қараганда қўйида, булоқ бошида кичкина тоғ дарёлари бўйлаб жойлашган буюк юрт ва ундан даранинг охирига, водийнинг оғзига олиб борадиган арава йўли кўзга ташланиб турарди.

* * *

Қора хоннинг олтин қуббали оқ чодири Эркўн водий-сининг қоқ ўртасига, Еттибулоқнинг бошига тикилган эди. Эркўнни қўриган, бу ерда сурувларини кўпайтириб, фарзандларини улфайтирган водийнинг улуғлари тўпланиб келган эдилар. Узун соchlари елкаларига тушиб турса-да, соқоллари йўқ эди. Шўланга юзлаб кишилар йигилганди. Курбон байрами эл-улус орзиқиб кутган, ҳар бир кимсанинг ўз нияти, ўз умиди билан боғлиқ байрам эди. Ўтгандарнинг, ота-боболарнинг руҳига қилинадиган қурбонликлар элни, бир қадам бўлса-да, ўз тилагига яқинлаштиражагига, гуноҳларнинг, ёмонликларнинг олдини олажагига, тинч-тотувлиқда, қонсиз-қурбонсиз яшамоқларига ёрдам беражагига ишонар эдилар. Бу байрам айни пайтда куч-куватнинг, мардликнинг синови эди, ҳар йил элнинг ян-

¹ Идик – муқаддас

гидан-янги алларини юртга танитар эди. Энг нуфузли бўлган бу байрамнинг қудрати унинг тинчлик, сулҳ байрами эканлигига эди.

Бу ердан айрилиб кетганлар юракларида эл-улуснинг бирлик, бирдамлик туйгуларини олиб кетардилар. Ранжиб кетиб қолганлар, бу ерда бўлиб ўтган аччиқ-тизиқ гаплардан душманга айланган кимсалар ҳам учраб туради.

Тўрага қўра шўлан от пойгаси билан бошланар эди. Бу мусобақалар янгини, янгиликни юзага чиқариши билан бирга эл-юртнинг куч-қудратини, баҳодирларнинг жанг маҳоратини намойиш этар, мусобақадошларни бирбирига янада яқинлаштиради.

Ўғуз ўтган галги байрамдан бери анча улғайганини, ўз тенгдошларининг сардори, ардоқлиги бўлиб етганини ҳамма кўриб туради.

Водийда қилинадиган илк қурбонлик учун овга от солдилар. Кўналғадан у қадар узоқ бўлмаган, кўм-кўк йўсинглар қоплаб олган қоялар орасидан, бўйи одамни яширадиган ўт-ўланлар ичидан кийик сурувини топиш у қадар қийин бўлмади. Бу ерда ҳам дастлабки ов Ўғузнинг тани экан. Муҳими ҳам шу эди. Қанча ов овлансин, бироқ беклар биринчи ўлжага кўз тиккан эдилар. Дастлабки ўлжа барча эл беклари орасида бўлиб берилар эди. Бу ўлжадан саройга тўплangan қардош уруғ бошлиқларининг ҳар бирига бир парча бўлса-да насиба тегиши лозим эди. Сўнгра юзлаб қурбонликлар кесиларди, бироқ илк ўлжадан бир парча тегмаган эл бошлиғи кўч-кўронини кўтариб кетиб ҳам қолар эди. Ов ўлжаси тарқатилгандан сўнг тоғнинг кунгай этагида бошини қуёшга қаратадан, қўйлар қурбонликка сўйилар эди. Сўнгра онт ичиш маросими бошланарди. Беклар қиличлари билан билакларини шиф этиб тилар, сўнг бирма-бир ўртага қўйилган йирик сафроққа¹ яқинлашар, билгидаги қондан бир-икки томчисини идиш ичидаги арфувоний шаробга томдиради. Сўнгра қонлар қоришган бу ичимлиқдан ҳар бир киши бир қултумдан ичиб, қўлларидан қиличини шоҳид – тансуқ² тутганларича эл борлигини сақлашга, тўрага, эл-юртга содик

¹ Сафроқ – ичимлик идиши

² Тансуқ – шоҳид, гувоҳ

бұлажакларига ямин этиб¹, байрам онтини – шаробни ичар әдилар. Юрт тұрасига күра ўша пайтлар тин деб аталған улуғ руҳларга, тангриларга дуолар кун бүйі давом этарди. Кишилар ёлворгу² учун саф тортишар, юқунчлари, муножотларини тутатташ, тановул учун тұпланардилар. Етти-булоқдан бир оз нарида йилқилар, сурувлар учун алохида қурбонгоҳ, тұғрироғи, от топиноғи ҳам бор әди. Йилқибоқарлар, чүпонлар, сиғиртмачилар³ ҳам ўша ерда қурбонлик қылар әдилар.

Кунчиқар туркаш улусининг бошлиғи, номи табғачларнинг үтакасини ёрган, қурч жүссали, мүйловларини қулоқларидан үтказиб юборған Кундуз бек түйбеги этиб сайланди. У олтин қадағни Қора хонга тутқазди. Қора хон деди:

– Қариндош бекларим, улус оғалари! Улуғ руҳлар қурбонликларимизни қабул этсін, юртларимизни асрасин. Күк чодиrimiz, ер түшагимиз бұлды. Кунчиқардан Кунботаргача оёғимиз етмаган жой қолмади. Бироқ илдизимизни унұтмадик. Билги, битик⁴ әгаси бұлдик. Юришларда, жангларда илкин йүлларимизни йүқотмадик. Даشتда яшамогимиз бизни ушбу макондаги ёзувларимиздан айро этмади. Шунинг учун ҳам бу ерга тұпландик. Ойлар давомида кечиб үтиладиган йүлларнинг нариги чеккасида хабарлашувимиз қийин бұлған олисликларда яшасак-да, биргамиз. Дунёга беклик – манглайимиз ёзувидир. Сийрак учрашувимиз тағовутлар туғдиради. Бироқ ҳаммамиз бир элнинг, бир қонун, бир тил, бир тұранинг фарзандларимиз. Битта зотнинг пуштидан тарқаганмиз. Бирлигимиз бузилса, кунчиқардан кунботаргача биз отини ҳам әшитмаганимиз бегона элларнинг құшнилари бизни ғажиб ташлайди. Бирлигимиз бузилмасин! Руҳларнинг үзи бизни асрасин!

Құллар үртада уйиб құйилған қүй, түя этларига чұзиди. Кетма-кет қимиз мешлари бушади. Түйбеги жілмай-ганича деди:

– Қариндошлар, Чин хоқони менга ўз қизини бериб,

¹ Ямин этмоқ – онт ичмоқ

² Ёлворгу – дуо ўқиши

³ Сиғиртмачи – қорамол бокұвчи, подачи

⁴ Билги, битик – билим, китоб

мени ўзига оғдириб олмоқчи. Ришталаримизни боғлайлик, Чин ўрдусига бошчилик қил, шимолдан даштнинг муттасил, қўққисдан содир бўлиб турган талончилик ҳужумларига чек қўйилсин, ҳар йили ял-ял товланган чиройли ипак, пахта, шойи, бўз матоларимизни, гуручимизни бериб турайлик, уруш барҳам топсин, демоқда.

Беклар унга тикилишди. Сукунатни Қора хоннинг момақалдироққа ўхшаш қаҳқаҳаси бузди:

— Гўрўғли полвоннинг ишқи Чин қизига тушибди, беклар!

Кимдир луқма ташлади:

— Чин гўзали кимга ёқмайди, ахир?

Уйғур хони Алинчи ўғли Алпдўған деди:

— Улар уй мушугига ўхшайдилар. Ёзида¹ сўлиб қоладилар. Турк қизларининг юмушини эплай олмайдилар. Бизга фақат ўзимизники чидаб беради...

Кундуз хон пинагини бузмади:

— Чалкаштирганг, беклар! Табғачни Чинга зўрма-зўраки боғламайлик. Табғач ўзимиздан ажралиб чиқсан.

Олтойли Буғухон ўғли Эник истеҳзоли жилмайди:

— Тўғри, Табғачнинг Чинга қоришадиган жойи йўқ. Уларнинг биздан ажралиб чиқсанни ҳам ҳақиқат. Бироқ уларнинг чинликлардан фарқи нимада? Шуни тушунтириб бера оласанми бизга? Улар чинликларни дўндириб бизга яқинлаштириш ўрнига бизни Чинга ямоқ қилиб солмоқчи бўладилар. Ўзимиздан чиқиб, ўзимизга орқа ўғирганлар чинликдан ҳам ёмонроқ ёғийдир бизга. Фақат турмушларигина эмас, юраклари ҳам бегоналашди уларнинг. На бизники бўлиб бизга ўхшайдилар, на чинники бўлиб чинга. Улар орани бузмасалар бу жанглар аллақачон битган бўларди.

Қора хон ҳамон мамнун-мамнун кулмоқда эди:

— Хотинингдан қўрқмайсанми?

— Хотиним нима ҳам дерди. «Улусимизга асқотса, бирваракайига бешта чин қизини олавермайсанми», дейди.

— Қандингни ур, бек! Тўй қил, уйлан! Балки табғачларнинг совиб қолган қонини сен қиздиарсан.

Яна қаҳқаҳа чекдилар. Бу сўзлар жиддий айтилдими ёки шунчаки ҳазилга — ҳеч ким сўраб ўтирамди.

¹ Ёзи — чўл, дашт, саҳро

Бироқ Гүрүглини тутган эди:

— Чинга құшничилигимиз билан руҳлар бизни синааб күраётир, беклар,— деди у. — Шунча ҳосилдор ерларда яшаса-да, бу қадар юраксиз, күтафақм эканликларини тасаввур этиб бұлмайды. Эркагидан аёлининг фарқи йүқ. Биз кийик, құш овчиси бұлсак, улар яранғу, инсон овчи-сирилар. Биз топиқни ҳайвонлардан кессак, улар инсон-лардан кесади. Тангрилари ҳам үзи тұраттан инсон қони-га ташна.¹ Бунинг устига қүшнинг ҳам эңг йиртқичини Тангри авлоди деб биладилар. Қушлар учун ҳам қурбон-лик қиласылар.

Қорахон чодирини, идиш-товоқларини эркүнликлар-га бұлиб берди. Анча енгил тортди. Ота Мафора зиёфати якунига етди. Эркүн водийси узра қүёш шуъалари остида товланиб ётган тоғларга, дарё бүйидаги үрмонларга, ни-шабликларда икки бир-уч бир бұлиб капалакдек оқарыб турған ўтовларга сұнг бора күз югуртиришаркан, уларни кузатгани келған эркүнликларни руҳлар панохига топши-риб, йүлга тушишди. Келған йүлларидан қайтишлари ке-рак эди, бироқ бошқа йүл танладилар. Эң қисқа йүлдан қайтмоқчи бұлдилар. Иссиққұлнинг кунчиқаридан ошиб ўтиб, Үйфурлардан келадиган эл йүлиға, күч-карвоңлари кунчиқардан кунботарға, кунботардан кунчиқарға қатнай-диган машхұр Ипак йүлиға — Турк йүлиға чиқиб олдилар. Құлнинг шимолидаги үрмонзор тоғлар этаги бүйлаб икки кунда үттіз икки тоғ дарёсидан кечдилар. Йүл гавжум бұлғани учун сойларға күприклар қурилған эди. Ҳар бир күприкни қайси бек қайси даврда соглани ҳам аниқ эди. Уларнинг үzlари үтиб кетған бұлсалар-да, йүлчига кечув қолдирған номлари ушбу күприкларда яшарди. Құлнинг шимол теграси янада серүт, гүзәл, бепоён, серсув эди. Күпиклана-күпиклана құлға ошиққан ингичка, аммо жүшқин жилғалардан қайси бирини ёқалаб юрма, күз ўнгингда илон оғзидан чиққандек адл қарағайларнинг қорли тепаликлар узра юксалиб турғани намоён бўлар, сокин үрмонлар оғушидан чиқиб қолардинг. Бир оз юқори-га юрсанг, бу үрмонлар қора арча, чойтикан бутазорлари билан алмашинарди. Эндилекда овлу аҳли бу бутазорлар-дан юқорига, одамни яширадиган үтлоқларға, қор ости-

¹ Қадимги Чинда тангриларға одамни қурбон қилиш одатига ишора.

дан сизиб чиқаётган булоқ бүйларига, яйловга чиқиб кетгән эди... Ниҳоятда илохий, тантрисол гүзәлликка бой эди бу жойлар. Чу дарёсининг дара исканжасидан чиқиб, Олатов этакларида ёйилиб оқадиган соҳилида күч ҳордиқ чиқаргани тұхтади. Бу жой йүл айиргич эди. Қора хон бир неча күн шу манзилда ором олмоқчи эди.

Эл беклари, олдинда алп-баҳодирлар, күчдан айрилиб үз әл-юртларига йүл олғанлари сари Ұғузнинг юраги ҳозирга қадар ҳис этмагани бир изтиробга тұлиб борарди.

Қора хон юрт ерларидә дам ола-ала ёз охирлари – куз арағасида Сифноққа¹ бориб, яйловдан қайттан улусга құшилди. Куз ва қишини шу ерда үтказмоқчи, сұнгра ораны тез-тез қескинлаштириб турадиган, уйқуси қочган заҳоти әлчи жұнатиб Ёмғир тошини сұрайдиган Бошқирд хони сари юрмоқчи эди. «Чин хоқони бу тошнинг изидан тушган. Уни-ку тушунаман. Қурғоқчиликдан қутулишни, ёмғир-сочинни истайди. Бошқирд әлини ҳам босдими қурғоқчилик? Йил бүйи бошингиздан қуишлиб ётган ёмғир бұлмай нима, ахир?»

Әлчи пинағини бузмай жавоб берди: «Менинг хонимнинг айтишича, у тош ёмғирни ҳам ёғдирар, ҳам тиндирап экан».

Албатта, бунинг замирида тошға зәға бұлиш истаги ётғанлиги барчага аён эди. Тошни кафтида туттан ер юзи-ни кафтида тутади.

Бошқирд хони буни яхши анларди. Қора хон ҳам бундан хабардор эди.

Қора хон Чу, Инжу соҳиллари билан Құшасой орасидаги минг йиллардан бери ота-боболариники бұлиб келгән, энди эса үзиге мерос бұлиб қолған, әлни едириб-ичирған әкін-тиқин ерларига боқмоқчи эди. Юртни жангдан ҳимоя қилиш унинг фарзиу қарзи эди. Бу серхосил, баракали ерларда узоқ яшаб қола билмасди. Дааларини әкінчиларга, құл-қаролларга, қари-қартангларга бұлиб берар, әктириб-үрдирар, қиша сотиладиганини сотар, ейилладиганини ер, улусга тарқатар, сотишдан тушган олтинни хазинасига солар, молларини подага құшиб қүяды. Ёз адөңгөл қолған, унашганлар күнларни санаб үтказадиган, түй-тантана қилинадиган, қызы чиқарып, үғил уйлантирадиган пайтлар эди...

¹ Сифноқ – Марказий Осиёдеги ұғуз кенти

ТУШ

Ўғуз Ота Мағорадан қайтган заҳоти Услу Хожани топди.

— Отабегим, Ота Үнгурни күрдингми?

— Күрдим, устозим!

— Ўша лойдан ясалган бутларни, ичига ўт-алаф тиқилган сигир, олқор тулупларини, сасиб ётган құғирчоқларни, илон, тошбақа «рухларимизни» ҳам күрдингми?

— Күрдим!

Ўғузнинг нималарни айтмоқчи бўлгани номаълум эди. Бироқ Услу Хожа эртами-кеч гапни чувалатиб, шогирдини ўз соғинчига¹, ўз мақсадига олиб келажагини биларди.

— Күрдинг. Бироқ «Булар ёбони², жоҳил кишиларнинг амали, бизнинг улусимизга бу ярашмайди, бизнинг Яратган эгамиз ер остига сифмайди, яшириниб ётмайди, у бошимиз устидадир, бешигимиз ўша ердадир, биз ўша ердан келганимиз», дея олмадинг, шундоқми? Шунақа бўладими тўрали киши?..³ Тўғри, бу гапларни айта олмасдинг, жигарим! Йиллар бўйи қаршингни кесиб, бу сўзларни айтишингга йўл бермай келдим. Бундан кейин ҳам йўл бермайман! Тангри кўзга кўринмайди, идрок билан англаради...

— Устозим! Айтиб бер менга, ернинг остию устини англаб етган кишилар не дейди?

— Мен «элнинг ишончига қарши бориб бўлмайди», деган фикрдаман. Минг йиллардан бери ота-боболаримиз ўшаларга топиниб келган.

— Ота боболаримизга қолса, «тўқсон тўққиз тангрим-илоҳим бор», дейишади. Барча яралганлар Яратганга боғлиқдир. Яратилган билан ўлдирилгандан Тангри бўлмайди. Йўнилган ёғочларга ишонганлар яратувчини тан олмайдилар. Улуғ Тангри ибтидоси ва интиҳоси бўлмаган, яратган, бироқ ўзи яратилмаган, бугун мавжуд бўлганни эртага йўқ этган, аммо ўзи йўқ бўлмайдиган, ҳаёт берган, умр берган зотдир. Олқор, сигир тулупи қодирми бунга? Бу ясама «тангричалар» Улуғ яратганинг номига ярашмайди.

¹ Соғинч – мақсад, ният

² Ёбони – бу ўринда: ибтидоий, ваҳший

³ Тўрали киши – сайдаб олинганд, йўл-йўриқни, урф-одатни билгир киши; давлат одами

— Ўйлаб сўйла. Ўғуз! Ясама ёғочларга ишонмаслигинг мумкин, бироқ хоқон отант ва улусга қарши бора олмайсан. Ишончнинг моҳиятини мен ҳам биламан, бироқ у элнинг қўлида ҳамма нарсани кесиб-тұғраб ташлайдиган қиличдир. Сен элиг, хоқон бўласан. Бу тушунчанг билан ўз келажагингни мавҳ этасан.

— Бу фикримни отамдан кейин ошкор этсам, «Хон отасининг тутсуфини¹ – васиятини бузди, хоқонлигига орқа қилиб ишончимизга ҳужум қилди», дейдилар. Эндиликда бирорвга мутелик жойим йўқ. Күшдек озодман. Қайси инончни танлаш ўз ихтиёrimda. Улусимизни ягона Тангрига ишонтиришдан бошқа истагим йўқ! Лойдан ясалган тангричаларга топингган элга хоқон бўлгандан кўра ўз ўзғир хаёлларимнинг беги бўлганим яхшиrok.

Услу Хожанинг юз қиёфаси тез-тез ўзгариб, кўзлари гоҳ оловланиб, гоҳ сўниб турарди. Кўрқув, севинч, умид бир-бирига қоришиб кетганди.

— Оғир йўлни танлаганингни, бу йўлдан қайтмаслигингни биламан, жигарим! Мен сени еру кўклар билими билан ошно этишга ҳаракат қилдим. Тўраларга қарши бор демадим. Ота-боболарингга қарши бор демадим. Йўқса оқибати манглай ёзувингга боғлиқ.

Ўғуз хон деди:

— Ўша кеча мен Ота Үнгурнинг борлигини кўриб, кўрганларимдан севиниб юксакларга қўтарилем. Отамдан тортиб ўтмишдаги барча буюкларимиз билан ифтихор этдим. Кечаси зиёфатдан сирғалиб чиқиб ортга қайтдим. Гулхан бошида, юлдузлар остида қамлар билан ёлғиз қолдик. Доно, билимдон кишилар экан улар. Мен сўзладим, улар тинглади, улар сўзлади, мен тингладим. Фикртушунчаларини англадим. Ёмғир тоши ҳақидаги гапларнинг ростми-ёлғонлигини билиб олмоқчи бўлдим. Улар менинг келажакда тахт эгаси бўлишимни билар, очиқчасига сўзлашар эдилар. Кўп нарсаларни билиб олдим. Тонг маҳали жиндай мизғиб олмоқчи бўлган эдим, ғалати бир туш кўрдим. Тушимда олдимдан нариги қирғоқларини кўз илғамайдиган бир сув чиқди. Нафас ростлаб улгурмасимдан оқ азмон отим сувга отилди, лекин туёғи ҳам ботгани

¹ Тутсуқ – васият

йўқ, сузмоққа ҳам ҳожат йўқ эди. Сув қотиб, гүё тошга айланган эди. Тулпор пинагини ҳам бузмай, чопганича нариги соҳилга олиб ўтди мени. Худди шу маҳал булутлар тарқаб кетди. Осмондан бир туйнук очилиб, ундан бошимга бир даста нур ёғилди. Нур ичидан уммонлардан ҳам теран, табассумли бир кўз менга тикилар эди. Бу кўзда осмоннинг бир парчаси денгиздек долғаланар эди. Тилга кирган ҳам ана шу осмон эди: «Ўз қули билан ясаган нарсаларига сифинганлар гуноҳга ботгандардир. Сени ер юзига ўз иродам, юксак руҳим, ялавочим қилиб жўнатдим. Улусга юз тут, уни тўғри йўлга даъват эт. Ўзингга мустаҳкам бўл, ўйлаганингни қил, қилганингта ишон. Бошинг устида мен бор эканман, менга ишончингни йўқотмагунча, кўкнинг, ернинг тартиботини бузмагунингча, сени ҳеч ким енга олмайди!» Шу пайт кўз бекилди. Мен байроғимнинг кўкда ҳилпираб турганини кўрдим.

Услу Хожа хаёлга толган эди. Анчадан сўнг Ўғузга боқиб:

— Таъбири яхши экан, лекин бунинг бир туш эканлигини унутма, — деди.

— Ҳожам, бу ягона туш эмас эди... Илгари ҳам шунга ўхшаш тушлар кўрадим, лекин сенга айтмаган эдим. Тушларга, сеҳру жодуларга эътибор бермаслигингни биламан, аммо ўша тонгда бошқа бир воқеа ҳам рўй бердики, мен эл орасига чиқиб ўз мақсадимни ошкор этмоқ фурсати етганлигини англадим.

— Бошқа не ҳол рўй берди?

— Қам Ота ва унинг чироқларини ранжитмаслик учун уларга тушда кўрганларимни айтмадим. Бироқ қизизи шундаки, Қам Ота ҳам меникига ўхшаш туш кўрган эди. У тушини яшириб ўтирмади: «Тангри нишон солган қўлдан кўрқмоқ керак! — деди у. — Сен кўкларнинг элчисисан, танланган зотсан. Бу менинг тушимда аён бўлди. Инжу сувининг бўйида икки оғоч бор эди — бири қайин, бири қарағай. Бироқ қайин ҳам қарағай каби кузда ҳам хазон тўқмай, ям-яшиллигича турар эди. Оғочлар ўртасида чоғроғ тепача ҳам бор эди. Унга боққанимда, кўкдан тепачага бир нур тушди. Тепача кўз ўнгимда улади¹, ёрилди, устида бир оқ ўтов пайдо бўлди. Ўтовда қўлингда Ёмғир

¹ Уламоқ — юксалмоқ

тошини тутганингча сен ўтирап эдинг, бутун улус ҳам сенинг рўпарангда эди». Шундоқ деди Қам Ота. Бошқа гапларни гапирганида, «кўнглимни кўтармоқчи» деб ўйлаган бўлардим. Бироқ бир тонгнинг ўзида ўхшаш туш кўрганимиз фалати эди. У тушида менинг хоқонлигимни кўрганини айтади, бироқ бу тушлар фақат хоқонлик билан боғлиқ эмас. Буни унинг ўзи ҳам билади. Фақат ошкор эта олмайди! Уни ошкор этмоқни Тангрим мендан кутаётир! Ортга чекинсам, Тангрининг йўлидан озган бўламан...

Услу Хожа ўз гапидан қайтмади:

— Сен қамларнинг ўз тушларини бошқаларга ўтказа олишини, фикрларини узоқ-узоқларга етказа олишларни билмайсанми, ахир? Уларни эшитсанг ҳам, ишонма! Мен ҳам битта қам бўламан! Ерларнинг, сувларнинг тилини биламан! Бироқ жодуга ишонмайман! Қамлар сени отангга қарши қўйсалар, эл жарга қулаб тушади.

Услу Хожа ундан Эркўндан кетиш пайтларини сўради. Ўғуздан эшитганлари уни гангитиб қўйган, аммо буни сездирмасликка уринарди. Унинг кўзи йўл кетди, хаёллар оғушида қолди. Ўғуз ва Қам Ота туш кўрган ўша саҳар у ҳам шунга ўхшаш туш кўрган эди. Бироқ у Инжуни сув билан эмас, қон билан тўлиб ётганини кўрган эди. Ўғуз бу қон дарёсидан қуийга қараб ҳам қўймай сакраб ўтган, кўқдан ёғилган бир даста нур оғушида ер юзининг нариги чеккасига қадар кетгандан-кетганди. Услу Хожа бу тушини шогирдига гапириб ўтирумади. «Ҳар дарёнинг бир кечуви бор», деб ўйлади. Албатта, бир нажот йўли топилса керак...

ЎҒУЗНИНГ ЎЙЛАНИШИ

Отасининг Бонуга совчилиги Ўғузни шошириб қўйди. Уч амакисининг уч қизи бор эди. Биргаликда вояга етган эдилар. Учаласининг ҳам кўнгли Ўғузда эди. Бир-биридан яширинча, Ўғуз мени танлайди, деган умид билан яшар эдилар. Ўғузнинг ўзига қолса, кичик амакисининг қизи Ойтожни танлаган бўларди. Қизларнинг энг кичиги бўлсада, энг гўзали, энг ақдлиси шу эди. Бироқ отаси танлаб бўлган эди. Унга қарши чиқа олмасди.

Ўғуз билан Бонунинг тўйи Сифноқда бўлиб ўтди. Тантана етти кеча-етти кундуз давом этди. Бахшилар Ўғузни мақташди. Юрт баҳодирлари тилларда достон бўлди. Узоқ-

яқиндан келган йигитлар от чоптириб лаззат олдилар, ўқ отиб ном чиқардилар, каманд ташлаб, ипак лиbosлар кийдилар. Сурув-сурув қўйлар сўйилди, меш-меш ичимликлар ичилди. Очлар, кимсасизлар тўйдирилди. Ойдан гўзал, сувдан тиниқ, тоғлар серкаси, элнинг эркаси Бону ўқ отди, Ўғуз беклиқ чодирини ўқ санчилган ерга тикди. Келинни ясатиб-безатиб, оп-олча¹ лиbosида, ёнида янгалари, чолгулар чалиб бекнинг оқ чодирига олиб келдилар. Ўғуз кун бўйи отини отга тутқазмай, ўқига ўқ етказмай, тизини ерга теккизмай, пойга қилди, ўқ отди, кураш тушди, каманд ташлади, елатма² ўйнади, сўнгра чўмилиб, кўёвлик ипак лиbosларини кийиб мурод ўтовига кирди. Бону ўтов ўртасида тик оёқда турганича, юзига чачвон тутганича уни кутмоқда эди. Ўғузнинг кириб келганини кўриб, унга яқинлашди. Қулини ўпмоқчи бўлди. Ўғуз қулини ўптирмади. Амакиваччасининг бошини кўтариб, чачвонини ечди, гулдек оппоқ юзларига боқиб:

— Тангри муродимизга етказсин, эй қиз! — деди.

Бонуни қўлларига олиб, кўкси баробар кўтарди, ёноқларини телбаларча ҳидлаб, лабларини унинг чўғдек лабларига босди, тириклиқ суви ичгандек бўлди. Бону амакиваччасининг бўйнига осилди.

Сўнгра қўллари бўшашиб, икки ёнга осилиб тушди, «Бўз бўрининг руҳи, мададкорим бўл!» — деди.

Ўғуз Бонуни шам ёниб турган хонага олиб кирди. Ёқасининг тумаларини очиб, қат-қат уст қўйлагини, ич қўйлагини, тўпифигача тушиб турган лозимини ечди. Тонгга қадар бир-бирларидан мурод ҳосил қилдилар. Тонг олатуронлигига Бону бошини бегининг кўксига қўйганича қўзичоқдек уйқуга кетди. Ўғуз чалқанча ётганича ўтванинг туйнугидан кўкка бокарди. Ўн беш кунлик ой уларни томоша қилаётгандек ўтов туйнугининг қоқ ўртасида қотиб қолган эди. Кўк ўтовни тўлдирган ой нурлари билан бирга бир парча оқ булутини ҳам жўнатган эди. Қиз Ўғузнинг кўксига бош қўйиб, орзусига етганидан шод ва баҳтиёр ётар экан, кўнгли таскин топиб, лаблари шивирлар эди: «Хоним, хоқоним, ботирим, тангриларимга минг шукурким, сени менга етказди!» Уч кеча-кундуз ўтвдан чиқма-

¹ Оп-олча — қип-қизил

² Елатма — тўй рақси

дилар. Уч кундан сүнг қоронгулик тушганда Ўфуз ўртоқлари билан дарада жүшиб оқаётган сувга энди. Бонунинг йўқотишини истамаган атру ифорларини муздек сувда ювиб ташлади.

Кунларнинг бирида Ўфуз Бонуга: «Тангриларим дема, тангрим дегин! Тўқсон тўққиз илоҳамиз йўқ бизнинг, факат битта Кўк Тангримиз бор, мен эса унинг элчиси, ялавочи бўламан! Бунга ишон, қабул қил, бошқаларга ҳам етказ!» – деди.

– Жоним сенга қурбон бўлсин, бироқ ишончимга дахл қилма, Ўфуз! Ўйлаб гапир! Улусимизни қутқариб қолган Бўз бўрини Тангри деганинг қайдан чиқди? «Эрим Тангрининг элчисидир», деган гапни айтсам, «Бону ақлдан озибди», дея мени тошбўрон қиласилар. Зинҳор-базинҳор оғзингга олма бу сўзни!

– Айтганимга кириб, менинг йўлимни тутмасанг, тўшагимизни бошқа қиласиз, – деди Ўфуз. – Энг яқин кишим, хотиним менга ишонмаса, эл-юрт қанақасига ишонади?

Ўша кундан бошлаб Ўфуз Бонуга яқинлашмади, бир неча кундан сўнг ўтовини ҳам бошқа қилди. Бону кундан-кунга сўлиб борарди. Эрининг ўзи билан бир ёстиқда ётмай қўйганини онасига билдириди, бироқ сабабини айтмади.

Қора хон буни эшитиб:

– Ўфуз сабабсиз бир иш қилмайди! Бонуни ёқтирамай қолган бўлса, иним Кузнинг ундан-да илгари қизи бор, ўшани оламиз, – деди ва ўша куниёқ иккинчи иниси-нинг қизини сўратди.

Иниси шундай деди:

– Каттамиз сен бўласан! Гапингни икки қилмаймиз. Тарчечак қурбони бўлсин Ўфузнинг.

Яна тўй бўлди. Яна Тарчечак отган ўқ санчилган ерга тикилган оқ ўтовда Ўфуз билан Тарчечак бир-биридан мурод ҳосил қилишди. Ўфуз уни ҳам ягона Тангрига топишишга, ўзини Тангри элчиси деб тан олишга даъват этди. Тарчекак ҳам уни ақлдан озган деб ўйлади. У ҳам Бонунинг йўлини тутди. Ўфуз оқ ўтовида тағин ёлғиз қолди. Қариндош қизларнинг ўз йўлидан юрганлиги Ўгузни чўқтириб қўйди. «Энди уйланмайман, етар!» – дея юртдан узоқлашди. «Пешонамга ёзилгани шу экан. Тангри

менга марҳамат қилмади, бироқ унинг йўлидан бошқа йўлим йўқ, у нимани раво кўрса, шуни қиласман», — дея ойлаб чўлларга чиқиб кетди. Отаси унинг ортидан одам солди, амакиларининг қизини хоҳламаса, бошқасини олиб берайлик деди, ўғлининг юртдан чиқиб кетгани чўктириб қўйди уни.

Ўғуз:

— Отам хафа бўлмасин, юртдан чиқиб кетганим йўқ, тенгдошларим билан ов қилиб, от чоптириб юрибмиз, яна бир бор уйланишни эса ақлимга сиғдира олмайман, хоқон отамга керак бўлганим заҳоти қайтиб бораман, — деди.

Бир куни еб-ичишдан, от чоптиришдан толиқиб, ўрмонда қайнин дараҳтининг остида ҳордиқ чиқариб ўтипар, мудраганича қушлар овозини тинглар эди. Бу қайси қуш бўлди экан? Қуш тин олмасдан фақат бир сўзни такрорларди:

— Тур кет! Тур кет!

Қўқисдан қайнин дараҳтининг шохлари осилиб, Ўғуз тепасида Эркунда кўргани кўзни, Кўк Тангрининг кўзини кўрди. Бу кўзнинг газабидан қўрқмоқда эди. Аммо ҳаммаси ўша кўргани каби эди. Теран, қатъий, жозибадор... Тангрининг кўзи гўё: «Сиқилма, ҳар нарсанинг ўз муддати, чораси бор, уйғон, юртга қайт!» — демоқда эди. Ўғуз кўзини очиб қайнин дараҳтининг баҳор елларида майин-майин силкинаётган новдаларига, тоза япроқларига боқди. Ўрнидан туриб, ўртоқларини чақирди-да, юртга йўл олди. Йўлнинг ҳам энг қисқасини танлади. Тушда кўрганларининг оқибатини билмоққа ошиқарди. Кентда суви тортилиб қолган дарё соҳилида қизлар кир ювмоқда эдилар. Соҳил бўйига бир тўда капалак қўнганга ўхшарди гўё. Чўлларнинг бутун гул-чечаклари битган эди бу ерда. Булар Қора хоннинг учинчи иниси Ўрхоннинг қизи Ойтожнинг канизаклари эди. Ўғуз бу гўзаликка боқмасдан ўтиб кета олмади, Ойтожнинг жилмайганича унга қўл силкиганини қўриб, юрагини эски хотиралар ўртади ва от бoshини ўша томон бурди. Ойтож унга яқин келиб деди:

— Хоқон отамизнинг эрка ўғли кимни изляпти? Бу ерлар ов қиласиган жой эмас...

— Амакисининг гўзал қизини изламоқда...

Ойтож аввал жилмайди, сўнг маъюс тортиб:

— Амакиларимнинг қизлари сабоқ бўлди менга. Шундоқ қизларни, фақат қизларнигина эмас, амакиларимни ҳам адойи тамом қилдинг. Энди ўз отамнинг ҳам адо бўлишини истамайман! — деди.

Ўғуз ториқиб кетган, дардини айтгани бир дардкаш излаб юрарди. Ойтож унинг айтганларини бажо келтиражагини биларди.

— Сўз очилган экан, эшит! Айб уларнинг ўзида. Менning ишончимга топиниб, гапимга кирмадилар. Йўлимни билмаган мени ҳам билмайди.

Ойтож ишонган каби:

— Шунинг учун ажрашдингизми? — деб сўради.

— Бошқа нима бўлиши мумкин орамизда? «Энди уйланмайман», деган қарорга келдим... Ким менинг сўзларимни англаса, ўлгунича менга содиқ қолса, ўша билан боғланаман. Учинчи дафъя ўқим тошга тегсин, уйланмайман!

— Тошга тегмайди! Сен барча қизларнинг севимлиси эдинг. Қайси биримизни танлашингдан баҳслашиб, талашиб-тортишардик. Улар катта эдилар, каттанинг йўли очиқ бўлади. Навбат менга келса, ўйлаб кўраман...

Ўғуз Ойтожнинг очиқ-социқ сўзларидан шошиб қолди, гап йўқ, элатдаги қизлар уялиб-чайналиб ўтирмасдан, тап тортмай сўзлар эдилар, бироқ ҳали гўдак ҳисоблаб юрган амакисининг қизидан бундай довюракликни кутмаган эди; унга илк бор кўраётгандек тикилар, балоғат булоғидан сув ичиб вояга етган бу қизни севишини ўз вақтида отасига билдираманидан ўксинар эди. Қўққисдан қайин остида кўрган тушини, бу йўл билан қаерга, нима учун ошиқиб келганини англаш етди:

— Гал сеники, Ойтож! Бошдан янгиш бўлди! Уларнинг қилганини сен қилмайсан!..

— Қайси йўлингни тутмадилар, мундоқ менга ҳам тушунтир!

— Уларга: «Мен яккаю ягона бўлган Кўк Тангрининг элчисиман», дедим, улар, «жинни бўлибсан», дедилар.

Ойтож жонланди:

— Сенинг кўкларнинг севгисидан яралганингга, элюртимизнинг нури эканлигинга ким шак келтира олади?

Бошқа бирорвга ўхшамаслигингни, танланган зот эканлигингни, яловочлик белгиси билан тұлиб-тошганингни нега күрмади улар?

— Сен күрган бұлсанг, менга шу етади, — деди Ўғуз.

Қиз күзларини олиб қочиб, майинлик билан деди:

— Мен сенинг бир бұлагингман. Нимани буюрсанг, ўшанга бош әгаман! Сенинг сирғанг қаерда бұлса, ўша жой менга қулоқ, сенинг тарофинг қаерда бұлса, ўша жой менга бош. Сен тош құйған ерга мен бош құяман!..

Ўғуз ҳеч нарса демасдан, қызни билагидан тутиб, күз очиб юмгунча ўз оғушига олди. «Түй керак эмас бизга», дея отини учирив кетмоқчи бұлды. Ойтож нима қилишини билмай, отдан қулаб тушмаслик учун уни маҳкамаш лаб олди. Ўғузга «сени дейман» деганидан сұнг ортга қайта оларми? Қизлар соҳилдан уларга лолу ҳайрон боқардилар. Ўғуз излаганини топған эди. Ойтож ҳар жиҳатдан унинг истагига мос эди. Ўғуз ворис бұлғанлиги учун ҳам отаси унинг бегона оиласардан уйланишини хоҳламас эди. Уни юртга қайтармоқ учун «кимни хоҳласа, олсин» деган бұлсада, ич-ичдан бунга норози эди. Ўғуз бирпасда миясида ҳамма нарсани ҳисоб-китоб қилиб чиқди. Юраги Ойтожнинг уни тушунганидан, унинг йўлини тутганидан, унинг йўлини тутажагидан туғилган севинч, янгидан юртга қайтиб, отасининг изтиробларига чек құяжагидан туғилган роҳат билан тұлиб-тошган, энди бемалол отини ўрдага елдириб борса бұларди... Бироқ ғойибдан бир овоз: «Сен Тангрининг элчисисан, фақат ўзингни ўйлама!» дея хитоб қиласарди унга. Ойтожни шу алпозда, ўғирлагандек олиб бориш ярашмасди. Бұлғуси хотинининг нариги амакиваччалари олдида тили қисиқ бұлмаслиги лозим эди. Акс ҳолда бу шошқалоқлиги билан Ойтожнинг отаси, ўзининг севимли амакиси Ўр хоннинг бошини эгіб қўймайдими? Ана шулар ҳақида ўйлар экан, отдан түшди, Ойтожни ҳам отдан олиб секин ерга қўйди. Қизиқки, Ойтож ҳам аввал уни олиб қочмоқчи бұлған йигитнинг сұнгра фикрини ўзгартириш сабабини тушунди. Ўғуз унинг наздида янада буюклашди. Ўғуз унинг тип-тиниқ күзларига тикилиб туриб:

— Кел, ҳаммаси эл-юрт одати бүйича, бұлғуси хотинманинг шаънига муносиб бұлсин, — деди.

Ойтож кафтларини бүғриқиб кетган ёноқларига босиб:

— Кел, ҳаммаси сен истаганингча бўлсин, — деди.
Ўғуз отига сакраб миниб, ўрдага чоптириб кетди.
Унинг қарори Қора хоннинг юрагига таскин бағишилади.
Бир неча кундан сўнг Ойтожни ясатиб-безатиб келин-
лик чодирига олиб келдилар.

Ойтож шу илк кеча: «Яккаю ягона бўлган Тангрига
ҳам жоним қурбон бўлсин, унинг элчисига ҳам», дея ўла-
ўлгунча Кўк Тангрига топинажаги ҳақида онт ичди...
Кўктангричиликнинг илк ўчофи аланга олди...

ОТА ВА ЎФИЛ

Ўғиз отаси билан юзма-юз ўтирад эди. Фил суюгидан
ясалган кенг эл тўри — тахт икки кишилик эди. Катта
йигинларда, хорижий ўлкаларнинг элчиларини қабул қил-
гандা, эл тўронларида Ойбека хотун ҳам Қора хон билан
ёнма-ён ўтиради. Хоқон бугун жуда хаёлчан эди. Гапни
нимадан бошлашни билмасди:

— Кулогимга яхши-ёмон сўзлар чалинмоқда, ўғлим!
Инончингга маҳкам, изчил эмаслигинг мени гангитиб
кўйди. Бу қадар ўлкага хоқон бўладиган киши инончга
таянмаса, ҳеч нарса қила олмайди! Юрагингни эзаётган
нарса нима, ахир, тушунтири менга! Икки қардошимни,
икки қанотимни қайирдинг! Қизларига қарамай қўйдинг.
«Кўйкимиз¹ бўла туриб қизларимизни ёлгиз қолдирди, айб
сенда, бошини бўш қўйгансан. Ҳадемай учинчи қардо-
шимизни қизидан ҳам ажрашади», — демоқдалар.

— Ўйлаганимни сўйлашни менга сен ўргатгансан, хо-
қон ота! Ер юзида яшайдиган Инсон болалари бир хато
қиладилар. Шайтон бизни йўлдан оздиради. Дунёнинг begi
бўлсак ҳам юрагимизни куллик, мутелик эгаллаб олган...
Қўшниларимизга боқ! Чинда, Ҳиндда, қизил юзли Тан-
кутда ҳам инонч инсоннинг буюклигини намоён этади,
улусга қудрат бағишилади, уни бирлаштиради. Бизда эса
ҳар уруғнинг ўз эгаси, лойдан, ёғочдан, теридан ясалган
бути бор. Тиз чўка олмайман уларнинг қаршисида!..

— Улуснинг кўзи бизга тикилган, Ўғуз! Эл-юртимиз
айнайди, биздан юз ўтиради. Сенинг хоқонлигингни қабул
этмайди!

¹ Кўйки — қуёв

— Мен рұхі ожиз кимсаларнинг эмас, яккаю ягона Тангрининг иродасига бүйсунаман! Чунки у мени ўз әл-чиси қилиб танлаган! Буни бутун әл-յорт билмоғи керак, ҳали билиціл олади ҳам!

— Тентак бола! Рұхларнинг ғазабидан құрқ. Элчиман деган жодугарларни, қамларни күп күрганман! Охири пуч бұлиб чиққан. Йүлингдан озма! Билагингда күч-қувват, бошингда зеҳну фаросат бұлса, уни тангриларимизга бағшида эт! Бу сен учун бир имконият. Яхши билан юрган етар муродға, ёмон билар юрган қолар уятта!

— Менинг яхшилиқдан бошқа йўлым йўқ, ота! Құрқмоқ менга ярашмайды. Элимизни бу боши-кети йўқ ёлғондан, бу қурама бутлардан қутқармоқ менинг зиммамга тушган. Бу манглайимга ёзилған! Кўз очиб дунёга келганимдан бери ана шу юқ остидаман. Мени бу йўлдан қайтариб бўлмайды! Ҳозиргача буни сенга ошкор этмадим, кўнглимда яшириб келдим. Сени хафа қилмоқни истамадим! Тангрининг иродаси билан ҳаммасини ўзинг англаб етарсан, улусимизни бу ёлғондан ўзинг қутқарсан деб ўйладим. Энди жим турмоққа ўрин қолмади! Бу йўлнинг муқаддаслигини, Кўк Тангрининг иродасига боғлиқ эканлигини англарсан, мендан хафа бўлмассан.

Отаси жим қолди. Қизишлоқ билан Ўғузни йўлга солиб бўлмаслигини англар, сўйларининг¹, барча қариндош уруғларининг, хоқонликнинг тақдирин ана шу инонч масаласига боғлиқ эканлигини унга тушунтироқчи бўларди:

— Мени хоқон қилған кўк хоҳиши билан муқаддас тұраларимиздир. Охирги кунимгача эл-кунимизни² ҳимоя қиласман! Тўраларимизга, дузанимизга³ туққан ўғлим қарши чиқса ҳам енгилади; элнинг кўнглига, инончига қўл кўтарса, қўли кесилади, үлдирилади, умиди тупроққа кўмилади. Буни англа ва ёдда тут!

— Манглайимизга нима ёзилған бўлса, шуни қурамиз, ота! Мен онадан Бир Тангричи бўлиб туғилдим. Ундан бўлак инончим йўқ. Улуғ Тангри мададкоримиз бўлсин!

Қора хон ўрнидан сакраб кетди, Ойбека уни қўлидан ушлаб ўтқазди:

¹ Сўй — насл, уруғ; бу ўринда халқ маъносида

² Эл-кун — давлат

³ Дузан — ҳокимият тизими, қоида-қонун

— Қора хон! Сен элигсан, тұрамизни, ишончимизни ҳимоя қилувчи ҳам сен бұласан! Менсиз ёрлик¹ чиқара, фармон бера олмайсан. Қизишка, мени әшит! Үғуз ҳам билмайдиган бир сирни очаман сенга! Йигирма йил ичимда сақладаб келдим. У туғилганда нимжон эканлигини билардинг. Нега бунақа, деб сұраган әдинг, билмайман, деган әдим. Бу рост әди!

Гұдак мени эммас әди. Юзини мендан олиб қочарди. Күкракларим шишиб, күйлагимга сифмай қолган әди. Эгилганды ёқам хұл бұлиб кетарди. Йиглайвериб, рухларга ёлворавериб тамом бұлган әдим. Чодиримиздаги Тангриларга тиз чүкавериб тиззаларим яра бұлиб кетган әди. Үғлимнингтирик қолишига ишончим йўқ әди. Бир кечада шу гұдагим тушимга кириб: «Сутингни эмишимни истасанг, бутлардан йироқлаш, яккаю ягона бұлган Кўк Тангрига топин, уни танигин!» — деди. Уч кечада кетма-кет шу сўзларни айтиб чиқди менга. Сендан яширинча үғлимнинг Кўк Тангрисига топиндим, унга юкундим. Айтсам ишонмасдинг, мени ҳам, үғлимни ҳам ўлдириардинг. Кўлимни кўкка чўзиб: «Улуф Тангрим, Кўк Тангрим, сутимни үғлим истаганича уютиб, лаззат баҳш эт!» — дея ёлвордим. Шу сўзлар оғзимдан чиққан заҳоти Үғуз мени эма бошлади. У Кўк Тангрининг танлагани, севимлиси эканлигига ишондим. Бир ёшида бурро гапира бошлаганини эсдан чиқардингми? «Мен Кўк Тангрининг ерга ёғдирған нури бұламан. Шунинг учун отимни Үғуз кўйинг!» — дегани хотирингдан күтарилидими? Тил чиқарганидан севиниб кетиб, унинг нима деганини ҳам ўйлаб үтирай: «Бизнинг уруғ-аймогимизда бундай кўркли бола туғилмаган», — дединг. Юришлар, жангжадаллар, хоқонлик ташвишлари билан унинг қандай улфайганини ҳам сезмадинг. Үғузнинг кечада кундуз Ёлғиз Тангри деб, Кўк Тангрини таниб, тенгдошларига ҳам шуни англатгани, тушларидан ҳам нуқул «яккаю ягона улуф Тангрига ҳамду санолар», деган сўзларига парво ҳам қилмадинг. Үғлингнинг чехрасидаги Улуф Тангрининг нурини кўрмаяпсанми? Бу қадар жасорат, эрк, куч-қудрат, бекиёс билимнинг боиси не? Үйлаб кўрдингми? Үқ отища, кўндарма² улоқтиришда, қилич чопища, билимда унга

¹ Ёрлик — бу ўринда: қарор

² Кўндарма — наиза

ким тенг кела олди? Буларнинг барчаси Кўк Тангри билан боғлиқ эканлигини, ўғлингнинг бошқа тенгдошларига ўхшамаслигини англамоғинг керак эди! Ўгуз сендан кейин эл-юртимизнинг ҳам, ер юзининг ҳам таянчи бўлади. Буни қамлардан ҳам, чин афсунгарларидан ҳам эшитганман. Неча йиллардан бери чинликларнинг: «Турқда бир гўдак туғилди, у ер юзининг дузанини ўзгартиради», деб изғиганларини, ҳар томонга бош урганларини унутдингми? Улар фақат хоқон саройига тумшуқ суқа билмадилар. Излаган гўдаклари сенинг хонадонингда туғилиши мумкинлиги хаёлларига ҳам келмади. У пайтдан бери кўп сувлар оқиб ўтди. Ўгузнинг ёшига қараганда доно эканлигини, юрган йўлига нур ёғилишини сендан ўзга кўплар кўрган. Майли! Сени айбламайман. Умринг жанг-жадалларда ўтди. Энди хушёр бўл! Биз яккаю ягона бўлган Тангрига топинамиз, сен ҳам унга топин!

Қора хон бошини чанглаб тахтга чўкиб қолди:

— Остимда тахтим чўккан экан, билмаган эканман!

Тушагимдан хотиним бегона бўлган экан, бехабар қолибман! Туқсан ўғлим иончимиздан қайтиб, ҳовлиқиб ўзини ялавоч деб юрган экан, ғофил қолибман! Ё Улуғ руҳлар, қайси гуноҳим учун?

Ойбека хотун хоқоннинг бу қисқа сукутидан, ўйга толганидан дадилланди. Қўлини хоқоннинг бўйнига солиб:

— Тақдирни такбир қилиб бўлмайди, хоқоним! — деди.

— Ўғлинг билан хотинингнинг ишончини йиллар бўйи англамаган экансан, бундан кейин ҳам англамай қўя қол! Бизни десанг, бутун улусингни бой берасан. Ўз хонадонингнинг ўн йиллаб бошқа бир ионч билан яшаб келганидан сенинг бехабар эканлигинга ҳеч ким ишонмайди. Эл гажиб ташлайди сени! Душман бош кўтаради. Ҳаммасини яратганинг ихтиёрига қўй! Амру фармон ундан келсин. Ким билсин, балки Ўгузни ҳам улуснинг йўлига солиб олармиз...

Ойбека хотун йиллар бўйи, қайта-қайта мулоҳаза қилиб, энди ошкор этаётган бу сўзларидан бошқача йўл ҳам топа олмасди. Хоқон буни тушунди. Ичидаги оташни юзга чиқармади, бироқ кўнглида хотини, ўғлини ҳам кечира олмас эди: «Ўз ўғлимнинг қотили бўлиш манглайимга ёзилган экан-да», деган хаёлга борди.

Тўрага кўра эл раҳбарлиги билан ионч раҳбарлиги-

нинг бир бўлиши¹ юртга эрк, қувонч баҳш этарди. Бироқ эндиликда Қора хоннинг оёқлари остидан ер қочгандек эди гўё. «От ўрнини той босар», дейдилар. Қайси той? Иончидан қайтган ўғилми? Бўйини бўйимга рост кўрганим, ўз тахтимга мос кўрганим, севимли ўғлим! Элни сенга топширмоқчи бўлиб турганимда, қўлимни қисقا, тилимни қисиқ қилганинг нимаси? Бир менинг ўғлим учун бутун элнинг маҳв бўлишини истайсанми? Ёғийлар кулишсинми устимиздан? Тўрани билмайдиган хоқон бошқаларни қандай идора эта олади? Бир томонда халқ, тўра, хоқонлик, бир томонда эса Ўғуз... Отасига қарши чиққан, уни тингламаган, бир сўзи билан элнинг қонун-қоидасини бузиб, ерларимизни ёғийларга талатиб қўймоқчи бўлган Ўғуз! Йўқ, бу сўз элга ошкор бўлмаслиги лозим! Йўқса хоқонлик қўлдан кетади! Бунг чидаш мумкинми?»

Қора хон бундан қўрқмасди. Босиб ўтган йўлларини, эл учун қилган хизматларини ўйларкан, ўлим ваҳимасини ёддан чиқараарди. Ўзини танигандан бери юрт дардида яшаган, оғир жант-жадаллардан, ўлимлардан ўтиб келган эди. Бугун бўлмаса эртага хоқонликни топширади шундок ҳам! Уни ўйга ботирган нарса элнинг эртанги куни эди. Эл янгидан синиши, бир байроқ остида бирлаштирилган тупроқлар янгидан душман қўлига ўтиши мумкин эди. Элни ҳимоя қилмоқ учун у, керак бўлса, ўз жонини Азроилга ҳам топширмоқча, ўз ўғлидан ҳам кечмоқча тайёр эди. Бошқалардан қонун-қоидани талаб қилган хоқоннинг ўз саройида иончга хиёнат рўй берганлиги маълум бўлса, ота-боболарнинг, улуғларнинг барча саъй-ҳаракатлари пучга чиқарди. Бундан кўра ё ўзи, ё Ўғузнинг бу майдондан кетиши хийла тўғри йўл эди. Элни десинми, ўғилни? Ҳозир у учинчи йўлни топа олмасди... «Демак, иш катталашиб кетмасдан Ўғуз ўзи Улуғ деган Тангрисининг ҳузурига қайтмоғи лозим. Эл ўғилдан афзалдир». Лекин буни қандай амалга оширади? Йиллар бўйи суйиб-эркалаб келган ўғлига қандоқ қилиб қўл кўтара олади? Ундан сўнг қандай яшай олади? Йўқса нима қилмоқ керак? Минглаб юртдошлари, уруғдошлари қон тўкиб, қурбон бериб ҳимоя қилгани, юксалтиргани эл-юрт бир саркаш ўғил ўйини

¹ Қадимги туркларда хоқон халқининг диний раҳнамоси бўлиб ҳам ҳисобланарди.

билан вайрон бұлсинми? «Улуғ рухлар, мадад беринг, ҳал этинг бу ҳал бұлмас ишни! Үглиниң қотили деган иснод-га қолмайин!»

Эндиликда Қора хоннинг бу ишни тезроқ бир ёқлик қилиш учун юкуниб-ёлворищдан бошқа йүли қолмаган эди.

* * *

Куз хон билан Кур хон үз қыздарига Үфуз боқмай құйғанлигини, кичик инилари Үрхоннинг қизини олиб, түй-томушолар билан алоҳида үтовга бошлаб борганлигини, үз қыздарининг күнглини олмай, уларга совуқ муомала қила бошлаганини оғриниб қабул қылган эдилар. Бұлғуси хоқон Үфуздан юз үгирған бұлмасалар-да, буни унинг юзига солмасалар-да, аммо ич-ичдан ранжиган эдилар. Қыздарининг үчини олмоқ фурсатини пойлар, бироқ Қора хондан чүчиб ғинг дея олмасдилар. Үгизнинг Ойтожға уйланиши уларнинг наздидә кичик инилари Үрхонни ҳам душманга айлантирган эди. Гуноҳ унда, унинг қизида деб билардилар.

Эл яйловға күчиши арафасида Үфуз отасига тоғларнинг ови тугамасдан, ҳалойиқ яйловларни макон тутмасдан аввал үз үртоқлари билан Иссиққұлға овга боражаги-ни билдириди. Үтган баҳорги сафардан бери күнгли үша тоғларда қолган эди. Отаси билан гаплашиб олғандан бери уйға сиғмас, паришон бўлиб қолган, юртдан узоқ-узоқларга кетгиси келарди.

Қора хон, «кетсину қайтмасин» деган хаёлга бориб, «майли», деди. Үфуз ов деса ҳам, овга бормади. Қанчадан-қанча оғир жангларга бошлаб борган йигитлари билан бир йил аввал элан-қаран кечиб үтган йўлларини бир неча кунда босиб ўтиб, Хонтангри оғушидаги Эркүнга, Ота Магорага етиб борди. Эркүн водийсида ов овлади, қуш қушлади, ерли беклар, қамлар билан ажойиб кунларини ке-чирап экан, барчани яккаю ягона бўлган Кўк Тангрига топинмоққа чақирди. Қам Отани ҳам ишонтиришга ҳара-кат қилди. Шу ердан йўлга чиқмоқчи, ҳамма нарсани шу ердан бошламоқчи эди... Улар үз сўзларини англамаган-ликларини кўриб: «Бу қўғирчоқлар, ясама ёғочлар Ярат-ган бўла олмайди, булар элни юксалишдан тўхтатади»,

дея ўзини телбага солиб, Ота Мағорадаги түқсон түққиз бутни уриб синдириди. «Қаранг, Күк Тангри мамнун бўлмоқда, сизнинг бутларингиз эса ҳатто ўzlарини ҳам ҳимоя қила олмайдилар», дея ўртоқларини бошлаб кетди. Эл маскан тутган яйловларни айланиб юриб, қаршисидан чиққан бекларни Күк Тангрига топинишга чақирди. Ишончли, маънодор сўзлари қаршисида лол бўлииб қолган кимсаларнинг ёғоч бутларга бўлган сўнгги эътиқодларини ҳам остин-устун қилиб ташлади: «Ота Унгур бундан сўнг қўғирчоқлар, бутлар сақланадиган жой эмас, Улуф, гўзал Күк Тангрининг ўчоги, эл билимининг, битикларининг хазинаси бўлиб қолади», – деб эълон қилди.

Бу ёз Қам Отанинг дунёси остин-устун бўлиб кетди. У Қора хон билан бўлгуси хоқон ўрталиғида қолган эди. То-пиниб келган бутларининг ҳолига йиғлар эди. Тағин бир томондан: «Ота Мағоранинг муқаддаслиги оёқ остида топталса, ким менинг ёнимни олади, эл орасидаги нуфузим, обрўйим нима бўлади?» – деб ўйларди... Чопар жўнатиб, ҳаммасини Қора хонга етказди.

* * *

Ҳар киши ўз юкини йифиштирган, қолганларга охирги топшириқлар берилган, ўтов чиғлари даста-даста қилиб боғланган, кигизлар буқланиб ўралган, сафар чоғи етганигини сезгандек ўз эгаларига қараб-қараб қўяётган отлар, хачирлар, бепарво кавшанаётган наслдор туялар, буғроларнинг баъзилари тушовланган, баъзилари дараҳт ёки қозиқларга боғланган эди.

Қора хоннинг сон-саноқсиз жанг ашёлари, қурол-яроғ, хазина, уруш аравалари хоқонлик чодирининг ён-атрофини қуршаб олган эди. Тонг отиши биланоқ эл йўлга тушарди. Сафар олдидан буюк хоқон Сигноқда охирги машваратини ўтказмоқда эди. Қариндошлари, уларнинг бола-чақаси, энг яқинларидан бошқалар машваратга чиқарилмаган эди. Сафар билан боғлиқ кенгашларда хоқоннинг яқинларидан ўзгалар иштирок этмас эди. Шу боис ҳам бундай кенгашлар узундан-узоқ, кутилмаган баҳс-мунозаралар билан давом этарди.

Шу оқшом Куз хоннинг қизи Бонунинг уйида бошқа бир йифилиш ҳам бўлаётган эди. Куз хон хоқон хузурига

боришдан олдин қариндоши Кур хонни ҳам ёнига олиб қизиникига ташриф буюрганди. Қизининг күнгли синиқлигини күриб, сабабини сұраган, тайинли бир жавоб ола билмагач, құшни уйдан жияни Тарчечакни ҳам чақыртирган эди. Үғузнинг икки «бепушт» хотини оталари билан юзма-юз үтирап эдилар. Ҳар қанча сир тутсалар ҳам, ахволни бундан буёғига яшира олмасдилар. Ябғу хоқоннинг авлоди үлароқ сафарда бұладими, дала-тоғда бұладими, улуснинг тұрасига садоқат руҳида улғайған эдилар. Иончға путур етса, ота-боболари әл бошида тұра олмаслигини яхши англардилар. Бұз бүрига, бутларга, улуғ руҳларга сидқидилдан топинишни шараф деб билардилар. Құш каби озод, номусли-ҳәёли бұлыб вояға етган эдилар. Фавқулодда ҳодисаларға дуч келиб, қайғуга ботиб қолғанларида ҳам үзларини йүқотиб қўймас, ичдагиларини ошкора қила-вермасдилар. Әл бир овозда «ху» дея тұқсон тұққиз тангриға юз тутгани маҳал күзлари ёшланиб кетадиган бу қизлар үзларини ташлаб кеттегандын күра күпроқ улуснинг иончидан юз үтирган Үғуздан ғазабда эдилар.

Иккінчи томондан болаликдан үзларининг күз нури бұлған, мардлиги, ақду фаросати, ҳалоллиги әлдан-әлга шоён бұлған Үғузни юракдан севар эдилар. Айниқса, Бону күпроқ әзиларди. Унинг Үғуз билан бешкертти эканлигини ҳамма биларди. Йиллар бүйи балоғатта етганида Үғузнинг нишонлиси, кейин эса хотини бұлиш орзуси юрагини орзиқтириб келар эди. Үнга күнгил берганида, үқ отиб оппоқ беклик чодирни қурганида, қип-қизил түйлик либосида үша чодир әшигидан кириб борганида үзини дунёнинг эңг баҳтиёр кишиси деб ҳисоблаган эди.

Қизлар ҳар қанча яширсалар-да, охирида ҳаммасини оталарига сұзлаб беришдан бошқа йўл қолмаганлигини тушундилар. Күзларидан дарё-дарё ёш оқарди. Ҳаммасини айтиб бердилар. Оға-инилар: «Бу эътиқод иши эмас, қора булатдир, улуснинг устига бостириб келаётган ажалдир, буни оғамизга ошкор этишимиз керак», — дедилар...

* * *

Үғуз билан отаси үртасига тушган совуқчилик, Ота Мағорада бўлиб үтган воқеалар әл-улусдан аввал Чинга этиб борди. Тұғрироғи, бу хабар Чиндан ҳам олдин Таб-

ғачга етган эди. Табғач Чин билан Турк орасидаги бир эл эди. Ўзларини туркка яқын тутсалар-да, илдизларини унүтиб, чинликдан кўра мутлақ чинпараст бўлиб кетган эдилар. Илдизлари турк эмасми, ахир! Ўгузга қолса, Чинда давлат қурғанлар, унга бир минг беш юз йил бошчилик қилғанлар, хилма-хил, дабдабали Чин номи билан пардаланган кўк фарзандлари, сулолалари ҳам турк уруғидан тарқаган, Чиннинг фаровон, тўқ турмуши машаққатли чўл ҳаётини унутишларига сабаб бўлган, замонлар мобайнида ўз изларини, ўзликларини йўқотиб, чинликка айланниб қолган эдилар. Ростини айтганда, бу тафйиротга қарши эътиroz ҳам йўқ эди. Чунки ҳокимият, яхши кунлар олдида уруғ суриштиришни майда иш деб ҳисоблардилар. Дастрраб Чинни ўзимизники қилиб оламиз деган фикрда яшаб келган бўлсалар-да, аксинча, дарҳол ўзлари чинликка айланниб қолар эдилар. Айни пайтда ирсий хотира уларни бу бегона элда ном-нишонсиз сингиб кетишиларидан аспар эди. Даشت билан Чинни яқинлаштириш истаги ана шундан туғилган эди. Бинобарин, чин тарафдорлари билан бир қаторда ана шу алоқадорлик орқали Чиндаги ўз уруғдошларини кучайтириб, уларнинг сафини орттиришини истайдиганлар ҳам бор эди, шу йўл билан Чинни ўзгартириб, турклаштиришларига ишонар эдилар.

Чиннинг шимоли-фарбидан келган Табғач элчилари Ўгузга йўлда етиб олдилар. Элчибоши очиқ-ошкора сўз бошлади:

— Улуғ Чин императори сизга байроқ, хоқонлик бермоқчи. Жангчи йигитлар, қурол-яроғ — нима истасангиз, ҳаммасини! Байроғингизни қайга тиксангиз, биз ёнингизда бўламиз, сизга ёрдам берамиз...

Ўгуз ғазабга келди:

— Сиз ақлдан озибсиз! Бизнинг битта элимиз бор, ўз байроғи, қўшини, мард йигитлари, эрки, кўрки билан! Унинг тепасида менинг отам турибди. Мен хоқон эмасман! Унинг аскарларидан бириман!..

Ўгуз буни Чин элчисига айтди. Ўз ичида эса: «Този каби ҳид олибдилар, отамга қарши қўймоқчи бўляптилар мени. Отам соғ-саломат, оёқда маҳкам турганида, унинг жаназасига шошмоқда бу олчоқлар!» — деб ўлади. Дарҳол отаси билан сўзлашмоқча қарор қилди. Юришларда от

миниб ёнма-ён сайдар этганларини хотирлади, юртга қайтиб бориш учун ошиқди. Қайси йул билан бўлса-да отасининг кўнглини топмоқчи эди!..

* * *

Хоқон саройида оила яқинларининг, Ябгу хоннинг пушти камаридан тарқаган қариндош-уруғларининг, сўйбоши, тархон¹, маслаҳатчилар иштирокидаги машварат давом этарди. Инилари билан келинларининг, кечикиб бўлса-да, зиёфатга келганликлари Қора хоннинг кўнглини кўтарган эди. Ойбека хотуннинг сўл томонида учала келини юзларига енгилгина чачвон ёпганча ўтирад эдилар. Зиёфат ярмидан ўтган, емаклар ейилиб, ичимликлар ичилиб бўлган эди. Бироқ Қора хоннинг қадаҳи узлуксиз тўлиб-бўшамоқда эди. Кўзадаги арғувоний шароб билан ичини ювиб тозаламоқчи эди у гўё.

— Аёлларимиз чачвонга одатланмаган. Келиним каби эмас, иниларимнинг суюкли қизлари каби сиқилмай ўтиринглар!..

Келинларининг титроқ қўллари чачвонларига чўзилди. Қора хон сўраб қолди:

— Нега аввал тушган келинларим Бону билан Тарчечакнинг гўзалликда Ойтождан илгари бўлса илгари, аммо кейин эмасликлари Ўғузни қаноатлантирилди. Тўрамизда бир хотинлилик бор эди, бироқ раъийга қарадик, Ўғуз икки карпа уйланди.

Аммо шунга ҳам қаноат қилмай, нега яна учинчи марта уйланди, кичик инимизнинг қизига кўнгил берди, кунларини у билан ўтказаётир?

Келинларнинг бошлари ерга эгилган эди.

Ўқ камондан чиққан, айтиладиган сўз айтиб бўлинган эди.

Қора хон Ўғузни охиригача тушуниб етмоққа, қардошлирини ранжитган бу масалани ойдинлаштирилмоққа уринарди. Иниларига ўгирилиб:

— Билагимнинг қуввати, белимнинг қиличи, суюнган тоғим — иниларим! Сиз ҳам билмайсизми бунинг сабабини? — деб сўради.

Куз хон ўзларидан илгари хоқон сўз очиб қолганидан

¹ Сўйбоши, тархон — қўшин бошлиқлари

севинди. Аммо айтмоқчи бүлган сұзларини кейин ташлади ва деди:

— Буюк хоқон, келинларингнинг үзи айтсин. Улар билганини биз билмаймиз.

Хоқон Бонуга юзланди:

— Сен гапир-чи, катта келиним!

Бону құзини ердан узмай деди:

— Сұрамасанғиз айтмас эдим. Гап ёқтириш-ёқтирмасликда әмас. Тилим танглайымга ёпишиб қолсин... Бошимизни қора булутлар босмоқда, хоқоним!

Эндилиқда бу машвараттаға Үғузнинг Ойтожга уйланиши шунчаки құнғил иши әмас, балки иноңч билан боғлиқ эканлиги, аввалғи хотинларини ҳам иноңч туфайли ташлаб кетғанлиғи аён бүлгач, құтариған ғала-ғовур, пи-чир-хисирлар саройнинг түридан қуисига оқиб келаётганини құрган Бону ғайбан юрагида Үғузга бүлган севгининг нафраттаға айланғанligини ҳис этди, бу гап ичкаридан, саройдан чиқиб, юртга, улусға тарқашыға шама қылар экан, хоқон бобоси олдидә Үғузнинг айбини янада бұрттириб құрсатишиға уринарди:

— Жоним оёғингга пояндоз, хон бобо. Иноңчсиз әл бүлмайди, әлсиз хоқонлик. Үғузнинг йүли тұрага, әлга, сизға қарши. Уни үзимдан құра ҳам күпроқ севсам-да, Сизни, юртни үндан ҳам күпроқ севаман. Үғуз иноңчимиздан воз кечди, бизга: «Күк Тангрининг йүлини тутиңг. Менинг як-каю ягона бүлган Тангримни танимасанғиз, мен ҳам сизни танимайман», — деди. Мен: «Күкда Тангри бүлмайди, Күкнинг қаерида үтиради Тангри?» — дедим. Унинг муқаддас бутлардан узоклашуви, сени месимай қүйғанлиғи бизни ғазабға келтирди. У эса бизни ташлаб кетди. Ойтож унинг ҳукміга қулоқ солиб, биртангричи бүлди. Үғуз ҳам унга боғланиб қолди. Үғелингиз билан унинг севимли хотини эндилиқда бошқа бир иноңчға топинмокдалар. Аллақачон ота-боболаримизнинг йүлидан чиқиб бүлғанлар...

Қора хон кичик келинидан сұради:

— Тұғрими шу гаплар?

Күркүвдан Ойтожнинг дами ичига тушиб кетған эди:

— Тұғри әмас, буюк хоқон! Үғуз менинг үзимни севиб қолди. Катта келинлар севилмасликларини бұрттириб иноңчға боғламасынлар.

Қора хон бўкириб юборди:

— Энди сизнинг қайси бириңизга ишонайлик?

У келинларнинг ҳақ эканлигини билиб турса ҳам бўкиргандан бўкирар эди. Ойбеканинг сўзига кириб, бу ишга эътибор бермай келганини, Ўғузни ўз ихтиёрига қўйиб хато қилганини англаб етган эди. «Тўғри айтиётир келиним! Улуф руҳлар мени ҳам, элни ҳам тарқ этмоқда. Ўғлим фақат инончимизнинггина эмас, насл-насабимизнинг ҳам душманига айланди. Кечак буни мен билан хотиним билар эдик. Бугун қариндош-урулар, аъёнлар, маслаҳатчилар, хизматкор-чўрилар ҳам билди. Эртага бутун эл билади. Устимга сел босиб келмоқда. Бугун тўхтатмасам, эртага кеч бўлади».

Сўзга қариндошлари аралашди. Кун хон деди:

— Улусимиз бу йўлда қонлар тўккан. Ер юзида байроғимиз баланд ҳилпираб туриши учун юз йиллар давомида авлодларимиз жон фидо этганлар. Гап фақат бир қизда бўлса, кечириш мумкин эди. Юзта қиз қурбон бўлсин Ўғузга! Бироқ ота-боболаримизнинг, ер-кўкнинг руҳи ранжимоқда биздан. Йўл топ, буюк хоқон. Сен йўл топмасанг ҳар бир киши айрилиб ўз йўлдан кетади. Парча-парча бўлиб, бошқаларнинг қулига айланамиз.

Кур хон деди:

— У бир лашкарбошидир. Жангга қўшинни сиз эмас, у бошлиб боради. Унга ишониб қўшинни топширсангиз оқибати не бўлади?

Қора хоннинг бош маслаҳатчиси Улутурк бундай баҳсу мунозараларни кўп кўрган эди. Гап нишаби қаёққа кетаётганлигини олдиндан сезарди. Оға-инилар оғзидан қон ҳиди келаётганлигини пайқаб, беихтиёр кўзлари ёшга тўлди.

Хоқон қўлинини баланд кўтарди:

— Ўғлим вояга етгунга қадар эркалатиб қўйдик. Уруғимизнинг давомчиси сифатида яхши кўрдик. Тенгдошларидан ажралиб турарди. Кучли, мулоҳазали, хоқонликка муносиб йигит эди. Лекин унинг юрагига шайтон ин қурган экан, пайқамай қолибмиз. Хўш, менинг ўрнимда бўлганда сиз нима қиласдингиз?

Оға-инилар вазиятни тушуниб турадилар. Ҳаммасига ўзлари йиллар бўйи гувоҳ бўлиб келган эдилар. Айни пайт-

да ушбу кенгашда қатыйй бир сұз айтишга ботинмай турардилар. Улар бошқача йүлни танладилар. Кур хон деди:

— Менға қолса унинг кечирилмас гуноҳидан кечган бўлардим. Бироқ сен аҳволга ота сифатида эмас, эл, инонч раҳнамоси сифатида баҳо бер.

Қора хон «воҳ, номард иним!» деб ўйлади. «Куруқ билан айбламаяпсан Ўғузни. Инонч бир тузоқ, холос. Мендан сўнг тахтга чиқиш истаги қутуртириб қўйган сени. Ўз пушти камарингдан бўлганида бу қадар жасорат билан гапирмаган бўлардинг». У шундай деб ўйлар, бироқ ўйлаганини айта олмасди. Орага Ойбека тушди:

— Гапга аралашмоқчи эмас эдим. Лекин бу нарса ота билан ўғилни бир-бирига қарши қилиб қўяди. Қон тўклиди, қурган хоқонлигимиз қулаб тушади. Ўғузнинг ўзидан эшитмай туриб, фақат келинларнинг гапи билан ки-фояланмак хато бўлади. Чопар жўннатайлик, Ўгуз келсин, уни ҳам тинглаб кўрайлик.

Гўё худди шу сўзларни кутиб турган эдилар. Ойбека гапини тугатган заҳоти ташқаридан хабар етказдилар:

— Чопар келди!

Ойбеканинг юраги ортга тортиб кетди. Чопар яхшилик келтирмаганлигини англалиди. «Ўғуздан келган. Унинг сўзи бу кечанинг тортишувларига чек қўяди». Кўзлари тиниб, тахт ортига суюнди.

Қора хон сўради:

— Кимдан келибди чопар?
— Қам Отадан.

Қора хоннинг юраги ниманидир сезди. Чопарни яқинлари орасида эшитишни истамасди.

Қам Отанинг букиб муҳрланган тери битигини очди, мактубга шошилинч кўз югуртириб чиқди, бошқаларга ўқиб бермасдан, чопарга:

— Ўзинг тушунтири, — деди.

Чопар деди:

— Ўгуз келди, Ота Мағорани вайрон қилди, улуғ руҳларни ранжитди, бутларни, санамларни синдириб ташлаб, Қам Ота билан бекларга: «Ягона Тангрига топининг!» — дея амр этди.

Қора хоннинг ранг-рўйи қулидаги ошланган тери каби оқариб кетди:

— Ўғуз ҳозир қаерда?
— Иssiққўлдан ўтиб, Олатов яйловлари сари келмоқда.
— Қам Отага етказ. Ўғуз гуноҳига яраша жазосини олади, хафа бўлмасин. Ота Мағорадан чиқмасин. Эркуннинг вакилларини қўпайтираман. Бу кеча дам ол, эртага қайтасан, Ўғузга дуч келма!

Ойбека ўғлиниң тамом бўлганини англади, юрагининг бошида бир санчиқ турди.

Қора хон эшик оғасига:

— Ябгуларга, шодларга, тархонларга хабар қил, эрталаб тўплансинлар, — деди.

Сўнгра қариндошларига юзланиб:

— Ўғуз сезмасин! Қархисидан чиқиб ўлдирамиз. Элнинг инонч жойини, зиёратгоҳини топтамоқ кечирилмайди! Ўғуз яшамаса-да, эл яшайди! — деди.

Ойбеканинг боши айланиб кетди. Келинларнинг учаси ҳам юзини тусиб олди. Бону билан Тарчечак ўч, қасос олишни истасалар ҳам, ўлимни кутмаган эдилар.

Ойтож бўзлаганича саройдан қочиб чиқди.

Анчадан сўнг, тун қоронгулигига ўрдадан бир отлик чиқди.

У Ойтожнинг сўзларини Ўғузга етказиши керак эди:

«Келинлар сени сотди, оталари душман булишди, хокон сенга қарши бормоқда. Ўлдириш учун... Унга юзма-юз келма! Йўлини топ! То иш совигунча жонингни қутқар!»

ЧИН БАРМОФИ

Чин элчиларининг бири келиб, бири кетарди. Тумшуқ суқмаган ерлари йўқ эди.

Сўнгти бор келган элчилар Қора хонга шимолликларнинг муттасил амалга ошираётган ҳужумлари, босқинчиликларидан шикоят қиласар, ҳар хил йўллар билан буни хоқонга боғламоқчи бўлардилар. Хоқон: «Биз Чиндан узоқдамиз. Бу ҳужумларнинг бизга алоқаси йўқ. Душманларингиз кимлигини билинг! Улардан ўзингизни ҳимоя қилинг», — дерди.

Карвонларга қилинаётган ҳужумлар ортиб бормоқда эди. «Ўзлари уюштириб, орамизни бузмоқчилар», — деб ўйларди Қора хон. Овозини баралла қўйиб:

— Менинг байроғимнинг кўлкаси тушган ерларда сиз-

нинг карвонингизга қўл кўтара олмайдилар. Ботирларимиз темир ташийдиган туяларимиз билан баробар югуриб, уларни қўриқлаб борадилар. Неки содир бўлса, Турон даштини кечиб ўтгандан кейин содир бўлади, у ерларга эса қўлимиз етмайди. Афғон яйловларида, Хуросондан нарида сўзида турмайдиган тўдалар бош кутарган. Уларнинг қайдан келганлиги маълум эмас! Бизнинг ерларга ҳам эга чиқишини истайдилар. Яшашларида ҳам қонунқоида йўқ, ўзиникини ҳам, ўзганикини ҳам билмайдилар. Ота ўз қизига, ака ўз синглисига уйланади. Улар сизнинг карвонларингизга суқилиб кириб, яширинча саройларингизгача бориб етмоқдалар. Бир кун илагингиз керак бўлмай қолади уларга. Илагингиз у ёқда турсин, қуртини ҳам ўғирлаб оладилар...

Чиндаги қирғоқчиликдан гап кетганда, Қора хон элида бу оғат рўй бермаганлигини улуғ руҳлар билан боғлар эди:

— Сиз ҳамма нарсани Ёмғир тошининг қудратида деб биласиз. Биз тошни кафтимизга олиб, жоду қилмаймиз. Бу хоқоннинг иши эмас, қамларнинг ишидир! Ер юзи ўзгармоқда. Бизнинг чўллар ҳам йилдан-йилга самарасиз бўлиб бормоқда. Руҳларга қарши бориб бўлмайди. Биз ҳам тангриларнинг, чалабийларнинг назаридан қолганимизда ҳосилдор тупроқларимиз, экин-тикин ерларимиз кўзлаган қутимизни бермайди. Қурғоқчиликка чидаш, ундан чиқиб олиш йўлини топиш мумкин. Бироқ руҳлар fazабидан, уларнинг ўч-қасос олиш таҳдидидан қтулиб бўлмайди.

Хоқон билан элчиларнинг сухбатлари чўзилиб кетган бундай кунларда Талас, Сайрам, Сифноқ бозорлари табассумлар қилиб, дуч келганга таъзиму тавозелар келтириб изғиган чинликлардан безиб қолган эди. Улар кирмаган тешик қолмаганди. Ҳар нарсани олар, ҳар нарсани сотар, ҳамма нарсага қизиқар эдилар.

Қора буултлар ўлканинг бошини қоплаб олганини сезганимидилар? Ё ўzlари эдими бу қора буултлар...

* * *

Тулунинг уйи чинликларнинг меҳмонхонасига ўхшарди. Дон Хининг олдига ҳар куни янгидан-янги қўноқлар келарди. Қумош, дори-дармон, идиш-товоқ, гуруч сотувчи-

лар хизматкор-чўрилар ёрдамида саройга, ўрданинг ичига қадар йўл топар эдилар. Аммо олди-соттининг энг зўри тунда бошланарди. Йигитлар, ёш-яланглар танда қўйган бу ерлар кентнинг бир чеккаси бўлиб, сиртдан қараганда қўзга ташланиб турмайдиган уйлар эди. Бу уйларда Чиндан қачон, қандай йўллар билан келганликлари номаълум бўлган қизлар йигитлар билан ўйнашар, тонг отгунча уларга турк қизлари учун бегона бўлмиш «севишмоқ» йўлларини ўргатар, уларни силаб-сийпалар, меҳрибончилик қиласар, юраклари гулгула солар, бор-йўқларини олиб даштга оширасар эдилар. Бу уйлар олтин тўплаш, йигитларнинг юрагидаги ўтни сўндиришдан кўра миш-миш тарқатиладиган, турк йигитларидан гап ўғирлайдиган уйлар бўлиб, бир учи Чин императорининг саройига бориб боғланарди.

Бу ўргимчак тўрининг толалари, эҳтимолки, Ота Магорага, захира, хазина ташийдиган араваларнинг кўриқчиларига қадар чўзилиб кетган эди.

Оқшомларда саройдаги чўри-канизаклар кайфи тароқ бекларнинг орасидан суврилиб чиқиб, тоза ҳаво олиш, ҳордиқ чиқариш баҳонасида қоровулларнинг қучогига отилар, чин шаробидан зеҳни туманлашган қоровуллар ичларидаги борини тўкиб солардилар. Қора хоннинг Ўғузга қарши юришидан бир неча кун аввал Тулу билан Дон Хи гойиб бўлди. Ўрда атрофидаги уйларнинг эшигига қулф тушди. Бозорлардаги чинликлар ҳам ўлат теккан жўжалар каби қўққисдан гойиб бўлишган эди.

ОНАНИНГ ТУШИ

Тунда Ойбека алғов-далғов тушлар кўриб чиқди: кенг бир даранинг ўртасида турганмиш. Тўрт томони сидирға қоялар эмиш. Худди йўниб қўйилгандек сип-силлиқ, жилоли, тимтик. Қўққисдан бу қояларнинг устидан бир туйнук очилди. Чолавериб ҳансираб қолган бир от ушбу туйнукдан ташқари отилди, ярим танаси туйнукдан чиқдию, ҳавода муаллақ қолди. Олдинги оёқлари ҳавода типирчилар эди. У қоядан пастга, қачонлардир айқириб оқсан дарёга отилмоқчи бўлар, бироқ дарёning қуриб қолганини, қуйидаги кўл ўрнида қиррадор, ўткир тошлар тиш қайраб турганлигини кўриб талвасага тушган, пастга отила олмасди. Ойбека таниди. Ўғузнинг оқ ўўргаси эди бу. Оқ

капалакка ўхшарди. Сўнгра бирдан оқ йўрганинг ўнгу сўлидан бошқа отлар сакраб чиқдилар. Гүё улар Ўгузни қувлаб келганлар-у, энди унга етганларида ўзларини тўхтата олмай жарлик тубига қулаб тушмоқда эдилар. Ё Тангрим, отлар ўмбалоқ ошмасдан тикка тупроқ устига тушдилар, оёқлари темир қозиқлар каби тиззагача ерга кириб кетди, бир қанчаси сарт қояларга урилиб тилка-пора бўлди. Уларни ҳам таниди Ойбека. Қора хон билан иниларининг отлари эди улар. Қулаган жойларида тошга айланиб қолдилар. Ана шундан кейингина Ўгузнинг оти чидаб тура олмай жарликка отилди. У қулаб тушмади, худди қуш каби айланиб пастлади, аммо ўзидан аввал қулаб тушиб ерга санчилган отларга яқинлашганда парвоздан тўхтади, уларнинг боши узра енгилгина, пинак ҳам бузмай, гўё қанот чиқариб, капалак каби суза бошлади.

Ойбека қора терга ботиб уйғонди. Ўрнидан турди, эрта тонгдан йўл тадоригини кўраётган Қора хоннинг қаршисини кесиб чиқди:

— Босриқиб чиқдим. Бу сафардан бир хайр кўрмаяпман. Балки Ўгузнинг қайтмаслигидан даракдир бу! Уни таъқиб этма! Борма! Кетсанг, аввал мени ўлдириб, ундан кейин кет! Шошган ишнинг охиривой, дейдилар. Бу ишни мундоқ қўполлик, шошма-шошарлик билан ҳал этиб бўлмайди. Ўз ўғлингга қарши қандоқ қилиб қўшни тортиб борасан? Биздан сўнг сенинг тахtingга чиқадиган, хоқон бўладиган ўғлингни ўқча тутасанми, унга қилич кўтарасанми? Қора қонига бўямоқчимисан уни? Бошини танидан жудо қилмоқчимисан? Ўз қўлинг билан ўз юртингни вайрон этмоқчимисан? Ақлингни йиф! Ҳушёр бўл! Унинг ҳам гардун¹ битигига, манглай ёзувига боғлиқ эканлигини тушунмайсанми, ахир? Насибаси узилмаган бўлса, унга ҳеч нарса бўлмайди! Сен қирқмоқчи бўласанми унинг насибасини? Ўйлаб кўрдингми шуни? Тангри бермаса, эр бойимас...² Англайсанми шуни?

Қора хон деди:

— Сенинг Тангринг Ўгузнинг кибру ҳаволаниши учун қиласиганини қилди. Гурбуз³, жасур деб ҳисоблаган ўғлим осийлик қилди, ғанимга — менинг, улуснинг, инончимиз-

¹ Гардун — бу ўринда: тақдир маъносида

² Бойимас — юсалмас; бой бўлмас

³ Гурбуз — қаҳрамон

нинг, тұрамизнинг душманига айланди... Энди ўзи танласин: ё у, ё улус! Бошқа йүл қолмади. Қани айт! Унга берған оқ сутингдан айб ахтармай, мени айбдор қиласанми? Тұрамизни менсімай құйған үғлимни кечирсам, эл нима дейди? Хоқоннинг үғлиман, унинг ворисиман деб, юртнинг тұраларига қарши чиқмоққа ҳаққи йўқ унинг. Сен ҳам тушун, ахир!

Қора хон отланди. Жанг-жадал, юришлар бұлмаганда жангчилар уйларига, ўз юртларига қайтардилар. Хоқон ихтиёрида фақат сарапанған алпларгина қоларди. Улар қуролланиб, хоқоннинг ишорасини күтмоқда әдилар. Карнайлар чалинди, черик ўрнидан қўзғалди.

* * *

Ойтожнинг чопари Ўғузни йигитлари билан Чуводийсидан топди. Отасининг ўзига қарши келаётганини эшишиб, хоқон қўшинининг энг сара жангчилари бўлмиш ўртоқларини, суворийларини тұплади. Вазиятни улардан яшириб ўтиrmади:

— Отам амакиларим билан бирга устимга бостириб келаёттир. Қўшин унинг ихтиёрида. Сизлар ҳам отамга боғлиқсиз. У хоқон, тұранинг ҳимоячисидир. Мен ҳам ўз инончимдан воз кечмайман. Керак бўлса, отамга қарши жангга кираман! Истасангиз, мен билан қолинг, йўқса отамни гиж-гижлаётганлар тарафига ўтишингиз мумкин. Чагри⁴ ёзган манглай ёзувидан қочиб бўлмайди!

Йигитлар бир овоздан:

— Биз сен билан, Ўғуз хон! — дедилар.

Ўғуз хоннинг энг яқин дўстларидан Бейрак бек:

— Биз бу куч билан хоқонга қарши тұра олмаймиз, Ўғуз! — деди.— Эл ичіда сени хуш кўрадиган, отанғдан, қайнаталарингдан безган кишилар кўп. Хабар етказайлик, хос беклар тұпланиб келсинлар. Унга қадар хоқон билан юзма-юз келмай, уни чалғитиб турайлик.

Ўғузга бу гап маъқул тушди.

Юртга чопарлар жўнатилди.

Бир неча кундан сўнг Ўғузга хайрихоҳ, уни хуш кўрадиган бекларнинг қораси кўринди. Улар узоқ-яқиндан етиб келмоқда әдилар.

⁴ Чагри — фалак

Ўғуз ўз йигитлари билан қанчадан-қанча жанглардан омон чиққан эди. Ҳеч бири ўлим-йитимдан тап тортмасди. Уларнинг ичида энг кучлиси, тенгсизи Ўғуз эди. Бироқ эндиликда у ҳам қўркувга тушган, дунё кўзига тор эди. Бўзқирда¹ ўз отаси билан юзма-юз келиши хаёлини чирмаб олган эди. Ўғуз буни истамас, бироқ тақдирдан қочиб қутулиб бўлмаслигини ҳам яхши биларди. Қолгани Тангрининг иродасига боғлиқ эди. Қисқа баҳор ёмфиридан сўнг чараклаб чиққан қуёш, ювилиб топ-тоза бўлган даштлар ўлим эмас, тириклик нафаси билан тўлиб-тошган эди. Фақат хоқонлик машмашасининг ўзи бўлса, у ҳеч иккиланмай ҳаммасидан воз кечарди. Бироқ энди унинг зиммасида илоҳий бир амр ҳам бор эди. Бундан қочмоқ ўз Тангрисидан юз ўтиromoқ демак эди.

Тўп ўрнидан қўзғалди, йўл бўйи жангсиз зерикаб қолган йигитларни оувуллардан йига-йига илгарилаб борди. Бироқ отаси билан юзма-юз келмади. Кунни кунга улаб, фурсатни чўзиш билан отасининг юрагини юмшатмоқ фикрида эди. Қора хон қулоғуз² жўнатиб унинг жойини билиб олар ва ортидан тушарди. Ота қувлар, ўғли қочар эди...

Ўгузниң йигитлари Қора хон черигини тор-мор қилиш истаги билан ёнар эдилар.

Қора хон бўри эди. Бутун йўлларни, чўлларни кафтдек билар эди. Ўғуз тутқич бермаслигини ҳис этиб, таъқибдан воз кечди. Қулоғузларнинг хабари асосида Ўғузни узоқдан кўз остига олиб қўйди, ўғли кутмаган, қоча олмайдиган бир вазиятда ердан чиққандек унинг қаршисини кесиб чиқди.

Ўғуз илгарида амакиларини, уларни бошлаб келаётган шодларни, мингибошиларни кўрди. Орқада, хоқон жанг майдонини кузатиб туриши учун соқчилар жойлашган тепаликда эл байроғи ҳилпираб турар, албатта, отаси ҳам ўша ерда эди. Отаси бўри каби пистирмада пайт пойлар, Ўғуз енгилганда ўзи келиб ўғлининг гарданига қилич солмоқчи эди...

Ўғуз болалигидан бери отаси билан ўнлаб жангларни кўрган эди. Ҳеч бирида бу қадар таҳликага тушмаган эди.

¹ Бўзқир – дашт

² Қулоғуз – кузатувчи, пойлоқчи

Эгарда тинч ўтира олмасди. Ё ўзини, ё отасини маҳв этадиган бу жангни четлаб ўтиш йўлларини изларди. Сўнгги умиди Тангридан эди... Жангга отилмоқда шошилаётган ўртоқлари эса унинг оғзига боқар, қандай амр беришини кутмоқда эдилар.

Шу пайт ўғуз қўлини баланд кўтарди:

— Жанг бўлмайди! Қани, менинг ортимдан!

Йигитлар истар-истамас отаси билан бирга Ўғуз ҳам биладиган дара ичидағи тор сўқмоқдан узоқлашиб бораётган сардорлари ортидан эргашдилар.

Қора хон билан инилари шошиб қолдилар. Аввалига буни бир тузоқ деб ўйладилар ва Ўғузнинг бошига бир томондан қайтиб келишидан қўркувга тушдилар. Тўрт томонга суворийларни жўнатдилар. Лекин Ўғуз йўқ, фойиб бўлган, гўё кўкка учиб кетган эди.

Шу тариқа кечаю кундуз тин олмасдан Инжу дарёсигача келдилар. Ўғуз фақат отасини енгиш, амакиларини тиз чўктириш билан иш битмаслигини яхши биларди. Яъни жангда бириси ўлиб, бириси ўлдиргани билан муаммо ечилмас эди. Бу унчалик қийин эмасди. Ўғузнинг фикрича, бу аразлашув замирида Тангри инончи турар экан, тугунни ҳам унинг ўзи ечмоғи лозим эди. Бу ишни саройдан эмас, эл-юртнинг ичидан бошламоғи керак эди. Ўғуз ўз инончига топинган, якка тангричилик йўлини танлаган кишиларнинг бир бўлагини Инжу бўйларига, икки дарё оралиғида яшайдиган элларга, Орол атрофига жўнатди. Қора қилиқ¹ деб ном олган, боши меҳнатдан чиқмайдиган халқ ўз орасига тарқалажак бир инончни жанг-жадалда ҳам ҳимоя қила олишига кўзи етарди. Кишилар ишонмайдиган, улар эргашмайдиган инончни уруш-сўқиш билан ҳимоя қилиш беҳуда эди. Улус тан олган инончни эса ҳимоя қилиш ортиқча, чунки улуснинг ўзи уни ҳимоя қиласди.

Биринчи бўлиб Инжуниң қуий оқимида, улкан қум саҳросининг ёнгинасида, қадимий бир қалъада яшайдиган аҳоли: «Биз сенинг инончинингнинг қулимиз», дея уни эътироф этдилар.

Ойларча давом этган қувди-қочдиларнинг охирида Ўғуз дашт-яйлов билмайдиган ўтроқ, экинчи-тикинчи кимса-

¹ Қора қилиқ — оддий халқ, жамоат

ларнинг, будуннинг – миллатнинг, аҳолининг йўқсул қисми бу инончни саройдагилардан бошқача қабул қилаётганини кўрди. Уларнинг бут-санами ҳам, тангриси ҳам тупроқ эди. Ўн жойга эгилиб-букилгандан кўра, ягона Улуғ Тангрига топиниш уларнинг айни кўнгилларидағи иш эди. Зотан, бекиёс юксак тупроқ илмини эгаллаган бу кишилар ёғоч, сопол бутлар ясаш, уларни кўтариб юриш каби ишларни қилмас, бунга бош ҳам қўшмас эдилар. Бутлар кўпроқ саройлар учун асқотарди. Экинчи-тикинчи кимсалар қушдек озод, ўз ҳаётларини кўкнинг қуёшига, булутига, ёмғир-сочинига, дарёларнинг сувига боғлиқ деб билардилар. У етиб борган ҳар бир ер Ўғуз айтган сўзлар қудрати қаршисида жим қолар, унга ишонар эди. Унга бўлган садоқатнинг, асосли сўзларига ишончнинг, уни қўллаб-қувватлаётганлар сафи тобора кенгайиб боришининг яна бир сабаби инсонларнинг тасаввурлари билан боғлиқ эди. Саройдагилар, қамлар тобора ҳашамдор қилиб ясаётган нарсалар, маъносини ўзлари ҳам билмайдиган, аммо тангри номи билан тақдим этилаётган ясама бутлар, чалабийлар уларга боғу бўстонлар ичига ўрнатиладиган қўғирчоқларни, полиз қўриқчиларини эслатарди.

Улар эски замонларни унумаган эдилар. У пайтлар бутпарамастлик бу қадар кенг тарқалмаган эди. Чўлда қуёшдан, ойдан бошқа боғланиб қолган нарсалари йўқ эди. Умр бўйи тупроқдан, оловдан, сувдан, Ойдан, Кундан кучлироқ нимани ҳам курибдилар...

Элатдан элатга ўтган сари бутларнинг қиёфаси ҳам ўзгариб борарди. «Яратганинг қиёфаси ўзгармаслиги керак-ку», дея ўйлайдиганлар ҳам оз эмасди. Иккинчи томондан, бутпарамастликнинг кенг тарқаши учун кўпроқ юрт ташқарисидан келган кимсаларнинг жон куйдиришини кўриб туардилар. Ўғуз хон эса эртанинг хоқони эди, унинг сўзларидан юрт бирлиги, кишиларга хурмат-эҳтиром сезилиб туарди...

Ўғуз уларга янги, ясама, четдан келган нарсани таклиф этмаётган эди. Улуснинг қадимий, унуттирилган инончини ёдга солар, Улуғ Тангрининг яхлит-ягона улусини бўлмоқчи, парча-парча қилмоқчи бўлганларнинг олдини тўсар, сўниб қолган руҳларга жон бағишлиарди.

Инжу бўйларида ҳам, даштда ҳам тоқ тангричиларнинг сони тасаввурга сифмас бир даражада ортиб борарди.

Бұзқирга бир үт тушдими, уни үчириб бўлмайди.

Фақат энди Ўгузнинг юраги таскин топган эди. Эндиликда ўз отасининг қўлида ҳалок бўлмоқ Тангрига қовушмоқнинг энг гўзал йўли, баҳтли бир тақдир бўлиб туюларди унга. Буни ҳис этган заҳоти «шунча ҳаяллаганим етар!» дея отаси билан, амакилари билан юзма-юз келиш учун ошиқди.

ҚОНЛИ БИР ЖАНГ БЎЛДИ

Кечага қадар бирга бўлган, елкама-елка үт-оташлардан кечган, душман бағрини ёқиб-ёндирган, ҳар бири қўй сурувига тушган бўри каби қанчадан-қанча ғаним қўшинини тумтарақай этган, дарёларни кечиб, тоғлардан ошган, ўлкаларни забт этган, бир илдиз, бир уруғдан тарқаган алп йигитларнинг, қариндош-уруғларнинг бир бўллаги ота томонида, бир бўллаги ўғил томонида туриб, қўл-оёқсиз, от-аравасиз, жон-жасадсиз қолгунча жанг қилдилар.

Қора хон жанг майдонида ўлиб ётган йигитларини кўрар экан: «Ит эмган! Ноқобил фарзанд!» – деб сўкинарди. Ўгуз қўксидан ўқ еган дўст-биродарларини куриб: «Кутурган ота!» – дея ўртанаарди. Қора хон, қўлидан келса, қўкларни ҳам, Ўгузнинг Тангрисини ҳам ер билан яксан қилишга шай эди. Ўгуз ер юзидағи барча бутлардан нафратланар: «Синдириб тугата олмадим уларни», – дея надомат чекарди. Эл парчаланган, қўшин қирилган, куч тугаб бўлган эди. Бу жангда энг кўп жонбозлик кўрсатиб, от сурган Куз хон билан Кур хон бўлди. Ўрхон жангга келмаган, яйловга чиққан юртнинг бошида қолган эди. Собиқ қайнаталари Ўгуз билан юзма-юз келмоқ, ҳар бири ўз үчини олмоқ истагида ёнарди. Бироқ енгилишларини сезишлари билан оғаларини майдонда қолдириб қочиб қолдилар. Буни кўрган Қора хон ўн карра кучли ғазаб билан Ўгузнинг устига бостириб борди. Ўгуз жангга киришмади:

– Бу Тангрининг иродаси, ота! Янги йўли бошланмоги керак улуснинг! Ер юзини бу хатоликлардан қутқариш менинг зиммамга тушган! Яқинларимизнинг, туғишганларимизнинг жасадлари устидан кечиб ўтишга тўғри келса-да... Сен Кўкларга қарши бора олмайсан. Менинг айбим йўқ! Ўз элчилигини менга топширган зот бор. Танг-

рига топин! Ясама сопол бутлардан қўлингни торт! Қадимги ажойиб кунларимизга қайтайлик. Онамнинг кўз ёшларига раҳминг келсин! Мен ўз отамнинг қотили бўлишни истамайман!

Қора хон бўкириб юборди:

— Тангри сени юртга қотил қилиб юборган! Ўз қўлларим билан бошингни олмасам эл мени кечирмайди!

Қилични ялонғочлаб Ўгуз томон отилди. Ўгуз ўз қиличининг қабзасидан тутганча қотиб туар, отасининг қўли билан яқинлашиб келаётган ажалини табассум билан қарши олмоқда эди. Аммо шу заҳоти Ўгуз йигитларидан бирининг пайкони хоннинг кўксига санчилди. Ўгуз қичқириб юборди:

— Бу нима қилганинг, олчоқ фаним!

Аммо фишт қолипдан кўчган эди. Қора хоннинг қўшини тўзғиб, тумтарақай бўлиб кетди. Амакиларининг ўғил-қиз фарзандлари юртдан бош олиб кетишиди. Ўузга қарши келганлар кечани кеча, кундузни кундуз демай Қорақум сари йўл олди. Олтойдаги қадимий юртларига, Селенга дарёси ва Қодиркон яйловларига бориб жойлашдилар. Улуснинг бу қора кунларини, улусларига доғ бўлиб тушган бу ички курашлар азобини минг йиллар кейин туғиладиган авлодлар ҳам эслайдилар, сўзлаб берадилар, ёниб-ўртсанадилар, афсус-надоматлар чекадилар...

* * *

Ўгуз қўшинини кезиб, жангдан омон қолган йигитларини бошлаб юртга қайтди.

Олдинда, икки от орасига осилган намат устида отасининг жасади борар эди. Жангда еру кўкни тингламаган Ўгуз эндиликда отасининг ортидан отда тебраниб борар экан, кўз ёшларини тия олмас, уни йўқотиб қўйганидан изтироб чекар, онасининг ҳузурига қандай боражагини ўйлаб эзилар эди. Бошқа бир туйғу эса унга, «манглайдаги ёзувдан қочиб бўлмайди», дея таскин берарди. «Тангрининг амридан, кўкнинг ёрлиғидан қочиб бўлмайди. Отам ёшини яшаб бўлганди. Ушбу кунларнинг бирида Азройил келиб унинг жонини олсаю, мен қўзичноқдек жимгина унинг таҳтига чиқиб ўтирганимда эди, ёлғиз Тангри учун кейинги олиб борадиган курашларимни ҳеч ким англамас

эди. Энди эса менинг бир инонч жангчиси эканлигимни, бу йўлда ҳатто отамни ҳам аямаганигимни ҳамма билади. Отасини аямаган Ўғуз бошқаларга ҳам шафқат қилмайди, деган гап тарқайди. Бир отанинг ажали билан Тангрининг, улуснинг йўли тозаланса, унинг руҳи мени кечиради».

* * *

Ойбека хоним дардан лиbos кийиб, қайғудан рўмол ёпинганди. Бу жангда муроса бўлмаслигини биларди – ё эр, ё ўғил... Иккисидан бирининг ўлими ҳақидаги хабарни кутарди. Чин хоқонининг қизига уйланмасдан, қўшни қизга қўнгил қўйган, уни танлаган, ундан бошقا сулувларнинг юзига қарамаган севимли эрининг ўлимини эшигганда, ёниб-уртанди, дод-фарёд солди. Бунинг учун еру кўкни, Тангрини айблади. Ўғуз унга таскин бермоқчи бўлганида, уроғочи бўри каби увлаб юборди:

– Заҳарли илонлар каби, ота-онасини қопган кўппак каби, ваҳший арслонлар каби, оч бўри каби, қутурган тuya каби ўз-ўзингизни қириб тутатдингиз. Ҳайф сизга! Эсиз эл-юртимиз!..

* * *

Элни ёқиб-уртаган гўяндалар, айтувчилар келиб кун бўйи йиғлаб-сиқтадилар. Дала билан тоғ оралиғида, ҳар йили кўч яйловга чиққанида хоқон эрта тонг маҳали унтурга таяниб қуёшли қарши оладиган тепаликларнинг бирида Қора хонни тупроққа қўйдилар. Ўғуз келиб бир курак тупроқ ташлади. Ҳар бир киши бир халтадан тупроқ тўқди, каттакон тепалик пайдо бўлди. Унинг устига суворийлар келтирган тошлар қаланди.

«Йиллар ўтгач, бу тош тепачага ҳам бош эгадилар», деган аччиқ-аччиқ фикр кечди Ўғузнинг хаёлидан.

ХОҚОНЛИКНИНГ ИЛК ЙИЛЛАРИ

Ёзнинг ўртасида Қорачуқ яйловида Ўғуз хоқонликни ўз қўлига олди. Аввал эл бошлиқлари иштирокида саройда тахтга чиқиш маросими ўtkазилди. Унга хоқонлик байроғи, довул ва тамғалар¹ берилди.

¹ *Tamғa* – муҳр

Дастлаб олтин учли қип-қизил хоқонлик байроби келтирилди. Ўғуз байроқни ўпид, остидан кечиб ўтди.

Сүнгра олтин сағаноқли¹ хоқонлик довуллари келтирildи.

Ундан сұнг қатор-қатор хазина араваларини, сандықтарни Ўғузга күрсатиб олиб ўтадилар.

Ўғуз хон анъанага күра қутсол Ёмғир тошини ҳам күриши, уни құлиға олиб, қамлар иштирокида фақат яхши ниятлар билан эл-юртга, эл тұрасига содиқ қолиши ҳақида онт ичиши лозим эди.

Ўғуз маросим иштирокчилариға деди:

— Энди Тангри тоши келтирисин!

Бу ерда йигилғанлар ичидә фақат Ўғуз бу тошнинг, элда аталғани каби, Жоду тоши әмас, Улуф Тангри ерга эндиригән муқаддас чақмоқ тоши, күк тоши эканлигини биларди.

Хазиначи тошга кетди, бироқ қайтмади. Бир оздан сұнг уни араваларнинг орасидан топиб келтирдилар. У ҳушидан кетиб қолган эди.

Ёмғир тоши йүқ әди! Йүқолган эди! Ўғирланган эди!

Хазиначи титраб-қақшаб деди:

— Бир неча күн аввал үзим күрган әдим. Сандиқда, үз жойида турған эди, хоқоним!

Шундай дея Ўғузнинг оёқларига йиқилди:

— Айтинг, мени ўлдирсінлар... Күнглем сезган эди. Ифлос чинликларнинг бир куни у ерга құл чўзишларидан кўрқардим. Ўғирлаб кетибдилар Жоду тошини! Яратган юз ўғирди биздан...

Бу сўзлар чақмоқдек чақди. Ҳамма қотиб қолган эди. Ҳеч ким қулоғига ишонмас эди. Бу улуснинг ўлими демак эди. Ўғуз аввал бу сўзлар маросимни бузиш учун айтилди, деб ўйлади. Бироқ аччиқ ҳақиқат бўлса-да, тош йүқолган, ғойиб бўлган эди. Хоқонлик маросими мотамга айланган эди.

Ўғуз хоқон Чинга борадиган барча йўлларга отлиқ дасталарини жўнатди. Бироқ тош топилмади.

* * *

Ёзниң охирида Ўғуз олтин каштали айвонини кунчиқарга қаратса тўқсон кунгурали, уч минг кишилик чодирини Қорачиқнинг гул-чечаклар очилиб ётган бир чаман-

¹ Сағаноқ – филоф

зорига тикди, узоқ-яқындан келган беклар, элчилар, меҳмонлар иштирокида қурултой чақирди. Эл-юртга хабар солди. Қирқ қаторда қирқтадан дастурхон ёзилди. Таомлар ейилди. Отасининг ўлимидан сўнг кўнглига ҳеч нарса сиғмай қолган бўлса-да, тўрани бузиб бўлмасди. Ўғуз хон бекларга, эл-юртга ўз фикрини билдириб бундай деди:

— Мен сизнинг хоқонингиз бўлдим! Ўқ-ёйимизни, қилич-қалқонимизни дадил қўлимиизга олайлик. Олдимиздан шарафли йўллар очилсин. Ўқларимиз ёйдан узилгандага кўк юзини қоплаб олсин. Темир найзаларимиз ўрмондек қалин бўлсин. Юртимизнинг дарёлари, денгизлари мавж уриб турсин. Қуёш байроғимиз, кўк чодиримиз бўлсин...

Ўғуз хон давом этди:

— Беклар, қондошлар, қардошлар, меҳмонлар, билиб олинг! Мен, Ўғуз хон, ер юзига буюк Яратувчининг элчи-си бўлиб келдим. Яратган яккаю ягонадир, барчамиз унинг тўрамаларимиз. Унинг амрига, жўнатган элчисининг истагига бўйсунсангиз, улусларингиз бизнинг сафларимизда тўпланса, бошқаларга ҳам кўл чўзиб иноқ бўлса, улуғ кўк остида инсон фарзанди нажот топади, ҳаёт топади, ҳалоллик билан бир-бирини англаб яшайди, яратганлар бир-бирининг қонини тўқмайди, ҳар бир кимса ўз хона-донида баҳтиёр бўлади. Ҳамма нарса буюк яратганга боғлиқдир. Унга қарши чиққанларни йўлга солмоқ ҳам Тангрининг амридир. Буни билиб қўйинг! Туркнинг Тангридан буюк яратган, туркнинг қудратидан буюк қудрат йўқдир! Буни ҳам англаб олинг! Кўк остида, ер устида бизнинг тартибимизни ҳеч ким бузолмайди, номимизни ҳеч ким йўқота олмайди! Кимки бу тартибга қарши бош кўтариб чиқса, унга омонлик йўқ. Кўк Тангри мададкоримиз бўлсин!

Ўғуз хон элчилар билан тўрт томонга, қўшни ўлкаларга фармон, билдирги ёзувлари¹, мактублар жўнатди. Бу мактубларда шундай деб ёзилган эди: «Мен турк улусининг, эл-юртининг хоқони бўлдим. Бутун ер юзининг ҳам хоқони бўлмоғим лозим. Мен билан алоқа боғлашингизни, менга итоат этишингизни истайман. Кимки менинг сўзимга кирса, амримга бўйсунса, ўз улушини, ҳадясини бериб, уни дўст тутаман. Ким менга қарши бош кўтарса, қўшин

¹ Билдирги ёзуви — маълумот, хабар

тортиб бориб калласини оламан, уни йүқ қиласман! Мен сиз авваллари күриб келган ерлик хоқонлардан эмасман. Ер-күкларни яратган, сизу бизга ҳаёт берган, бутун ибти-доларнинг ибтидоси, Буюк Зот, тенги-баробари бўлма-ган, Ягона, Битта, Эркли, Кўркли, Улуф Тангрининг ерга, барча халқларнинг бошига юборилган Ялавочиман! Минг йиллар давомида инсон фарзандини йўлдан оздириб, уларни бир-бирига қарши қўйиб келган тўраларни йўқ қилмоқ, нигоҳимизни ўзимиз келган кўқдан тусиб қўйган, одамларни ушоқлаштириб юборган, Тангри номига кўлка сол-ган бутларни, санамларни, чалабийларни, ясама топин-чоқларни йиқитиб-йўқотмоқ, ер юзида тангрисол тарти-бот қурмоқ менинг вазифамдир. Бу Тангрининг менга юборган амридир! Ишонган итоат этсин, ишонмаганни итоат эттираман!»

Шундан сўнг Ўғуз хоқон охирги жангда ўзига ёрдам берган Ўйтур, Қаю элларининг бекларини алоҳида тўпла-ди. Барча юришларда бирга бўлажакларига келишиб ол-дилар. Тўс-тўполонда парчаланиб, тарқаб кетган қўшин қайта йифнанди. Суворий бошлиқлари янгидан тайинлан-ди. Оғир кунларда ундан узоқлашмаган амакиси, қайна-таси Ўрхон қўшин бошлифи бўлди. Ўғуз Қам Ота билан гаплашиб, уни якка тангричиликка ишонтироқ, Ота Мағорани тангричилик ўртоғига айлантироқ, уни янада қаттиқроқ қўриқламоқ учун музокара олиб бориш ишини Услу Хожага топширди ва уни Хонтангрига жўнатди.

Яқин атрофлардан таниқли темирчиларни тўплаб, йи-гин ўтказди, уларга зиёфат бериб кўнгилларини олди. Турк элларида ўша пайтлар темирчилар ҳам чўпон ва аскар каби нуфузли кишилар эди. Халқ орасида ҳокимият ма-қомида ўзига хос ўринлари бор эди. Темирчилар кечаю кундуз ишлаб, қўшинга керакли қилич, башоқ¹, мизроқ, болта ва бошқа жанг қуроллари ясадилар. Қўшин янги-дан қурилди.

Отлар сараланиб, миниладиган ва юк ташиладиган гуруҳларга ажратилди. Уларга мўл-кўл арпа берилди.

Ўғуз хон ўз саройидаги Чин элчисини чақиртириб маълум қилди:

— Ўлкангизнинг таниқли императори, муҳтарам қўш-

¹ *Башоқ* – камон ўқининг учи

ним ва қардошим ўзини кўк кишиси деб ҳисоблади. Кўк Тангри ерга мендан бошқа элчи юборгани йўқ. Ёғоч, тош, тери каби жонсиз нарсаларни ўзи учун яратган деб билган кимса кўк кишиси бўла олмайди! Чин бизнинг яхши қўшнимиз бўлади. У ерда бизнинг уруғимиздан бўлган сонсаноқсиз кишилар яшайди. Узоқ йиллар хоқонлигингиз тепасида бизнинг қондошларимиз турган. Сизнинг сарҳадларингиздан бошлаб олис кунботар элларигача чўзилмиш буюк чўлларнинг, Даشتнинг begi бўлган, сиз таниган-танимаган улусларни итоатда сақлаган элемизга паст назар билан қараб келдингиз. Ўлкангиздан ташқарида бўлганларни камситмоқдан, эзмоқдан, алдамоқдан, номларига ёлғон ёндиromoқдан толиқмадингиз. Бизни яғмочи, босқинчи деб ҳисобладингиз. Энди етар! Чиннинг ёлғони туркнинг қиличидан ўткирдир. Биз ёлғон билан иккиюзламачиликни билмаймиз. Биз қудратли бўлмоғимиз учун ҳам қўшнимизни қудратли кўрмоқни истаймиз. Узоқ давом этган қурғоқчиликнинг Чинга солган жафоси бизни ҳам ташвишга солади. Бироқ бу Тангрининг ишидир. Қўлимиздаги маълумотларга кўра туркка Тангри жўнатган Тангри тошини, элемизнинг муқаддас тошини Чин императорининг айгоқчилари ўғирлаб олиб кетган. Биз урушни истамаймиз, бироқ тош қайтарилемаса, чўлларнинг низоми бузилади, юришларнинг олдини ола билмай қоламиз, истасак-истамасак, бу юришлар оқибатида Чин вайрон бўлади.

Элчи тилёғламалигини ишга солди. Тарихдан, бугундан, Чин императорининг қўшнилар билан яхши муносабатидан дам уриб узундан-узоқ гапирди. Бу тошнинг Чинда эмаслигига ишонтириш учун роса тиришди. Зотан, энди Чиннинг бу тошга эҳтиёжи қолмади, кўпдан бери кутилган ёмғирлар ёға бошлади, деди у.

Бу хабар Ўғузнинг барча шубҳаларини тарқатиб юборди: «Туркнинг тоши бошингизга тушсин! Уни қўлга киритганингиздан сўнг Тангри сизга ёмғир берди».

Элчи чиқиб кетган заҳоти Ўғуз хон Чинга юриш учун ҳозирлик кўришни буюрди.

Ўғуз хон Чин императорига қуийдаги мазмунда мактуб йўллади: Чин хоқони! Эшит ва билиб қўй! Сендан илгари бизга қўшни бўлган отанг ҳам, ундан аввалги отабоболаринг ҳам бизга бўйсунган, итоат этган.

Кўклару ерларнинг яратувчиси бўлган эркли, кўркли, юксак, яккаю ягона бўлган Тангри бизга турк деган ном берди, бизни ер юзининг хоқони қилди. Тангри кимдан фазабланса, унга қарши бизни жўнатди. Бироқ биз сизнинг устингизга босиб боришни истамаймиз, қўшничиликда минг йиллардан бери давом этиб келаётган алоқаларимизни ҳимоя қилишни истаймиз.

Сизни тўғри йўлга, юксак Тангрининг йўлига чақираман. Тўғри йўлга кирмоқдан, Кўк Тангри ионончини эътироф этмоқдан ўзга нажот йўлини кўрмаяпман сизда.

Яккаю ягона Тангрига сифинсангиз, элларимиз энг яхши қўшнилар сифатида мангу бирга яшайдилар. Мен Тангрининг элчисиман. Тангрини таниган мени танийди, буюклигимни тан олади. Ҳар йили икки карра бож жўнатди, хирож тўлайди. Бошқача йўл ахтарганлар бош устидаги менинг қиличимни кўради.

Сўзимга кирсанг, амримга бўйин эгсанг, мен улуғлаган буюк Тангри сени ҳам юксалтиради!

ТАБФАЧ – ҲИЙЛА УЯСИ

Ёмғир тошини хазина аравасидаги сандикдан ўғирланган Чин жосуслари Тулу ва Дон Хи хузуридан тезда қочиб қолган эдилар. Дон Хи: «Тулу билса, иш бузилади, эрим бўлса-да, барибир турк. Руҳий кучларнинг Чинга кўчишини истамайди», – деган эди.

Ўрдадан узоқлашганларидан сўнг жосусларга бир гуруҳ чинлик савдогарлар ҳам қўшилган эди. Улар турли-туман номлар билан турк саройига, Чин элчисининг ёнига келиб-кетар эдилар. Дастлаб ваҳима ичидаги бўлсалар ҳам, ўз ўлкаларига яқинлашганлари сари юзларида табассум, севинчларини яшира олмасдилар.

Йўлда Кунботардан келаётган бир карвонга қўшилганларидан сўнг изларини бутунлай йўқотдилар. Юзлаб йўлчилар, сайёҳлар орасидан энди уларни излаб топиб бўлмасди.

* * *

Тош ўғирланган кечада Қам Ота оғир бир туш кўрди, уйқудан қон-тер ичидаги уйғонди. Эрталаб шогирдларини, бошқа қамларни ўз ёнига тўплади. «Элнинг қора кунлари бошланмоқда, – деди у. – Қўрқинчли бир туш кўрдим.

Тушимда йиллар бўйи узлуксиз давом этган қурғоқчилик бўзқирларни қулга айлантирган эмиш. Эсаётган еллар ер юзининг бу бошидан у бошигача кул совуриб юрибди. Ўртада ингичка бир яшил сўқмоқ бор эмиш. Ундан боши-охирни йўқ узун бир карвон кетмоқда. Қурғоқчилик балоси фақат ана шуларга хавф солмас эмиш. Эл-юртимиз ҳар томондан қочиб келиб, ана шу карвонга қўшилишни, ўз жонларини қутқариб қолишни истар эмишлар. Кейин шундоқ қарасам, бу карвон эмас, бир тўп ип эмиш. Турк элларидан чўзилиб кетган ранг-баранг иплари силкина-силкина бу тўпча Чин сари думалаб кетмоқда эмиш. Бу тушнинг таъбирини билмайман. Бироқ яхши туш эмас! Бормикан шундоқ бир карвон? Бўлса, кимники экан? У нима олиб кетмоқда биздан? Бунисини-да билмайман. Аммо тўхтатишимиз керак биз уни! Эркўннинг барча жодугарларини йигиб бўлса ҳам, йўлларни боғлаб, карвонни тўхтатмоғимиз керак!»

Қамлардан бири:

— Қам Ота, бу иш юлдузчи¹ Эрқут отанинг қўлидан келмайдими? — деди.

Қам Ота нималарнидир ўйлаганча:

— Маъқул. Юлдузчи Эрқут отани топинглар! — деди.

Бир оздан сўнг елкаларига тушиб турган патила-патила оппоқ соchlарини демаса, юзларидан болага ўхшаган, теран кўзларидан гўё узоқ бир дунёларга йўллар очган Эрқут ота келди. Қам Отанинг туши ва бу тушдан туғилган ваҳимани суриштириди.

«Қўлимииздан қутула олмайди ўша карвон», дея жилмайди. Худди шу пайт мағорага чопарлар кириб келди...

* * *

Карвонбоши гангид қолган эди. Нима қилишини, қайси томонга юришини билмасди. Бу йўллардан ер юзининг ўлкаларига неча карра бориб-келган бўлса-да, ўзини бу йўлларнинг энг яхши билимдони деб ҳисобласа-да, бу йўлларда неча турли-туман мashaққатларни бошидан кечирган бўлса-да, бунақасини кўрмаган эди. Карвонлар, аравалар, отлиқ ва пиёда йўловчилар қатнайвериб тошга айланиб кетган, уч-тўрт арава сифадиган эл йўли қўққис-

¹ Юлдузчи — мунахжим

дан йўқда чиққан эди. Гўё арқонтортма ўйинидаги каби кимдир бу йўлни унинг оёқлари остидан тортиб олган эди. Кунчиқар ҳам, кунботар томон ҳам унинг учун аниктиниқ, аммо қайси томонга юришини билмасди. Гўё кўкдаги юлдузларнинг ҳам ўрни ўзгариб қолгандек эди. Бу жойлар Тангри тоғлари билан Чин ўртасидаги сўнгсиз бир сахро эди. Ўнг томонда, гарчи узоқлардан бўлса ҳам, ҳар ҳолда кўзга ташланиб турган Танқутнинг қорли чўққилари булутлар оғушида эди. Йўл қаерда қолди экан? Карвонда тартиб бузилган, туялар, отлар, хачирлар, савдо-гарлар, йўл бўйи уларга қўшилган йўловчилар ва Ёмғир тошини ўғирлаб уларнинг сафига қўшилган ўғрилар неча бора бир-бирига дуч келган эди. Неча бора кечалари юлдузларга боқиб илгари юришар, лекин кун ёришганда ҳар гал аввалги жойларидан чиқиб қолар эдилар.

Тоқатлари ҳам сув каби тугаб бўлган эди. Эндиликда карвондагиларнинг ҳар бири яратган ўзларидан юз ўғирганигини англар эди. Мешлардаги сўнгги томчи сувлар ҳам ичилган, кишиларнинг лаблари ўзлари кечиб келган сахро каби тарам-тарам ёрилиб кетган, баданларини яра босган эди. Кексалар, узоқ йўлларни босиб ўтган, сафарларда тажриба ортирган кимсалар отларнинг, туяларнинг қорнидаги юза томирларни тешиб, ундан сизиб чиққан қон билан ўз ташналикларини қондирмоқчи бўлардилар. Аммо бу тезда кўнгилларини айнатарди. Карвонга касаллик дориди. Бу ҳам етмагандек, ўн-ўн беш кун ўтгач қўққисдан унинг атрофини бўри галалари қуршаб олди. Улар одамлар, жониворлар устига бостириб келар, давра олиб бу ўлим ҳалқасидан ҳеч кимни ташқарига чиқармасдилар.

Бир неча кундан сўнг қўққисдан кўк юзи қорайди. «Ҳавога булат чиқди. Энди ёмғир ёғади», – дея севингланлар ҳам бўлди. Бироқ осилиб тушган бошларини зўрға кўтариб кўкка қараганларида, кўкни чодирдек қоплаб олган, карвон узра Азройил қўлкаси каби айланиб учайдиган қора қузгуналарни кўрдилар.

Шундай қилиб, карвон бепоён қум сахросида сарсон-саргардон бўлиб изғиди, аста-секин сафлар сийракланиб, озайиб борди ва охир-оқибат қумлар орасида бутунлай фойиб бўлди. Ёмғир тоши ҳам, уни қўлга киритганидан севингланлар ҳам карвон билан бирга абадий чўкиб кетди бу қум денгизининг қаърига...

* * *

Чинга боргандаридан сұнг Дон Хининг саройға оёқ чиқарып қолғани Тулунинг юрагини алғов-далғов түйфу ва шубҳаларга тұлдириб юборган эди. Уларни құлға тушириш осон иш әмасди. Турк әлида эканликларида Дон Хи уни шошилтирганини, үрдадан тезда қочиб қолғанликларини Тулу үз юритидаги муқаддас тошнинг үғирланиши билан боғлиқ эканлигини ҳис этди. Демак, Туркнинг күч-қудратига болта урган әдилар. Унинг үз құли билан бұлмаса-да, ёрдами билан амалга оширилған эди бу иш. Тулунинг бошидан муздек сув қүйилгандай бўлди. Ҳушёр тортди, бироқ нима қилишини билмасди. Сир очилса, чинликлар унинг асир тушганлигини билиб қоссалар, үлимдан қутулиб қола олмасди. Дамини ичига ютиб кутишдан, үзини билмасликка солишдан бошқа йўл қолмаганди. Айни пайтда Дон Хига сездирмасдан, яширинча ҳар хил йўллар билан Ёмғир тоши қаерда эканлигини билиб олмоқчи бўлди.

* * *

Чин саройидаги тантана секин-аста пасайиб, юракларни орзиқтирадиган бир диққатбозликка айланди. Тошни келтириши лозим бўлган карвондан ҳамон дарак йўқ эди. «Тутиб олиб ортга қайтардиларми, йўлда қириб ташладиларми? Балки тошнинг үғирлангани ҳақидаги гап Дон Хи билан Тулунинг уйдирмасидир?» Бироқ үрдадан, Чин элчисидан келган чопарлар ҳам уларнинг гапини тасдиқлар эдилар. Ўғуз хон ҳам тошнинг Чинга олиб кетилганини билар, үз мактубида уни қайтаришни талаб қилган эди. Тошнинг Чинга етиб келган-келмаганлиги ҳақида эндиликда сўз ҳам очиб бўлмасди. «Тош бизда эмас, карвон билан бирга фойиб бўлган» деб жавоб қилинса ҳам, бу қониқарли жавоб бўлмас, аксинча, ушбу ишнинг тепасида ўзлари турганликларини фош этарди. Қайғуга ботиб, бу йўқотиш дардини чекаётганларини ҳам сездириб бўлмасди. Ўзларини ҳеч нарсани билмайдигандек тутишдан бошқа йўл қолмаганди. Маросим янгидан жонланди, император саройи аввалги ҳолига қайтди. Энди Тулунинг ишончи комил эди: «Тошни келтиришган!..» Бироқ уни қаерда асрashади экан? У буни билмасди. Фақат шуни би-

лардики, муққаддас Тангри омонати ўғирланган турк-ларнинг ваҳимасидан тошни бу ерда, саройда сақламайдилар.

Шу аснода ўлканинг жанубидан кетма-кет хабарлар келар, у ерларда йиллар бўйи интизорлик билан кутилган ёмғир ёғмоқда эди. Лекин шу қадар кўп ёғмоқда эдики, дарёлар тошиб уйларни, экин-тикинни ювиб кетмоқда эди. «Демак, рост экан-да! Ёмғир тоши борган ерида ўз кучини кўрсатар экан-да!»

Турклар ичida ҳар бир улус begi кўз тиккан Ёмғир тошининг Чинга ўғирлаб кетилгани ҳақидаги хабар ари уясига чўп тиққандек бўлди. Элда саросима бошланди. Бунинг оқибати уруш билан тугарди. Бироқ ҳар бир бек катта жангга кириш эмас, ўз ўчини олиш пайида эди. Қулай фурсат келган эди. Улар ўртадаги сулҳни бузган Чинга қарши юриш қилиш, кетма-кет босқин қилиб уларнинг бошига қора кунларни солиш, Тангри ёрлақаса, муқаддас тош изига тушиб, унинг эгаси бўлиш орзуси билан ёнар эдилар.

Шимол – жануб йўллари босқинчиларнинг сон-саноқсиз юришларига тўлиб кетди. Ҳар куни бу йўллардан Чиннинг устига ёғин-сочиндан ҳам даҳшатли бўлган селлар ёприлиб келарди. Юришларнинг, босқинчиларнинг селга ўхшатилиши, турк ҳужумларининг оқин деб аталиши ҳам осмондан тушган атама эмас эди. Худди ана шу даврларда Чин императори бутун Шимол йўлларини тўсадиган узун бир тош девор қуриш қарорига келган эди.

* * *

Бироқ қўшнининг юрагига қўл чўзмоқ нима эканлигини Ўғуз Чинга кўрсатиб қўймоқчи, кўзга чўп тиққан бу қўшнилардан йиллар давомида йифилиб келган ўчини бирваракайига олмоқчи эди. Хоқон навбатдаги бу юришга қизғин ҳозирлик кўрар экан, амакиларининг Олтойдан, Қодиркондан Тинч уммонигача қанча турк улуси бўлса, ҳаммасини тўплаб ўз устига бостириб келаётганлиги ҳақидаги хабарни олди. У олға интилар экан, орқасидан тиф санчган эдилар.

Ўғуз хон уларни юрга киритмаслик учун Чу дарёсининг сўл томонидаги бепоён саҳродан, Балхаш қулининг

жанубидан ўтиб, бир неча кун кунчиқар сари юрди. Олтой тоги этакларида чодир тиқди. Бир оздан сұнг амакилари билан юзлашди. Икки кун давом эттан қоның жаңгда ҳар икки томондан ҳам күплаб йигитлар ҳалок бұлды. Ұғуз хоннинг кутилмаган ён зарбалари амакиларининг қасос олиш орзусини пучга чиқарди. Катта амакиси ўлдирилди. Омон қолганлар Кур хон бошчилигіда Шимоли-шарқ бұзқырларига, Туғро водийсига чекиндилар. Кур хон бу ерда ҳам құл қовуштириб ўтиrmади. Катта акасининг хунини олмоқ, қутурған амакиваччасининг бурнини ерга ишқаб қўймоқ истаги Кур хоннинг бутун борлигини қамраб олган, бунинг учун ҳар қандай кимсага илтижо этмоққа, ҳар қандай кимсадан ёрдам олмоққа тайёр эди. Бироқ бундай кимсанни излашга эҳтиёж қолмаганди. Шундоқ ҳам Чин элчиларининг ўзлари императорнинг яширин мактубини унга етказған эдилар. Мактубда император гүё дүсти Қора хоннинг қисматига чин юракдан ачингани ҳақида, қўшнилар ўртасидаги душманчилик янада чукурлашиб кетишини истамаслиги борасида ёзған эди. Аммо, шубҳа йўқки, мактубдан кўзланған мақсад бутунлай бошқа эди. Император сўз орасида Ұғуз хоқоннинг ҳали ёш эканлигини, бу эса қўшнилар ўртасидаги муносабатларга путур етказиши мумкинлигидан ўзининг хавотирда эканлигини қистириб ўтган, усталик билан ўлкаларнинг манфаати учун Кур хонга ҳар қандай ёрдам бериш учун тайёр эканлигига ҳам ишора қылған эди. Аслида, Чин императорининг фикрича, хоқонлик Кур хонга тегиши керак экан... Мактуб ана шунақанги ўртага нифоқ солувчи руҳ билан тўлиб-тошган бўлиб, бу Кур хонни янада газаблантиради. «Қонга қон», дея отилиб кирған ҳар бир жангидаги йўқотган яқинларининг, учраган мағлубиятларининг алаами ундағи интиқом ва ғазаб ўтини янада авж олдирар, ўз ёғида ўзи қоврилар эди. Шу қизиққонликда шимолий қабилалардан тўплаган жангчилари билан ёш хоқон устига яна бир юриш қилди. Ұғуз хон бу гал ундан олдинроқ ҳаракат қилди. Кур хон уни қаердан излашини Ұғуз яхши биларди, шунинг учун ҳам бу ердан қўзғалиб, сездирмасдан Қоракурумга ўтиб олди. Кумли сахро этагида қўққисдан Кур хоннинг олдини кесиб чиқди. Қариндошларнинг яна бир қоның жангиги бўлиб ўтди. Қариндош-уруг аямасдан бир-

бирларини ўқقا тутдилар, найза санчдилар, қилич чопдилар, бўз саҳрони қизил қонларига бўядилар. Кур хон бу сафар ҳам енгилиб, Кунчиқарга қочди. Ўғуз хон Шимолда яшайдиган татарларнинг сардори Олтин хон билан билан юзлашди, енгилиши муқаррар эканлигини кўрган Олтин хон тадбир билан иш кўрди, элчи жўнатиб, «шундоқ ҳам бир-биримизни ҳолдан тойдирдик, яхшиси, Буюк хоқон умумий душманимизга қарши жангта ҳозирлик кўрсинг, биз унга душман эмасмиз, қўйган шартлари бўйича унга ёрдам беришга тайёрмиз», деган сўзлар билан Ўғуз хонга итоат қилмоқча ҳозир эканлигини билдириди. Икковлари кўришиб, гаплашиб олдилар.

Ёш хукмдор куч тўплаш учун тағин Кунботарга қайтди. Бутун қишини Балхаш атрофида, қалин қор қоплаган тоғларнинг пана, шамол ҳам ўта олмайдиган қишлоғга мос дараларида ўтказди. Қора қирғизларнинг майда босқинчилкларга чидаб берганича Чин оқинига ҳозирлана бошлади.

ЧИН ЮРИШИ

Ўсмир ёшларидан бошлаб бу йўлдан у кўп ўтган, Чиннинг йилнинг етти ойи давомида сув остида қолиб кетадиган, одамлари чумолидек гужфон ўйнаган, рутубатли, юракни сиқадиган ички аймоқларигача бориб қайтган эди. Бироқ эндиликда бу бошқача сафар эди. Ички урушлардан, отаси билан, қариндошлари билан бўлиб ўтган қонли жанглардан сўнг у илк бора бу қадар кучли душман билан юзлашмоқда эди. Бу Ўғуз учун, айни пайтда унинг хоқонлиги учун ҳаёт-мамот жангига эди. Бир томондан эса Тангри тошини эсдан чиқаролмасди. Ора-сира отасининг ортидан ҳам ўпкалаб қўярди: «Бошинг бутларга сарсилиб қолди, элнинг буюк мақсадини унудинг. Улуснинг бошига қора кунлар солиб кетдинг, ота!»

Бир уюр от, бир қайтабон¹ тuya кетганида ҳам Ўғуз бу қадар ўртанмасди. Тош қайтарилемаса, юрт хароб бўлади... Шуни ўйлаб афсус чекарди.

Баҳор келди, ер-сувлар уйғонди, йўллар очилди. Ўғуз кўклардан нидо кутди. Ой тўлишиб, дунёни сутдек ёғдуси

¹ Қайтабон – тuya тўдаси

билин тўлдирган бир кечада, куннинг илк шуъласи тоғларнинг қорли чўққиларида жилваланган бир кунда Ўғузнинг турли уруғ-қабилалардан сараланиб тўпланган қўшини жануб томон оқди. Бир ойлик мاشақатли йўлни сабр-тўзим билан, қоринларига тош боғлаганча¹ босиб ўтдилар, ниҳоят чинликларнинг дастлабки қоровул миноралари кўринди. Ўғуз хон қўшинга бир ҳафталик ҳордиқ берди. Шу орада қўшиннинг илфор кузатувчилари, қиловузлар ён-атрофни текшириб, қаршидаги йўлларни аниқлаб келдилар. Қоровул минораларининг ҳар бири битта қалъага тенг бўлса-да, Ўғузнинг яқинлашаётганини эшитиб қочиб қолган эдилар. Шу тариқа Ўғуз Чиндан кириб, Мочиндан чиқди. Буюк денгиз, Далай денгизи, Кунчиқар денгиз деб аталадиган Тинч уммон соҳилларига бориб тұхтади. Орқадан чопарлар келишди.

Кур хон янгидан куч тўплаган, Сифноққа кириб, Ўғуз қайтгунча саройни эгаллаб, ўзини хоқон дея эълон этмоқчи эди. Ўғуз хон ҳар бири ўзини устун деб ҳисоблайдиган, бир-бирини ёқтирамайдиган, бироқ шимолдан бўладиган турк ҳужумларига қарши дарҳол бирлашадиган Чин аймоқларининг бош шаҳарларига кириб келганида, уни Тангри элчиси каби кутиб олар эдилар. Қўшинни мисли кўрилмаган сахийлик билан сийлардилар. Юзларида табассум ўйнарди. Бироқ Ёмғир тошининг дараги чиқмади.

Кунчиқар сафари охирлаб қолганда Ойтож хотун Ўғузга ўғил ҳадя этди. Отини Кун қўйдилар. Хоқон билан хотун, ота-она уни яна бошқа бир от билан ҳам аташар, уй ичидан ана шу от билан чақиришар, бироқ Кун исмида аслздода турк табақаларининг кўк ва яралиш билан боғлиқ тасаввурларидан келаётган яширин бир маъно ҳам бор эди, иккинчи томондан эса бу от гўдакнинг Кунчиқарда туғилганини англатарди. Биринчи ўғлининг отини Ўғиз хоннинг ўзи қўйди. Бу отни эса тушида кўрган эди. Оппоқ либосли бир чол кулимсираганича «Олти ўғил кўрасан, уларга кўк билан боғлиқ отларни қўясан, Кўк тангрининг иродаси, ёрлиғи шундоқ!» деган эди. Ўғуз хон бу тушига ишонган, от қўйишни кўкнинг ҳукмдори – Кундан бошлаган эди.

Ўғуз туғилиши билан шундоқ ҳам ўлгудай севалиган,

¹ Қоринларига тош боғламоқ – очлик, ташналилкка чидамоқ

қаттиқ боғланиб қолган, узоқ, оғир юришларда бир лаҳза ҳам ёнидан айримайдиган, феъл-авторидан жуда хурсанд юрадиган Ойтож хотун Үфузга янада қаттиқроқ боғланди. Үгуз Ойтожни Тангрининг ўзига бўлган севгиси, армуғони деб биларди. Йигитлар, алларда бўлмаган бир тўзим, куч, жасорат бор эди бу хотунда, бунинг устига хоқоннинг энг яқин, синалган маслаҳатчиси ҳам шу эди. Узоқ йиллар, оғир йўллар давомида қаршидан чиқадиган юзлаб саволларни, тугунларни ечишда Үфузга ҳаммадан кўпроқ у ёрдам берарди. Хоқоннинг буфро каби, баҳор селлари каби ҳайқириб, ҳамма нарсани остин-устун қилмоқчи бўлган пайтларида ҳам Ойтож хотун пинагини бузмас, қовоқ солмас, чехрасини ой нурига ўхшаш жозибадор нур, барча ғам-ғуссаларга барҳам берадиган ёғду тарк этмасди. Қон-қариндошларининг ёвлашуви, юртдан чиқиб кетишлари уни эзар, жангларда уларнинг кетма-кет енгилиб, қирилиб, тупроққа қоришиб кетишларидан ўртанар, бироқ у ҳам Үгуз хон каби бундан қочиб бўлмаслигига, Тангри ёрлигини, элни ҳимоя этишнинг бошқача йўли йўқлигига ишонар, хоқонни ич-ичдан бўғаётган изтиробларни камайтиришга уринарди. Афтидан, Тангри элчисини асраш учун унинг танлаб олинганлиги ҳам кўк билан боғлиқ бир иш эди, хотун буни ҳис этарди, эрига, эл бошлиғига, хоқонга умр йўлдоши эканлигидан фаҳрланиш билан бирга, ана шу тариқа Тангрининг амрини ҳам бажараётганидан севинар эди, ана шу туйфу умрининг охиригача уни тарк этмади...

Ўғли Куннинг туғилиши билан ер юзининг янги кунлари бошланганига ишонарди. Ўғил туғмоқ – Үфузнинг наслини янгидан кўқартмоқ, хоқонга ворис баҳш этмоқ демак эди. Фақат сут бериб боқиши учун эмас, элнинг йўлини ҳимоя қиласидиган фарзанд каби ўстиарди Кунни...

Неварасининг туғилиши Үрхонга ҳам қанот берган эди. У қўшиннинг ортга қайтишини истамасди. Унга бўйсунадиган бошқа суворий бошлиқлари ҳам Үфузга, «ойлаб йўл кечиб келсак-да, охирида Буюк денгизга бормасак, айб бўлади, хоқоним!» дея олға юришга даъват этардилар. Үфуз хон қатъий қилиб деди:

– Олдинда қўрқадиган жойимиз йўқ. Бизнинг довруғимизни эшитдилар. Элчиларимиз борганда, «Сизга итоат

этамиз, сизга эл бүламиз», деган ваъдан берсалар бўлгани. Бошқача гапни кутмайман ҳам. Чинга қудратимизни кўрсатдик. Энди юртимизда арқайин яшай оламиз. Қайтмоқ керак!

Жиянининг узоқ давом этган бу илк юриш борасида бу қадар bemalol сўзлаши, ҳамма нарсани тугади деб ҳисоблаши Ўрхонни хавотирга соларди.

– Хоқоним, ҳали Чинни енгилди деб бўлмайди, бизга хабарлар етиб келмоқда, улар тўпланиб, қаршимизни кесиб чиқишишмоқчи. Буларнинг мояси чирик. Сохта табассумларига, бошимиз остига пар ёстиқ қўйишларига алданмаслигимиз керак.

Ҳақиқатан ҳам, Ўғуз хонни ўз ўлкалари ичига киритган, қайга борса табассумлар билан қарши олиб, унга бўйсунган Чин аймоқ бошлиқлари бу ўзига ишонган, эрдил¹ турк хоқонини, ана шу соддадиллигидан фойдаланиб, хоқонлигининг бошидаёқ бўғиб ташламоқчи, шу тариқа турклар ваҳимасидан бир йўла қутулмоқчи, Даشتни тиз чўқтириб, ўз қўлларига киритмоқчи эдилар. Энди бунинг фурсати етган, ўлжа ўз оёфи билан келиб тузоқقا тушган эди. Чинликлар бирлашган қўшинлари билан Ипак йўлиниң бир тармоғи Танқутга айрилиб кетадиган жойида, тор дарада Ўғуз хоннинг қаршисидан кесиб чиқдилар. Жангнинг охирини кутмай бир-бирларини зафар билан кутлар эдилар. Бошдаги хоқони билан ўн мингларча турк ўз ҳовучларининг ичидаги эди. Кўкда деб билган Яккаю Ягона Тангрилари келса ҳам энди уларни қутқариб ололмас эди.

Ўғуз хон алданганини билиб, қўшин бошлиқларини кенгашга йиғди ва деди:

– Бу пахса уйларда тўнғизлар, товуқлар билан бирга яшаган Чин эркаклари кўзлари очилгандан бизни душман деб биладилар. Унумдор тупроқ, жарақ-жарақ олтинкумуш, юмшоқ ипаклар, энг яхши терилар шуларники... Бизларни чўлларга сиқишириб қўйиб, ҳатто ўша ерда озғин тупроқларимизда bemalol яшашимизга ҳам чидай олмайдилар. Буларни бизнинг озод фикримиз, тўзимимиз, туганмас куч-қудратимиз қўрқитади. Азалдан элимизга фитналар солиб, турмушимизни бузган шулардир. Танг-

¹ Эрдил – жасур

ри мадади билан энди күчимизни күрсатайлик. Менинг сўзим шу. Энди сиз гапиринг!

У бекларни эшитиб бўлгач шундай деди:

— Бу жойларни уйфур суворийлари яхшироқ билишади. Улар олдинда борсин. Қолган күчимизни яшириб турайлик. Уйфур суворийларини кўрган чинликлар күчимизнинг озлигидан жўшиб кетиб, уларнинг ортидан тушишади, шунда пистирмадаги уйфур камончилари кўрсатади нималарга қодирлигини.

Кўшинни ортга, даранинг чиқиш жойига қайтариш, ўнг ва сўл қояларга қўшимча камончилар жўнатиш учун Ўғуз хон вақтдан ютиши лозим эди. Шу сабабли Чин кўшиннинг қаршисига уч баҳодирни жўнатди: «Яккама-якка курашда ким болиб чиқса, ўша енгган ҳисобланади. Аскарларимиз беҳудага қирилиб кетмасин...». Ўғузнинг таклифи ана шундай эди.

Чинликлар узун соchlари елкаларида ўйнаган, чўлнинг асов отлари устида ҳар бири девга ўхшаб ўтирган баҳодирларни кўрганда, олтмиш тутам найзаларига, олтин беҳакли ёйларига, ҳар бири одамнинг бошидек келадиган гурзиларига кўзлари тушганда яккама-якка курашдан қочиб:

— Чинни уч киши эмас, бутун қўшиннингиз яғмолади¹. Ҳар бир кишининг ўз айби бор, шунга яраша жазосини олиши керак, — дейишиди.

Бу сафар Ўғуз элчиларига бошқа бир буйруқ берди:

— Бориб душманга бизнинг жанг усуулларимизни айтинг, биз қон тўкишни истамаймиз, урушни яраш билан алмаштира оламиз. Жангдан олдин от, тuya пойгалари ўtkазиш, алпларнинг кучини синаш элимизнинг қадимий одатларидандир, агар хоҳлашса, ана шундан бошлайлик...

Чинликлар Ўғуз элчиларнинг бу сўзларини ҳам менсимай, истехзо билан қабул қилдилар.

— Отларимизнинг югуригини, алпларимизнинг кучини жангда кўрасиз...

Элчилар қайтишиди. Жанг муқаррар эди. Аммо бу музокаралар Ўғузга ўз қўшинини жойлаштириш учун етарли бўлди. Шундан сўнг уйфур суворийлари олга юришди, Чин

¹ Яғмоламоқ — талон-торож қилмоқ

қўшинининг қарисида от ўйнатиб, ёғийни жангга чорладилар. Жанг бошланди.

Чин хоқони қаҳқаҳа уриб кулди:

— Шулар билан қўрқитмоқчими бизни Ўғузхон?

Ўғуз хон суворийларининг юрагида кўй сурувига кирган бўридек бир ишонч бўлганлигидан қарши келганларнинг озми кўп эканлигини ўйлаб ҳам ўтиришмасди. Ўлим ваҳимаси йўқлигидан жангга тўйга боргандек борар эдилар. Жанг уларнинг ҳаёт тарзи эди. Шунинг учун ҳам уйғур суворийлари Чин қўшини устига қасирға каби босиб бордилар. Бир томондан кириб иккинчи томондан чиқдилар. Бир-икки карра шундай ўтсалар сони ўзларидан бир неча баробар кўп бўлган Чин суворийларини тор-мор этардилар, бироқ Ўғуз хоннинг топшириғи бошқача эди, шунинг учун бир оздан сўнг қўрқсан каби ортга қараб қочдилар. Даранинг теранлигига чекинганлар гўё селга ўхшарди. Чин суворийлари оғир либосларда эди. Енгил кийиниб олган уйғур суворийлари олдида улар кулгили кўринар, рақибга ета олмасдилар. Буни кўриб уйғур суворийлари отларини секинлаштирудилар. Чинлар яқинлашганда чопачопа от ўйнатиб ёмғир каби ўқ ёғдирдилар. Чин суворийлари учун бу бир сабоқ эди. Уз ўқлари юз-юз эллик қадамдан нарига ўтмасди. Бироқ бундан уч баробар узоқликдан отилаётган уйғур ўқлари бўғизларини тешар, кўкракларига санчилар, отларининг кўзини чиқарар, туёқларини бир-бирига михлаб қўярди. Чин суворийлари туркларнинг тўхташини, улар билан юзма-юз жанг қилишни, қилич, найза курашини кутардилар. Бундай жадал от чоптиришда ортга ўқ узиш уларнинг тушларига ҳам кирмаган эди. Ушбу талотўпда нималар рўй бераётганини тушуниб етмасларидан шоҳдаги чирик мева каби дув-дув тўкилар, тўкилган сари сийраклашиб борардилар. Даранинг энг тор жойида фақат олдиндангина эмас, ўнг ва сўл томондан ҳам ўқ ёфиласётганини кўриб тузоқقا тушганликларини англадилар. Талвасада битта-битталаб ерга қулаб тушар эдилар.

Илоннинг ёғини ялаган Чин хоқони пинагини бузмасди. Турк қўшинининг қудрати суворийларда. Улар ҳам қочиб қолган бўлса, Ўғуз хоннинг кучи тугабди.

Ўйлашларича, Чин суворийлари аллақачон турк қў-

шинини дарада қириб тугатиши, соғ-саломат ортга қайтиб келиши керак эди. Ўз суворийларининг кечикаётганини кўрган Чин императори тишдан тирноққача қуролланган пиёда қўшинини дарага жўнатди. Улар қаршиларидан келаётган эгасиз от уюрларини кўргандада шошиб қолдилар. Сўнгра дара бўйлаб чўзилиб ётган жасаллар орасидан ўтаётганларида сафлари бузилди. Шу пайт ўнгу сўлдан ёғилаётган ўқ ёмғирлари остида ўзлари ҳам қулай бошладилар.

Жанг охирида Чин императори қўриқчи дастаси билан бирга қўлга олинди. Ортга чекинишга ҳам, ўнг ёки сўлга қочиш учун ҳам йўл қолмаган, бепарволиги туфайли ўзи қурган тузоққа ўзи тушган эди. Ўғуз хон императорни отдан тушмасдан, бироқ эҳтиром билан, жанг натижасини юзига солмасдан, гўё файритабиий ҳеч нарса рўй бермагандек, оғир-вазмин, гурур билан қарши олди. Зимдан Чиннинг ҳали ўзи қўрмаган жойларини суриштириди, сўзни айлантириб Ёмғир тошига олиб келди, жанг қилишни истамаслигини, фақат Чин томонидан ўғирланганига амин бўлган тошни излаб юрганини айтди. У ҳар қанча сўраб-суриштирмасин, императордан Ёмғир тоши борасида ҳеч нарса била олмади. Тошнинг Чинга келтирилиши мумкин эканлигини эътироф этган император оддий ўғриларнинг масъулиятини ўз зиммасига ололмаслигини, саройнинг ва ўзининг бу ишдан бехабар эканлигини айтди. Тош қасддан ҳам ўғирланган бўлиши мумкин. Балки икки қўшнининг орасини бузмоқчи бўлганларнинг қўли бордир бу ўғриликда. Тошнинг императорга келиб етмаганига Ўғуз ҳам ишонди. Аммо императорнинг ўзи ҳам унивидан кам бўлмаган қизиқиш билан бу тошни кутаётганлигини, уни ахтаришга тайёр эканлигини Ўғуз хон сезди. Император ҳурматли хоқоннинг розилиги ва илтифоти билан кечирилиб, ўз ўлкасига қайтарилар экан, тошни излаб қўришни зиммасига олди, хоқон жўнатадиган кишиларнинг Чинни кезиб-ахтариб чиқишлиари учун ёрдам кўрсатажагига ҳам сўз берди. Бир томондан Ўғуз хон ўзига мағлуб бўлган, қаршисида бош эгиб турган бир кимса бор экан, бошқа бирорвнинг Чин таҳтига эга бўлишини истамасди. Ана шуларни ўйлар экан, император билан ўзаро алоқа шартларини аниқлаштиргач, уни озод

қилиб ортига қайтарди. Чин Үгүз хонга ҳар йили ўттиз минг ипак қумош, олтмиш минг олтин, ўттиз минг қоп гуруч ва күн берадиган бўлди.

* * *

Чин сарҳадларидан узоқлашганларида Тулу бир неча отлиқ билан ўрдага етиб олди. Уни хоқоннинг ҳузурига олиб кирдилар. Үгүз унинг сўзларини отасининг кекса маслаҳатчиси, маҳрами Улутурк билан биргаликда тинглади. Тулу кўзларидан ёш оқа-оқа деди:

— Хоқоним! Ўтинаман, менга ишон! Хотиним «юртимни соғиндим» дея мени олиб кетди. Бироқ Ёмғир тошининг ўғирланишида унинг ҳам қули бор эканлигини билганимдан сўнг ажрашдим. Эшитишинг қараганда тошни Чиннинг шимолида, тоғлардаги бир топиноққа яширганлар. Изидан туша билмадим. Ишонмасангиз, бошимни олинг!

Ўгүз уни ўлдирмади, қўйиб юборди. Лозим бўлса, Чинга қайтармоқчи эди. Айни пайтда Тулунинг гапларини эшитгандан сўнг қўққисдан жонланди. Қам Отадан келган мактубни ўқигандан кейин эса бутунлай бошқа қиёфага кирди. Улутурк бунинг сабабини сўраганида хоқон:

— Мен Тангри тошини топдим, — деди.

Қам Отадан келган хабар гўё уни уйқудан уйғотган эди. У Қам Ота ва юлдузчи Эрқут ота йўлларни чалкаштириб юборишганига, ўғрилар қўшилди деб шубҳаланган карвоннинг Чинга етиб бормаганига, йўлдан адашиб, қумденгизига чўкиб кетганига ишонар эди. Бунинг рост ёки ёлғонлиги эртами-кеч маълум бўлар эди. Эндиликда Үгүз хон Қам Отадан келган хабар билан Чин императорининг айтган сўzlари бир-бирига мос келаётганлигига асосланниб, шунга уйғун қарор қабул қилган эди.

Улутурк сўради:

— Қандоқ қилиб топдинг?

— Менинг ишончим Тангрига боғлиқdir, тошга эмас!

Эл орасида Кўк Тангрига топинганлар қундан-кунга ортиб, бизга ишонганлар кўпайиб бормоқда. Энди Тангри тошининг қулимизда бор-йўқлиги муҳим эмас. Чинликлар тошни қулга киритган-киритмаганликларини сир тутадилар. Биз «топмадик» десак, ўз ичимиздаги бекларнинг

қанчадан-қанчаси душман каби севинади, бизни кучдан қолди деб ҳисоблайди, бизга қарши бош күтәрадиганлари ҳам топилади. «Күтсөл тош менинг құлимда!» деган та-саввур уйғотайлик. Улуста, құшинларга, бекларга сез-дирмасдан.

Улутурк хаёлга толган эди. Хоқоннинг донолиги, бу үпқондан йўл топа олғанлиги уни хурсанд қилди:

— Тушундим! Тұғри йўл топдинг! У тошнинг қудрати сендадир. Сен — Тангрининг элчисисан! Ёмғир тоши ҳам фақат сенинг құлингда жонланади. Уни топган бошқа би-ров «құдратларини олиб қўйдим» дея баҳтиёрларча уйқуга кетади, аммо кучдан қолиб уйғонади. Майли, бу тошнинг нусхаси кўпайсин. Тошга кўнгли кетган ҳар бир кимсага уни ўғирлатайлик... Шунда ҳар бир кимса ўзини бу тошнинг эгаси деб ҳисоблайди, лекин бошқалар буни тан ол-майди. Тош фавгоси шу тариқа аста-секин ўртадан кўта-рилади, — дея кулиб қўйди.

Ишнинг қолгани Улутуркнинг құлида эди. Ишончли бир тоштарош топди, куришиб, келишиб олдилар.

Чинда тош ҳақида бошқа гап-сўз бўлмади, аммо ҳамон яширинча уни изламоқда эдилар.

Хоқон ортга қайтар экан, Талас, Сайрам бекларининг «Ўғуз Чиндан омон қайтмайди!» — дея итоатдан чиқиб, саркашлик қилғанликларини эшитди.

«Ўғуз хон инончимизга қарши чиқди. Бизни йўлсиз қилиб қўйди. Бутларимизга эҳтиром кўрсатмади. Ота-бо-боларимиз тўрасига менсимай қаради. Бизларни камситди... Тўр боши, хоқон бўлиш учун ўз отасидан ҳам кечган кимса эртага бизни ҳам танимай қўяди. Ҳозироқ буни ол-дини олмоғимиз керак», дея унга қарши чиқдилар.

Бекларнинг бош кўтариши Ўртажга бориб, Инжу дарёси ёқалаб экин-текин ерларини кенгайтирмоқ, янги кентлар барпо этмоқ истаган хоқоннинг йўлини ўзгартирди. У Талас ва Сайрам сари юрди. Саркаш бекларни осонгина орадан кўтариб, ўлпон йиғиш учун ўз босқофини¹ қўйиб қайтди.

Зафарли Чин юриши хоқоннинг номини ер юзига танитди. Кунботар ўлкаларининг элчилари унинг жангдан қайтиб, саройга келишини кутмоқда эдилар. Ёнларида

¹ Босқоқ — ўлпончи, вакил

турк, чин, сүфд тилини биладиган тилмочлари ҳам бор эди. Элчиларни тўра бўйича гулхандан айлантириб хоқон ҳузурига бошлаб бордилар. Уларнинг ўз ҳукмдорларидан келтирган мактублари бошдан-охир Ипак йўли билан боғлиқ эди, турк-чин уруши оқибатида бу йўлнинг бекилиб қолишидан хавотирда эдилар. Олис-яқинда яшашидан қатъи назар, ҳамманинг кўзи ана шу йўлда эди. Сўнгра элчилар кунботардаги эл-улусларнинг турмуши, янги бошлиқлар, янги кентлар ҳақида сўзлаб бердилар. Бири иккинчисининг ҳудудига кирмаслик, тўраларга риоя этиш, яқинлик, ҳамкорлик қилиш ҳақида сўз берди. Ўз үлкаларига кўз олайтираётган душманлардан ҳимояланиш учун Ўғуз хондан мадад сўраганлар ҳам бор эди. Хоқон бу барча элчи хушгуфторликлари заминида нима ётганлигини яхши биларди.

Хоқон мавҳум, тутунли суҳбатларни ёқтирамасди. Шу ўринда элчиларга кўрсатилиши лозим бўлган мулозаматни, улуслараро муомала таомилини унуди ва кескин деди:

— Менга Ассуриё, Ливиё, Мисрни танитмоққа уринманг. Уларни етарлича яхши биламиз, пайти келса у жойларга ҳам борамиз...

ЎҒУЗ ХОН ТЎРАСИ

Чин юриши шарафига мисли қўрилмаган бир тантана бўлди. Сўнгра Ўғуз хон яkkатангричиликнинг элни бирлаштириши ҳақида сўзлаб, оғир тўраларини эълон этар экан, бундай деди:

— Будунимга, улусимга, эл-юртимга!

Мен Ўғуз хон, Ягона бўлган Юксак Тангрининг қути бўламан!

Унинг ўели, тили ва элчисидирман!

Унинг иродаси билан, ундан келганман!

Эл-юртим, уруғим ҳам кўқдан энди. Зарҳал нурдан туғилди. Биз Тангрининг нуридирмиз! Кўк фарзандимиз! Амалимиз, фикримиз, сўзимиз — ҳаммаси кўкларнинг нури билан алоқадор. Бу нурни ер юзига ёйиш ҳам бизнинг зиммамизга тушди!

Биз Тангри сўзининг экинчилари бўламиз! Унинг хоҳиши-иродасини ташиймиз. Тангри тағин бизга қанот ҳам берган... Низом ва куч берган! Мен Тангрининг ердаги

қўлкасиман, унинг уруғимга баҳш этган улгисининг, амрининг ва қудратининг қўриқчисидирман!

Мени билмаган Тангрини ҳам билмайди, унга қарши борган бўлади!

Қўк Тангри менинг улусимнинг, уруғимнинг бошида мангу қолади. Унинг ҳукми бузилмагунча, Тангри кўзи, Тангри Кўли бош устимизда бўлади.

Элиминг абадий яшамофи, будунимизнинг ер юзининг ягона, ўзгармас буюги бўлиб қолмоғи Тангрига чексиз севгимизни, унга бўйсунишимизни тақозо этади.

Эшитинг, билиб олинг!

Мен юксак Тангрининг қиличиидирман! Мехрни билганим каби, қаҳрни ҳам биламан!

Оғоч илдиздан сув ичади, эл тузукдан.

Тузуксиз эл бузилади, йўлини йўқотади.

Тангридан келган қутни асралмоқ ҳар бир кишининг зиммасидадир.

Турк ичидаги катта-кичик, мартабали-мартабасиз барча тенгдир. Тангрининг яратганларига бир кўзда қаралади.

Тангри мени тўра бошига чиқарди, эл-улусим йўлида ҳормай-толмай, оғишмай, букилмай, меники-сеники, узоқ-яқин демай тўғри амалларни қўлмоғим учун...

Элда ҳар бир кишининг инсоний эрки хоқоннинг ҳимоясидадир. Бой билан йўқсул ўртасида тафовут йўқ! Битта оти бор киши билан бутун бошли уюри бор кишининг, битта қуий бор киши билан бутун бошли суруви бор кишининг тўра олдидаги нуфузи баробардир.

Ҳар бир киши юртники, юрт ҳар бир кишиники!

Ҳар бир кишининг қайфуси ҳам, шодлиги ҳам эл билан баҳам қўрилади.

Улусимизнинг қудрати Қўк Тангрига бўлган инончадир. Бу инонч юрт билан улусни, хоқонлик билан чўпонликни тенг кўради. Бир киши иккинчисига дахл қўлмайди, бирорвоннинг гапига эгилмайди, бир инсонни бошқа инсондан устун кўрмайди, ер юзини ҳам қўк юзи каби яхлит деб билади. Битта юрт – битта инонч!..

Юртимизни юксалтган адолат тўрасидан узоқ-яқин, таниш-нотаниш барча улусларга масъулият тушади.

Ер юзининг ёлғиз раҳнамоси Тангридир.

Турк элида барчанинг тили бир бўлади.

Отамдан қолган, тұрамизга күра менга теккан бу юрт шунинг учун ҳам Үғузнинг үчоги, Үғузнинг юртидир. Бу юрт менинг тақдиримдир. Бу юртга, бу әлга боғланған ҳар бир киши Үғуз деб аталади. Менинг бир тармоғим бўлади. Үғуз эли мангу ер юзининг кўрки бўлиб қолади. Ҳар бир Үғуз Тангрининг аскари ҳисобланади.

Бу кундан Үғуз элининг оғир ва енгил тўраларини эълон қиласман.

Ўғуз эли давлатини, бирлигини тўра бўйича ҳимоя қиласди. Бутун ишларимиз тўра билан боғланади.

Тўра ионч билан қардошдир.

Тўранинг бошида Тангрига, яратиқларга севги туради. Борлиғимиз севгидан куч олади.

Борлиғимиз билан эл бирлигига бурчлидирмиз. У бузилса, ном-нишонсиз йўқоламиз.

Юртнинг бойлиги унинг улусидир.

Тўрани яратган улус мангудир, муқаддасдир.

Ота-боболаримиздан келган, бу кундан Үғуз-турк элини бўлиб ҳисобланадиган тўра бирдамлигимиз учун яратилган.

Қўл бўлмак, эл бўлмак, элчи бўлмак – ер юзига тинчлик ўрнатмак – Яратганни севинтирмакдир. Үғуз элининг улуғ ва сўнгсиз йўли – тинчликдир.

Эшитинг, билиб олинг!

Мен Улуғ, Мангу Тангрининг истаги, унинг қудрати билан сўзлайман. Бироқ Тангри элчиси, хоқон эканлигим хато қилишимга, яхшини ёмон дейишимга изн бермайди!

Хоқон сифатида тўрага ҳаммадан қўпроқ мен мастьулман! Ташқаридан келганга қиличим, ичкаридан келганга тўрам бор!

Мен, кўкларнинг юксак ўғли – Үғуз хоқон, эл хоҳиш-иродаси ва тўрадан бир одим ҳам ташқари чиқмайман!

Тўрамизга кўра хоқон ўлароқ эл буюкларини, кенгаш йиғинини, буйруқчиларни юксак тутганим ҳолда ҳар ишни улуснинг сайловига ҳавола этаман.

Эл, давлат – тенгdir! Бутун тўратганларни бир кўз билан кўрмоқ лозим.

Юртларимиз Тангрининг яралишга, яралишнинг борлиққа энг яқин бўлган ерларидир.

Юрт учун, инсон учун хизмат қилган киши Тангри учун хизмат қилган кишидир.

Бошқа элларнинг бу юртларга суқилиб кирган пайтлари бўлди. Бож ҳам тўладик. Бироқ тилимизни ўзгартирамадик, узун соchlаримизни кесмадик, бегона лиbos киймадик, тўраларимизни бузмадик, ота-боболаримиз изидан қайтмадик.

Кучимиз ҳам шундадир!

Ота-боболаримиз номини шарафлайлик, беклар!

Кўкдан энган олтин шуъла ерга тўқинганида бир тоғ яратди. Уни Қутли тоғ дедик.

Отанинг бошига парвона бўлгандек, унинг бошига йиғилдик.

Унинг этакларида кўпайиб, ер юзига сочилдик.

Қутли, Тангрисол тоғлар бор экан, биз ҳам бормиз!

Аксинча бўлса, Тангри кут йўлагини¹, кут ёрлигини мендан қайтариб олади. Бирдамлик, билим, низом, бирбирини ўзаро англаш бўлмаган ерда Тангрининг қути қолмайди. Эл-юртимиз ана шу турт устун узра юксалади.

Мен улусимни оғир, улуғ тўраларга етказдим.

Ўгуз элимни, қонимни, ҳаётимни шунга мослаб, уни тузук бўйича муҳофаза қўлмоқ истайман.

Ота-боболаримиз тўраларини қўримоқ – ўз номимиз ва Тангри номини юксак тутмоқдир.

Биз ғоғил инсон ўйғонсин деймиз. Тўранинг тўғри йўлидан юриб улғайсин деймиз. Йилқиларимиз, сурувларимиз, қайтабонларимиз кўпайсин. Ургуларнинг, шахру қишлоқларнинг, эл-юртнинг қайфуси арисин.

Инсон тўрасиз қолса хароб бўлади.

Оғир тўрага кўра ҳар ургунинг бир белгиси, туғи бўлиши лозим.

Оғир тўрага кўра ота-боболаримиздан қолган барча бойликлар қўриқланади, ўрганилади.

Эл ичида ҳар ургунинг алоҳида ўз тўраси ҳам бўлиши мумкин.

Оғир, бош тўралардан ташқари элнинг тўғри яшамофи учун Тангрига юқунч, еб-ичмоқ, сўзламоқ, элчилик, уйланиш, байрам, бекларга муносабат, тўй, қурултой, қўшин,

¹ Кут ўйлаги – инояти

ов, отни парвариш қилмоқ, экин-тикин, яғмо, хоқон сайлаш тұраларини ҳам тузиб чиқдим!

Құлдан қувват кетса, тұра оёқсиз қолур.

Элим, будуним! Эшит, билиб ол!

Хәётим от устидадир. Куним беҳуда үтмади. Ором билмадим. Ёзда күлка, қишида бошпана күрмадим. Қилич чопиб ёғийларни маҳв этдим.

Элимда нифоқ бұлмасин, низо чиқмасин дея ҳар бир кишининг ўрнини тайин қилиб қўйдим. Юрар йўлларини билсинлар деб уларга ном, тамға бердим. Мен-сенга, айтди-қўйдига бормасинлар. Юрагимдан тузунлик¹ камаймади. Кўнглимни Тангрига бердим, умидимни унга боғладим.

Ўрдага тузук бериб, уни тортилган ёйга айлантирудим.

Мен сизни ўғузлаштирудим!

Бу тартиб, бу тузук билан Кўк Тангри паноҳида ер юзи бор экан, биз ҳам бор бўламиш.

Улуғ Тангрига шукrona айтайлик, беклар!

Шундан сўнг Ўғуз хон маросим қатнашчиларига янги Тангри амрини етказди. Ўғуз хон бундоқ деди:

Тўрасиз элдан Тангри юз ўғиур.

Тўрани билса киши, юришади ҳар иши.

Тўра бўлса яхши – чехраларнинг нақши.

Эр майдонга чиққанды имонсизни имонга келтирап.

Эр севинмаса, қилич қиндан чиқмас.

Эр эл учун, эшишак кул учун туғилур.

Тепадан боққан тубангга қулайди.

Йигитим соғ бўлсин, чиқилмаган тоғ бўлсин.

Хоқоннинг ҳар бир сўзи дарҳол тилдан тилга қўчар, битикчиларнинг битигига тушар эди.

* * *

Баҳордан сўнг бир ой ўтгач, Кур хон яна қўшин тўплаб кунчиқардан Ўртажга юриш қилди. Ўғуз хон унинг Ўртажга етиб келишини кутиб турмасдан, Олатовнинг кунчиқарида тўхтатди.

Кур хоннинг уялмай-нетмай, тортинмай, оқсан қонларга ачинмай янгидан ўз устига бостириб келиши, шун-

¹ Тузунлик – марҳамат

ча йўлни тўсиқсиз босиб ўтиши Ўгузнинг ичини кеми-
рарди.

Ўз уруғдошлари билан охирги, энг қонли жанг ана шу
ерда бўлиб ўтди. Йигитлар олиша-олиша «Улуғ Тангри
йўлида!» дея найза санчар, қилич сермар, отдан қулатар,
бироқ жасадларга боқиб, ўз яқинларини кўрганларида кўз
ёшларини тия олмасдилар.

Шу жангда Кур хон ўлдирилди. Қўшинининг қолган-
кутган жангчилари, йигитлари Кунчиқарга қараб чекин-
са-да, Ўгуз хон уларни таъқиб қилиб бораверди. Хоннинг
ўзларига етиб олиб, сўнгти жангчига қадар қириб таш-
лашдан тап тортмаслагини кўриб тўхтадилар, донишманд
оқсоқолларини унга элчи қилиб жўнатдилар.

Элчилар келиб таъзим қилдилар. Ўгуз хон уларнинг
яқинига борди, ҳар бирининг аҳволини алоҳида-алоҳида
сўраб чиқиб, сўнг ўзининг ўнг ва сўл томонига ўтқазди.
Элчиларнинг нега келганликларини, нима демоқчи экан-
ликларини биларди. Оқсоқоллар аввал Ўгуз хоқонни Чин-
да эришган зафари билан кутладилар ва сўнгра дедилар:

— Биз ҳам сеникимиз! Сенинг томиринг ва уруғинг-
дан бўламиз. Кесилган қўл енг ичида. Нега бизни қириб
йўқ қилмоқчисан?

Ўгуз хон қайтиб ўз тахтига чиқиб ўтирди, элчилар
 билан кўришувда ўз ёнида бўлган қайнатаси Ўрхонни
кўрсатиб:

— Мен ота юртимда оқсоқолларга душман эмасман,—
деди. — Қаранг, қайнатам Кўк Тангрига ишонди, хонадо-
нидагиларни ҳам ишонтирди, унинг яккаю ягоналигига
бўйин эгди. Сизлар ҳам Тангрига топинсангиз, кураш-
ларга чек қўйсангиз, жанг тугайди. Яккаю ягона бўлган,
еру кўкларни яратган Улуғ Тангрига имон келтирмаган-
ларга омонлик йўқ.

Ўгуз шундай дейиши билан оқсоқоллар бир-бирлари-
га боқдилар, ўзаро узундан-узоқ кенгашдилар. Сўнгра
кўкка юз тутиб, Ягона Тангрининг бирлиги ва буюклиги-
га юкунч келтирдилар.

Ўгуз хон «Қорақурумдан тортиб атрофдаги барча туп-
роқлар сизники, қондошларингизники бўлсин!» дея уларга
армуғонлар, ҳадялар бериб жўнатди. Фақат шундан ке-
йингина кунчиқардан қўлини тортди. У жойларнинг энди

қайта бош күттармаслигига ишонди, ортга қайтар экан, үлка ичида отасидан кейин итоат этмай қўйғанларнинг чорасини қўриб, элда тартиб ўрнатди, янги туруклар, ясоқлар¹ бериб улуснинг кўнглини олди.

Элчилар Ўғуз хоннинг ҳузурига келган пайтларида яна бир ғалати воқеа бўлиб ўтди. Ўғузнинг биринчи ва иккинчи хотинлари – Бону билан Тарчечак ўз канизаклари, жориялари билан биргаликда: «Жангдан, қондан, юришлардан бездик, ўлдирсанг ўлдир, қолдирсанг қолдир», дея Ўғуз хонга итоат этишларини билдирилар. «Сенга ишонмадик, Тангри наслимизни барбод қилди. Отаси бўлган отасиз, қардоши бўлган қардошсиз, юрти бўлган юртсиз қолди. Гуноҳимизни кеч, бизни эл ичига қабул эт! Юритимизга қайтайлик. Сенинг қанотинг остида яшайлик. Ана шу сулҳ учун юксак тоғларга, кутсол тупроқларга ўнларча қурбонлик қилдик, сочқилар сочдик», – дедилар.

Ўрхон Ўғуз хоннинг мисдек қизарган юзига боқиб қўрқиб кетди. Бироқ ортга чекинмади, қардошларининг қизларини ўрдага қайтариш, гуноҳларидан ўтиш учун у ҳам хоқонга ёлворди:

– Қардошларимиздан қолган ёдгордир булар. Рухсат бер, қайтсинлар! Кўз ўнгимизда яшасинлар. Энди сенга қарши нима ҳам қила олардилар?!

Иккинчи томондан Ойтож, кўзларида жиққа ёш, хоннинг қўлларига ёпишиб:

– Гуноҳларидан ўт, – деди. – Балки шу билан қирғинлар ҳам охирига етар...

Ўғуз уларни ўлдиртирмади...

ТОПИНОҚ ҚАЙФУСИ

Услу Хожа Ота Унгурдан қоришиқ тушунчалар билан қайтди. Қам Ота Ўғуз хон билан сўнгги учрашувидан сўз очиб: «У туркнинг йўлини ўзгартириб, донғимизни ер юзига ёяди... Кўкларнинг менга хабар қилган, тушларимга кирган нарса ана шудир. Элнинг, будуннинг халос бўлиши учун ягона Кўк Тангрига топиниб, ўз инончини дунёга тарқатиши кутилмаган ҳодиса эмас. Бу унинг пешонасига ёзилган. Муқаддас битиклар ҳам, Танкут, Чин ромчилар

¹ Туруқ-ясоқ – қоида-қонун

ри, машхур кўримчилар¹ ҳам Ер юзини бошдан оёқ байроғи остига оладиган, инсонлар юзини кўкка қаратадиган бир турк хоқони келишини илгаридан башорат қилган эдилар», – деди. Ортидан яна шуни қўшиб қўйдики, Кўк Тангрининг ягоналиги у яратган ернинг ҳам Тангридек ягона ва булинмас бўлишини тақозо этади. Ерни яхлит бир юрт каби кўриш орзусининг илдизи ана шунда. Кичик улуслар бир халқ бўлиб бирлашувининг илоҳийлиги, вожиблиги ана шу билан алоқадор. Ўфуз хоннинг инончи, тангричилиги яратганга бўлган севгидан эмас, ўзига бўлган севгидан туғилган. У муқаддас инончини йўқотиб, тож-тахтнинг, хоқонликнинг асирига айланади. Ҳамма даврларда ҳам шундай бўлган. Ер юзининг барча буюк зотлари, хоқонлари ўзларини Яратганинг, инончининг элчилари каби кўрсатсалар-да, инончни ўз манфаатларига бўйсундириб, унинг муқаддаслигини йўқотиб, қиличнинг, зўравонликнинг, тўранинг қулига айлантирганлар. Қора халқнинг инончи билан унга бошчилик этганларнинг инончлари ҳам, яшашлари ҳам бир-биридан фарқ қиласди. Беклар ўз яратганларини ҳам бой-бадавлат, зангин кўрадилар.

Бир парча нонни зўрға топадиган экинчи, тикинчининг Яратгани эса худди унинг ўзидек кўзи тўқдир. Унинг Яратгани дабдабали маросимларни, сон-саноқсиз қурбонликларни хоҳламайди. Экинчининг сочган бир ҳовуч дони, қонсиз қурбонлиги унинг учун кифоятдир. Улуғ кун деб аталадиган соғинч куни – қиёмат келганида кўнглини билиб бўлмайдиган Тангрининг ажри қандоқ бўлажагини, инсонларни бир-биридан қандай фарқлашни, улардан қай бирини тамуқقا², қай бирини учмоққа³ солишини ҳеч ким билмайди.

Қам Отанинг бу сўзларига жавобан Услу Ҳожа шундай деган эди: «Ер юзи яралгандан бери ҳеч бир инсон фарзанди ўз инончининг энг түгри, ўз йўлининг энг равон эканлигини исботлай олган эмас, бошқалардан ортиқ, устун эканлигини кўрсатиш учун бир тола қилчалик, бир кум заррасичалик далил топа олган эмас».

Сўнгра Қам Отанинг Ўфуз хон билан ҳамжиҳатлиги

¹ Кўримчи – фолбин

² Тамуғ – дўзах, жаҳаннам

³ Учмоғ – жаннат

қочиб бўлмайдиган тақдир эканлиги ҳақида сўзлаган эди: «Бу бир манглай ёзувиdirки, унинг олдини олиб бўлмайди; бир элнинг жонланиши, дунёнинг бирлашуви шуни тақозо этар экан, бунга «йўқ» деб бўлмайди. Аксини тутсанг, биринчи ҳолда Тангрига, иккинчи ҳолда элингга қарши чиқсан бўласан». Қам Отанинг сукутга кетганлигини кўриб ўз фикрини янада қатъият билан давом эттирган эди: «Ана шуни англаганим учун ҳам Ўғузни қўллаб-кувватлашдан бошқа йўл топа олмайман». Қам Ота ҳам ўз фикрини яшириб ўтирганни: «Кўнглимдаги шубҳа, гумонлар тарқамай қолмоқда. Улар фикрим билан тилим ўртасидаги тафовут йўлида чопарлик қилиб юришибди. Алам қиласидигани ҳам шу. Бу қадар иккиланишларни хоҳламаган эдим».

Услу Хожанинг Қам Отага иончи суст тортган эди. Бироқ буни ошкор этишни истамас, уларга тобе бўлган башоратчиларни, юлдузчиларни, қуръачиларни, юрт баҳшиларини Ўғуз хонга қарши қўймоқчи эмасди.

Ота Унгур фақат бир хоқоннингтина эмас, барча яратилганларнинг ўтмишини муҳофаза қилиб келган, келажига шуъла тутган бебаҳо бир хазина, муқаддас жой бўлиб, унинг калити Қам Отада. Ёлғиз Қам Ота ўқий оладиган, изоҳлай биладиган, қадрини тушунадиган юзлаб ёзув, битиклар асралади бу ерда. Қам Ота билан ора бузилса, бу ёзувлардан ҳам алоқа узилади, эл басиратда қолади.

Ота Унгурни кўз қорачифидек асраладан, қамлар билан ришталарни маҳкам тутмоқдан бошқа йўл йўқ эди. Қам Ота ҳам ўз навбатида Ўғуз хоннинг ўзига ишонмаслигини пайқаб қолса, Ота Унгур қўлдан кетарди. Туғри, эндиликда бу Унгур бутлар, санамлар, чалабийларга сингинадиган жой бўлмай қолган эди. Бироқ еру кўкдаги сирларнинг калити эди. Буни Қам Ота билар, бутларнинг парчаланиши билан Ота Унгур ўз нуфузини йўқотиб қўйди деган фикрдан йироқ эди. Курбонликлар ҳам фақат бутларга, санамларга эмас, нариги дунёга кетганларнинг руҳларга ҳам қилинарди. Шунинг учун ҳам эркўнликлар гамташвишсиз яшар, дунёдан ажralиб қолганлари хаёлларига ҳам келмасди. Бу йўл тўсилар куни элнинг нур йўли тўсилар, билги йули бекилиб қоларди...

Ота Мафора аввало билги маъбадидир. У вайрон бўлса,

элда тұс-тұпалон, ички парчаланиш рүй беради, кишилар үз буюкларининг битикларини үқий олмай қолишади, үтмишни унутишади. Қам Ота буни англар, ана шу дард билан яшарди.

Үфуз хон деди:

– Тұра үзгармайды, қурбонлигимизни буюк яратганимиз, яккаю ягона Тангри учун қиласым. Қурбонлик қилмайдиган улус йүқ. Оёғимиз Унгурдан тортилмаса, Қам Ота биздан узоқлашмайды.

Услу Хожа хоқоннинг фикрини тушунди. Бу қадар катта хазина эшигининг улус учун берклиги уни ташвишга соларди. Бу эса қамларнинг айни күнглидаги иш эди. Улар әл бекларини, улус катталарини, хоқонларни үзларига итатда сақлашни истардилар. Үз билганларини бошқа ҳеч ким билмаслиги керак эди...

Услу Хожа эса юз йиллаб, минг йиллаб йифилган бу билим үчоғининг юрт учун, болалар учун очиқ бўлишини, улар бу қадими ёзувларни ўрганиб, шу йўсинда савод чиқаришларини, әл ичида билимдонларнинг кўпайишини истарди.

Үфуз хон ҳам ҳалқнинг унумдор тупроқларда яшашини, Чиндаги каби үқишиш ёзиш ҳар бир кишининг қўлидан келадиган одатий ҳол бўлишини орзу қиларди.

Жангга йўл олган қўшин ҳар сафар энг жасур ўғлонларини бегона тупроқларда қолдириб қайтар, қирила-қирила камайиб, камайгани сари үзлигини ҳам йўқотиб борар, илдизидан узоқлашиб, ётлашиб кетарди. Бутун ярамасликлар ана шундан келиб чиқарди. Хонадоннинг хонадонга, уруғнинг урукқа, элнинг элга шунча қарама-қарши тургани, ҳар бири алоҳида от, алоҳида зотга сиғинган, асл илдизи эса бир бўлган улусларнинг бир-бирини қириб-сургани етар энди! Бу бир душманнинг тузофидир!

Услу Хожа кўп нарсаларни биларди. Элда оғиздан-оғизга кўчиб юрадиган афсонаю ривоятлардан тортиб Ота Унгурда қамлар устига парда тортиб, сир сақлаб келаётган битикларгача, ҳамма-ҳаммаси унга маълум, ундан яширин биронта сир-асрор йўқ эди. Кўзлари саҳрони равшан кўрар, қулоғи узоқни аён эшитарди.

У Үфуз хондан сўради:

– Чинда талоғатимиз кўп бўлдими?

— Йўқ! Кўп жон йўқотмадик. Аммо анча-мунча тасаввур ва туйгуларимиз маҳб бўлди. Улар юз йиллар давомида қўшниларини қулдек ишлатиб, ўзларига бир жаннат бунёд этибдилар. Унумдор тупроқларга, гўзал юртларга эгалик қиласдилар. Бирлашганлари, эл бўлганлари учун ҳам кудратлари ошиб кетган.

— Бироқ сен кўрган ерларнинг аксарияти қадимий турк юртларидир.

— Қадимда кўп нарсалар бор эди, на илож? Энди ҳамма ерда табғачлар, ана, биздан юз ўтиридилар, бегоналашдилар, сингиб кетдилар, илдизларини унудилар, тамомвассалом! Халқ – биздан, беклик – улардан... Чинликлардан ҳам баттарроғи ўзимиздан чиққанлардир. Йўлдан қайтганлар... Юртдан чиқиб, юрт душманига айландилар.

Услу Хожа деди:

— Биласанми Чин хоқони қандай қилиб аврайди уларни? Ҳар бирига бир ёлғон беклик, ёлғон хонлик беради, юртлари бу ерда, ўзлари ташқарида... байроқ ҳилпиратадилар. Ўз хаёлида ҳар бири бир турк элининг эгаси. Сўнгра уларни «Боринг, Тангри ато эттан юртларингизга эгалик қилинг», дея устимизга жўнатадилар. Улардан ҳар бирининг ўз туғи юксалганда туркларнинг юксак байроғи оёқлар остига тушади.

Ўғуз хон деди:

— Чинликларни қилич билан енгмоқ қийин эмас. Бир карра енгдик ҳам. Бундан кейин ҳам енгамиз. Бироқ бизлар билан жанг қилмаслик, аскарларини, тупроқларини қўримоқ учун молларидан кечадилар, мўл-кўл ипак, пахта, арпа, гуруч, олтин, кумуш берадилар. Бизда инсоннинг қадри йўқ – йўлнинг тоши, кўкнинг қуши каби... Улар йигитлари учун молларидан кечадилар, биз эса дунё моли учун йигитларимизни қурбон қиласмиз. Улусни бу азобдан қутқармоқ учун унга билги бермоқ лозим. Қўшнилар билан орани очиқ қилиб олгач, элимиизда ана шу тартибни ўрнатаман.

* * *

Ўғуз хон Чин юришидан қайтар экан, «Жоду тоши то-пилди» деган сохта манзара яратган бўлса-да, уни излаш учун қўшниларнинг тилини биладиган турт йигитни Чинга

жўнатган эди. Улар оёқлари етган ҳамма жойга борган, бироқ умидларини узиб ортга қайтган эдилар. Йиллар бўйи ёмғир кутиб тарам-тарам бўлиб кетган Чин водийларида бу тош гўё бир томчи ёмғир каби тушгану, тушган жойида йўқ бўлиб кетган эди.

Ёмғир тоши Чиннинг жанубида яширилганини эшитар экан, «бу гапнинг тўғрилигини аниқлаш учун янги кишиларни жўнатмоғим керак», деб ўйлади. Услу Хожанинг ишончли, хоқонликка яқин бўлган ўғли Кутлуққа яширинча топшириқ берди: «Ёмғир тоши Тангрининг бизга йўлланган муҳаббатидир. Уни йўқотиш билан Улуг Яратганни ранжитдик, у биздан юз ўгирадиган бўлди. Бу тошини топиб келиш элизизга бутун бошли бир қўшиндан ҳам каттароқ хизмат қилиш демакдир».

Буни эшитган Услу Ўғуз хонга деди:

— Икки ўғлим бор, иккаласи ҳам сенинг кўлкангдадир. Ўл десанг үладилар, қол десанг қоладилар.

Бу Услу Хожанинг ўз ўғлига омад тилаши эди. Унинг иккинчи ўғли Эрдам қўшинда суворийлар юзбошиси эди.

Кутлуг ҳамроҳлари билан еди, ичди, сўнгра суворийлар мингбошиси Эрганнинг уйига борди. Севгилиси Эл билга билан хайрлашди:

— Узоқ бир йўлга отландик. Икки йил кут. Келмасам, элдан бирини танла, кўнгил бер, унга тег! — деди.

Қиз йиглаб-сиқтади. Кўзларидан мўлдир-мўлдир ёш тўкиб:

— Сендан ёмон хабар келгунча, менга ўлим келсин, сени кутаман! — деди.

* * *

Чин хоқони устидан қозонилган ғалаба Ўгузнинг нуфузини ошириб юборди. Бироқ бу зафардан у кибраланиб кетмади. Қодиркон ўрмонларидан, Олтойдан тортиб Итил дарёсига қадар отаси билан бўлган юришларда ўз кўзи билан кўриб-билган қорни оч, этни ялангоч халқнинг ҳаёти об-ҳавога, сувга, ёмғирга боғлиқ эканлиги, ҳар томондан сон-саноқсиз босқинларга дуч келиши уни қаттиқ ташвишга солар эди. Бу ташвишни қуруқ гап билан бартараф этиб бўлмаслигини яхши биларди. Жангсиз, қурбонсиз ҳал бўлмас эди бу иш. Элим бир бўлсин, дахл-

сиз бўлсин дер экан, юраги ўт олиб ёнарди. Ўрдасини, бош кентини юртнинг ўрталигига қўчиришни истарди. «Ер юзининг елини» деб ном олган икки дарё улусини эми-зид-тўйдиради. Бош кенти учун қўлдан бери жой ҳам танлаб қўйганди. Инжу¹ дарёсининг ўнг қирғоғида, Орол денгизи яқинлигига Чинда кўргани кентлардан қолишмайдиган янги бир юрт солмоқчи эди. Улуси қаерни истаса қанот қоқиб борсин, лекин иссиқ жойини унутмасин. Шундоқ ҳам Ўғузни отдан эндириб, жанг-жадалдан, юришлардан тўхтатиб бўлмасди. Унинг заифлашганини кўрган заҳоти бошига бостириб келадилар, тупроқларини парча-парча қилиб ташлайдилар. Қайси томонга қарама, қайралган тишлиарни кўрасан. От устида ором билмай елиб-юрган улуснинг олам қадар гўзал, қалби муҳаббат билан лиқ тўла бўлишини кўра олмайдилар. Ер юзи бир жанг майдонидир. Унда муттасил жанг қилмоғинг, қон тўкмоғинг, ўзингни ҳимоя этмоғинг керак. Йўқса ўзгаларнинг ўлжасига айланасан, сени ражиб ташлайдилар. Мана қара, Чиннинг мажақланганини қўриб турган бўлса-да, жанубдан ҳиндлар тинимсиз фингшинади, чумоли карвони каби ёпирилиб келмоқчи бўлади, олди олинмаса яна бир фалокат бошланади. Ўз элингни қудратли, яхлит кўрмоқчи экансан, бу илоннинг ҳам бошини янчмоқ керак. Ўнгу сўлингни шундоқ тозалаб қўйгинки, ўз уйингда хавотиризиз, шод-хуррам яшашнинг имкони бўлсин.

Фақат хоқон бўлганидан кейингина Ўғуз отасининг йиллаб муттасил олиб борган юришларининг сабабини англаб етган эди. Ҳимояланмоқ, бунинг устига элни едириб-ичирмоқ, ота юртни пусиб ётган «овчи»лардан асрармоқ мушкул иш эди. Бунинг учун уйқу билмасдан кунботардан кунчиқарга, шимолдан жанубга юришлар қилиши керак эди. Ҳинд эли ҳам мустаҳкам, йўли оғир юрт эди. Тоғлар, қалин ўрмонлар уларни ҳимоя қилиб туради.

Танқут томондан ҳали ўтилмаган, синалмаган бир йўл бор эди. Баланд яйловлардан, тор даралардан ўтиб бормоқ учун ҳаволарнинг илишини, жўнатилган элчиларнинг қайтишини кутиб ўтиаркан, Қурбон ойи кириб келди. Бу анъянанинг жуда қадим замонларга, эҳтимолки, инсон пайдо бўлган давларга, буюк ибтидога боғлиқ эканлиги-

¹ Инжу – Сирдарё

ни билгани учун ҳам удумни бузмади. Ўз қўшини билан Ота Унгурга йўл олди. Улкан дарвозадан сўнг бошланадиган водий янада гўзал эди. Тағин тоғ дарёсининг, булоқларнинг бошига ўтовлар тикилди, қурбонликлар қилинди, водийнинг бекларию қамлари хабар олгани оқиб келдилар. Барчанинг чеҳрасида бир сўроқ аломати бор эди.

Ўғуз хон буни англаб шундай деди:

— Яккаю ягона Улуғ Тангри мададкорингиз бўлсин, беклар. Яратганинг борлигига яратилган шоҳид! Тангри мингларча жониворларни яратди. Бизларни ҳам ўша эндириди. Қора ерни, мовий кўкни, кунни, ойни, кечаларни, илму заковатни яратган ҳам Эркли, Ўғон¹, Мангу Тангридир. Яшаб турган ер-сувимиз улуғ Тангрининг ҳукми остида, унинг оти билан боғлиқ бўлса, тупроқдан бўлган бир парча сополнинг, бир чўл жониворининг руҳи қандоқ қилиб бизга мадад бера олади? Бу йўлни бизга бошимизни эгмоқчи бўлганлар ўргатишган. Тўрали кишилар бунга алданмайди. Хўш, агар бу чиндан ҳам Тангрининг муҳаббатидан яралган бўлса, нега бутун ҳалққа ўргатишмайди. Ҳар бир уруғимизни алоҳида бир инончга боғлаб қўймоқчи бўлдилар. Бу ҳақиқий инонч йўли эмас. Ер-сувларимизни эгаллаб олиш йўлидир. Демак, биз ўз фикримиз билан улусимизга ишониб, ягона Тангримизга имон келтириб, кўнглимиздаги нур билан яшамоғимиз, бу нурни, туркнинг буюк руҳини ер юзига ёймоғимиз лозим.

Бизнинг йўлдан бошқа йўлларнинг йўлсизлик эканини, борлиқни ҳалокатга олиб боришини ҳар бир киши билмоғи керак. Ёточ, тош, териларга қарши эмасмиз. Чунки уларни ҳам Кўк Тангрининг яратмиши деб ҳисоблаймиз. Мен буларни айтмасам, Тангримга қарши бош кўтарган бўламан. Бу фақат хоқонлик истаги эмас. Мен элимизнинг тўрасига кўра хоқонман. Хоқон ўлароқ ҳар бирингизнинг ҳаёт тарзингизни тушунаман. Хоқон ўлароқ эл байроғини ер юзининг ҳамма пучмоғида юксак кўтармоқчиман, юксак кўтараман ҳам! Хоқон ўлароқ ер юзига тарқаб кетган уруғларимизни, улусларимизни бирлаштириб, турк ҳалқи орасидаги қирғинларга чек қўймоқчиман. Шундоқ қиламан ҳам! Риёкор қўшниларимиз қархисида туркликтининг буюклигини кўрсатмоқчиман! Йўқса Тангри ҳузурига юзи

¹ Ўғон — қодир

қора бўлиб бораман. Билиб қўйинг, беклар, она оғушида — гўдаклигимдаёқ. Тангридан элчи-ялавочлик амрини олганман... Онам, отам, яқинларим, юзлаб дўстларим бунинг гувоҳидир. Туркнинг ер-сувлари, эл-юртимиз Тангриси билангина ўзлигини топади, яхлит бўлиб қовушади. Тангрисол яратилган турк фарзанди ёлғиз Тангрига топинганда чехраси очилади, бирлашади. Биз Тангри ишқидан дастлаб яратилган инсонлармиз. Тангри бизни ер юзининг буюк халқи, беги қилиб яратди. Ер юзининг улусларини жамлаб қад ростлаган, барча қўшниларга тузук берган ҳам бизнинг аждодларимиздир. Эркли, кўркли, ибтидоларнинг ибтидоси, юксакларнинг юксаги — турк Тангрисидир. Топинганим Улуг Тангри номи билан, эл-юртимга бўлган севгим билан бир йўл бошладим. Илоннинг ёғини ялаган Чин императорини тиз чўқтиридик. Бошқа элларга ҳам борамиз ва ўшанда ҳам Тангри мададкоримиз бўлади.

Тўрамизни асрароқ ҳар бир кишининг зиммасидадир. Неки қилган бўлсам, Улуг Тангри иродаси билан қилдим. Ясама ёғоч, сопол бутларни, санамларни нега синдирагнимни тушунинг! Элимни синдирамадим, сизни қирмадим, сиз ҳам шунга лойиқ бўлинг...

Қамлардан бири сўради:

— Хўш, Ота Унгур нима бўлади, бутлар билан бирга эл-юртимизнинг хотирасини, ўтган-кетганларни ҳам вайрон қиласар эканмиз-да, шунақами? Балки ундаги битикларни ҳам, билимларни ҳам йўқ қиласмиз?

Ўғуз хон деди:

— Ота Унгур туркнинг бешиги, ўтмиши, келажагидир. Унга қўл чўзган қўлсиз қолади. Оталаримизнинг сўзларини, изларини элдан сир тутишни истамайман! Ҳамма ҳам жангчи эмас, ҳар бир киши урушга боравермайди. Билимга ҳавас қўйган фарзандларимиз Чинга борадилар, лекин билим олгач ортга қайтмайдилар. Менга, хоқон фарзандларига ўргатиладиган нарсаларни ҳар бир киши билиши керак. Элни билимдан йироқ тутганлар уни фақат чўпончўлиқ, темирчи, жангчи бўлишини истаганлардир. Қачонгача қабр тошларимизни ҳам, ёзув-чиズувларимизни ҳам ўзимиздан чиқиб Чинга сифинадиган бегона фикрли би-

¹ Битувчи — бу ерда: котиб, ёзувчи

түвчиларга¹ ёздирамиз? Балки у ёзувларда бизни ҳақорат қылғандирлар? Чиннинг илону қурбақалари ёнида Туркнинг муқаддас ёзувини ҳам кўринг, ўрганинг!

Қам Ота бир томондан Ота Унгурнинг муқаддаслигига путур етишидан, Эркўннинг оёқости бўлишидан хавотирга тушса, иккинчи томондан эл билгинларининг¹ қадр топишидан, болаларнинг саводли бўлиб улғайишидан севинарди. Шунинг учун ҳам унинг хоқоннинг сўзларини эътироф этишдан, унинг айғанларига итоат қилишдан бошқа йўли қолмаган эди.

Ўуз хоннинг мулоҳазалари унга бегона эмас эди. Курган тушлари, ўқиган ёзувлари мавжуд инончнинг туғашидан, ер юзида яkkатангричиликнинг тарқашидан дарак берарди. Инсоният қаердан бошланган бўлса, ўша жойига қайтиши лозим эди. Аммо бу воқеалар ўзи яшаб турган даврда содир бўлишини қутмаган эди. Кўкларнинг ерга элчи жўнатиши маълум нарса эди. Инсон фарзандининг аъмоли ўзгарган, ернинг тартиботи бузилган эди. Бироқ бу элчининг Ўуз эканлигига ишонгиси келмасди. «Тақдирни такбир қилиб бўлмас», – дея кутиб турар, ўпка-гина қилиш билан иш ўнгланмаслигини биларди.

Билгили, тўрали инсон, навқирон ёшда бўлган хоқоннинг ҳақ эканлигини, инончи тўғри эканлигини кўриб турар, тобора унга кўпроқ боғланар, ўзи қилган хатолар азоби камайиб, Ўгузнинг йўлига умиди ортиб борарди.

Таомлар еб-ичилиб, йигитларнинг қилич чопиш, найза улоқтириш, кураш мусобақалари бошланган бир пайтда Қам Ота билан Ўуз хон Мағорага чекиндилар. Ўуз хон йиллар бўйи ундан кўпгина нарсалар, анча-мунча ёзувлар ўрганган эди. Кунчиқардан кунботаргача эллару чўлларни, тоғларни кезиб юрган сайёҳларни ҳам яхши танирди. Ўлкалар, будунлар, кентлар орасидаги йўлларнинг масофасини, юлдузлар, ой, қуёш билан ернинг алоқадорлигини билар, турли элларнинг инончлари, ҳаёт тарзлари ҳақида етарлича билимга эга эди. Бироқ Қам Ота ҳамма нарсани ошкор этмаганлигини, Ота Унгурнинг баъзи сирларини ундан узоқ тутаётганлигини ҳам ҳис этар, ҳар гал келганида бу сирларни ўсмоқчилаб билиб олишга уринарди.

¹ Билгин – олим, ўқиган одам

Кунботар юришида энг оғир йўлни босиб ўтар эдилар. Ўгузнинг кайфияти кўтаринки эди:

— Сен ўтмишу келажакни биласан, Қам Ота, — деди у.
— Қон-қариндошларимиз бир-бирининг қонини шунчалик кўп тўkkанидан сўнг уруш руҳлари биздан, будуни миздан юз ўтирамадимикан? Олдимизда турган юришдан сен нима кутмоқдасан? Ростини айт!

— Бу юришдан ҳам зафар билан қайтасан! Бироқ...
— Нима бироқ?

— Манглай ёзувинг сенинг йўлинг бошқача эканлигини кўрсатмоқда. Чин ва ҳиндга чек қўйиб бўлмайди. Бундан кўп йиллар олдин бу гапни отангга ҳам айтмоқчи бўлган, лекин сўзимни англамаслигидан қўрқсан эдим. Сен эса йўлнинг бошидасан. Навқирон, жасоратли ёшдасан. Сенга айтсам булади...

Ўғуз хон ўзи кутган дақиқалар етиб келганини ҳис этди.

Қам Ота шу сўзларни айтгач, Унгурнинг қоронғи бир бурчагига ғойиб бўлди. У ерда бир тош ўрнидан қўзғалди. Қам Ота ўгирилиб Ўғузни ҳам чақирди:

— Кел, хоқоним, келиб ўзинг кўр!

Очилган ёриқдан ичкари кирдилар. Бу хона аввалгиларидан анча катта эди. Бурчакларига йирик темир сандиқлар қўйилган, токчалари тери, папирус, гил, сопол лавҳалар билан тўла эди.

— «Юртнинг хотираси» деб атаганим яширин хона, бош хазина мана шу, хоқоним! Бутлар синса, янгиси ясалади, инончлар ҳам ўзгариши мумкин. Бироқ бу хазина йўқолса, яратганинг тили, яратилмишнинг илдизи бутунлай унут булади. Инсон фарзандининг кечиб келган йўллари ёддан чиқади. Шунга кўра бу ерни «Тарих хотираси» деб атаса ҳам булади.

— Отамга ҳам буларни кўрсатармидинг?

— Отанг эътибор бермасди. У фақат бут ва санамларнинг руҳи яшайдиган бир жой деб боқарди Ота Унгурга. Урушлардан, жанглардан боши чиқмади. Бутлар, санамлар, тангрилар, яхшилигу ёмонлик — барча инончларнинг илдизи ана шу ерда эканлигини англаб етмади. Тош билан ёмғир ёғдириб бўлмайди... Отанг ўша тош учун жанг қилганида сенинг тангрчилик учун жанг қилганингни билмасди. У Ёмғир тошини руҳларнинг тоши деб ҳисоб-

ларди. Яккаю ягона Күк Тангридан келганлигини билмасди. Тангри тамғаси ана шу ердадир.

Қам Ота сандиқдан нимадан қилинганилиги номаълум, алоҳида бир жило билан товланиб турган, кафтга жо бўладиган бир тамға чиқарди.

— Мана қара, бу ерда «Тангри» деб ёзилган, бу саккиз ўқли арава фидирагига ўхшаган тамға ундан келган, унинг рамзиdir. Буни Ота Унгурда яшаган қамлар жуда қадим замонлардан қўриб келганлар. Хоқонлар эса ундан бехабар эдилар. Тангри сув ва тупроқ билан ер юзини қоплатиб қўйган, инсон фарзандини қувиб дунёга сочиб юборган қадим-қадим замонлардаёқ ота-боболаримиз тангричи булишган. Аммо Тангрининг турк будунига ато этган нарсаларига чидай олмай ундан юз ўтирганлар.

— Бизнинг тоғларни, саҳроларни бир пайтлар сув босганига тушунмадим.

— Йўқ, биз бу ерларга сувдан эмас, Тангридан қочиб келганмиз. Бу жойларнинг дарёсига, тоғига, дарахтига, жониворларига топинганмиз. «Яккаю ягона Тангридан интиқом оламиз», — деганмиз.

— Улуг Тангридан нега ранжигансиз?

— Ота-боболаримизнинг минг йиллаб қурганларини вайрон қилмоқчи бўлганмиз!.. Улар Тангри сирларига дахл этардилар. Қуш каби кўкларда учар, иқлиmlарни ўзгартирап, ер-сувларни идора этардилар. Тангрининг бундан ғазаби келди. Энди улардан ҳеч вақо қолмади. Тангри бизларни унутиб қўйди. Орадан узоқ асрлар, минг йиллар ўтиб кетди.

Ўғуз хон гўё уйқудан уйғонгандек бўлди. Бу йўллар қайдан бошланиб, қайда тугайди? Улус неларни йўқотиб, неларни топди? Бу сирларни ким билади? Йўқотилмаган калитларни ким топади, бу сандиқлардаги битиклар қадим замонларданчувалиб келаётган ип бўлса, унинг учини ким топади, ким йўқотилган ўтмишга, йўқотилган дунёга йўл оча олади?

Қам Ота деди:

— Чинликлар, танқутлар бу ерни фақат маъбад деб биладилар. Битик хазинаси эканлигини билиб қолсалар, аллақачон бостириб келардилар. Энг қадимий яратувчиликнинг, илк яралишнинг бизнинг номимиз билан боғ-

лиқ бұлиб чиқишига улар чидай олмайдилар. Тангрининг ерга жүннатган тошлари ҳам фақат бизнинг құлымида, қамларнинг юкунчлари билангина құдратлидир. Улар мұқаддас күк тилининг, ёзувларнинг құриқчисидир. Сен хоқон эканлигинг билан бирга, отанғ каби иноңч раҳнамоси ҳам ҳисобланасан. Буни билиб қўйишинг лозим.

— Билишнинг ўзи камлик қиласы, уларни үрганишим ҳам керак.

— Бунга битта умр етмайди, хоқоним! Фақат битта улугимизнинг ёзғанларини үқисанғ кифоятдир. Үнда ҳаммаси бор. Бир хоқонга лозим бұлған ҳамма нарса. Яралишдан бери улусимиз кечиб үтган барча йұлларни ёзиб қолдирған бош битикчимиз. Улуғ хон Ота битикчи деб атардилар уни. Туркнинг эңг муқаддас битигини ўша яратған. Кимлигимизни билмоқчи бұлсанғ ана үшани ўқи! Үшанда кимлигингни таниб оласан, үтиб келған йұлларимиздан ортга қайтмоқни, Оталаримизнинг ilk борлиғи билан қовушмоқни истаб қоласан.

Шундай дея тош токчаларда устма-уст қалаштириб ташланған тери ёзувларига ишора қиласы.

Шундай қилиб, Қам Ота билан хоқон Мағорага бекиниб олиб, Улуғ хон Ота битикчининг яралишдан бери бұлиб үтгандар қақындары тасаввурға сиғмайдын бир гүзіллік, сеҳрли бир тил билан баён этувчи насллар қақындары ҳикоясини ўқишига киришдилар.

Ұғуз хоқонликни ҳам, элинин ҳам, Эркүнда уни кутаётган кимсаларни ҳам унуган эди. Энди у Тангри әлчиси ўлароқ дүнёға битта ўзи келмаганлыгини англағ етган эди. Тинглаётган бу сүзлари үтмиш тарихларнинг баёнигина эмас, балки Тангрининг каломи, ҳидоят қомуси, ҳаёт ва дүнёнинг сирли қатламларига бошлаб борувчи йўл ҳам эди.

Бироқ уни ҳайратлантирган яна бир нарса бор эди. Бу битикнинг баъзи саҳифаларини, сүзларини ушбу қўллэзмани ўқишидан аввал ҳам биларди у. Эл орасида юрган ривоятлардан, мақоллардан ҳис этарди буни.

Балки оталар сўзи — мақоллар деганда Ота битикчини назарда тутгандирлар...

Қам Ота ўз бурчини үтаган каби енгил тортиб деди:

— Хоқоним! Бу битик ўзида маълум бўлғанларни яна

бир бор маълум қилди сенга. «Оққан дарё оқмай қолмас», деб ёзган Ота битиқчи. Сен энди бориб қадимий юртларга жон бахш эт. Нураб тушган маъбадларни янгидан тикла! Унутилган қариндошларимизни ўз байробинг остида янгидан уйғот.

Үфуз хон деди:

— Тұғри айтасан. Эски замонларни тирилтмак учун ўша юртларга боришим лозим! Лекин қандай қилиб? Кунботарга юриш қылсам, бу кунги юртларимизни кимга ташлаб кетаман? Чинга қолдириб кетаманми?

— Йүқ. Чин күпдан бери Буюк Гобининг шимолидан девор олмоқчи бұлиб юрибди. Бизнинг ерларимизнинг бўз иқдимига чинлик чидай олмайди. Сенинг кетганинг халқнинг кетгани эмас. Эл ўз ерида қолади.

Үфуз хон деди:

— Бунинг фақат битта йули бор! Куч-қудратимиздан, ёрлиғимиздан, қиличимиздан аввал тангричилигимиз, яккаю ягона Яратганга бўлган инончимиз етиб бориши керак! Тангричилигимиз ер юзига тарқалиши лозим. Бунга сен ёрдамчи бўласан!.. Мен бугун Улуг Тангрининг турк тепасига тиклаган бир хоқониман, унинг хоҳишини ҳар қандай йўл билан бўлса-да амалга ошираман. Ота Унгур бор экан, мен ҳар қадамда битта бутхона қуришни истамайман. Кўк Тангри билан бизнинг орамиз очиқ. Кўприка ҳожат йўқ. Тангрининг менга берган нуфузини ўзгалар билан баҳам кўрмайман. У элчисиз ҳам улуғдир, эрклидир... Бутхоналар тиклаш, маъбадлар қуришга ҳожат қолмайди, яратган яратилмишлари билан қуришмоқ учун маъбадларни, алоҳида кунларни белгилаб қўймаган, Тангри ҳар бир кимсанинг ёнида, бош устида, кўнглидадир. Ҳаёти от устида, йўлларда, юришларда кечадиган бир улусга нима керак эканлигини Тангрининг ўзи биздан яхши билади. Шунинг учун, наҳотки яккаю ягона Тангри ҳар улусга бошқа бир ялавоч ато этса, Яратгани билан муносабатларини ҳар улуснинг ўз ҳаёт тарзига мос қилиб ўрнатишни маъқул кўрса... Тангри номи билан улуснинг қонини сўрадиган янги бир тангричилар тўдаси етишиб чиқса, янглиш бўлади. Ер юзида қанчаки турк бўлса, унинг ҳар бири узини Тангрининг элчиси деб ҳисобланмоғи керак...

Ота Мағорага неча карра келиб кетган Үғуз хон бу маъбад ҳақида жуда оз нарса билишини бугун англаб етган эди. Мағоранинг сирлари очилган сари у ҳолдан ҳолга тушарди. «Ўз яратганимиздан, ўз кўрганимиздан ўзимизнинг хабаримиз йўқ, деб ўйларди у. Модомики у ҳам хоқон, ҳам элнинг ионч раҳномоси экан, бу билимлардан нега бехабар қолиши қерак?» Бироқ бу фикрлар хоқонни бошқа бир ҳақиқатга ҳам бошлаб бораради. «Кўриниб турибдик, булар лой, тери, ёғоч «тангричалар»га сифинувчилар учун, холос. Буларнинг ҳаммаси Кўк Тангрининг иродасига боғлиқ ва бу сирларни ҳам Қам Ота ўз хоҳиши билан эмас, балки Улуг Тангрининг иродаси билангина оча олади».

Қам Ота Үғуз хоннинг бу мулоҳазаларини англаб турибдимикан? Ким билсин. Фақат унинг мамнун эканлиги кўриниб турибди. Қам Ота шошмасдан, битигдан битикка ўтган сари, Үғуз хоннинг ҳар гал ҳайратланганини кўриб қанот чиқаргудек бўларди. Гүё интиқом олмоқда эди у Үғуз хондан. Гүё «Кўряпсанми, нималар бор бу ерда. Бу муқаддасликка инсоннинг қўли қандоқ ҳам етсин?» — дегандек бўларди унга. Айни пайтда унинг ичидан бир овоз, «Тараддудга тушма, бу сирлар фақат ана шу ёш хоқонга ошкор бўлиши керак. У янги бир йўлни бошламоқда. Ҳамма нарсани унга англатмоғинг лозим. Сўнгра кеч бўлади», — дер эди. У ҳамон ўз ишида давом этарди.

Шундай фикр оғушида сандиқдан ҳафсала билан ўралган оқ тери битикни чиқариб очди. Мойчироқ шуъласида терининг устига қиздирилган мил ёки бўёқ билан битилган чизиқлар аниқ кўриниб турарди. Аслида бу ҳам саккиз бурчакли тамғага ўхшаб кетарди.

— Бу ерда Улуг Тангри яратган ерлар, сувлар чизилган. Экинчи, темирчи, чўпон ота-боболаримизнинг минг йиллар давомида қурган жаннатмонанд жойларини ана шундан билиб оласан, бу еру кўк сирларининг калити бўлмиш бир битикдир. Ер юзидағи унутилган замонларнинг, жуда қадимий даврларнинг тасвиридир бу. Кунботарда, номлари унутилиб кетган энг кўхна масканларида барпо этган юртлари вайрон бўлиб, тартиботлари бузилганини қўрган ота-боболаримиз янгидан Қуёшга юз тутиб келишган, тоғларга чекинишган, сўнгра «тупроқдан тикланганга се-

винмаслик керак», дея ушбу юртларда макон тутиб, ерсув билан, ёз-қищ билан муросада яшаганлар. Туркни бу қип-қизил саҳро билан, Гоби, Торимнинг охири қўрин-майдиган қум денгизлари билан боғлаган нарса нима экан-лигини ўйлаб кўрганмисан? Ҳеч ким сўраганми бунинг сабабини? Юз йиллар мобайнида энг унумдор ерларда яшаб келган бегоналар тўрт ёндан суқилиб кирса-да, бу қумликларни ташлаб кетмаганмиз. Ташиб кетсак-да, яна унга қайтиб келганмиз. Биладиган борми бунинг боисини?

Ўғуз хоннинг юзи мойчироқдан кўра кўпроқ эшигтанларининг таъсиридан ёришиб кетди.

— Мен сўрайман, менга сўзлаб бер!

— Итлар ўчиб-сўниб қолган ўчоқ ёнидан ажralиб кета олмаганлари каби биз ҳам тупроққа кўмилиб қолган юртларимиздан, бу ерда яшаб ўтган ота-боболаримизнинг руҳидан ажраб кета олмаймиз, сабаби шу. Танқут билан Олтой оралиғи — Торим соҳилларидағи ерлар кўркини, юксаклигини кўклиардан олмиш муқаддас жойлардир... Битикларда шундай деб ёзилган. Дастлабки даврларда инсон беш минг-үн минг йилча умр кўради. Сўнгра ўзини ўлмас деб ҳисоблади. Тангрисини унуди. Кўклар газабланди, қум денгизини суриб борди у ерларга. Ер юзида ўхшали бўлмаган кентлар, жаннатсимон боғлар, ўрмонлар, сойлар қадамба-қадам қолиб кетди бу қум бўронининг остига. Кўк ва ерларнинг барча сирлари Тангрининг рамзий тилида ёзилган бўлиб, фақат билгичларгагина аён эди улар. Торим бўйлаб унгурларда, горларда, қўл билан қазилган ер ости кентларида тўпланган билимлар барча сирларнинг калити эди. Уларни ўйлаганда мана бу ерни хазина, маъбад деб билишимиз кулгилидир. Жуда қадимий замонларнинг билимлари, Тангрининг тили бутунлай унутилиб кетган! Бизга фақат уларнинг чанги қолган, холос... Аммо шунисига ҳам хурсанд бўл! Яратган нозиккина бир ипнинг учини сақлаб қолган Ота Унгурда. Танқутга борадиган йўлда, Қансу ўрмонида, Дониё битикларида ҳам нишалардир бор. Бироқ уларни ўқиб бўлмайди, тил унутилган. Тил унутилмаганида барча пардалар очилар, бутун ибтидо аён бўларди. Қазилиқ тогининг шимолида дунёга келганимиз, у ердан Торимга келишимиз, Торимнинг қум остига қолиб кетиши, Кунботарга юzlаниб, дарёлар ора-

лиғида янги бир давлат қурганимиз ҳолда қадимий юртларимизнинг барча билгиларини қайтадан тиклаганимиз, сўнгра у ерларни ҳам сув босгач, яна дунёга сочилиб кетишимиз... битикларда ҳаммаси бор... Орол дангизига оққан дарёларнинг оқмай қолиши ҳам, Каспийнинг тошиб, Қазилиқ тоғлари ён бағрининг сув босиши ҳам... Кўкдан келган элчилар ҳам...

Ўғуз хон кўп йиллар аввал отаси билан юриш қилган Итил ирмоғини эслади. Дарёнинг нариги соҳилидаги ерлар ҳам турклар учун тутма юртлар бўлғанлигини биларди.

Қам Отанинг тери битиги туркнинг илдизи билан боғлиқ тасаввурларини янада кенгайтирас, қоронғи нуқталарини ойдинлаштирасди. Ўғуз хон сўради:

– Бу чизмани олсам бўладими?

– Йўқ, буюк хоқон, бу сандиқдагилар Ота Унгурдан ташқарига чиқарилмайди. Биз Тангрининг кўлкасида миз, фақат бизнинг эмас, ер юзининг келажаги ҳам ана шу битикларга боғлиқдир.

– Калит битта бўлса, унинг йўқолиши ўлим демакдир, кўп бўлса ҳеч қандай тўфондан, ур-йиқитлардан хавотир олмаса ҳам бўлади... Сирлар будуннинг билгичларига, янги авлодларга аён бўлиши керак... Мен шу фикрдаман...

– Тўғри айтдинг! Нажот йўлини билгига кўрмоқ тангрисол инсонларнинг иши, туркнинг йўли шу... Билгили кишида эрк, эркли кишида билги бўлмоғи лозим. Фақат қилич билан иш битмайди.

Қам Ота сандиқларни ахтариб, бошқа бир тери боғламини чиқариб Ўғуз хонга узатди ва деди:

– Мен бу билгининг иккинчи саҳифасини бераман сенга. Сен борадиган йўллар ва ерлар шунда чизиб қўйилган. Бизга қараашли барча юртларни, тупроқларни шундан топасан. Улуғ Тангри сенга бу юртларни бирлаштирумак ва у жойларда яшаган кимсаларни ер талашувларидан қўримак амрини берган. Сен уларнинг кўкрагини кўтариб, юзларини Кўк Тангрига қаратасан!

Тангри тамғасининг, Улуғ Хон Ота битикчининг атиги бир қисмини ўқий олганлари «Улуғ битик» ҳар бири бир мўъжиза, ҳар бири юз хоқон хазинасига тенг бойлик эди. Бироқ Ўғуз хон учун энг муҳими охирги битик эди.

Рұхини юриш ҳавоси әгаллаб олган бир пайтда бу тери чизма барча дарвозаларнинг калити, бутун йўлларнинг раҳнамоси эди. Ота Мағорага уни бошлаб келган нима эди? У буни энди ҳис этмоқда эди! Демак, Тангрининг иродаси ила бу ердаги қўғирчоқ бутларни йиқиб-синдириши ҳам мана шу Мағоранинг бу чекка хилватида, яширин хотира хонасида сақланаётган билгиларнинг ҳукми ва истаги билан содир бўлган, Ўғуз хон уларга етиш ва дунё сирларига эришиш учун интилган экан-да! Буни ҳам энди англаб етган эди.

Бу ер шунчаки бир маъбад эмас, Тангрига бошлаб борадиган йўлдир, бу йўлнинг йўқотилиши дунёни фалокатга элтади. Тангрининг элчиси ўлароқ унинг энг катта иши бу хазина эшигини ўз эл-юргита очиб қўймоқ эди.

Аслида Ўғуз хон учун бу суҳбат охирига етган эди. Бироқ Тангрининг фақат унга инъом этган файриоддий бир ҳасослиги билан Қам Отанинг яна нимадир демоқчи эканини, «айтсаммикан ёки айтмасам» деган тараддуд ичидаголганини сезиб турарди.

Жангда зафарнинг бир шарти душманга танлаш имконини бермасликдир. У ҳам ана шу усул билан Қам Отадан устун келди:

— Яна бир сир бор юрагингда. Нега гапингни охирига етказмадинг?

Қам Ота жилмайди. Улар бир-бирларини яхши тушунар эдилар.

— Сир дейсанми? Йўқ. Ҳаммасини айтиб бердим. Бундан у ёғига ўта олмайман. Тангрининг ишларига қўл чўзишдан қўрқаман.

— Сен Тангрининг элчиси билан гаплашмоқдасан, — деди Ўғуз хон, — Сўзингни охирига етказмаганингни сезиб турибман.

Қам Отанинг юзи сандиқ томон бурилди. Гүё у сандиқни нигоҳлари билан силаб-сийпалар, ундан нимадир ахтарарди. Деворлардаги тушуниксиз, сеҳрли расмларга, ишоратларга бир-бир қараб чиқди. Сўнг майин-майин сўз бошлади:

— Биласанми, буюк хоқон! Ростини айтсам, бу мағора билан боғлиқ бўлган ҳамма нарсани айтиб бердим сенга. Анча илгари ҳам инсон фарзанди ва будунимиз ўтиб кел-

ган йўллар ҳақида кўп гаплашган эдик... Бугун Тангри тамғасини, Улуг Хон Ота битикчининг китобини сенга кўрсатгандан сўнг, ота-боболаримизнинг ilk юртлари-ни, кечиб ўтган йўлларини билдирувчи тери битикни сенга бергандан кейин гўё ичим ҳувиллаб қолгандек бўлди. Аллақандай бир ваҳима қоплаб олди мени.

Ўуз хон Қам Отанинг безовталигига сабаб нима эканлигини тушуна олмасди. Қўлини Қам Отанинг қўлига қўйиб сокин бир овозда сўради.

— Сени қўрқитаётган нарса нима? Ота Унгурнинг тақдирини ўйлаяпсанми? Тушунтирдим-ку, ахир. Биз бор эканмиз, бу ер қўриқланади. Чироқларнинг, ёрдамчиларингнинг сонини оширамиз.

Қам Отанинг қўзлари йўл кетди:

— Сенга ишонаман. Бу борада андишам йўқ. Мени ўйлантираётган нарса инсон фарзандининг ва ер юзининг келажагидир. Кўряпсанми, жангнинг биттасини тутатмай туриб иккинчисига отланяпсан. Инсон яралгандан бери бир-бирига душман ҳисобланади. Кўз очиб-юмгунча умр ўтиб кетади. Ён-веримизда, қўзимизнинг қаршисида турган буюк нарсаларни кўрмасдан, сир-асрорларни очмасдан, Тангри билгиларининг эшигини қоқмасдан ўтиб кетамиз. Бу билгилар ҳам борган сари унутилади...

— Бу мени ҳам ўйлантиради, — деди Ўуз хон.

— Биз нақадар улкан бир янгилик ичидан эканлигимизни билмаймиз, буюк хоқон! Яратиқ, яъни бизлар нозиккина бир ипга боғлиқмиз. У ҳам узилиб кетса, қадимий дунёдан, Тангридан бутунлай ажралиб қоламиз. Урушдан, юришдан бўшаганингда шуни ўйлаб кўрганмисан? Бир куни буларнинг ҳаммасини ўйлаб кўр ва ўз-ўзингга савол бер.

— Нимани сўрайман?

— Сўраб кўрким, Тангри шунча хоқонлар ичидан нега сени танлади? Нега барча турк хоқонлари ўзларини қўклида мавжуд бўлган ва қўклидан келган деб ҳисоблайдилар? Нега Ота Унгурга қурбонлик қиласиз, бу нақшларни деворларга кимлар чизган? Бу ёзувларни, рамзларни бизга кимлар ўргатган?

— Тўғри, сўраганим йўқ. Хўш, ўзинг сўрадингми? Сўраган бўлсанг, нега менга сўзлаб бермадинг?

Қам Ота кулимсираб жавоб берди:

— Бу ҳам Тангри хоҳиши ва амрига боғлиқ. Узоқ йўлга чиқсан. Келиб-кетар дунё бу. Кейинги учрашувимизни неча йил кутар эканман? Буни на сен билсан, на мен! Бу саволларнинг жавоби нозиккина ўша ипнинг нариги учидадир.

Қадим замонлар билан бизнинг орамизда бир-иккита омонат кўприк қолган, холос. Улар ҳам қулаб тушса, Тангридан келадиган барча йўллар унутилади.

Ўуз хон юришларни ҳам, Эркўн водийсини ҳам, ўзини кутаётган воқеаларни ҳам унуглан, бутун диққати Қам Отада эди.

— Сен ҳам ўша кўприкларнинг бирисан, шундайми?— деб сўради у Қам Отадан.

Қам Ота бу саволга жавоб бермаса-да, юзидағи ифода ўғузнинг нишонга аниқ текканини кўрсатиб турарди.

— Битта мен эмасман. Миср ва Бобил, Тангриқут-Тибет коҳинлари, шомонлари ҳам бу сирларни ҳали унугланлари йўқ. Биз чиндан ҳам Кўқдан, Тангридан келганимиз. Тангри ернинг илк яратиқларини кўқдан туширган эди. Улар ўзларини «эр» деб атардилар. Бу кутилмаган кўчишнинг сабабини ҳеч ким билмайди. Ерни инсон масканига айлантиromoқчи бўлганми ёки фалокатга учраган бошқа бир юлдуздан бу ерга кўчиб ўтишга мажбур бўлганми, буниси номаълум. Улар илк бор тушган жойлар ана шу мағоралардир. Улар ерга тил, билим олиб келганлар. Йўқотилган дунёларига ўхшаш бир дунёни шу ерда яратиб, чала қолган ишларини шу жойда давом эттирганлар. Улар минг йилларча умр кўрганлар, ерни жаннатга айлантирган, ҳавода қуш каби уча олганлар. Мағоранинг муқаддаслиги ва қурбон байрамлари ўша замонлардан қолган. Тангри тошини ҳам кўқдан ўшалар келтиришган. Ўқقا ўхшаш, илонга ўхшаш узун кўк араваларида тушиб келишган. Сенинг номинг ҳам ўшалардан қолган. Илонга топиниш ҳам. Ўзлари билан фақат битта жонивор олиб келганлар — у ҳам бўридир. Кўкликлар келган жойларини тез унудилар, аммо бўри унумаган. Ҳозир ҳам бўйини ўша узоқ дунёларга чўзиб увлайди. Бўрининг бизни асрар қолганлиги ҳам ана шу билан боғлиқ. Бу нарса кўқдан, қадим дунёларнинг бирлигидан қолган. Туркнинг бўрини ўзига қардош деб ҳисоблаши, уни муқаддаслаштириши ана шунга бориб тақалади.

Ўғуз қўққисдан Иссиққўлнинг жанубида қояга сиқиб бориб ўлдирган бўрисини, унинг ўша пайтдаги қарашларини эслади. Бироқ Қам Отанинг сўзини бўлмади. Қам Ота гапида давом этарди:

— Бизнинг йўлимиз кўкдан тушган одамларнинг илк масканлари оралиғидаги йўлдир. Олтой, Хонтангри, Музлоқ тоғлари, Миср, Танқут. Нега турклар бу ерлардан ташқарига чиқмайди? Чунки кўкдан келганларнинг илк масканлари ана шу жойлар бўлган ва улар ана шу масканлар оралиғидаги қадимий йўлларинг қўриқчиларидир. Сен биринчиси эмассан, хоқоним, хафа бўлма. Бу йўлдан жуда кўп Ўғуз хонлар кечган...

Қам Ота тин олиб Ўғуз хонга боқди. У ўз сўзларини хон қандай қабул этажагини билмоқчи эди. Бироқ Ўғуз хоннинг нигоҳлари қайгадир мафора деворларидан ҳам олисга, мавҳум бир нуқтага тикилган эди.

Қам Ота билганларини тилга чиқаришга қийналарди. Энг муҳимини айтиб бўлган эди. Ўғуз хон унинг жимиб қолганлигини кўриб ҳушёр тортиди.

— Кейин-чи? Кейин нима бўлди? — деб сўради у.

— Сунгра аста-секин кўкдан келган инсонларнинг насли кесилди. Тангрининг ғазаби келдимикан улардан? Бирбирлари билан ўзаро жанг бошлаб юборишли. Балки аввалги ўз масканларида бошланган тўқнашувлар давом этгандир? Билмайман. Ёзувларда бу сир сирлигича қолган. Бироқ фалокат уларни бирдан чулғаб олди. Яхлит бир қитъа сувга чўкиб, курган жаннатий гўшалари қум ва муз остида қолиб кетди. Излари бутунлай йўқолиб кетмасин ва дунё ҳувиллаб қолмасин дея Тангрининг амри ила бугуннинг кишилари яратилди. Ушбу кун сен сифинган Тангри дини ҳам ўшалардан қолган. Бугуннинг одамлари тупроқдан яралган. Кўк одамлари тупроқдан ўз нусхаларини яратадилар. Аммо буни жуда сир тутардилар. Эркўн ҳам уларнинг яширинча инсон яратадиган ерларидан бири эди. Бу изларни йўқотмоқ учун кейинчалик бу ерни темир эритиладиган бир жой деб атадилар. Ер юзида Эркўнга ўхшаган Она юртлар қанча — бунисини билмайман. Кўкдан келганлар айнан бир хил эди. Бироқ яратган кишилари бир-биридан фарқ қиласарди. Бу балки тупроқнинг хилмачиллигидандир. Бу ҳам Тангрининг амри. Шунинг учун ҳам

күхна китоблар, кўқдан келганларнинг тили, эски ёзувлар шу қадар кўп йўқ қилинади, унугтириладики, Ерда яралганлар кўқдан келганлар билан ўз ораларидаги фарқни йўқотиб юборишга уринадилар. Бу деворларда кўрган нарсаларинг Кўк одамларининг ёзувлари бўлиб, уларнинг тилида битилган. Мен ўзимни тушунмайман. Бир кун Ота Мафора ва Тангри бандаларининг бошқа бир мана шундай маскани йўқ бўлса, бу ҳақиқатлар бутунлай унут бўлади...

Ўуз хон худди эртак тинглаётганга ўхшарди.

Бирданига ҳамма нарса ойдинлашди. Йиллар бўйи бу Мафорадаги учрашувларида Қам Отанинг пардали, узуқ-юлуқ сўзлари, кўклар ва юлдузлар, руҳлар ва малаклар ҳақидаги, инсоннинг тангрисол қудрати, ўтмиш ва кела-жакни кўра билиш қобилияти, тушларнинг маъноси, жаннат бунёд эта олган, ер ости оламига кета билган инсонлар ҳақидаги гаплари йиғилиб, яхлит бир мазмун касб этган эди. Дунё ва инсон тарихи тартибга тушган эди.

Энди уни янги юришларга даъват этаётган туйфулар қайси манбадан қувват олаётганини у жуда яхши англаб туарар, бу юришларга босқинчлилек деб эмас, бир зиёрат деб қарамоқда эди.

Тангри томонидан танланганлигининг, Тангри элчи-си эканлигининг сабабларидан бири ҳам шу эди.

Улар айрилишар экан, Қам Ота боядан бери кўз узмай турган сандиқ ичидан ҳозиргина болға остидан чиққан каби шуъласи кўзни қамаштирадиган бир қилич чиқарди. Кафтлари узра уни Ўуз хонга узатиб деди:

— Қарагин, мана бу кўқдан келган Тангри темирчиларининг иши бўлади. Бу қилич билан Тангри амри бирлашганда сени енгадиган куч бўлмайди. Тангри ҳамиша сен билан. Йўлинг очиқ бўлсин.

Ўуз хон нимқоронги Мафорадан нурга тўлиб чиқди. Излаганини топган эди. Ер юксалиб, осмон паастлагандек эди гўё.

Қароргоҳга қайтганида Ўуз хон айтди, кўрайлик-чи, нималар деди:

Олимларни, билгинларни қўригин!

Эл кетар, тўра кетмас. Йўл битар, билги битмас!

Тун-кун топин Тангрига, бўйин товлама, қўрқиб-ий-маниб ўзга йўлни қувлама!

Билгинлар билиги – кийим ва ошдир, билгисизнинг қиличи кераксиз тошдир.

Яна Ўфуз хон бундоқ деди:

Тилнинг кўрки – сўз, кишининг кўрки – юз, юзнинг кўрки юздир¹.

* * *

Ҳинднинг шимолига жўнатилган элчилар Ўфуз хонни Иссиққўл жанубидаги қароргоҳидан топдилар.

Ҳинд эли уларга бош эгиб, дўст бўлиш, боғланишни истаган эмишлар.

Хон ойнинг тўлишини кутмоқда эди. Тонг оқариб келгандай байроқлар кўтарилиди. Карнайлар чалинди, довуллар қоқилди, от туёқларининг дупур-дупури кўлни ларзага келтирди. Кўп ўтмай сассиз-садосиз бир интизом билан ҳар бир киши қўшинда ўз ўрнини эгаллади.

* * *

Ҳинд элининг шимолида, улкан бир юртда Ўфузни қўллаб-қувватлаган уйfur элига яқин яшайдиган яна бир улус бор эди. Унинг ҳукмдори Яфмо хон Ўфузни очиқ юз билан қарши олди. Йўлига чиқиб, совға-саломлар топшириди. Эски душманларидан уч олиш фурсати етганидан севинди. Қўл қисишиб Ўфуз хон билан эл бўлди. Унга тобе эканлигини, ҳар йили хирож тўлашини билдириди. Шундан сўнг Ўфуз хон тоғ довонларидан, ўпқонлар устидаги осма кўприклардан кечиб ўтиб, қийин бир йўл орқали кунчиқар томондан Улутог ўлкасига кириб борди. Ўлкадаги бошбошдоқликдан жони ҳалқумига келган аҳоли уларнинг келишидан жуда хурсанд бўлди. Бир ой ҳордиқ чиқариб, йўлларни ўрганганидан сўнг ирмоқлар бўйлаб Икариёга юрди. Меш ва тулумларни шишириб, дарёни кечиб ўтдилар. Икариёликлар кўз очиб юмгунча ўз шаҳарларини ўгузлар қўлида кўрдилар. Тантаналар қилинди. Ўфуз ўлпон йиғувчини тайин қилиб, ортга қайтди.

* * *

Борган йўлларидан қайтишар экан, орқадан чопарлар етиб келишди. Яфмо Ўфуз хоқоннинг ортга қайтмаслигига

¹ Юздир – бу ерда: юз гўзалигининг юз хил кўриниши бор, маъносида

ишониб бош күттарган, унинг йигитларини қувиб юборган эди.

Хоқон тұхтади. Элни яйловларга қолдириб, бу гал ихчам бир суворийлар гурухи билан яна ортга қайтди. Яғмо хоннинг күчи нимага қодирлигини құрган эди. Үз аскарларини зұрга солмасдан унинг құшинларини тұмтарақай қилиб юборди ва ўзини үлдіртирди.

* * *

Хинд әлидан қайттан Ўғуз хон юртнинг ичидә бұлды. Ойлаб Талас, Сифноқ, Үртоқ, Олатовларни кезиб юрди. Инжу соҳилларидаги юртларга, жанговар йигитларнинг тупроқла-рига қадам құйди. Яңгикар қурилишини бошлаб юборди. Пойдевор құювчиларга тортиқлар берди. Ички юришларда Услу Хожа унинг сұхбатдоши, маслағатчиси эди. Унинг үели Кутлуғ ҳамон Чиндан қайтмаган эди. Қайтиш муддати ту-габ бұлған, аммо улардан ҳануз бирор хабар йўқ эди.

Тангрининг мадади ила уларнинг ўрни бүш қолмаган эди. Суворийлар мингбошиси Эрганнинг қизи Элбилга фақат ҳусни биланғина әмас, донолиги билан ҳам ном чиқарған эди. «Мен Кутлуғнинг қайлиғиман!» – дея қан-чадан-қанча совчиларни ортга қайтарди. Қиз ҳар гал тонгги қуёш шуълалари билан бирга Услу Хожанинг үтовига ки-риб борганида еру күкка сиғмайдыган севинч бахш этар-ди уларнинг юрагига.

Ўзи гулдан нозик күрінса-да, от чопишида, қилич үйна-тишда, ўқ отишда йигитлардан ортда қолмасди. Байрам-ларда оппоқ либоси ўзига ярашиб турарди. Услу Хожа-нинг қувончи, таянч тоги эди Элбилга. Тангри уни бир хонадоннинг таянчи, күркі қилиб яратған эди! «Ўғлимга ўғил туғиб беради, унинг сирдоши, елқадоши бұлади... Фа-қат қайтиб келса эди Кутлуғ!.. Түй қилиб, тилакларига ет-казардик, юрагимиз таскин топарди».

Кутлуғнинг Элбилга билан танишиб, құнғил бериши ҳам ғалати бұлған эди. Бир куни Кутлуғ овдан овулға қай-тар экан, қоялар орасидаги тик нишаблик этагида боши-ни ўтлар орасига тиқиб чалқанча ётган бир от ва отнинг ёнида ҳали мүйловлари сабза урмаган хүшсурат бир йи-гитни құриб қолди. Құшни овулларнинг биридан бұлса керак, Кутлуғ уни танимади.

- Отингга нима қилди? – деб сўради у.
Ўсмир бошини кўтариб Қутлуққа боқди:
- Илон чақибди, сезмай қолибман. Бирданига шиша бошлади ва ерга қулади. Афсус!

Инсоннинг қаноти, муроди бўлган от заҳарга чидамайди. Афтидан, Тангри бу жониворни фақат ширин сўз, илиқ муносабатлар учун яратган бўлса керак.

Пастдан юқорига боқиб турган ўсмирнинг кўзларида аянчли бир ифода, пушаймонлик бор эди. Айни пайтда бу нигоҳларда тасаввур қилиш қийин бўлган бир жозиба намоён эди. Бироқ Қутлуғ буни ҳис этмади. Уни бу ерда қолдириб кетолмасди. Ундан сўради:

- Сен ҳам овга чиққанмидинг?
- Ҳа.

Буни сўрашга ҳожат йўқ эди. Йиқилиб ётган отнинг эгарида бир неча чўл қуши осиғлиқ турарди.

- Қайси овулдансан?
- Совуқбулоқнинг устига қўнганмиз.
- Қўшнимиз экансан-ку. Ортимга мингаш, олиб кетаман.

Йигит бир дақиқа тараддуланиб қолди, бироқ бу таклифни қабул қилишдан ўзга иложи ҳам йўқ эди.

- Отнинг эгар-жабдуғини нима қиласман?

Қутлуғ отдан тушиб, илон чаққан отнинг эгар, юғаларини ечиб олди, қушларни ёш ҳамсуҳбатига узатиб, қолган нарсаларни тартиб билан ўраб чеккадаги тошларнинг орасига бекитди ва:

- Эртага келиб олиб кетасан, – деди.

Ўзи отга бир сакраб миниб олгач, йигитнинг ҳам орқасига мингашувига кўмаклашиб юборди.

Текис йўлда йигитча Қутлуғдан ора сақлаб, отнинг ялангоч сағрисига ўтириб олган эди, аммо юқорига кўтарилиш бошланганда сирғалиб тушиб қолишидан қўрқиб, эгарга чиқиб олди ва Қутлуққа қапишди. Қутлуғ ўқтам овозда:

– Яқинроқ ўтириб ол! Йўқса бу тепаликда отдан тушиб қоласан, – деди. Йигитча унинг белидан кучиб олди.

- Мана шундоқ.

Қутлуғ беихтиёр йигитчани ўз белига чирманиб олган қўлларига назар ташлади ва бу қўлларнинг йигитларни-

кига ўхшамаслиги диққатидан четда қолмади, нозик, узун бармоқлар, инжә билаклар қызы боланинг қўлларига ўхшарди. Бироқ кўнглига бошқа фикр келмади: «Нозигойим йигитлардан бўлса керак, дея ўйлади у, йўқса отини илонга чақтириб қўярмиди?»

Юқори чиқишида отини бир оз жадаллатди. Йигитчанинг уни маҳкам қучоқлаб олишдан бўлак иложи қолмаганди. Кутлугнинг куракларига иккита қаттиқ мушт қадалгандек бўлди. Бу нимаси? Йигитча қанақа либос кийиб олган ўзи?..

— Овулдаги қайси хонадондансан? Мен ҳаммани танийман.

— Суворийлар мингбоюсиси Эрганнинг... — дея жим қолди ва бир оз сукутдан сўнгра юмшоқ овозда илова қилди: — ўғлиман.

Кутлуг индамади. Анчадан сўнг ўзини тута олмай:

— Мен танийдиган Эрганнинг ўғли йўқ-ку! — деди.

Ортидаги йигитчадан жавоб бўлмади ва худди шу лаҳза қўққисдан Кутлугни чақмоқ ургандек бўлди. Ҳамма нарса аён эди. От янада жадалроқ юрсин ва ортидаги ҳамроҳи ўзига янада қаттиқроқ ёпишсин дея пошналари билан отнинг қорнига ниқтади.

Шундан сўнг жим кетдилар. Сир очилган эди.

Бир неча кун ўтгач Кутлуг отини Совуқбулоқдаги овул томон сурган, булоқ бўйидаги қизлар орасида бу гал қизларнинг либосини кийиб олган ўша ёш овчини кўрган ва унга ошиқ бўлиб қолган эди. Булоқ бошидаги қизлар орасида нима ҳам дея оларди унга? Бироқ тўқнашган нигоҳлари ва қизнинг юзидағи сезилар-сезилмас табассум ҳамма нарсани ошкор этганди: «Албатта, менман! Сен излаб юрган овчи йигит мен бўламан».

Ўғуз хоннинг олис элларга кетган элчиларидан аксарияти қайтиб келган эди. Улар борган юртларда Ўғуз элига қўшилмоқчи бўлган, унга бўйсунгандари ҳам бор эди, дадиллик билан, «келсангизлар, гаплашиб кўрамиз», деганлари ҳам. Эл ичидаги тартиб ўрнатиб, кунчиқардан, жануб томонлардан хавфи қолмаганидан сўнг, ясама бутлар таъсиридан чиқа олмаган амакиваччаларини Қодиркон ўрмонларига қувиб юборганидан кейин Ўғуз хоннинг илк орзузи кунботар сари юриш эди. «Қам Ота айтгани

каби күхна юртларнинг эшикларини очайлик! Элни ер юзининг нариги чеккасигача ёйлиқ. Кунботардан кунчиқаргача менинг байроғим кўлласига бўйсунмаган бирорта жойни қолдирмайлик!»— дер эди у. Бироқ шу орада жанубдан элчи келиши унинг фикрини ўзгартириб юборди. Бешсув аймоғида элчиларни қўпол қарши олган эдилар.

Ҳаволар саринлашиб, юриш пайти яқинлашганда Инжу водийсида, хоқон чодирининг ён атрофига йигитлар тўплланмоқда эди. Хоқон бу ерда беҳуда вақт ўтказиши истамасди. Шу боис Гур, Гарчи, Афғон томонларга янада оғирроқ босқин қилиш таҳдиidi ила тўла ваҳимали мактублар билан янги элчилар жўнатди: «Бу Буюк хоқон томонидан Улуг Тангри номи билан буюрилган амрdir. Бизга қўшилиб, байроғимизнинг кўлласига бош эгиб, хирож тўлайсиз. Йўқса эгилмаган бошлар, бизга қарши кўтарилган қўллар кесилади. Тангри хоҳиши бажо келтирилади».

Йўлга чиқишдан олдин Ўғуз хон тағин Услу Хожа билан бирга эди. Элнинг ўтмиши, келажагидан, турк улусларининг аҳволидан сұхбатлашмоқда эдилар. Оғир ҳаёт, қаҳратон қиши, қумли сахролар, ёмғирсиз далалар улусни синовга соглган эди. Услу Хожа:

— Улуг хоқон, буларнинг ҳаммаси яратганинг иродасига боғлиқ. Йилларнинг ҳам яхши-ёмони бўлади. Ойни, кунни, юлдузларни хоқон идора этолмайди. Хоқоннинг бурчи эл-улус олдидаги бурчдир. Сенинг эл олдида иккита бурчинг бор. Хоқонликнинг асли-илдизи ана шу икки ишнинг амалга оширилишига боғлиқ. Булардан бири тўранинг ҳимоя қилинишидир. Тартиб-интизомнинг бузилмаслиги, ҳеч кимнинг эсдан чиқарилмаслиги, бирорвнинг молига бошқасининг кўз олайтирмаслиги, халқقا берилётган ризқ-насибанинг кесилмаслиги... Иккинчиси, сенга хизмат кўрсатгандарнинг ҳимоя қилиниши, юксак мавқеда тутилиши, улар чекига тушган олтин-кумушнинг дарҳол бўлиб берилишидир. Тўра асосида улус шод-хуррам яшамоги, хизмат кўрсатгандар ҳам ўз пайтида улушларини олиб, эл молига, қўшни молига кўз тикмасдан ёруғ юз билан кун кечирмоқлари керак. Деҳқоннинг оёқ тери, чўпоннинг тўнлиги, аскарнинг кучлуғи, хизматкор, чўриларнинг ўзлуги, элчи, қўшин бошлиқларининг елими,

кесимликлари¹ ўз пайтида, қимириб-қисмасдан берилмоғи лозим. Эл тартибга тушса, юрагинг ва ҳаётинг ҳам тартибга тушади. Эл молини еганларни ер ютади. Эл молини емоқ унинг кўксига тиф санчмоқ, тўрани бузмоқ демакдир. Сенинг қиличинг тартибни, ҳақиқатни, ҳалолликни ҳимоя қилмоғи керак. Аскарни хурсанд қилмасанг, у қилич кўтариб жангта кирмайди. Олтинни ўзинг учун йиғма! Йигитларинг учун йиғ! Олtingга асирик шаробга асирикдан ҳам даҳшатлироқдир. Яртмоқ² соч, токи йигитларинг қўшиндан сочилиб кетмасин, лашкар пароканда бўлмасин. Қиличинг эл қуриқчиси бўлсин!..

Амрингни кўкларнинг ҳукми каби қатъий айт!

Бу суҳбат узоқ чўзилди. Ўғуз хонни олдинда турган юриш ўйлантириб қўйган эди. Улутоғ билан Икариёдан унинг улуси бир неча йил еб-ичишга етадиган бож билан қайтган эдилар. Хон олдинда турган юришнинг янада зафарли бўлишини кутарди. Қўшдарё оралиғидан Бешувга кечиб ўтиб, у ердан бой-бадавлат, уруш кўрмаган бир элга бормоқчи эдилар. Бу кейинги йилларда қургоқчиликдан тинкаси қуриган юртларга қайта жон бағишлар эди.

Услу Хожа бу юришга зафарлар тилаган эди, лекин бугун фақат юришдан эмас, Ўғуз хоннинг келажак йўлларидан, элнинг тақдиридан, қисматидан гаплашмоқда эдилар. Услу Хожа дер эди:

— Буюк хоқон, сени тепада кўк, пастда ер элнинг хоқони қилиб танлади. Кўк сендан юз ўтиргагунча, ер оёғинг остидан қочмагунча зафар сен билан бирга. Турк хоқонлари уч устун устида туради! Ҳукм, қут, манглай ёзуви... Сенда учаласи ҳам бор. Тангри ёрлиқ бериб ўтқазди сени юксак Амр Тахтига. Сени кишилар орасидан сайлаб олиб қут билан йўғирди, зафарини ҳам аямади. Дадил бориб, зафар билан қайт!

ҚУТЛУҒНИНГ ҚАЙТИШИ

Юртда юриш ҳавоси ҳукмрон эди. Отлар парвариш қилинар, йигитлар ён-атрофдан тўкилиб келар, темирчилар кечаю кундузни билмасдан, чарчадик-толиқдик де-

¹ Оёқ тери, тўнлик, кучлук, ўзлук, елим, кесимлик...— меҳнат ҳақи турлари

² Яртмоқ — маблаг, мол-дунё

масдан олов пуркаб темир тоблар, арава гилдираги, ўқ, найза, қалқон ясар, қилич тайёрлар эдилар. Ўтвларда йиғиб-йиғишириш ишлари кетар, қүшинда отиш-чопиш мусобақалари тин олмай давом этарди.

Юриш туркнинг телбавор одати эди. Бахшига илҳом келганида жанг-жадалдан куйларди. Бу руҳни йилқилар, сурувлар ҳам ҳис этарди. От туёқлари ерни ногора каби гумбурлатар, созлар, қубизлар, карнайлар йўлга даъват этиши билан бирга бу ерда қолаётган юртлари учун бўзлар ҳам эди. Унинг бутун ҳаёти эскининг аянчи билан янгининг қувончи оралиғида эди.

Ўзанларнинг¹ қўшиқларида эл билан қовушиб-айрилмоқ, хонадоннинг тақдирини Тангрига топширмоқ, янги сафарларга оқ йўл тиламоқ, бу ҳаёт-мамот юришига зафар тиламоқ, Тангрига юкунч келтирмоқ каби кўнгил фарёдлари, ер ва кўк ўртасидаги инсон умрининг азалий муқаддаслиги, қувноқ-ҳазин оҳанглар, дардлар қоришиб кетган эди.

Сўнгсиз саҳролардан кечиб ўтган, изгириналарнинг совуқ нолишларига қўшилиб улусни ўз ортидан чорлаган Бўз бўрининг увиллашлари қўшилиб кетган эди бу оҳангларга.

*Тунлар туриб кўчайлик,
Қора сувлар кечайлик,
Ёғий бошин бичайлик²,
Энди бизни ким тутар...*

*Учқур отлар йўртамиз,
Йўллар бағрин йиртамиз,
Ер юзини ўртамиз³,
Энди бизни ким кутар!..*

Барча юришларда бўлгани каби бу гал ҳам кишиларнинг кўзи кўкка тикилган, Тангрини мадҳ этар, ундан зафар тилар эдилар:

*Онадан туғмадинг, отадан тўрамадинг,
Кимса ҳақин емадинг,
Зўравонлик қилмадинг,*

¹ Ўзан – бахши

² Бичмоқ – кесмоқ, чопмоқ

³ Ўртмоқ – қопламоқ, тўсиб қўймоқ

*Урганини унутмаган Улув Тангрим, ҳу!
Берса миннатин күтмаган Улув Тангрим, ҳу!
Юксакдан юксакроқсан,
Ҳеч ким билмас – қандоқсан,
Бирлигингга сиғиндик,
Мангудан мангуроқсан.
Сен кўкдасан, сен ердасан, Улув Тангрим, ҳу!
Улусимнинг кўнглидасан, Кўркли Тангрим, ҳу!*

Узоқ-яқиндан эшитилаётган бу созлар, олқишлиар, илтижоларни тинглаб турган Ўғуз хоннинг ичидаги туйгулар бўрони уйғонган эди. Ёмғир тоши йўқолгандан сўнг қурғоқчилик тўғридан-тўғри Чиндан Шимолга сакраб ўтган, Гобида, Қўшдарёоралиғида, улкан яйловларда мисли қўрилмаган ташналиқ содир бўлган эди. Йилқилар, тияқайтабонлари, қўй сурувлари, мол-ҳол ҳолдан тойиб бормоқда эди. Бу танглик кейинги пайтларда эл-улусни Қораҷук, Олмали томонлардан Инжу қирғоқлари сари сиқиб бормоқда, бирон-бир томонга юриш қилиш имконини бермасди. Бу танглик ичидаги Қам Отанинг сўзлари бир тасалли каби чарх уради Ўғузнинг бошида: «Юрт бирлашмоғи керак. Тангри аломатини англаштан тош ҳам мангурлик эмас, ўлимни билмайдиган, абадиятга йўл очадиган нарса улуснинг бирлигидир. Тилини, ўзлигини, тупроғини, йўл-йўриғини ҳимоя қила олган эл-улус Тангри муҳаббати остида ўлим-йитимни билмагай».

Ўзанларнинг овозида ҳам Қам Ота айтган ўлмаслик, сўнгизлик оҳанги бор эди. Аммо қўшиқлар шарт кесилди. Юртга овоза тарқади. Услу Хожанинг ўғли Қутлуғ Чиндан қайтиб келган эди. Ота-онасини зиёрат қилишдан олдин у саройга борди. Хоқоннинг қаршисида таъзим қилас экан, кўзлари ёшга тўлди, қўли бўм-бўш қайтиб келганини айтди. Ёмғир тоши топилмаган эди. Чиннинг жанубидаги саройларга йўл топиб, ундаги барча маъбадларни ахтариб чиққан эдилар. Лекин тош ҳеч қаерда йўқ эди. Улус Тангри тоши деб атаган, бироқ қамлар уни йўқолмас дея ҳисоблаб, Мангу, Абадий деб ном берган бу тош, афтидан, Абадий йўқолган эди. Ўғуз хон улардан икки йилдан кўпга чўзилган бу изланишларнинг барча тафсилотларини, қайси аймоқлардан ўтиб-кечганликларини синчилаб суриштирди. Бу савол-жавоблардан хоқонни севинтирган нарса Чин-

да бўлиб ўтган жангдан сўнг уларда сулҳни бузиш ҳара-
катларининг йўқлиги эди. Карвон-арғишилар турк ерлари-
дан хавотирсиз ўтиб олардилар. Шимолдан келадиган бос-
қинлар тинчиб, ўлка сарҳадларида, юрг чегараларида
юришлар тұхтаган, жант ваҳимаси йўқ, демак, Ўғузнинг
улуши – бож-хирож ўз вақтида жүнатилади. Бунинг усти-
га Чиннинг шимолий ўлкаларида яшайдиган туркларнинг
кучи ортиб бормоқда. Улар билан бирлаша олсалар, Чин
хоқонлиги янгидан турк бекларининг құлига ўтади. Бу гап-
лар айтилиб, савол-жавоблар ойдинлашгандан сўнг Кутлуг
таъзим қилиб ўрнидан турди.

Ўғуз хон:

– Ачинма! Сизлардан сўнг тош топилди, – деди. –
Дам олинг, қаршимизда узоқ бир сафар турибди.

Кутлуг саройдан чиқиб, отини кент чеккасида, ўрмонда
уни кутиб турган йўлдошлари ёнига суреб борди ва деди:

– Буюк хоқоннинг хузурига бордим. Кўзимиз ойдин¹,
тош топилибди! Энди ором олсак бўлади. Аммо аввал мени
уйимизга кузатиб қўйинг. Ота-онамнинг хузурига бирга-
ликда борайлик...

Қизиги, Кутлугнинг ёнида от миниб олган Ли Шан
исмли Чин қизи ҳам бор эди. Ўзини насл-насаби турклар-
дан бўлмиш табғач қизи деб таништирган, севишишган
бўлса-да, туркликтан асар ҳам йўқ эди. Тилни билмас,
Чин таомили бўйича яшар, бироқ Кутлугни севар эди.
«Икки йилдан ошди, Эл билга кутиб ўтирганда! Унинг
ота-онаси ҳам, «Кутлуг қайтмади, уйда чириб ўтирасан-
ми, элдан бирорни танла, унга тег», дея аллақачон узатиб
юборгандирлар уни», – деган хаёллар билан Кутлуг Чин
қизига қўнгил қўйган эди. Қизни олиб келиш оғир иш
эди, бироқ хоқоннинг, отасининг умидларини пучга чи-
қариб, севгилиси деб Чинда қолиб кетиши ундан ҳам оғирроқ
эди. Эл ичиди қийналишларини кўз олдига келтирди,
бироқ қиздан ажралмади. Энди узоқ йўлларни босиб ўтга-
нидан сўнг, кучини йиғиб ота-онаси билан юзлашмоғи
лозим эди. Чинда эканлигида у бунга Тангрининг хоҳи-
ши, тақдир иши деб қараган эди. Ўрдага кириб, эл ичига
қайтганидан сўнг, Чиннинг дабдабали кентлари билан
қиёслаб бўлмайдиган туфма ерларини, оғир аҳволда яша-

¹ Кўзи ойдин – кутлуг бўлсин маъносида

ётган улусини кўрганидан кейин бу уйланиш унга янгиш бўлиб туюлмоқда эди. «Тангри хоҳиши бўлса ҳам, афтидан, Чин Тангрисининг хоҳишига ўхшайди бу». Йўлдошлари далда бера-бера уни уйига бошлаб бордилар.

От туёқлари сасини эшитиб Услу Хожанинг юраги орзиқиб кетди. Эшикка чиқибон ҳар бир йигитни алоҳида-алоҳида бағрига босди. Ўғлининг ёнидаги чинли қизни кўриб тўхтаб қолди, Кутлуғнинг қизариб-бўзаришидан ҳаммасини тушунди. Ҳеч нарса демасдан чодирга қайтди:

— Кўзинг ойдин, ўғлинг қайтиби, бор, келинингни олиб кир, — дея хотинига зарда қилди.

Бироқ аёлнинг келинни ўйлаб ўтиргулик ҳоли йўқ эди. У ўғлини туз каби ялаб-юлқай кетди:

— Юрагимиз тамом бўлди-ку бизнинг. На ўлигиниздан хабар бор, на тиригингиздан...

Сўнгра чинлик қизни ҳам қучоқлаб ўпди:

— Болаларимиз қайтиб келишди, Тангрим!

Ташқаридан уйланиш туркларга ясоқ ҳисобланмасди. Бироқ буюк хоқоннинг топшириғи билан жунатилган ўғлининг кўнгил кўчаларига кириб кетгани Услу Хожани рањжитган эди. Улус нима дейди? Бу икки йил бадалида уларга ўғил ўрнига ўғил бўлиб қолган Элбилга: «Ота отини таратмаган бебош ўғилнинг ота белидан энгунича энмагани яхши эди!», дея ўз чодирига чекинди.

* * *

Элбилга Кутлуғнинг қайтиб келганини эшитганда кўкка учгудек бўлди. Бироқ у бир чинлик қизни ортидан эргаштириб келганини эшитиб ерга қулаб тушгандек бўлди. Аввал нима қилишини билмади. Сўнгра ерга ётиб ҳўнгир-ҳўнгир йиглади. Кутлуққа бўлган севгиси, унинг қайтишини кун санаб кутганлари, унинг уйини ўз уйи каби билгани бир ёқда тураверсин, энди у қандай қилиб эл олдига чиқади? Қиз-келинлар даврасида нима дейди? «Улуф Тангрим, жонимни ол, ол жонимни! — деди. — Келганидан ўша ёқда ўлиги қолгани яхши эди!»

Тонг оқарганда оқ йўргасига сакраб минди-да, чўлларга чиқиб кетди. Хилватларда юрди. Кундузлари ҳеч кимга кўринмасди. Фақат тун ярмидан оққандан ота-онасини ўтамаслик учун ўтовининг эшигини очиб кириб, сассиз-садосиз тўшагига чўзиларди. Эл азоби Услу Хожага бўлган

хурмат-эътиборга келиб тўхтади. Гап-сўз катталашиб кетмади. Юриш тараддуни кетаётган бир пайтда алоҳида чодир тикди, Ли Шан билан яшаётган Қутлуғ уннутилди.

* * *

Тунда булатли шафақ ўт тушган қаби алвон рангда эди. Бу зафардан дарак берарди. Элда: «Тунда булат қизарса, уйда бир чақалоқ туғилгудек бўлади», деган нақл юради.

Илиқ тонг шамоли чодирлар орасидан увиллаб эсар экан, Бўз бўри сасига ўхшаш бир садо янграп эди.

Жанг карнайлари барчани кўчдаги ўз ўрнига чорларди. Сассиз-садосиз, кўникма бўлиб қолган бир интизом билан йўл тадоригини кўрмоқда эдилар.

Эрта тонгда Ўғуз хоқон қўшини жануб томон оқди. Инжунинг сўл томонига ўтиб, эски эл йўли билан довон ошганларида дастлаб Кунчиқардаги олис Қорача тоғларининг боши қизариб кўзга ташланди. Сўнгра тонг шуъласи товус думи қаби уфқни қоплаб олди. Кўч тўхтади. Олдинда Ўғуз хон, йигитлар ўгирилиб, аравадагилар арава устидан, отлиқлар от устидан, яёв-пиёдалар ерга тиз чўкиб қўёшга уч бора таъзим қилдилар. Қуёш шуъласи кўчнинг томирларида долғаланиб оқди, қиличларда ялтираб ўйнади, йўлларга оппоқ пояндозлар тўшади.

Кўч ичидаги саси саҳар қушлари овозини босиб кетарди.

* * *

Ўғуз эли жануб йўлларидан тўйга кетаётгандек юриб борарди. Шу орада олдиндан жўнатилган элчилар ҳам уларга пешвоз келдилар. Гур үлкасида элчиларни хурмат билан қарши олиб, «гаплашиб келишайлик», деган эдилар.

Бир неча кун ўтгач Гур сарҳадида кичик бир қўшин билан оқ байроқ кўтариб уларни қарши олишди. Гур ҳокими Ўғуз хоннинг истиқболига чиқди, от устидаги саломлашдилар. Гаплашиб бир тўхтамга келдилар. Гур ҳукмдори юртининг тўрт томонини ёғийлар қуршаб олганини, шу важдан ёрдам кераклигини, бир битимга келсалар ҳар йили лозим қадар хирож беражагини айтди.

Ўғуз хон Гур элининг тартиб-қоидалари, тўраси, низомларига хурмат-эҳтиром билан қарашини билдириди. Гур ҳокими ўзини ерга урмасдан: «Қўшниларнинг тилини,

уларни йўлга солмоқ усулини ўзим биламан!», дея бир гуруҳ сара Ўғуз суворийлари билан от суриб кетди.

Ўғуз хоннинг отларнинг рангига кўра тартиб берилган қўшини баҳор чаманларига ўхшар, қўнгилларга завқ берар, шу кўрки билан янада қўпроқ ваҳима уйготарди. Бу қўшинни кўрган қўшнилар, то Фазнаю Кобулга қадар, жангни хоҳламасликларини, келишиб хирож тўлашга рози эканликларини билдирилар. Қўшин ҳордиқ чиқариш учун тоғ этагига, ирмоқ бўйига қароргоҳ тикди. Гур ҳокими дўстлашганлари шарафига зиёфат берди. Эл жануб юришидан жангсиз, қурбонсиз, боши осмонда бўлиб қайтди. Қайтишар экан, Ўғуз хоқон бекларининг мардлигидан фурурланиб сўйлади, кўрайликчи, нелар сўйлади:

*Арслонларга им бош бўлса, ҳамма арслонлар им бўлади.
Будун бузилса, беклар тузар, беклар бузилса ким тузар?
Қилич қўриқчи бўлса, бек ҳузур топур.
Қилич қимиirlаса, ёғий қимиirlамас.
Куёшда дарз, бекда жаймоқ¹ йўқ.
Ернинг боши – тоғ, элнинг боши – бек.*

Оти, донғи машҳур, юзи оқ, кўркли бекларим, йигитларим, сараларим, ботирларим, жасурларим! Шавкatingиз камаймасин. Элимиз, Тангримиз олдида бошингиз ҳамиша баланд бўлсин.

* * *

Юрт дарди юртда қолган эди. Фақат Эл билга ўз ёғида ўзи қоврилмоқда, бир йўл ахтармоқда эди. Жануб юришида у ҳам отдан тушмади, отасидан айрилмади. Олис-олисдан Кутлуғни кўрганда юраги пора-пора бўларди. Ёндашиб юзма-юз келмасди. Кўришса, гап очилса кўнгилчанлик қилиб қўйишдан кўркарди. Ўч олмаса совимасди. Юришда унга қўл кутарса, эл орасида гап-сўз бўлар, жангчилардан бири камаяр, ҳамма уни айблар эди... Юриш пайтларида ҳамма ёй каби таранглашар, ўлжа устига отилмоққа шай арслонга ўхшарди. Бундай дамларда эл ичиди қон тўкиш билакларни заифлаштирав, юришга бузғунлик соларди. Эл билга бундай қилмоқни истамас, тоқат қиласди.

Кўч юртга қайтгандан сўнг тантаналар бир неча кун давом этди.

¹ Жаймоқ – шошмоқ, хато қилмоқ

Ой тұлишиб, еру күкни ёғдуға тұлдирған кечаларнинг бирида қони томирларида гупиллаб, юраги күксіда дүкіллаганча чодирлар күлкасидан ўтиб Қутлугнинг чодирға яқынлашды. Қалин эшик пардаси ёnlаридан боғланмаган эди. Ичкаридан сас-садо эшитилмагани учун эшикни очиб ичкари кирди. Йиллар бүйи юрагининг түрида сақлаб келган улус ўғлони, күнгіл беріб севгани Қутлуг чодир түйнугидан тушиб турған ой ёғдусида хотини билан бағирлашиб ётарди. Қотиб қолди. Бу огуш унинг жойи эди. Энди бу огушда элига осий бұлған бир ўлқанинг түя тупуғи каби оппок, руҳсиз бир жасади ётарди. Түймасдан узоқ тикилди. Элнинг «енгилди» дейишидан құрқмаса, уввос солиб йиеглаган бұларди. Чинлик қыз ич-ичдан севинарди. Қархисидагиларнинг кимлигини унуганча ой шуыласида бу түшгә үхшаш манзарага узоқ боқиб турди, юраги орзиқиб кетди. Гұзал, бетимсол бир ҳолат эди. Уларнинг юзларига құнған бахтиёр табассум ой нурларida үйнарди. Гүё бир-бирларига боқиб севинардилар. Балки Элбилгадан кулаётгандирлар. Эхтимол, уни құргандирлар, фақат буни сездирмаслик учун ўзларини уйқуга солиб ётгандирлар. Элбилга қүнглида: «Ё Тангрим, бу севинчни қандоқ қилиб бузаман, бу уйқуга қандоқ қилиб құл құтаратман?» – дея фарёд қилди.

Садоқдан бир ўқ олди, түшамага санчиб, эшикдан чиқди-да, чодирлар орасига ғойиб бўлди.

Орадан уч кун ўтди. Қутлуг ўқни таниған, аммо хотинига ҳеч нима демаганди. Айтиб нима ҳам дерди? Бориб Элбилгани изласинми? Излаб топди ҳам дейлик, унга бўлган воқеаларни, нега бундай иш қилиб қўйганини қандай қилиб айтади? Шундоқ ҳам Элбилганинг у кетгандан сўнг ота-онасига ўғиллик қилиб, гапида турғани, уни интизор бўлиб кутгани Қутлугни гангитиб қўйган, юрагида Ли Шанга бўлган туйғуларини остин-устин қилиб юборган эди. Мана оқибати, энди қандай қадам босишини ҳам билмай қолган эди. Отининг бошини чўлларга бурди, йилқилар, сурувлар ёнидан елдек сирғалиб ўтди. Жилови бўш қўйилган от учиб бораарди. Кўклар ювилган каби мовийдан мовий эди. Бу мовийликнинг бир парчаси яйловнинг этагига қўнганди. От ушбу тиниқ кўлни танир, ўша томон елиб бормоқда эди. Худди шу пайт тепалик ортидан бошқа бир отлиқ чиқиб қолди. Оқ йўрға қуёш

шувълаларида пар-пар ёнар, шамол Элбилганинг соchlарини байроқ каби ўйнарди. Бироқ турклар қора байроқни хуш кўрмайдилар... Бу яхшилик аломати эмас.

Элбилга пешвоз келди:

— Эй, Кутлуг бек, мардлик қилмадинг! Мени бир ўз элизизнинг қизига алмашсанг, алам қилмасди. Кетиб, қули тоғаларимнинг, отамнинг қонига бўялган, тили мингта, қиёфаси мингта чинликлардан бирини эргаштириб келдинг. Мени ўлдирмоқ учун! Лекин у ҳам яшамайди. Мард бўлсанг, мен санчиди келган ўқни олиб ўлдирган бўлардинг уни, қўлингдан келмади. Энди мени ўлдир! Шундоқ ҳам бир марта ўлиб бўлдим... Ўлдир!..

Гапирган сари кўзларидан дув-дув ёш оқарди.

Кутлуг у билан суҳбатлашмоқ, ҳозирда ҳам ўзига ҳаммадан яқин бўлган севгилисини овутмоқ, қўл чўзиб отининг жиловидан ушлаганича у билан ёнма-ён турмоқни истарди. Элбилга жиловни тортди. Оқ йўрға кўкка сапчиди. Қиз отини буриб узоқлашди, лекин бир оздан сўнг от бошини йигит томон бурди, йигитга юзланганча садоғидан ўқ олиб ёйга жойлади.

— Улуғларимизнинг қонини булгай олмайсан, Кутлуг бек! Хотинингдан туғилган фарзанд ҳам чинлик бўлади. Мен бунга чидай олмайман, — деб ёйни кўксига кўтарди.

Ўқ визиллаганча учиб кетди! Бўшлиқда узаниб, ҳаволарни ёриб... Гуё қиз истаса уни тағин ёйига қайтара оларди. Кутлуг қўл узатса уни ўзига келиб қадалмасдан ҳавога ушлаб қолар, чўпдек синдириб ташларди. Иккиси ҳам қотиб қолганча ўқ парвозини томоша қилардилар. Яшаган умрлари қадар йўлни босиб ўтди бу ўқ, учди, учаверди, худди гул каби Кутлугнинг сийнасига санчилди. Тешиб курагидан чиқди. Элбилга қолганини, Кутлугнинг букчайиб от бўйнига ийқилганини, от гуё нелар рўй берганини тушунгандек еркўкларга сапчимасдан, беозоргина ортга бурилганини кутиб ўтирумай оқ йўргасининг ёлига энгашди, оқ йўрға уни олиб учганича чексиз сахро оғушида кўздан фойиб бўлди.

* * *

От ўз устидаги юкини тушириб қўймаслик учун сеқин-секин одимлаб ўрдага қайтди. Кимнидир чақиргандек кишинаб юборди. Кутлуг ерга осилиб тушса-да, оёғи узангода қолди. От эгасига озор етказмаслик учун таққа

тўхтади. Уни кўрганлар юрганча етиб келдилар. Ўрдада шовқин-сурон кутарилди.

Кутлугни ким отганлигини билмай ҳайрон эдилар. Буни фақат от кўрган, лекин у гувоҳлик бера олмасди. Услу Хожа билан Эрдам, бир-бирларига очиқ айтмасалар-да, иккиласи ҳам бу фавқулодда ўлимда Элбилганинг қўли бўлса керак деган фикрда эдилар. Лекин буни тилга чиқармадилар. Шундоқ ҳам Элбилга бир парча булатдай ғойиб бўлган эди. Бу ишда чинлик қиз айбдор эканлигини ҳамма биларди. Ҳар нигоҳда шу маъно бор эди. Буни Ли Шан ҳам англарди. Одатга кўра ўлган кишиларнинг фарзандлари етим, ўз ҳолига ташлаб қўйилмас, хотинига эса марҳумнинг оға-иниларидан бири уйланарди. Кутлугнинг фарзанди йўқ, бунинг устига хотини оғироёқ эди. Уни ўз ҳолига қўйиб қўйдилар. Аза тугагандан сўнг аёл Чинга қатнайдиган савдо карвонига қўшилиб кетиб қолди. Бироқ у юраги остида ҳеч кимга билдирамай уч ойлик ҳомиласини ҳам олиб кетмоқда эди. Ярим йилдан сўнг у бир ўғил туғарди. Йигирма йилдан сўнг Кутлугнинг бу ўғли Чин қўшинининг бўлук бошлиғи сифатида туркларнинг устига бостириб келарди.

ОЗ ЭРЛАРИ БИЛАН БИРЛАШУВ

Ўғуз хон Кунботарга юриш қиласими? Неча йилдан сўнг? Бу маълум эмасди. Ички курашлар ҳеч тинмасди. Бир ўт ўчирилмай туриб бошқаси аланга оларди. Бироқ куз тугаб, қиш бошланган кунларнинг бирида элнинг кунботар сарҳадларидан яна бир қора хабар келди. Эски қўшнила-ри бўлмиш қамарлар бошқа қўшнилари билан биргалик-да келишувни бузиб, Итил ва Ёйиқни ошиб ўтиб, янги тикланган Янгикентгача келиб етган, бу ердаги юртларни талон-торож қилиб ортга қайтган эдилар. Ўз ортларидан бир элчи ҳам жўнатган эдилар.

Юзи ниқобли элчининг ташрифи тинчлик учун келгандарнинг ташрифига ўхшамасди. У қамар элидан мактуб келтирган эди. Фармонбардор уни олиб ўқиди. Қамар хоқони бундай деб ёзарди: «Улуф хоқон, сенинг кунчи-қарда ёғийларни бирма-бир эзив, тиз чўқтирганингдан бошимиз кўкка етди. Яратганинг қўли бошингизда, тоши қўлингизда. Сизга ким ботина оларди? Бизлар бир-бири-мизга қардошмиз!.. Битта отанинг фарзандлари бўламиз. Элларимиз орасида узоқ йиллик боғлиқлик бор. Кунбо-

тарда ёғийларнинг сизга борадиган йўлларини биз тўсиб қўйдик. Муқаддас тошни асрамоқ энди бизнинг зиммамизга тушади. Яратган уни Ўгуз хон номига эмас, турк номига жўнатган. Ён-атрофимизда шунча кўп ёғий бор экан, биз бир-биirimизга кучимишни кўрсатиб юрмаймиз деган умиддаман. Тошни бизга бериш билан қардошлар қирғинининг олдини олган бўласан...»

Ўгуз хон Ёмғир тоши уруш учун бир баҳона эканлиги-ни англади. Қамарлар ўз юришлари учун бошқа бир важ топа олмаган эдилар. Турклар Қора денгиз деб атайдиган Понт дентизининг шимоли-шарқий худудлари қамарларга қарашли эди. Куч-қудратлари, бойликлари битмас-туғанмас эди. Беҳудага бу ёққа қўшин тортиб келмаган эдилар. Ўгузни қўрқитмоқчи бўлар, «тошни бермасанг, уруш бошлаймиз» дея пўписа қилмоқда эдилар.

Қамарларнинг бу фавқулодда босқини Ўгуз хоннинг кунботарга юриш истагини оловлантириб юборди. Юриш тадориги ҳақида керакли топшириқлар берилди...

* * *

Тангричилар элдан элга, улусдан улусга ўтиб боргани сари Ўгуз хоннинг дунёни бир инончга топинган, бир тўрага итоат этган, бир байроқ остида бирлашган ягона бир ўлкага айлантириш истаги тобора кучайиб борарди.

Иккинчи томондан эса отасининг давридан бери саройнинг бош маслаҳатчиси, ўтитчиси бўлган, кексайиб қолган эса-да, ўткир мушоҳада қобилиятини йўқотмаган Улутуркнинг, болалигидан ўзига отабеклик қилган Услу Хожанинг берган билимларидан сўнг қизиқиши тобора ортиб бораётган Каспий атрофидаги тили бир, яқин ўлкаларга, ундан кейин эса фиръавилар Мисригача бўлган худудларга бориш орзусидан кеча олмас эди.

Бу олис, қайтиб келиши гумон бўлган юришга ўзи билан бирга ўн мингларча хонадонни ҳам олиб бормоқда эди. Шунга яраша от-арава, туя, қурол-яроғ ҳозирланиши лозим эди.

Шу орада Иссикқўлнинг нариги томонидан жуда оғир бир хабар келди. Ўгуз хоннинг энг ишонган қўлдошлари, йўлдошлари бўлмиш уйғурларнинг кунчиқарда қолган бир қаноти билан қарлуқлар ўртасидаги жанг тугар-тугамас, бу сафар жанубдан танқутларнинг босқини бошланган эди.

Олдинда бир неча ойлик фурсат бор эди. Ўғуз хон отларни, туяларни, қўй сурувларини боқиб йўлга тайёрлаш учун Инжу дарёси бўйларидағи водийга бормоқчи бўлди. Ортда қолган уйғур элига ёрдам бермай туриб юришга чиқа олмасди. Қўшин бошлиқларидан уйғур беги Тўлмушни беш минг суворий билан Бешбулоқча жўнатди.

Инжу дарёсига энган қўшин устига ортдан улкан бир кўч етиб келди. Ўғуз хоннинг кунботарга юришини эшишибоқ унга қўшилмоқчи бўлган Оз эрлари Кўиман тоғларидан ошиб келган эдилар. Ўғуз хон Оз эрларининг бошлиғи Алпон бекни ёнига ўтқизиб эҳтиром кўрсатди. Қўшин қабила бошлиқларига армуғонлар берди. Бу юришнинг ҳар иккаласи учун ҳам зафарли бўлишини тилади.

Алпон бек деди:

— Бизнинг ота-боболаримиз Қазилиқ деб аталадиган муз тоғлар орасида яшаганлар. Бундан ўн беш-йигирма авлод илгари Шимолдан юксак тоғларни ошиб келган, чумолидек сон-саноқсиз, тили ҳам бегона бўлган ваҳший босқинчилар бизни ўз ерларимиздан қувиб юборганлар. Юз йиллардан бери юрт дея бўридек ув тортамиз, ер юзида сарсон-саргардан тентиб юрамиз, бироқ ичимиздаги изтиробни қувиб чиқара олмаймиз.

Тангри сени бизнинг ўчимиизни олиш учун юборган. Бу буюк сафарда сенга қўшиламиз. Сен қайда бўлсанг, биз ҳам ўша ердамиз...

Ўғуз хон учун бу кутилмаган, бошини кўкка етказган ҳодиса эди. У Оз эрларини танир, билар эди. Пароканда яшасалар-да, бардамликлари, қадду қоматлари, кўрк-қиёфалари, ўткир тиллари билан бошқа уруғлардан ажралиб туардилар. Бироқ Ўғуз уларнинг илдизлари Қазилиқ тоғининг нариги томонига бориб боғланишини илк бор эшиитмоқда эди. Бу янгилик унинг олдинда турган юриши тўғри эканлигини яна бир бор тасдиқларди. Энди фақат қамарлар билан шунчаки ҳисоб-китоб қилиш учун эмас, балки насабдошларининг қўлидан тортиб олинган юртларини уларга қайтариш учун ҳам юриш бошламоқда эди.

ЭСКИ ТАРИХНИНГ ЯКУНИ

Ҳали ҳаволар илимаган, беш ойдан бери музлаб ётган Инжу дарёси эримаган эди. Бу Ўғуз хоннинг сафарини осонлаштирди. Дарё қуйисидаги Орол қўли ёқасида жой-

лашган, бир неча кунлик йўл бўлган янги бошкенти – Янгикентга қараб юрдилар. Инжунинг ўнгу сўл томонидан йигитлар оқиб келар эдилар. Ўғуз хон кексаларнинг элдан ажрашини истамасди. «Биз юртларимизни ташлаб кетяпмиз! Ерларни бирлаштириб, улусимизни унинг бегига айлантиromoқ учун кетяпмиз. Кунчиқар дарвозасининг тошларини тиклаб бўлдик. Қайтишда бу тошларни Қодиркон тоғларининг нариги тарафига, Буюк денгизга қадар ташиб борамиз. Кунботарда ҳаммани бир эл қилиб, қудратимизни орттириб қайтамиз!» дер эди.

Инжу бўйидаги экин-тикин далаларига, бодом, олма, беҳи боғларига, тошдан, пахсадан тикланган овулларга ҳавас билан боқарди. Унинг будунига фақат экинчи, боғбон, чорвадор дея қараб келганлар соchlарини юлсинлар. Турк қўшини юриш бошлагандан даҳшатта айланади, арслонлар каби олишади. Бироқ эгаллаган юртларига раҳмшафқат кўрсатади, илоҳий бир тартибга солади.

Баҳор келгач, дарёning муз пардаси парча-парча, лахта-лахта бўлакларга бўлинганича Орол томон оқа бошлайди. Бу ердан то Термиз томонларга қадар кемалар қатнови бошланади. Унинг юртининг кемалари!. Савдо-сотиқ авж олади. Хоразмликлар Чиндан кириб Эллиндан чиқадилар. Хоразм деб аталадиган, Қоракум билан юзма-юз турган бу жаннат гўшасини у жуда хуш кўрарди. Орол денгизининг тўрт томони унинг улуслари азалдан яшаб келган ерлар эди. Бу ердан чиқиб, Каспийнинг шимолидан ошиб ўтмоқчи эдилар.

Хозиргacha ҳеч бир юриш уни бу қадар сеҳрлантириб қўймаган эди. Албатта йўл узок эди, оғир эди! Борадиган ўлкалари ҳам аралаш-қуралаш, Чин, Ҳинд эллари каби қоришиқ эди. Ер юзининг барча йўллари туташган, тўқнашув, бирлашув-ажрашув, қон-қиронга бой ерлар эди.

Йиллар бўйи карвонлар билан бориб келган тангричилар бу ерлар ҳақида хушламай гапирап эдилар. Ичма-ич яшайдиган майда элатларнинг инончи ҳам аралаш-қуралаш, ўзаро муросасиз бир ҳолда эди. Кўк Тангри инончининг тарқалишига қарши чиққанлар ўзларини Ер Тангриси деб ҳисоблардилар. Кунботардагилар кунчиқарликларга қараганда янада бидъатчи, ўжар, руҳ оламига янада кўпроқ боғланган эдилар. Каспийнинг нариги томонида тангричилар дуч келган зўравонликлар, азоб-уқубатлар Ўғуз хон-

ни шошириб құярди. Унинг бу кайфияти әлни ҳам чулғаб олғанди.

Йүл бүйи унинг фикру ёди, қайғуси әкин-тикинни тезроқ йиғишириб олишда бўлди. Йигирма кун ўтгач Хоразмнинг бош кенти Хивага кириб бордилар. У ерда икки кун тин олгач, шимолга юзланди, Инжуни кечиб ўтиб, Янгикент дарвозаси олдига чодир тикди.

Кўчаларининг гавжумлигидан игна ташласант ерга тушмайдиган, боф-роғлари жаннатга ўхшайдиган, хушфеъл, самимий, меҳмондуст Хивадан сўнг Янгикент жозибасиз, кўримсиз бўлиб туюлар эди...

Кеча ва кундуз тенглашган кунда Иссиққўлга жуна-тилган қўшин от елдириб қайтиб келди. Уйғур беги Тўлмуш Ўғуз хон қаршисига тиз чўкиб, таъзим бажо этди.

Танқут қўшини тумтарақай қилиб юборилган, уйғурларнинг узоқ давом этадиган осойишталиги ўрнатилган эди. Бироқ шу аснода яна бир воқеа рўй берган эдики, ундан кўра жангда енгилгандари яхши эди. Ёйи Эркўнга йўл олиб, водийга кириб борган, мағораларни талон-торож этиб, вайрон қилиб, битикларни олиб кетган эди.

Ўғуз хон сапчиб туриб кетди. Қилич қабзасини қаттиқ сикқанидан қўлининг томирлари бўртиб-бўртиб чиқди. Аммо бу қадар узоқликдан ҳеч нима қила олмаслигини билиб тахтга шилқ этиб чўкди-да, бошини чангллади:

- Хўш, Ота Унгурдаги хазинамиз, битикларимиз-чи?
- Ҳаммасини вайрон қилишибди.
- Қам Ота-чи?

– Ўлган-қолганини ҳеч ким билмайди. Уни ҳам тутқун қилиб олиб кетишган, дейдилар. Бирор, йўлда қутулиб қолиб, Фарғона орқали кунботарга қочган, дейди. Бошқа бирор унгурнинг ичидаги қолиб, кўкка фойиб бўлган, дейди.

Ўғуз хон ўз-ўзи билан сўзлашгандек: «Муқаллас тошнинг ўғирланиши мени бу қадар ёндирамаган эди. Зотан, Ота Мағорада Тангри тамғаси қўриқланарди. Шунинг ўзи бизга кифоя эди. Бироқ энди барчаси йўққа чиқди. Ер фарзандининг Тангрига, Улуғ Кўкларга олиб борадиган йўллари бекилди, ўтмишимизнинг калитини йўқотдик. Бу миямизнинг калитини йўқотдик демакдир. Тангрига уланган тилимиз кесилди. Ҳамма нарса тамом бўлди. Алам туркка, алам бизларга!» деди.

Иккинчи бўлим

БУЮК КУЧИШ

Юриш бошлашдан аввал Ўгуз хон улус беклари, қўшин бошлиқлари, оқсоқоллар, эл донишманлари иштирокида бир йифин ўтказди. Босиб ўтажак йўллари ҳақида кўп гапирган эди. Энди эса сўнгги топшириқларни бермоқда эди:

— Беклар! Эл-уруғим, будуним! Ой тўлишганда ҳозиргача кўрган юришларимизнинг энг қийинига, юрган йўлларимизнинг энг узунига отланмоқдамиз. Қўшниларимиз Кунботарда бизга тинчлик бермай келаётир. Қурғоқчилик ерларимизни кулга айлантироқда. Бу юртлар бизга кифоя қилмай қолди. Борадиган жойларимиз ҳам ўз юртларимиздир. Жуда қадим-қадим замонларда биз ўша ерларда туғилганмиз, ер юзининг энг қадим давлатини қурганмиз, минг йилликларининг шон-шарафини қўримоқ билан инсонга яшамоқнинг барча сирларидан сабоқ бериб келганмиз. Бу сабоқлар Ота Унгурда сақланарди. Унинг тилини фақат қамлар билишарди. Душманларимиз уларни вайрон қилди. Қам Ота гойиб бўлди. Кўк Тангри уни ҳам кўкларга олиб кетди. Кунчиқардан Кунботаргача ҳамма бизнинг қудратимиздан қўрқади. Ҳафа бўлманг, беклар! У сабоқларни яратганлар яна яратадилар. Бу юришимиз инсон фарзанди хотирасида абадий муҳрланиб қоладиган ва ер юзининг қиёфасини ўзгартириб юборадиган бир юришдир. Биз қиличимиз билан урамиз, ақлимиз билан қурамиз. Ер юзи яна бир бор бизни таниб олади. Борадиган ерларимизда ўзимизнинг наслимиздан чиқсан, тарқаб кетган, бегоналар орасида яшаб юрганлар бор. Уларнинг қулликларига чек қўйилади, юзларида табассум ўйнайди... Билиб қўйинг, бу шунчаки юриш эмас, балки бирлашмоқдир. Яхлит бўлмоқдир. Иончимизни ер юзига ёймоқ, қадимий юртларимизнинг қутсоллигига қовушмоқ, энг буюк топиноқقا эришмоқдир. Қари-қартанглар, хаста-ногиронлар шу ерда қолсин! Йўлда ортиқча юк бўлмасин. Бир бўлак қўшинимиз ҳам қолади. Учоғимизни сўндирамаймиз. Унинг оло-

вини янада гуриллатиб ёқмоқ учун кетаётирмиз. Кўк чодиримиз, қуёш байроғимиз бўлсин, эй беклар!..

Чодир фувлаб кетди. Юриш севинчидан издиҳом бўридек увлаб юборди. Сўнгра таомлар келтирилди, ичимликлар тортилди, аёқлар, соғарлар¹ тўлдирилди. Давра қизигандан қизиди. Тантананинг энг ширин нуқтасида қўқисдан икки бек чаплашиб қолди. Бир-бирларига хўroz каби теғланиб келдилар. Бу шовқин-сурон Ўғуз хоннинг қитиқ патига тегди, қўлини баланд кутарди. Талашиб қолган беклар ўрнига бошқалари воқеани унга кула-кула гапириб бердилар. Улар эт масаласида келишолмай, ўз улушларини бўлишолмай қолган эканлар. Ўғузнинг беклари хоқон шўланида ўтирадиган ўринларига, бериладиган таомга алоҳида эътибор билан қарап эдилар. Отларию зотларига муносиб ўрин кўрсатилмаса, юзларига совуқроқ қаралса, ҳатто хоқон зиёфати бўлса ҳам, ранжиб кетиб қолар, насл-насабларига муносиб таом берилмаса, емакка қўл ҳам узатмасдилар. Ҳатто хоқоннинг оғзидан чиқса ҳам, ҳақсиз сўзга чидай олмас, миннатни кўтармасдилар. Бу бир синов ери эди. Дастурхон атрофига ўтиридиларми, беш кишининг овқатини емасдан турмас эдилар. Қисқаси, юришлардан олдин ҳам, кейин ҳам бўкканча еб-ичишни хуш кўрардилар. Бундай шўланларда ерга ёзилган дастурхонлардаги таом учун тортишиб қолишлари одатий ҳол эди. Бундай тортишувлар Ўғузни хафа қиласин. Бу гал ҳам баланд овозда деди:

– Бунга бир йўла чек қўяйлик. Бекларга ҳар қандай хатар нафсидан келади. Мен юришларга иштирок эта бошлаганимда ёнимда эндингина йигит ёшига етган йўл дошларим бор эди. Энди уларнинг ҳар бири бир элбеги, уруғнинг каттаси бўлди. Сурувларининг сон-санофи, оттуяларининг ҳисоби йўқ. Кунлари бизнинг дастурхонга қолган эмас. Хоқон ҳузуридаги зиёфат бир таомилдир. Йўқса ўз чодирларингизда ҳам тотли емакларингиз ошибтошиб ётиби. Бу ер, албатта, тиланчи дастурхони эмас, хоқон меҳмондорчилигидир... Бундан сўнг дастурхонимиздаги улуш ҳам топиқ-курбон этининг улуси қаби бўлади. Ҳар киши ўз ўрнини, ўз улушкини билсин. Йўқса бекларимизнинг қорин-қурсоқ низолари тугамайди.

¹ Аёқ, соғар – май қадаҳлари

Құноқлар қаҳқача чекдилар. Кимдир ойдинлик кирилди:

— Биз қорнимиз учун эмас, қадримиз учун тортишамиз, Улуғ хоқон!

Яна күлгі күтарили.

Шу тариқа хоқон шүлани тартибга тушди, хоқон ҳузурида, сарой йиғинларида ҳар бир кишининг үтирадиган ўрни, емак-ичмагига аниқлик киритилди ва тасдиқланди.

* * *

Үтовлар бузиб-йифиширилган, наматлар, чиғлар түпленаб, оти борнинг отига, туяси борнинг туясига, хачири борнинг хачирига ортилган эди. Аравалилар кечадаёқ нарсаларини ҳозирлаб қўйишган, энди эса арава устида мудраб үтирадилар. Ит йилида, эрта баҳор саҳарлаб карнайлар чалинди, туялар бўкирди, отлар кишинади, қўй-қўзиларнинг маъраши одамларнинг бақир-чақирига қўшилиб кетди, ўн минглаб кишиларнинг кўчиши-юриши бошланди. Бу бир неча минг йил давом этадиган келажак тарихнинг ибтидоси эди...

Қадимий анъаналарга кўра турклар юришларни қишиларидан бошлашар, жанг-жадаллар баҳорга бориб якунланар, баҳорнинг ўртасида қурбонлик қилинап, сўнгра жонли хилқат оғушига, бир-бирларининг, қариндошуругларининг зиёратига боришар, шод-хуррамлик билан яйловларга чиқиб кетар эдилар. Туркнинг тоғ билан қовушиб, тоғдан айрилишида тил билан изоҳлаб бўлмайдиган, юракларни ўртаб юборадиган бир ҳаяжон, минг йиллардан бери яшаб келаётган ажиб бир сир, изтироб, ҳаётнинг абадий давом этажагидан масрурлик, кўз очиб юмгунча ўтиб кетадиган умрдан ҳасрат, Тангри билан Азройил оралиғида қолган инсоннинг ўт-ўланга, гулга, чечакка, баҳорнинг ёмғирига, чаманнинг шабнамига, кукнинг туманига, дўлларига битмас-туганмас бир эъзози, эътиқоди бор эди.

Туркнинг топинадиганларидан бири ҳам тоғ эди. Тоғ уни ҳимоя қилиб, ўлимлардан асраб қолгани учунми, юксаклиги, қўкларга, Тангрига яқинлиги учунмикан? Ким билсин... Бу жуда қадим замонлардан келаётган пардали бир сир эди...

Узоқ давом этадиган юришларда буюк кўчни доимо

назоратда сақлаб, емак-ичмагини етказиб бериш, хаста-беморларини парваришилаш, тартиб-интизомни сақлаш жуда қийин эди. Шу боис күч уч-беш минг кишилик ўқларга бўлинар, ҳар бир киши ўз уруф-аймоғи, насли, овулдошлари сафидан жой оларди. Дунё яралгандан бери ҳеч ким бу қадар катта бир элнинг бир ердан қўзгалиб, шунчалик тартиб-интизом билан шу қадар узоқ йўлга чикқанини кўрмаган эди...

Аввал хоқонликнинг олтин найзали, олтин тикишли алвон байроби ҳилпирав, кўкка юксалар, шуъласи Кунчиқарда ял-ял ёнарди. Ўгуз хоннинг фил суюгидан ясалган, қимматбаҳо дур-инжулар билан безатилган, тuya қўшилган араваси байроқ остида шай турарди. Ўгуз хон кўч билан олиб юриладиган олтин тахтга фақат сафар узоқ давом этадиган пайтлардагина чиқарди. Қолган кунларни от устида ўтказар, олдига келганларни от устида эшитар, ёрлигини от устида берар, улусга ҳам от устида туриб хитоб қиласарди.

САНДИҚ

У тағин от устида, қўнгли файзиёб эди. Юзта қулоғуз, яна бир қоровул бўлиги от устида саф тортиб олдинда турарди. Кутиш сонияларида ўзларининг ҳам, отларининг ҳам донг қотиб туришларидан тош ҳайкалларга ўхшаб кетардилар. Уларнинг ортида қўшин чолғучилари саф тортган эди. Олтин ва кумушдан ҳал берилган карнайлар, до-вуллар, сурнайлар тонг ёруғида сокин тун зулматини қувиб юбормоқда эди. Юришга шайланган Ўгуз хон севимли олапочасининг устида эди. Роса ўнта шунақангি олапоча, ўнта бўз от унинг тасарруфида эди. Бири толиққанида иккинчисига миниб оларди. Йўл мاشаққатли эканлигидан хоқонлик хазинасининг араваларига туялар қўшилган эди. Ундан кейин ҳар бирида ўн мингтадан суворий бўлган икки бўлук саф тортган эди. Ўнг томонда тонг ёфусига ўхашаш бўз отлар жойлашган эди. Унинг сардори, бўлук бошлиғи Услу Хожанинг ўғли Эрдам эди. Сўл томондаги қор каби оппоқ отлар бўлугига Хонтемирўғли Тўғон бошлиқ қиласарди. Ортда хол-хол чавкар отлардан иборат тағин икки бўлук бор эди. Унинг орқасидан улус саф тортган эди. Кўч қўзғалганда ҳамма ана шу сафга киради.

Улус ортида олапоча отларга миниб олган Буфро хон бошлигидаги яна бир бўлук бор эди. Юриш бошланадиган тунда Услу Хожа ўғли Эрдамни бир чеккага тортиб деди:

— Ўғуз хоннинг юришда кечикканларга, ортда қолганларга тоқати йўқ. Шунинг учун ҳам «кексалар чиқмасин», деди. Йиллар давомида ҳузурида бош маслаҳатчи бўлган Улутуркни шу боис сафга олмади. Менга ҳам: «Сен қол! Олис йўл мاشаққатига чидай олмайсан. Кутлугнинг ўлими сени букиб қўйди, кўз олдимда ўлиб-нетишингни истамайман», — деди. Бу гапи тўғри. Мен Кутлугни бу ерга қолдириб кета олмайман. Сиз менинг икки қанотим эдингиз. Бири қайрилди. Сендеқ ёлғиз қанотим билан уча олмайман. Бироқ энг мард йигитлар ҳам ўлимдан қоча олмайди, шунинг учун биз ҳам сизлар билан бирга кетамиз. Юришда, ёт, нотаниш йўлларда сизларга маслаҳат берадиган кишилар керак бўлади. Ўтиб бўлмас йўлларга, ечиб бўлмас тутунларга дуч келасиз. Шунда кекса, тажрибали кишиларни излаб қолсангиз, кимни топасиз? Турк хоқонлари ўжар бўладилар. Ўзларини ҳамма нарсани биладигандек тутадилар. Ер юзида жумбоқлар, хоқонлар билмайдиган нарсалар жуда кўп, ўшаларга дуч келиб қолсангиз нима бўлади? Уларни айбламайман, Тангри шоҳид, балофатга етар-етмас юришга отланадилар, жанг-жадалларда барча саволларга уларнинг битта жавоблари бор: билак кучи... Аммо қўл билан, билак кучи билан ечилидиган тутунлар ҳам бор...

Тафаккур, зеҳн-идрок отдан ҳам югурикдур... Учган күшни тутса бўлади, айтилган сўзни тутиб бўлмайди. Кўчда гап биладиган, сўздан сўзнинг фарқига борадиган, ёғийлар билан мулоқот қила оладиган кишилар ҳам керак бўлади. Йўл айрилишида йўргалаб қолган эмас, тўғри йўлни танлаган ютиб чиқади, тўғри юрганинг йўли қисқаради...

Отаси бу гаплари билан Эрдам бекни ишонтириди. Бироқ нима ҳам қила оларди у? Эрдам Ўғуз хон билан бирга улгайиб, барча юришларда бирга бўлган эди. Унинг амрига қарши боришни истамасди. У билан кенгашмай туриб отасини бирга олиб кетолмасди.

— Сени олиб кета олмайман, ота, — деди у. — Юриш низомини қандай қилиб бузаман?

— Иш хайрли тугашини хоҳласанг, жонинг хатарда

қолса ҳам буни қилишинг керак! Йўлини мен айтаман. Сандиқлардан бирига түшак сол, нон-сувимни ёнимга жойла, сандиқни туяга юкла. Асқотиб қоламан... Бунинг устига, кеча тунда Қутлуғ билан онангдан туш кўрдим. «Эрдамни ёлғиз жўнатма, энди сен бизсиз қолган бўмбўш юрга эмас, унга кераксан», – дедилар. Уларнинг бу гапидан сўнг қандоқ қилиб бу ерда қоламан? Ё мени тириклай ерга кўм, ё бу сандиқقا солиб олиб кет. Билиб қолиб, бошингга келсалар, «отамнинг ўлигини олиб кетяпман», дейсан.

Унинг охирги сўзлари Эрдамни гангитиб қўйди. Энг катта сандиқقا түшак солди, отаси бу ерда bemalol узаниб ётар, истаса ўтира олар, кичкина тешиклардан йўлларни кузата биларди.

* * *

Қадимий карвон йўли дарё бўйидаги толзорлар, тутзорлар орасидан ўтади. Дарёнинг Орол кўлига қуишига оз қолганда ўнгта бурилиб, жарликлар оралаб чексиз-чегарасиз даштларга, ерли халқ тили билан айтганда қовуга ўрлаб кетади. Маҳаллий аҳоли Чиндан то Қазилиқ тогига қадар узаниб ётган, орада тоф силсилалари билан кесилган бўлсада, умуман яхлит бўлган, ернинг бир юзини қоплаб ётган чўлларнинг ҳаммасини «қову» деб атарди. Балки бу қувмоқ маъносидадир. Инсон отни, ҳаёт инсонни, қум бўронлари эса ҳамма нарсани олдига солиб қувиб юрадиган бу саҳроларда бундан-да яхшироқ ном топиш мумкинми, ахир?

Ернинг, ҳаётнинг янги даври ана шу кўчишдан бошланган эди. Ҳали тонг оқармай туриб эл оёққа турган эди. Сўнгсиз далаларни сутга чўмдирган сигир елини каби тўлин ой уларнинг бошига ёғду сочиб турарди. Булутсиз самода юлдузлар маржондек тизилиб турар, кеча ва қундуз бир-бирини қувиб айланар, кунчиқардан эсаётган майин тонг ели ёвшанли чўлларда ҳаёт яралгандан бери янграб келаётган эзгин бир қўшиқ куйлар эди.

Саҳарлаб кўч олдида кетаётган кўзчи от суриб келиб, хоқонни қуршаб кетаётган алплардан бири орқали унга бир хушхабар етказди:

– Тангри биз билан! Юришимиз зафарли бўлажак. Бўз бўри бизга йўл кўрсатмоқда.

Ўуз хон отини қоровул дасталари орасидан ёриб илгари чиқди. Чиндан ҳам күчнинг олдида, бир ўқ етгулик масофада чўл рангидан деярли фарқ қилмайдиган арслон каби ёлдор, семизликдан бели бир оз майишган, қарийб хачирдек келадиган бир бўз бўри ўқтамлик, дадиллик, осойишталик билан юриб борарди.

Ортдан келаётган бу қадар улкан кўч, қўшин, ерни титратиб бораётган эл-улус унинг парвосига ҳам келмасди. Зотан, ушбу дақиқаларда у улуснинг бир аъзоси каби олдинга тушиб йўл кўрсатаётгандек, уларга зафар тилаётгандек, «эл қаерда бўлса, мен ҳам ўша ердаман», деяётгандек туюларди.

Ўуз хон қўлларини кўкка кўтариб Тангрига шукrona айтди:

— Эй бутун яранмишларнинг маҳрами, кўнгилларда юксалган, ичимни ишқ нури билан, тилимни гўзал сўз билан безаган, қимиrlаган ҳар жоннинг, ҳар жонзотнинг раҳнамоси бўлган Улуф Тангрим! Мовий самоларни безаган, ўнг мингларча юлдузни, қоп-қоронги кечани, ёруғ кундузларни равшан этган Тангрим!

Сенга суюнаман, сенга ҳамду санолар айтаман!

Бутун амаллар, бутун илмлар, бутун йўллар ўзингта аён!

Бутун сир-асрорларни ўзинг ошкор этасан. Бутун юришларга чақирадиган ҳам ўзинг!

Сенга топиндик, сенга инондик, сенга сифиндик. Бизни тўғри йўлга, зафарга бошла! Англатувчи ўғон Тангрим!¹

Бизни яратган, улгайтган, кечирувчи Улуф Тангрим! Хоқонлар хоқони, Буюк Тангрим!

Шу пайт Ўуз хоннинг сўзини эшиштан қаби Тангри кунчиқишга ўт қуйиб юборди. Булутлар ўт олиб ёнди. Кўзга ташланган нимаики бўлса, миллион йиллардан бери бузилмай келаётган бир интизорлик сукунатига чўмди: чўлнинг олис уфқларида қуёш чарақлади.

Ўуз хон отининг бошини Кунчиқарга буриб, уч бора қулини кўксига қўйганича қуёшга таъзим қилди.

Бутун қўшин ҳам, кўч ҳам буни такрорлади. Карнайлар янгради. Бўри увлашига ўхшаш бир саломлашма тўлқини кўч устидан бўрон каби гувлаб ўтди.

Хозиргача сассиз-садосиз келаётган улус кун туфиши

¹ Ўғон Тангрим — қодир Тангрим

билан жонланди. Янги қүёшни қаршиламоқ. Ўғуз элининг жуда қадим-қадим замонлардан келаётган удумларидан эди. Кўчда юриш пайтида уч бора, ўрдада ўтирганда тўқиз бора, пиёда, от устида, умуман қаерда бўлсалар ўша жойнинг ўзида ерга бош эгиг, тиз чўкиб қүёшни қаршилар, сўнг шовқин-сурон билан унга олқиши айтардилар. Қўлларида бирор нарса бўлмаса, тошни тошга урас, кўкракларига муштлаб, келимли-кетимли, ўлимли дунёда ҳар куни янгидан туфилган, тозаланиб чиққан Қуёшнинг мангу, абадий эканлигига ўз шодликларини билдирар эдилар.

От туёқларидан ер зир титрарди. Гўё фақат биргина улус эмас, балки ернинг бу юзи нариги юзига кучаетган-дек эди. Ўтроқ кунларнинг турғунлигидан зериккан ҳар бир кимсанинг юзларида кун нури билан қонларини кўпиртириб юборган қадимиий бир туйғудан, минглаб йилларнинг анъанасидан туфилган бир севинч ҳам бор эди.

Битмас-туганмас жанг-жадаллар, юришлар, ер юзининг савдо-карвон йўллари зимдан ҳар нарсани ўз тартибиға соглан эди. Ҳар уруғ, ҳар овул ўз ўрнини биларди. Олдинда ёш йигит-қизлар борар, толиққанларида болалар, она-лар ўтирган араваларга тирмашиб чиқиб нафас ростлар, сўнг яна тенгдошларига қоришиб кетардилар. Ҳар бир уруғ, ҳар бир овул ўз мол-ҳолини, ўз сурувини ҳайдаб борар, алмаштириладиган отлар аравага қўшилган ўз шеригига қараб-қараб қўйганича одим ташлар, эркаклар ўз хотинлари билан ёнма-ён от суриб борардилар. Йўқсулроқ хона-донларнинг соҳиби хотинини ортига мингаштириб олган эди. Минглаб, ўн минглаб уй, хонадон, уруғ, қабила, тоифа, эл-улус ана шу тариқа бир ерда яшаб, бир маромда нафас оларди. Ҳар хонадоннинг ўз сигири, қўйи, хачири, оти, эчкиси, ити, мушуги, ёши, кексаси бор эди... Аммо ҳамма айтилмаган, ёзилмаган бир амрга бўйсунар эди. «Олға!» Ҳамма бу кўч, бу юришнинг муқаррар эканлигига ишонар эди. Шунинг учун ҳам Ўғуз кўчларида тасавурга сифмас бир тартиб-интизом бор эди. Йўлга чиқишдан аввал ҳамма ўз иши билан машғул бўлар, бирор бирорвга ха-лақит қилмасди.

Ўғузга таянч бўлган уйғурлар билан ёнма-ён кангарлар, қирғизлар, қарлуқлар, қипчоқлар, қора татарлар, оз эрлари илгарилаб борарди.

Бу күч жуда қадим замонларда ота-боболари келган йўл билан ортга қайтмоқда эди. Буни Ўғуз хондан, Услу Хожадан бошқа ҳам биладиган бормиди? Зеро бунинг аҳамияти ҳам йўқ, у кунларни ўзлари унуган бўлсаларда, ирсий хотиралари унугман эди.

Юриш ҳавоси эл ичида тил билан ифода этиб бўлмайдиган, аммо юракларни орзиқтирувчи, эзгин, лекин чекинилмас бир вазият яратади. Одамлар бир-бирига янада яқинлашади, ўпка-гина, кин-кудуратлар унутилади.

* * *

Амакиваччалари айбларини бўйинларига олароқ қайтиб келиб элга қўшилганларидан бери алоҳида бир овулда яшамоқда эдилар. Шу қадар кўп яқин кишиларини, хоқон амакиларини, оталарини йўқотганларидан сўнг бутларнинг синдирилиши, эски инончлар тақиқланиб, Кўк Тангрига топинишлари уларни аввалгидек газаблантирамай қўйган эди. Болаликдан ўзлари жуда ёқтирадиган, номидан, мардлигидан фуурланиб келганлари Ўғуз хон уларнинг ўчоқларини сўндирган, уругнинг қанчадан-қанча алп йигитларини, оқсоқолларини ўз йўлига қурбон қилган эди. Уларни ана шу нарса азоблантиради. Бошқалар билан бирга ўлиб кетмаганларига афсусланар, эл ичида ўзларини бегона, камситилган ҳис этардилар. Зотан, бунга чидамоқдан ўзга најот йўли ҳам йўқ эди. Ҳар қанча қаттиқ ранжиган бўлсалар-да, сабр-тоқат энг тўғри йўл эканлигини англар, Ўғузга қарши чиқа олмас эдилар. Унинг навбати келган, юксалган пайти эди. Холиқ юксалтиrsa, маҳлуқнинг қўлидан не келарди?

Ўғуз хон қон-қариндошлари ўзи билан бирга эканлигидан севинса-да, амма бу бирдамлик ихтиёрий эмаслигини яхши англарди. Уларнинг бошқа танлайдиган йўллари қолмаган эди. Элга қайтган бўлсалар-да, терсайиб олган эдилар. Ўғуз хон бу терсайишнинг боиси фақат оталарини йўқотганликларидан, тўкилган қонлардан эмаслигини, улар Ўғузни кечира олмаётганликларини, ич-ичдан у билан муроса қилмасликларини савқи табиийси билан ҳис этар, Тангри унга ато этган сирли бир нигоҳ билан уларнинг кўнглини ўқиб турарди. Бироқ эл-юрт бирлиги учун буни ошкора этмас, сабр билан кутмоқда эди. Бу кутиш

охир-оқибатда катта жароҳатлар, улкан йўқотишлар келтиришини билар, лекин барибир кутарди... Бу қўйнингда илон асрашдек бир гап эди. Ҳар лаҳза хушёр турмоғи, ўзини эҳтиёт қилмоғи лозим эди. Буни Ойтож хотунга ҳам айтган эди. Аммо аёл соддадил эди. Амакиларининг қизларини гўдакликдан опа деб биларди. Уларнинг аввал душманга айланиб, сўнгра янгидан унинг ҳузурига қайтиб келишларини Тангри иродаси, қочиб бўлмайдиган, ўзига боғлиқ бўлмаган бир тақдир деб билар, бунда ўзини айбламас, ҳеч кимга озор бермас, ўзини ҳам озор етган деб ҳисобламасди. Орадан йиллар ўтиб кетган эди. Амакиларининг қизлари ўз тароватларини, гўзалликларини асраб қолган бўлсалар-да, ўтган кунларнинг аламлари юракларида, уни ҳеч унута олмасдilar. Бу хотиралар оғир, аламли эди. Ойтож ҳам бу хотираларни унута олмаса-да, лекин янги fabғолар келиб чиқишини кутмасди. Бону билан Тарчечак унинг қўлини ўпиб, ўз қаноти остига олиши, Ўғуздан ҳимоя қилишини ёлвориб сўраган эдилар. Ойтож бу аҳволда уларга йўқ дея олмасди. Бону билан Тарчечакнинг гапига кўнди. Шундоқ ҳам йўл азоблари, юришлар уни ҳолдан тойдирган эди. Ўғузни, ўғлонларини ўйлаб юраги эзиларди. Шундай дамларда амакиларининг қизлари билан овуниб енгил тортарди. Дастрлабки пайтларда Бону билан Тарчечак унинг бу меҳр-муҳаббатидан таъсиrlаниб кетиб, рўй берган қонли жангларни, жудоликларни унутиб, қолган умрларини эл-юрт ичида, илк ва охирги эрларининг, ҳозирги хоқоннинг кўлкасида ке chirмоқчи, бу чалкаш йўл орқали, эҳтимол, илк муносабатларини тиклаб олишни истардилар. Бироқ Ўғуз хон кечаю кундуз тиним билмасди. Кети узилмаган жанг-жадаллар, юришлар билан бўлиб, ажрашган эски хотинларига қайтиш фикридан йироқ эди. Ойтожни чин кўнгилдан севар, хаёлида ундан бошқаси йўқ эди.

Бону билан Тарчечакнинг ичини ёндирган ўт сўнмаган эди. Бу қандай ўт эди? Хоқоннинг уларга эътиборсизлигими ёки оталарининг хунини олмоқقا даъват этувчи ёвуз ваҳшийликми?.. Буниси номаълум эди... Анифи – Бону билан Тарчечакнинг ичларида ўч олмоқ истагининг кундан кунга алангаланиб бораётгани эди.

* * *

Саҳро, адоқсиз йўллар, юришлар, омонсиз жанг-жадаллар кишилар жанговарлигини оширса-да, ёши қайтиб, қиличини камаридан ечганлар орасида темирчи, қуроляроф усталарининг, эмчиларнинг¹, аравасозларнинг, эгарчи, тўкувчи, пўстиндўз, этикдўз, гиламдўз, довулчи, тамракчи², кўнчи, очари³, ядикчи⁴, дубулгачи, тариқчиларнинг⁵, умуман эл-юрганинг кундалик юмушларини ўтамоқ учун ҳамманинг ўз ўрни бор эди. Йўлда учрайдиган қийинчиликлар, машаққатларни енгиб ўтиш учун ҳам ҳар уруғ, ҳар овулнинг ўз усталари етишиб чиқар эди.

Овчилар, афсунгарлар, фолчилар, ромчилар, мунажжимлар, курандозлар ҳам улус орасида айрича ўринга эга одамлар эди.

Қўл, юз ёки қумга боқиб фол очувчилар, башоратчилар, афсунгарлар, жангда душман йўлини бўрон, қор, ёмғир, олов билан тўсадиганлар, ғанимни йўлдан адаштириб тузоққа туширадиганлар кўч, жанг арафасида жонланиб қолар, кўшин бошлиқларининг, хоқон саройининг эшигидан оёқ узмасдилар. Ҳатто Ўғуз хоннинг ўзи ҳам жангдан олдин ромчиларнинг оғзига қарап, юришнинг зафарли, ўлжанинг мўл бўлиш-бўлмаслигини сўраб кўради.

Сувсиз чўлларда чодирларга кирадиган, юклар орасига бекиниб оладиган илонларни афсунлаб тутадиган, жуда хилма-хил номлари билан болалар учун даҳшатга айланган бу «чақирилмас меҳмонларни» кўлида бемалол ўйнатиб юрадиган афсунгар Кункўр Илонўғлини кунларнинг бирида Бонунинг ҳузурига чақириб қолишиди. Чодирга илон-пилон кирган эмас, йўқ, Бону уни чодирдан анча нарида, юлғун буталарининг остида кўрган, кўрган заҳоти юрагига ваҳима тушган эди. Негадир бу илон мени чақиш учун келган деган ваҳимадан кутула олмасди у. Ўтган кечаси ухлаёлмай чиққанди. Илон қоронфилик тушиши биланоқ менинг чодиримга ўрмалаб киради, бошқача бўлиши мумкин эмас, йўқса нега бу ердан нарига кетмаяпти?!

¹ Эмчи – табиб

² Тамракчи – ўқ учини ясайдиган уста

³ Очари – муаллим

⁴ Ядикчи – йўл асбоб-анжомлари, қурол-яроф тузатадиган уста

⁵ Тариқчи – сарой жарчиси

Кўзини юмиши биланоқ чодирнинг кўзлигидан¹, туйнугидан, чиглар орасидан илонлар ўрмалаб чиқаётгандек, совуқ айри тиллари билан унинг юзларини ялаётгандек бўларди гўё.

Қисқаси, илон чодирга эмас, унинг миясига кириб олган, у ердан эса чиқиб кетгиси келмасди. Афсунгар унинг сўзларини тинглар экан, кулиб юборди ва:

— Бу бир қорабосма², ҳамма ҳам бу ҳолга тушиши мумкин. Йўқса, сен илонга тегмасанг, у ҳам сенга тегмайди, — деди.

— Сенга ишонаман, бироқ миямдан ҳеч чиқаролмаяпман уни... Болалик пайтларимдан илондан қўрқаман. Унинг тирик ё ўлигини ўз кўзим билан кўрмасам, чидай олмайман...

— Тиригини ҳам кўрасан, ўлигини ҳам, — деди афсунгар Кункўр ва чодирдан чиқиб илон яшириниб ётган юлгун буталари сари борди, бир неча буталарни оралаб юрди, тиз чўкиб, у ердаги барча тешик-туйнукларни қараб чиқди, ниҳоят, важоҳатидан ўтакани ёриб юборадиган катта-кон илоннинг бир қули билан бошидан, бир қули билан белидан тутганича чодирга кириб келди, Бонунинг кўз олдидагачунтагидан бир идиш чиқарди-да, илоннинг тишларини унга босиб заҳарини олди:

— Мана қарагин, унинг жони шу заҳаридаги эди! Энди ҳеч корга ярамайдиган ожиз бир нарсага айланди, — дея бўғиздан сиқиб ўлдирди-да, чодирдан нарига отиб юборди.

Шундан кейингина Бону ўзига келди. Кункўрга қараб ниманидир хаёлидан ўтказар экан:

— Афсунчи, нотаниш бир йўлга чиқдик. Қаршимиздаги душманларнинг ҳам кимлигини билмаймиз. Жангларнинг қандай натижа билан тугаши ҳам номаълум. Ўзим билан олиб юришим учун шу заҳарни менга бер, — деди.

Афсунгар чунтагидан аёлларнинг атир соладиган кичкина олтин қутичасини чиқарип унга узатар экан, деди:

— Сени тушунаман, бекам! Ўқдан, қиличдан ҳам ўткирроқ бир қурол бермоқдаман сенга. Бир лаҳзада тамом қиласди.

¹ Кўзлик — туйнук, дераза

² Қорабосма — ваҳима, восвослик

* * *

Ойтож Бону билан Тарчечакни яна қувонч билан қарши олди. Узок, мاشаққатли йүлларда ахён-ахёнда бир насиб этадиган ҳордиқ дақиқаларида еб-ичишдан, бир-бирла-риникига бориб-келишдан ўзга нима ҳам қиласылар?

Сұхбатнинг шириң ерида Ойтожнинг кенжә ўели Юл-дузхон чодирга кириб онасининг құлини ўпди:

— Отам акаларим билан мени овга олиб бормоқчи. Энди кичкина эмасман.

Ойтож уни бағрига босиб:

— Овинг бароридан келсин, жигарим, бора қол, — деди.

Юлдуз чодирдан чиқиб кетгач онаси:

— Ё Тангрим, Юлдуз ҳам овга борадиган бўлиб қолди! — дея Бонуни қучоқлади. — Гүё кечагина түққандайман. Қандай қилиб шунча йиллар ўтиб кетди? Қачон улғая қолди у?

Бону ичидаги ҳасадни яшириб:

— Тангри ўз паноҳида асрасин! Ҳар бири бир қўшинга бас келади ўғилларинг, — деди.

Фарзандларини ўйлар экан, ҳамма нарсани унутган Ойтож олис йиллар хотирасига қайтган эди.

— Чиндан ҳам, Юлдуз Тангрининг менга ато этган инъомидир. Узоқ бир юришга чиқмоқчи эдик. Унинг неча ой давом этиши номаълум эди. Янгидан ҳомиладор эдим. Юришга бу юк билан қандай чидайман? Ўғуз хонга малол келтирмайманми? Билмасдим. Мен ҳомиладорликни қийин кечирардим. Бу бола туғилишини истамасдим. Сарой фармонбардорларидан донишманд бир қария: «Ит сути ич, мушкулинг осон бўлади», — деди. Ё Тангрим, нақадар билимдон эди у. Қадимда аёллар бола кўришни истамаганларида чотларида арслон ўтининг уругига ўхшали билдирилди. Унинг тутунидан ҳомилани ўтказар эканлар. Бир кундан сўнг қария ит сути топиб келтириди. Тангрининг ишларига қаранг, гүё Ўғузга кимдир ҳаммасини сўзлаб бергандек эди. Ҳолбуки, ҳомиладор эканлигимни унга билдиримаган эдим. Бироқ у юзларимга боқиб туриб: «Учинчи ўғлимнинг отини Юлдуз хон қўймоқчиман, — деди. — Тангри бизга учинчи ўғилни ҳам ато этади». Шундан сўнг болани тушира олармидим? Мана энди куриб турибсиз, йигитларга қўшилиб турибди...

Емаклар ейилди, ичимликлар ичилди. Бону билан Тарчечак туриб кетдилар. Бир оздан сўнг чодирида ёлғиз қолган Ойтож тўлғаниб кулча бўлиб қолди. Пешонасини совуқ тер босди. Ранги оқарди, кўнгли ағдарилди. Ерда думалай бошлади. Хизматкорлар унинг овозини эшитиб кириб келгандаридага аёлнинг ерда илон каби тўлғаниб ётганини кўрдилар, ёнида эса заҳарини солгандан сўнг ҳолсизлануб қолгандек бир илон ҳам ётарди, улар ўзларини йўқотиб қўймай илоннинг бошини янчдилар, бу ишни шу қадар узоқ, узун бир хода билан илонни ура-ура амалга ошириларки, илоннинг илгаридан бўғиб ўлдирилганини ҳам сезмадилар. Сўнгра сарой эмчисини чақириб келдилар, бироқ унинг ҳеч бир даво-дармони кор қилмади. Ўғуз хон ва ўғиллари овдан қайтар экан, аёллар, сарой хизматкорлари уларни соч юлиб, юз тимдалаб қарши олдилар. Ойтож ўлган эди!.. Уни илон чақиб ўлдирган эди...

Бу ўлимга ер титради, осмон бўзлади, ялт-юлт йилдиримлар чақа кетди, туташ оғир булутлар чодир узра йифилиб, тўлғана-тўлғана яшинлар чатнади...

Ҳатто отасининг жудолигидан ҳам гангиб қолмаган Ўғуз хон бу гал тиз чўкиб ўғилларини қучди. Уларга қўшилиб ҳўнг-ҳўнг йифлади.

У тақдирнинг бу оғир жудолигидан ўртанар: «Тангрим, энди нима қиласман, йўл кўрсат менга!» дер эди.

Юриш яна тўхтади. Аёлни дафн этмасдан йўлга чиқа олмасдилар. Айтимчилар келишди. Хотинлар ёқа йиртиб йифлар эдилар. Эл-улус йифилди. Кексалар Ўғуз хонга юзланиб: «Аёлинг ўлди, очунни қолдириб, кўчиб кетди. Энди сен омон бўл, умринг узоқ бўлсин! Насибанг кам бўлмасин!» – дедилар.

Эл Ойтожни севарди, Ўғузнинг барча зафарларида, қабул қилган тўғри қарорларида бир томондан у билан ёнма-ён туриб хукм чиқарган Ойтожнинг ҳам ҳиссаси борлигини билишарди. Хайрлик билан бошланган бу юришда шундай аёлни йўқотиб қўйганликлари ҳаммани ғамга ботирган эди. Бу азалик-жудолик билан бошланган юриш Тангрининг «Ушбу йўл сизга зафар келтирмайди, воз кечинг бу юришингиздан!» деган ишораси эмасми-кан? Лекин Ўғуз хон йўлдан қайтишни хаёлига ҳам келтирмасди... Етти кун мотамзадаларнинг, айтимчиларнинг овози тинмади, кўз ёшлари сел бўлиб оқди. Еттинчи кун

жасадни кейинчалик Хотунтепа дея ном олган бир ерга дафн этдилар... Ҳар киши бир сиқимдан тупроқ ташлади, каттакон бир тепа ҳосил бўлди.

Ўғуз хон тепага қараб, кўрайлик-чи, не деди экан:

Оқу қора тоғлар ошиб толмагандим, толдирдинг мени.

Қонли-қонли жанглар қилиб ўлмагандим, ўлдирдинг мени.

Жазирама чўллар кечиб ёнмагандим, ёндиридинг мени.

Қора Шимол совуғида сўлмагандим, сўлдирдинг мени.

Уч ўғил бериб мени бойитган, элдан айрилсам мени айбситган элатнинг онаси, инончимнинг нишонаси, хонадонимнинг ўзаги, наслу насабим безаги, кесган қиличим, учган ўқим, кўкка юксалган байробим, хотиним-ҳей!

* * *

Ойтожни заҳарлаган, боши ээйлган илонни Ўғуз хонга кўрсатган эдилар, бироқ у негадир хотинини илон чаққанига ишонмасди. Ойтож қўрқоқ аёл эмас, юришларда жуда кўп илон-чаёнларни кўрган, ўзини ҳимоя қила оларди. Ўлимидан олдин унинг ёнига Бону билан Тарчечаклар келганини эшитганида ҳар хил хаёлларга борди. «Бир неча кун аввал Бонунинг чодирига ҳам илон кирган эмиш, уни афсунчи тутиб олган эмиш», – дедилар... Бу ерда қандайдир бир алоқадорлик борга ўхшарди... Ўғуз бу ногаҳоний ажалнинг қайдан келганлигини сезган эди... Бироқ шубҳанинг ўзи билан ҳукм чиқариб бўлмас, Бонуни, Тарчечакни, афсунчини, хизматкорларни – ҳамма-ҳаммасини эшитиб қуриши лозим эди. Бироқ фолчининг гаплари бошқасига ўрин қолдирмаган, унинг шубҳалари тўғри эканлигини кўрсатарди. «Хотунни олиб кетган ажал илондан эмас. Унинг ёнида бекалар кўриняпти... Қотил илон эмас, инсон, сарой яқинидан ахтаринг уларни...»

Афсунчи эса аёлни чаққан илонни кўрганда қорайиб кетган, сўнг эса қатъий қилиб бундай деган эди: «Бу мен Бонунинг чодири ёнида ўлдирган илон, саройга унинг ўлиги олиб кирилган...»

Эл ичиди ўлимга ўлим удуми бор эди. Хоқон хонадонига дахл этганларнинг, ўша замон кишиларининг тили билан айтганда, кини, яъни жазоси янада оғир эди. Бу ҳукмни Ўғуз хон чиқарди...

Бону билан Тарчечак дастлаб дадил гап бошладилар: «Бизни нега айблаяпсан?»— дея сүрадилар, сұнгра хоқон хонадонига хос бир дағаллик билан: «Айбимиз йўқ экан, бизга кўз олайтирма», — дея шовқин-сурон кутардилар. Ўгузнинг бу гал ҳам юмшамаганини кўриб оёғига йиқидилар, бўйин товлашга илож қолмаганидан: «Хатолик ўтибди, қора кунга ўзимиз учун асраб қўйган заҳар очилиб кетиб тўкилганини сезмай қолибмиз», — дедилар; гапирган сари адашиб кетдилар, уларнинг қотил экани энди ҳаммага аён эди. Ўғуз хон уларни тинглагани сари азоби ортди, кўнгилчанлик қилиб уларни ўрдага киритганидан ғазабланди, уларга нафрати ошиб-тошди, чақмоқ қиличини қинидан суғуриб: «Илоннинг айби йўқ экан, сизнинг бошингизни янчмоқ лозим экан», — дея илгари юрди ва уф дегунча ҳар иккисининг бошини бирваракайига танидан жудо қилди, сўнг оёқ остида ҳамон илтижоли ётган бошларга мурдор бир нарсага боққан каби боқиб:

— Олинг, бу илонбошларни олиб чиқинг бу ердан, — деди. — Оталари тирик бўлганида, манави қанжиқ қизларининг қонли бошларини уларнинг бўйинларига осиб, бир умр кўтаририб юрардим! Улар ҳам бир илон эдилар, кўзларини тутган қон билан ўлиб кетдилар... Буларнинг бошини санчиб қўйинг Ойтож хотуннинг аравасига. Кўрган эл тупурсин буларнинг башарасига!..

Араванинг ўнгу сўлига санчилган каллаларнинг узун соchlари олислан туғларга боғланган от думига ўхшарди. Ўғуз хон ер супурган, арава филдиракларига илашиб, чангтўзонда чиркли жун арқонга ўхшаб қолган бу соchlарга, сўнгги томчи ёши қотиб қолган кўзларига боққани сайин йўлларни тезроқ босиб ўтишини, бу ўлим дақиқаларидан тезроқ узоқлашишни истарди...

* * *

Орол кўлидан баъзи ерларда чалпак каби ёйилиб, саёзлашиб оққани учун Ёйиқ номини олган Улусувга, ҳозирги Ўрол дарёсига, ундан Итил дарёсига қараб сувсиз, қумли сахролар бўйлаб жуда оғир бир йўл узаниб кетади. Фавқулодда шимол шамоллари, қум бўронлари бошланиб қолса, беш қадам нарини кўриб бўлмайди, қум баданга ёпишади, кўз-қулоқларни тўлдиради, оғзига кириб, тиш-

лар орасида ғижирлайди. Қадим-қадим замонлардаёқ бу йўллар бўйлаб қудуклар қазилган. Улар бир-биридан узоқда, икки кунлик йўл оралиғидадир. Лекин баҳор эндиғина жамол очмоқда, сувсиз чўлларга жон кирмоқда эди. Кумлоқлар яшил алангага айланган, ёвшан, тутавон каби ўт-ўланлар саҳар елларида тўлқинланиб ётар, саҳро бошдан-оёқ кумуш дengизга ўхшарди. Юлғунлар бу саҳрора ярашмайдиган даражада гўзал, нозик нофармон гулларга бурканган эди. Бош узра тўрағайлар тинимсиз сайрарди. Услу Хожа ер юзининг ўзи қадар таниш бўлган, абадиятга қадар давом этадигандек туюладиган бу сасларни тинглар, қаерга боришмасин, бу сафарга қўшилганидан шод эди. Эндиликда унинг ўзи ҳам кўқда сайраётган қушларга, тўргайларга, биқиниб ётган беданаларга ўхшарди. Бу йўллардан у неча карра ўтди экан? Ҳаёти қаердан бошланди, қаерда тугайди? Куни кеча эди-ку, ахир, унинг ҳам манави ўсмирлар каби чўллар узра от елдирғанлари, овозига осилиб олган қушлардек, отнинг учиб боришини ҳам сезмасдан, ер ва кўк орасида енгилгина, оёғи ерга тегмай қанот боғлаб учиб юрганлари! Бироқ энди бир сандиқ ичидан яширинча кетмоқда. Қаҳҳор Тангри яратғанларидан ҳеч нарсани аямайди, хоқонлар ҳам шунақа. Ёшинг қайтдими, агар юз кишининг ишини қилсанг ҳам ортиқча юкка айланиб қоласан. Ҳеч ким сени орқалаб юрмоққа рағбат кўрсатмайди. Мева қилган бўлсанг, тамом, шохларингни синдириб бўлса ҳам териб оладилар. Бироқ Услу Хожа уларнинг биринчиси ҳам эмас, охири ҳам эмас. Шунисига ҳам севинади. Бошқа қушлар учса, гап йўқ, бедана учса, «Йўл бўлсин», деган эканлар!..

Ернинг нариги чеккасига йўл олган бу кўч ўз кучини тежарди. Дастлабки кунда кун тушдан оққунича юрдилар. Сўнг қаршидан дуч келган сув бошида тўхтаб, мол-ҳолларни, отларни суғордилар, ем бердилар, бир оз ҳордиқ чиқариб, яна йўлга тушдилар. Бу чўлларнинг бузилмас анъанаси эди. Ҳар куни фақат икки марта, атиги икки-уч соат дам олар, сўнг яна йўл танобини тортар, от устида ухлар, от устида ҳордиқ чиқарарадилар.

Йўл туркнинг ҳаёти эди. Йўл тугагани – ҳаёт тугагани демак, ёки, ҳаёт тугайди, йўл тугамайди, дер эдилар. Йўл узоқ, машаққатли бўлса-да, эл-улус ана шу йўлларда минг

йиллик урф-одатлари, анъаналарини асраб келар, севишар, уйланар, туғиб-құпаяр, гұдакларини тарбиялаб во-яга етказар, мол-ҳолини, қүй-құзисини қатый бир интизом ила парвариш қилас, ғовмишини қисиридан, қүйини құзисидан ажратар, сайдар этар, низолашар, ярашар, ов овлар, бир-бирини меҳмон қилас, отини, туяси-ни асраб-авайлар, дунёдан үтганини тупроққа топширап эди. Күчнинг бузилмас низомига күра ортда қолганлар, кучдан қолиб юришга мажоли етмаганларнинг күчни тұхта-тиб туришга ҳақлари йўқ эди. Күчдан айрилган бутунлай қолиб кетар, чўл-саҳролар бўйлаб турли-туман номлар остида, овул-овул бўлиб, мангу давом этадиган бир жу-долик оғушида ушбу күчнинг, ушбу кечмишнинг жонли тарихи, ўчмас лавҳаси каби муқим яшаб қолардилар...

Шу тариқа йигирма кун юрдилар. Чўллар қурғоқчи-ликдан, жазирамадан қовжираб ётарди. Сувнинг тугаб қолгани қўчга азоб берарди. Болаларнинг лаблари ёрилиб кетган, отларнинг боши осилиб қолган эди. Араваларни отдан чиқариб тுяларга қўшган, юкларни ҳам туюларга ор-тган эдилар. Фақат туюларгина пинагини бузмас, сувнинг бор-йўқлигига парво ҳам қилмас, гўё кавшана-кавшана бўйинларини чўзганларича олис кунботар йўлларини ча-малаб кўрмоқда эдилар. Тунда Услу Хожа сандиққа эгил-ган ўғлига шивирлади:

— Эрта тушда, куннинг энг қизиган пайтида бир неча сувсаган сигир бошини бир-бирига қўтонлаб қўйинг. То ҳолдан тойгунига қадар!.. Сўнгра уларни ечиб юборинг. Ту-ёқлари билан қаерни тимдаласалар, ўша ерни ковланг! Сув чиқади...

Эртаси куни отаси айтганича қилди. Сигирлар тимда-лаган ерни, чўлнинг ўргасини қазиб кўрган эдилар, муз-дек сув отилиб чиқди. Ён-атрофда қудуқлар қазилди. Кўч, қўшин, жониворлар таскин топди. Ана шунақанги кун-ларни кечиб ўтиб, ниҳоят, Улусойнинг ям-яшил соҳилига бориб қўндилаар. Дарё бўйида яшайдиган айни уруғли ки-шилар Ўғуз хонни қарши олгани чиқдилар. Кўч номаълум муддатта ором олиш учун қароргоҳ курди, оқ чодирлар оппоқ капалаклар каби дарё бўйларини қоплаб олди.

БОШҚУРД ЙОРИШИ

Ўғуз хоннинг ўғиллари ўсмирлик даврига кирган, тенгдошлари билан от чопиш, ўқ отиш, қиличбозлиқ, найза улоқтириш каби мусобақалар ўтказиб турар эдилар. Кўллари узун Бейрак бек уларга мураббий қилиб тайинланган эди. Бейрак қўшиннинг энг машхур мергани, қиличвози эди. Йўл бўйи уч оға-ини – Кун хон, Тоғ хон ва Юлдуз хон сарой кишиларидан кўра кўпроқ кўч сафида келаётган овчи, чўпон болалари билан бирга бўлар эдилар. Эндинга ўн-ўн икки ёшга кирган бўлсалар-да, келгуси жангчи биродарларини ана шу оддий кишилар орасидан ахтариш лозимлигини яхши билардилар.

Ўғуз хон қаноти остида тўпланган кишилар ўртасида мансаб, уруғ-аймоқ, бойлик айирмачилиги йўқ эди. Йўл, қийинчилик, жанг-жадал ҳаммани бирлаштириб турарди.

Тўнғич ўғли Кун хон отасининг валиаҳди, вориси эди, низомга кўра отасининг ўрнига у чиқиши керак, фикрмuloҳазаси, куч-кудратини ҳам шунга мўлжаллар эди.

Улусув ёқасига қароргоҳ тикканларидан сўнг хоқон кўпдан бери бош эгмай келаётган, унинг элчиларини соvuқёнлик билан қабул қилган Бошқурд хони Қорашиб билан гаплашиб қўймоқчи эди. Сара суворийлар бўлуғи билан Улутогнинг – Ўролнинг кунботарида жойлашган бошқурдлар устига юриш қилди. Ярим ойлик йўлдан сўнг бошқурдларнинг Улубоқур қальясига этиб бордилар. Кузатувчилар бу қалъада ўтирган Қорашибдага Ўғуз хоннинг катта куч билан бостириб келаётганини етказган эдилар. У қалъани ишғол этиб бўлмаслигига ишониб, ташқарига чиқмасдан, келаётган қўшинни ичкарида ўтирганича кутмоқда эди.

– Келиб кўрсин Ўғуз хон, – дерди у. – Улубоқур қальаси бундай босқинларнинг кўпини кўрган.

Ўзига қолса Ўғуз хоқон у билан урушмоқни истамасди. Ярим ойлик йўлдан сўнгра отлар қуруқ, сувсиз чўлларда ориқлаб, заифлашиб қолган эди. Ўзи кетаётган бош йўлдан ўнгга, шимолга бурилиш фикри кейин пайдо бўлди. Бу ерда уни тингламаган, бўйин эгмаган қудратли қўшнини қолдириб кетиш қўйни бурига топшириб кетиш демак эди. Янгидан элчилар бориб келишди. Қорашиб кибранишига қарамасдан, жангни ютиб чиқажагига амин эмасди.

Қалъа шинагидан беш қиррали юлдуз, беш япроқли гул каби тизилиб турган, ҳар бўлути алоҳида рангда бўлган Ўғуз қўшинини кўриб ўтакаси ёрилди:

— Баҳодирларимиз жанг қилиб қўришсин. Уч киши биздан, уч киши сиздан, — деди. — Мендан биттаси ҳам етади сизга қарши...

Шарт қабул қилинди, дарвозалар очилди. Уч бошқурд баҳодири Ўғуз қўшини билан қалъа ўртасидаги майдонга чиқиб келишди. Савлатларидан от хуркар эди. Бошдан-оёқ темир либосда, темир совут, темир дубулға, қўл-оёқлари ҳам темир ичидаги бўлиб, куёш нурида ял-ял товланарди. Кўзлари ғазабдан олов сочарди. Бунинг устига бошқурд отлари Ўғузнинг отларидан анча йирик, сержун эди. Оғир, йўғон оёқлари гүё ерни тешиб турарди. Узун ёллари байроқ каби ҳилпиради.

Ўғуз қўшинининг таомили бошқача эди. Жанг олдиндан от ёлини қисқартиришар, қиличга илашмасин дея думини кесар ёки тутиб олар эдилар. Отнинг ёли, думи боис ҳалок бўлганларни кўп кўрган эдилар. Биринчи бошқурд баҳодирининг қаршисига Ўғуз томондан жанг қоплони Қорачўнга ўғли Азмон бек чиқди. Бошқурд баҳодири гурзи билан бир уриб унинг бош узра тутган қалқонини бoshшига кийдириб қўйди. Бекнинг бош суяги эзилиб, юзига қон оқди ва йиқилиб тушди. Қалъанинг сурлари янгради. Ўғуз хоннинг ранги оқариб кетди.

Иккинчи бўлиб уйғур паҳлавони Диб Шансу ўғли Бурон бек майдонга чиқди. У тифдор найзаси билан бошқурд баҳодирини отдан афдаришга уринди. Найза совутга илашди, бошқурд баҳодири найзани майда-майда қилиб ерга отди.

Ўғуздан учинчи баҳодир ҳам енгилса, жанг ютқизилган ҳисобланарди. Услу Хожанинг ўғли Эрдам бек Бошқурд юриши арафасидаги тунда отасининг яширинча айтган сўзларини эслади: «Бошқурд йигитлари кучли, лекин ўзлари ҳам, отлари ҳам оғир бўлади, суст ҳаракат қилишади. Уларни енгиш учун чўл мушуги каби бўлмоғинг, кўз очиргани қўймаслигинг керак». Эрдам отини хоқон ёнига суриб борди ва:

— Учинчи жангга мен чиқаман, улуг хоқон! — деди. Хоқон ўзининг болалик, ўсмирлик сирдошига боқиб ха-

ёлга чўмди, устози Услу Хожанинг ёлғиз ўғлини, энг яқин дўстини «бошқурд айифи»нинг панжасига ташлашни истамасди. Эрдам каби Ўғуз хон ҳам жангда ўлимни тингласди, болаликдан улар ўлимдан қўрқув билмай таълим олган эдилар. Шунинг учун ҳам у Эрдам бекнинг йўлини тўсмади: «Тангрининг иродаси шу экан, — деди. — Била-гинг букилмасин, борақол!..»

Эрдам қиличини қиндан сугурди. Бошқурд баҳодири ҳам жилмайиб, энли, узун қиличига қўл узатди. Юзма-юз келдилар, қиличлар тўқнашиб, ерга учқунлар сачради. Эрдам бекнинг тўриқ оти ёй каби керилиб, етти одимга сакраб ўтди-да, дарҳол ортга бурилди. Эгаси билан бирга сон-саноқсиз жангларни кўрган бу от Эрдам сезгисининг, Эрдам қиличининг давоми эди. Бошқурд баҳодирининг оғир оти ўзини ўнглаб ортга қайтиб улгурмай Эрдам унинг устига бостириб борди-да, баҳодирнинг гарданининг очиқ жойига қилич солди, унинг боши коптоқдек думалаб кетди.

Улубоқурнинг иккинчи баҳодири ҳам Эрдам бекка қарши келар экан, мушук каби бурилган тўриқ туфайли бошидан жудо бўлди.

Учинчи баҳодир чидай олмай, отини буриб қалъа дарвозаси томон қочиб қоди.

Хоқоннинг қўшини баробарига қаҳқаҳа урди.
Ўғуз хон сўйлади, кўрайдик-чи, нелар деди:

*Йигит майдонда қолса, динсизни динга киритур.
Югурек от эгасин хоқон қилур.
Тепадан боққан тезда тубан қулаб тушар.
Йигитим соғ бўлсин, ошилмаган тоғ бўлсин.
Эрнинг бир ҳунари, элнинг минг қайғуси.*

* * *

Дарвозалар очилди, Қорашиб оқ байроқ кўтариб, ёнига суворий бошлиқларини олиб чиқиб келди. Қўл бериб, «Эл бўламиш!» — деди. Отнинг устидаёқ битим тузилди. Йилда бир марта хирож, мўйна, мол-ҳол, буғу жўнатажагини билдириди. Хоқон билан бир тилда сўзлашдилар. Ўғуз хон:

— Кўк бир, Тангри бирдир. Ер ҳам бир бўлиши керак. Биз биздан бўлмаганларнинг устига юриш қилиб бормоқдамиз. Сизлар ўз қардошларимиздирсиз! Сиз билан жанг қилмоқ, қон тўқмоқни истаймиз. Тангри мадади ила қўши-

нимиз енгилмаган, бундан кейин ҳам енгилмаяжак, – деди. Қорашод қорайиб кетди, бироқ:

– Тангри муродингизга етказсин, менинг баҳодирларим ҳам сенинг амрингдадир, – деди.

Сўнгра қўшинга дам берилди, таомлар ейилди, отлар ўти белга урадиган далаларда ўтлашди. Ўғуз хоқон дунёнинг ҳеч бир ерида бу қадар бўлиқ, шира боғлаган, қопқора тупроқ кўрмаган эди. Улусув ирмоқларидан бирининг бўйида тұхтаган эдилар. Хоқон қўл чўзиб бир сиқим тупроқ олди. Сиқиб кўрди. Гўё бу бир таому, ҳозир оғзига соладигандек эди. Қорашодга:

«Улуғларимизга офарин! Сизга дунёнинг энг бўлиқ ерларини ато этиби!» – деди. Қорашоднинг илк бора чехраси очилди. Жилмайди:

– Бошқурд юрти – кўркам юрт, – деди у. – Ирмоқлари, кўллари, ўрмонлари, чаманлари. Камимиз йўқ.

Сўнгра ерга айиқ терилари тўшалди. Қорашод шимолдан, Ўғуз хон эса ўзи борган эллардан ҳикоя қилганча кийик, күш этларидан еб, қимиз ичиб ўтиридилар.

Ичкилик туманида кураш аламини унугтан Қорашод Ўғузнинг бир-икки ой шу ерда қолиб ором олишини истарди. Овдан, мўйнанинг мўл-кўллигидан, Бошқурд элидан ўтган мўйна йўлидан сўз очиш билан Ўғуз хонни танг қолдирмоқчи, элининг куч-кудратини таърифлаш орқали уч баҳодирнинг енгилиши бошқурд элига доғ тушира олмаслигини билдириб қўймоқчи бўларди.

Ўғуз хон хаёлга берилган эди:

– Ипак йули, мўйна йули... Дунёнинг бутун буюк йўллари қўлимизда. Аммо ўз йўлимиз узуқ-юлуқ... Ички курашлар наслу насабимизни тутатмоқда. Сизлар билан аҳдлашиб, Шимолни ўзимизга боғлаш орқали душманлигимиз тугади. Йўқса бу юришда икки кўзим ортда кетардим...

Ўғуз хон Эрдам бекни ёнига чорлади. Отлари тенглашганда, қўлини унинг қўлига қўйиб, «Бу жанг сенинг жангинг, сенинг зафаринг бўлди. Отанг Янгикентда эшитиб хурсанд бўлади», – деди. Сўнгра Эрдам бекка олтин бошли түғ армуғон этди.

Гўзал баҳор пайти эди. Ўғуз озиб кетган отларни тағин сувсиз, жазирама саҳролар сари бошлашни истамади. Қорашоднинг гапига кириб шу ерда қолди. Бутун ёзни у билан

бирга овда, от пойгаларида ўтказди. Бошкурд ва Ўғуз йигитлари апоқ-чапоқ бўлиб кетишиди. Ўқ отиш, қилич чопиш, найза улоқтириш, от устида курашиш мусобақалари бир-бирига уланиб кетди. Ўғуз хон жарчи солди. Бошкурд элини кезиб юриб сара, зотли отларни танладилар. Юриш лиbosлари тозаланди. Йўлда ҳолдан тойиб, юриши истамай қолган кишилар ажратиб олинди. Ўзларига юрт солиб, шу ерда қолдилар. Уларнинг ўрнига Бошкурд йигитлари олинди. Бошкурд қизларига кўнгил қўйиб, уйланганлар ҳам хотинларини ўзлари билан олдилар. Семирган отлар еру кўкни тингламай қўйган, чўллар, ўрмонлар устидан илк кузак еллари эсиб, рутубатли, эзгин ёмғирлар бошланган бир пайтда Бошкурд элидан айрилдилар.

Қорашибод олис йўлга кетаётган Ўғуз хоннинг қўшин бошлиқлари, беклари учун мўйна кийим-кечак, озуқа ортилган бир карвон армуғон этиб, хоқонга зафар тилаб қолди.

Улусувнинг ёйилиб, саёзлашиб оқадиган жойидан сурувларини олдинга солиб ўтдилар. Қўшиннинг бир қисми отдан тушмади. Шунчаки дамланган тулумларни ўнгу сўл томондан эгарга боғлаб, отларнинг сузишини осонлаштириб, ё от устида, ё унинг жиловидан тутганча ёнма-ён кечиб ўтдилар...

Итил дарёсига қадар яна роса ярим ойлик йўл бор эди.

ФОШ БЎЛГАН СИР

Сандиқда кетаётган Услу Хожанинг яширин маслаҳатлари Эрдам бекнинг тили билан Ўғуз хонни неча-неча мashaққатлардан олиб чиқди. Эрдам бекка эски болалик дўстининг меҳри кундан-кунга ошиб борарди. Лекин ҳали мashaққатлар тутагани йўқ эди.

...Итил қирғоқларида яшайдиган аҳоли ҳам Ўғуз эли билан айни тилда гаплашар, ўзларини улар билан бир уруғ деб ҳисоблашарди. Бироқ уларни қувонч билан қарши олганлар, пешвоз чиққанлар оз эди. Ерли хон ҳам улусини олиб қочиб қолган эди. Уруққирон кечувига яқинлашгандарида овулларнинг ҳувиллаб ётганини кўрдилар. Аҳоли жонини сақлаб қолиш учун қочиб қолган эди. Аммо яйловлар мол-ҳолга тўлиб ётарди. Кўч сувга кириб борди, Эрдамнинг суворийлари сув тубининг пар-пар ёнаётганлигини кўрдилар. Гўё дарё олтинга тўлиб оқар эди. Дарё

тубига шүнғиб чанг солсалар, құлларига лойдан бошқа нарса илашмасди.

Эрдам бек яна яширинча сандық ёнига борди. Воқеани отасига гапириб берди.

Услу Хожа:

— Сувда йўқ бўлса, бошларингиз устини, дараҳт япроқлари орасини қараб кўринг,— деди.

Чиндан ҳам соҳилдаги бир неча дараҳт гўё олтин мева туккан эди. Ерли аҳоли қочаркан, жой топа олмай олтин буюмларини дараҳтлар орасига яшириб кетган эдилар. Бироқ дарё устидан эсган шамол япроқларни тебратганида олтин буюмларнинг акси сувга тушар, ўзларини доно ҳисоблаб олтин яшириб кетган кишиларнинг сири очилиб қоларди. Дарё қирғоғида турган беклар бу воқеани хоқонга етказдилар. Ўгуз хон Эрдамни ҳузурига чорлаб:

— Эрдам бек, мен Тангрининг элчисиман, олдинда бизни нималар кутаётганини кўриб тураман. Сен нечанчи дафъаки, пинҳон сирларни очиб келмоқдасан. Буларни фақат Услу Хожа биларди. Наҳотки у сенга барча билимларини ўргатган бўлса? — деб сўради.

Эрдам бек шунга қадар чидаб келганди, энди чидай олмади:

— Ҳозиргача улус йўлида ёлғон гапириб келдим, улуг хоқон! Энди эплай олмайман. Истасанг, ол бошимни...

Сўнг ҳаммасини гапириб берди. Ўгуз хон қорайиб кетди. Катта сертуқ панжалари билан тахт қўлсуянчигини чунон сиқдики, гўё у ҳозир парчаланиб кетадигандек эди. Ўт сочаётган йирик кўзларини олайтириб Эрдам бекка узоқ тикилди... У тикилган сари Эрдам бек ёғдек эриб, кичрайиб қолди. Эрдам хоқон қаршисида ожизона тиз чўкиб, кўзларини ерга қадаганча унинг амрини кутиб турди. Пинҳона бир туйғу унга ҳали ҳамма иш битмаганлигидан дарак берарди. Айни пайтини топиб айтган эди. Бошқа пайт айтганида хоқон фақат унинг ўзинигина эмас, отасини ҳам кечирмасди.

Ўгуз хоннинг овози унинг боши узра момоқалдироқдек гумбурлади:

— Тур, бориб Услу Хожани бошлаб кел!

Эрдам ҳали-ҳамон қандай ҳукм чиқарилажагини билмасди. Фақат шуни билардики, мабодо хоқон уни кечир-

са, у қолган бутун умри бўйи ундан қарздор бўлиб қолади. Ҳозирга қадар элда бундоқ гуноҳ қилган ҳеч бир кимсанинг гуноҳидан кечмаган эдилар.

У Услу Хожани сандиқдан чиқарди. Бўлган гапларни айтиб берди. Ҳожа ўлимдан қўрқмасди: «Тўғри қилибсан, ўғлим, — деди. — Ёмон иш қилмадик. Рост, кўп иш қилмадик, оз қилдик. Лекин нимадир қилиб улгурдик!»

Ўғуз хоннинг олтин куббали саройига бориши. Бироқ таҳтда ўтирган ўғуз хон кулмоқда, овози ҳамон момоқалдироқдек эди.

У йирик қўлларини чўзиб жой қўрсатди.

— Ўтирип, Услу Ҳожа! Ўтиргину менинг гуноҳимдан кеч! Энди билдим хоқонларимиз қари-қартангларни юртларда қолдириб кетиб, ақдли бошларни сафга олмасдан, фақат йигитларнинг билак кучларига ишониш билан нақадар катта хатога йўл қўйганларини!

Сўнг Эрдам бекка юзланди:

— Ёлғонинг, кўч, юриш низомини бузганинг учун гуноҳингни кечирмасдим. Бироқ бошкурдлар билан жангдаги мардлигинг учун кечирдим.

У ўша куниёқ Услу Хожани ўз ҳузурига маслаҳатчи қилиб олди. Ўғуз хон дарёни кечиб ўтишдан олдин сўл қирғоқда элига, қўшинига дам бермоқчи, отларнинг этга тўлишини кутмоқчи, йўлдаги йўқотишлар ҳисоб-китобини қилмоқчи эди.

Бу қадар катта кўчни Итилдан ўтказиш учун жуда кўп сол ясаш керак эди. Тулумларга ишониб сувга тушишни истамасди. Озғин сурувларни бундай кенг дарёга солиш хатарли эди. Дарёнинг бу кечуви бехудага Қўйқирилган деийилмасди. Дарё ёқаси ўрмон, бир неча ойда сурувлар, йил-қилар жонланиб қоладиган жой эди. «Кутамиз, Итилнинг суви музлагандан сўнг кечиб ўтамиз», — деди хоқон. Ростини айтганда, келгуси баҳоргача қолмоқчи эдилар. Баҳорда музлар эримай дарёни кечиб ўтиб, нариги соҳилда юрт солмоқчи, сўнг янгидан яшилланган далалардан юриб бориб, ҳаволар илиганда қамарларга ҳужум қилмоқчи эдилар.

Итил соҳилидаги ям-яшил бир тепа устига ўғуз хоқоннинг олтин куббали хоқонлик чодири тикилган эди. Қўшин бошлиқларининг ўтовлари ҳам юриш-ўрда низомига кўра ўнгу сўл томондан ортдаги ўтлоқларга чўзилиб кетган эди.

Бу чодир шаҳрининг боши-охири кўринмасди. Гўё ер юзининг бутун одамлари бир дарё қирғоғига йиғилган эди.

Тунда йўл азоблари ҳоритиб-толдирмаган йирик жусали Ўғуз хон фил суюгидан олтин безаклар бериб ишланган таҳтида ўтирас эди. Унга уч ўғил бағишлаган хотинининг ўрни бўш эди. Ўнгда ўнг қўл беклар, сўлда сўл қўл беклар, эшикнинг ташқарисида тиш¹ беклар ўтирас, улар узоқ йўлларни босиб келмаган каби бардам, хушчақчақ эдилар.

Итил устига чўккан илк кечада, чўлларни кумуш қиров билан қоплаб олган баҳорнинг сўнгги изғиринида бир жойга тўпланиб, кечиб ўтган йўлларга бир қур назар ташлаш, қилинажак ишларни кенгашиб олиш ҳаммани жонлантириб юборган эди.

Туннинг ана шундай бир пайтида қўққисдан Янгикентдан чопарлар келиб қоди. Чопарлик турк элида катта маҳорат билан ташкил этилган эди. Карвон қароргоҳларида, кентларда, овулларда отларни алмаштира-алмаштира Бойкўлдан, Олтойдан то Кунботар денгизигача сув йўли орқали ўтардилар, шу тариқа хабарлар атрофга яшин каби ёйиларди. Кимсасиз чўлу саҳролар бўлмаганида ер юзининг бу бошидан у бошигача энг муҳим хабарлар жар солиш йўли билан тарқаши мумкин эди. Аммо бу кенгликларда, сувсиз, ҳаётсиз саҳроларда овоз етадиган масофаларда ҳеч ким яшамасди. Фақат чопқир отларни алмаштира-алмаштира кўчнинг йигирма кунда босиб ўтадиган йўлини босиб ўтиш учун атиги бир неча кун кифоя эди.

Чопарлар келтирган хабарлар кечанинг файзини учирив юборди. Йўқ, Чин хоқони битимни бузган эмасди.

Улар бундай ишларда аввал барча ҳийлаларни қилиб кўрар, бошқа усусларнинг ҳаммасини қўллаб бўлганларидан кейингина, бошқа йўл қолмагач, битимни бузар эдилар. Бу гал ҳам ҳар хил яширин йўллар билан, мўл совфа-саломлар, армуғонлар билан шимолнинг узун қишида ҳолдан тойган, очлик азобидан қорнига тош боғлаган улусларга қармоқ ташламоқда, чўлларда айғирга айланган Ўғуз бекларига илон оғзидан чиққандек Чин қизларини кетма-кет «қурбон» бермоқда, уларнинг қўли билан эл орасида ҳар хил ёлғонлар, уйдирмалар тарқатмоқда, чинли қариндош-уруғларнинг келди-кеттилари кишиларнинг

¹ Тиш – ташқари

қўлини ишдан совутмоқда, охир-оқибатда чин хоқонларининг ўзларига берган ҳашамдор номлари — «Кўк ўғлиниг ёрлифи» билан ҳар куни бир бек турк-ӯғуз элининг хони каби танилмоқда, улар эса бир-бирига ҳужумлар қилмоқда эдилар. Ёшларни ўқитиш, ўргатиш, сайд эттириш баҳонасида Чинга олиб кетиб, у ерда ширин тилларнинг, нозик баданларнинг асирига айлантироқда эдилар.

Бу юз йиллардан бери давом этиб келаётган, ҳар бир мард йигит, ҳар бир киши кўриб турган, бироқ ҳеч қандай қаршилик қила олмайдиган амаллар эди... Улар ҳар гал ишонар, кетиб қолар, алданар, бир-бирини ўлдирап, бир-биридан енгилар, лекин барибир нажот йўлини топа олишмасди. «Қўшнинг ёмон бўлса кўчиб кутул» деган нақл балки ана шундан яралган эди. Бироқ бусиз ҳам юз йиллар, минг йиллар мобайнида ернинг бу чеккасидан у чеккасига, у чеккасидан бу чеккасига кўчиб юрган эдилар. Куриё сарҳадларидан, Мангжуриёдан, Хуанхе бўйларидан, Тибет-Танкут яйловларидан ортга чекина-чекина Чиннинг ерларини, ҳудудларини кенгайтирган эдилар. Авваллари Такла элидан, Жунгор кечувидан, Тангри тоғларидан кунботарга кетадиган бирорта изни танимаган чинликлар туркларни бир-бирига қарши қўйганча, ўзлари илгари отини эшитгандаёқ титроққа тушган уйфур элларига сизиб кириб, дастлаб гуруч, дори-дармон, олтинкумуш билан келган бўлсалар, энди дадиллик билан қўшин тортиб келаётган эдилар.

Эндиликда уларни ортга қайтармоқ мушкул эди. Хозирча Чин юзаки қараганда сокин қўринса-да, бироқ Ўғуз хоннинг қувиб бориб Қодирконга сиқишириб қўйган амакиваччалари, уларнинг тарафдорлари чинликлар билан олиш-бериш қилмоқда, уйгурларга ҳужумлар уюштироқда, Ўғузнинг аламини улардан олмоқда эдилар. Хоқоннинг болалик сирдоши, энг оғир жангларда унинг ёнида бўлган, барча уйгурларни унга итоат эттирган, у билан бирга янги хоқонлик асосини қўйган уйфур бошлиғи Элтуғон Тутуғ бек бошини чангллаб ўтиради. Дунёнинг бу чеккасида туриб, нариги чеккасига нима илож топа оларди? Буни Ўғуз хон ҳам англар эди.

Кучли уйфур уруғларини элга боғламоқ учун Ўғуз хон атайин ўзини «уйфурлар хоқони» деб танитган бўлса-да, отаси Қора хоннинг уруғидан уйфурлар билан келганлар

орасида енгил-елпи миш-мишларни ҳам эшитиб қоларди. Йўл давомида гап катталашиб кетиши мумкин эди. У ушбу жудолик азобини борадиган янги ерларига ҳам элтишни истамасди. Чин ва Ҳинд элидан узоқларда бир улуснинг соғ, ажралмас юрти қурилиб, элнинг кунботардаги энг ишончли қалъасига айланиши лозим эди. Шунинг учун ҳам ўз улуси, ўз уруғларини пароканда этмай олиб боришини хоҳларди. Иккинчи томондан эса хоқонликнинг кунчиқар сарҳадларини фақат ишончли кишига топшириш мумкин бўларди.

Ўгуз хон бундай деди:

— Элтуғон Тутуғ бек! Сен хоқонликнинг таянчи, менинг жангчи биродаримсан. Бироқ уйгурлар устини қора булат босганида сени ушлаб тура олмайман. Буни Тангри кечирмайди. Менинг ўзим ортга қайтишим керак эди. Лекин қўрқиб қайтди дейдилар. Олдинга элчилар жўнатганман. Улар етиб борган ерларга мен ҳам боришим лозим. Шунинг учун ҳам сен ортга қайт! Уйфурга бош бўл! Элнинг кунчиқар сарҳадида сен турар бўлсанг, мен хотиржам тортаман. Олдинда нималарга дуч келишимизни билмай туриб, ортда қолган юртларимизни ёғийларга ғажитиб қўя олмаймиз. Насия деб нақддан воз кечмайдилар... Тангри паноҳинг бўлсин!..

Элтуғон Тутуғ бек бошини кўтарди. Юзи нурланган, кузлари ёшланган эди. Ўгуз хоннинг энг оғир вазиятларидан моҳирона чиқиб кетиши унга қанот баҳш этар, ўрталаридағи бирлик турк учун эканлигига яна бир бор ишонтиарди.

— Ўзимга қолса, сиздан ажралмас эдим, бироқ сен энг тўғри йўлни топдинг. Қайт десанг, қайтаман...

Эрта тонгда Ўгуз хон Тутуғ бекка зафарлар тилаб, мўлкүл армуғонлар бериб, ўз улуси билан ортга қайтарди.

* * *

Киши келди. Кўкка ўрлаган тутунларни демаса, ўтовларни қорли чўллардан ажратиб бўлмасди. Ўрмонлардан ўтин ташилган, йилқилар, сурувлар учун оғил, қўра, сайисхоналар қурилган эди. Ўн мингларча суворий, аскар гўёғойиб бўлган эди. Бироқ улар ҳеч ёққа кетмаган эдилар. Ўз ўтовларида еб-ичар, мириқиб ухлаганча ёз мاشаққатининг эвазини чиқарар, роҳатланиб дам олардилар. Қўёшли кунларда қордан тозаланган чоғроқ майдончаларда

ошиқ, арқонтортма каби ўйинлар ўйнар эдилар. Булар айниқса ўсмирларнинг севимли ўйинлари эди. Қор бўлса ҳам муттасил ўқ отиш, қилич чопиш, найза улоқтириш машқлари ўтказилар, тез-тез мусобақалар уюштириб туриларди. Қишлоғатга етганларни рўёбга чиқаарди. Ҳар бир номдор жангчи бир неча ўсмир ёки ёш болага таълим берар, сўнгра уларни бир-бири билан жанг қилдирар, қор устида курашга соларди. Бироқ энг гавжум жой дарёning усти эди. Бу ерда катта-кичик бир-бирига қоришиб кетганди. Соҳилдаги нишабликлардан эниб келган чанғичилар дарёning анча ичкарисига сирғалиб бораарди. Пўстинга ўраниб олган балиқчилар музни ўйиб балиқ тутар эдилар. Бу оддий бир эрмак эмас, кўчнинг қиши лаззатли таомларидан эди. Овчилар ҳар кун чўл кезар эдилар. Қулоғузлар, кузатувчи-назоратчи беклар ҳар кун бир неча ёғоч узоқларга кетар, олд бўлукларнинг суворийлари нариги қирғоқча ўтиб, кун бўйи тўрт томонни кезганча ё мўл озуқа, ёки муҳим хабар билан қайтиб келардилар. Бироқ қамарлардан дарак йўқ эди. Кўкка учғанмидилар, ерга кириб кетғанмидилар? Шу тариқа Ўғуз хон қўшинни янги жангларга ҳозирлар, Итилни кечиб ўтгандан сўнг қамарлар ортидан бориладиган йўлларни, Кунчиқарга бориш йўлларини ҳисоб-китоб қиласарди.

ИЛК ВА ОХИРГИ МАҒЛУБИЯТ

Кеча билан кундуз тенглашган кун, баҳорнинг ҳам келиши қутлангандан сўнг кўч ўрнидан қўзғалди, Янгикент чиқишидан ҳам дабдабали, муҳташам бир шаклда Итилнинг ўнг қирғоғига кечиб ўтди. Бир неча кундан сўнг арава излари бўйлаб музлар ёрилди, дарёга мовий осмон акси тушди.

Ўғуз хон улуғ Тангри амри ила яратилган ҳар нарсага болаларча қизиқиши билан боқадиган, борлиқнинг, очуннинг гўзалигини, қудратини кўрганда гўё ўзини ҳам ичдан ўзгарган, кучига куч қўшилган каби ҳис этадиган бир инсон эди. Баҳорнинг бошларида Инжу, Иртиш, Торим, Чу, Енису ва қирғоғида амакиси Ўрхон кўмилган, эндиликда унинг номи билан аталадиган дарёларнинг, Селенганинг музлари эришини кўп кўрган эди. Энди эса Итилнинг парча-парча музлари бир-бири билан тўқнашиб, қасир-қусир, шақир-шукур қилганча бир-бирининг устига қала-

шиб кетишини, түсіб бұлмас бир құдрат билан Каспийга оқишини томоша қылар, бу оқим билан ўз құчи орасида изоҳсиз бир үхшашлик құрарди. Болалар ҳамон муздан айрилишни исташмас, муз парчаларини бир-бирига отганча гүе Итилнинг муздан халос бўлишига ёрдам берар эдилар.

Очилган дарё кўзгусида жилваланиб турган олақуроқ осмон акси юрагини умид ва кучга тўлдирап, хаёллари яна уни кўкка, Кўк Тангрига тортиб кетар эди.

«Яккаю ягона Тангри нега бу қадар шафқатсиз. Уни севганларни нега бу қадар ундан олиб бунга солади. Ҳатто ўз элчисига ҳам раҳм қилмайди», – деб ўйларди.

Шунда кўқдан ёки ичидан келган бир овоз унга: «Тангри элчиси янада тўзимли, янада сабрли бўлмоғи лозим! Тангри сен билан бирга, унинг ўзи ҳам сен билан бирга кечиб ўтади бу машаққатлардан. Сен билан бирга у ҳам ўз сабрини синааб кўради», – дер эди.

Бепаён чўллар ва бу чўллар устидаги бепаён кўкларга боққанида ўз руҳининг ердан кўра кўпроқ самога боғлиқлигини яна бир бор ҳис этарди.

Дарё ўзани билан биргаликда Ўғуз хоннинг юраги ҳам очилиб борарди. Айни пайтда изоҳсиз бир дард бор эди ичиди. Балки бу йўлдан энди бошқа қайтмаслиги, балки ҳаётининг энг кўркам чоғлари бу дарё, бу ирмоқнинг нариги томонида қолаётганлиги уни фуссага ботирганди. Эҳтимол ана шу туйғулар ғолиб келдими, ҳар қалай, негадир у кунчиқар юришини секинлатди. Йўлга шошилмади ва хоқонлигининг энг катта хатоси ҳам шунда содир бўлди. Итил зулмат ўлкасидан оқиб келади дердилар. У ерда йилнинг ярми ёруғ, ярми қоронғи бўлар экан. Элчилари ҳам у ёқдан бевақт қайтган эдилар. Улар Қил Барак¹ орқали

¹ Ўғузномаларда номи учрайдиган Қил Барак элининг жойи баҳслидир. Баъзи тарихчилар уни Узоқ Шарқдан излайдилар ва Қил Барак билан жанги Ўғуз хоннинг илк ҳарбий амалиётларидан бири деб ҳисоблайдилар, ушбу жангдаги мағлубиятни ҳам унинг тажрибасизлиги билан боғлайдилар. Бу ном остида конкрет қайси ҳудуднинг, қайси халқнинг назарда тутилгани маълум эмас. Бизнингча, бу жангни Ўғузнинг Итил – Урал дарёлари орасида бўлган даврларига боғлагандар ҳақиқатга яқин турадилар. Акс ҳолда унинг бу дарёлар орасида ўн йилга яқин кечикишини, ўғузларнинг бу ҳудудда кенг жойларга ёйилиш сабабини англаб бўлмайди. Бу мағлубият ўғузларга оғир таъсир кўрсатган эди. Фазабланганларидан Қил Баракка Ит Барак, Итбоши деб ном берган эдилар.

Ўғузга: «Агар сизнинг тўққиз кишингиз бизнинг икки киши билан жанг қилиб енга олса, биз бош эгиб, қуллик бўйинтуруғини илиб, хирож тўлаймиз, агар ютқизсангиз, шундоқ ҳам бўлади албатта, унда ўз йўлингиздан қолмайсиз», — деган шарт юбордилар.

Ўғуз хоннинг мағур-ўр элчилари эса бундай жавоб қилган эдилар:

— Курашмоқчи бўлсангиз, ҳар тарафдан иккитадан киши чиқсан.

Бу хабар Ўғуз хонни фазаблантириди, кўч бошини зулмат дунёси, Қил Барак сари бурди. Элчилар Қил Барак ҳақида қулоқ эшитмаган сўзларни айтар эдилар. Гүёки у юртнинг одамлари қоп-қора юзли, балчиққа беланган, чиркин кишилар эмишлар. Аёллари эса оқ юзли, жозибали, чиройли эмиш. Ўғуз хон танимаган, билмаган йўллардан «Тангрим мададкор», дея илгари юрди. Бироқ бу гал Тангри «Билмаган жойингга борма» дея уни синдириди. Ёғийлар билан юзма-юз келганда шошиб қолдилар. Уларнинг қўзларидан бошқа бутун баданлари мўмиёга ўхшашиб қоп-қора бир нарса билан қопланган эди. Жанг узоқ давом этди. Ўғуз йигитларининг кетма-кет туширган зарбалари гўё тошга теккандек ортга қайтарди. Қиличу найзалирнинг зарби Қил Барак йигитларининг парвосига ҳам келмасди. Қоп-қора баданлари темирга ўхшарди.

Душманнинг қонини тўқмоққа ошиқсан Ўғуз хон жуда фазабли, бир оз аввал ўзи жангга отилмоқни истарди. Отилиб кўрди ҳам. Ҳайҳот! Ёғдирилган ўқлар қилбаракликларга тегиб, гўё деворга-тошга теккандек ерга тўкилар эди. Қурол захиралари тугади. Ҳеч иложини топа олмадилар. Ўғузнинг жангчилари чарчаб ҳолдан тойди, кўпчилигининг ўлиги майдонда қолиб кетди. Суворий бошлиқлари Ўғуз хонга бориб: »Бунақада жанг қилиб бўлмайди, биз уларнинг қандай либос кийганликларини билолмадик», — дедилар. Ана шу ерда Ўғуз хоннинг қўшини ilk бора мағлуб бўлди. Кунчиқар — Кунботар оралиғида от ўйнатиб, ўнлаб жанглардан ғолиб чиқсан мард йигитлар эндилақда итбашара бу душман олдида ожиз қолдилар.

Бу жанг майдони кўплаб йигитлар учун сўнгги жанг бўлди. Қўшин бузилди, Ўғуз хон хато қилганини англашиб ортга қайтди. Дарёни кечиб ўтиб тўпландилар. Қилбарак-

ликлар уларни таъқиб қилиб келсалар-да, дарёни кечиб ўта олмадилар. Ўгуз хон икки дарё оралиғидаги яйловларда гоҳ түп-түп, гоҳ якка-якка бўлиб келаётган уруғдошларини йиғиб түплади. Кўп йўқотиш бўлган эди. Бу жанг уни Кунчиқар юришидан тўхтатиб қолди. Бу куч билан узоққа бориб бўлмасди. Иккинчи томондан, Қил Баракдан ўчини олмаса, эл ичидаги бош кўтариб юра олмасди.

БЕГОНА ЮРТ АЁЛЛАРИ ЁРДАМИ

Тугар бек зулмат оғушида кўз очди. Нотаниш жой эди. Сийрак болуд дараҳтлари остидаги баланд ўт-ўланлар орасида ётарди. Тупроқ ҳўл эди. Ўнг қули, оёқлари бутун эди. Ҳўл дегани ўз қони экан. Қон сўл елкасидан курагига оқиб тушган, кийимини намиқтирган эди. Турмоқчи бўлди. Чап елкасининг оғриғи бутун баданига ёйилди. Гўё тош каби оғир қўллар уни елкасидан босиб, узаниб ётган ерига қапиштириб қўйган эди. Инграб юборди. Тағин хушдан кетди. Унинг овозини эшитиб келганларми ёки ўзлари кўриб келганларми – билолмади. Кўзини очганда боши узра бир олманинг икки палласидай бир-бирига ўхшаш икки гўзал аёлни кўрди, кўрган заҳоти ҳаммасини тушунди. Оғир кечган жанг кўз олдидаги жонланди. Урса тошни кесадиган қиличларнинг қилбаракликларга тегиб ортга қайтганларини, алп йигитларнинг қилич, гурзи, болта уришдан чарчаб, ҳолдан тойганликларини, сўнг биттабитта яраланиб отдан қулаганларини, кейин ўзининг яранганини, унинг аҳволини тушунган отининг бўйини қучоқлаб, «Мени бу ердан олиб кет» дея шивирлаганларни эслади. Демак, оти уни жанг майдонидан олиб чиққан, манави баланд ўт-ўланлар орасига келтириб туширган. Ўзи эса ё ўлган, ё эгасиз қолган йилқиларга қўшилиб кетган, ёхуд қайдадир шу атрофда ўтлаганча эгасининг соғайишини, чорловини кутаётir.

Бу аёллар қилбаракликлар эди. Кўримсиз эркакларнинг бу хотинлари ҳақиқатан ҳам ниҳоятда гўзал эдилар. Улар Тугар бекка чипор кўзларини қадаб турар, қўлларини унинг юзига теккизар, узун соchlарини силар, бир эркакнинг шу қадар хушсурат бўлишига ишонмас эдилар. Ой шуъласида ҳамма нарса тушга ўхшарди. Фализ бир тилда нималарнидир пицирлаб Ўғузни турғиздилар. Бақувват аёл-

лар эди. Икки ёнидан кириб олиб кетдилар. Тугар бу гал ҳам оғриқнинг зўридан ҳушидан кетди. Яна қўзини очганида ўзини яланғоч ҳолда юмшоқ айиқ терисига ўраб қўйганларини кўрди. Бояги аёллар ҳамон унинг ёнида эдилар. Яраси боғланган эди. Орадан бир неча кун ўтди. Бирбиридан фарқ қилмайдиган аёллар кун бўйи ундан айрилмасдилар. Соғайиб, сўл қўлини ишлата, қад кўтариб ўтира бошлаганида ҳар куни бу аёлларга тағин нотаниш икки-уч аёл ҳам қўшилар эди. Улар Тугар бекни бошдан оёқ қўздан кечирар, ўз тилларида нималардир деб қулишар, еб-ичар, уни ҳам тўйдирар эдилар. Соғайганидан сўнг уни топган аёллар навбати билан, аввал бири, кейин иккинчиси унга яқинлик қилдилар. Унинг истар-истамаслигини сўраб ҳам ўтирмадилар. Тугар бек узун, машаққатли йўлларни, жанг-жадални, юришларни унут этган бир уйқу оғушида эди. Балки яраланиши, жароҳатларининг битиши – ҳаммаси бир рўёдир, мен аллақачон ўлганману, жаннат деган мана шу ерга тушгандирман, – дея ўйларди. Бу зиёфатларга бошқа аёллар ҳам, энг охирида қилбаракнинг энг гўзал хоними ҳам қўшилди. Бу – Қил Барак элигининг¹ қизи эди. Бутун кеча давомида ундан айрилмади. Эртаси куни бошқа аёлларнинг унга яқинлашишини тақиқлаб қўйди. Ҳар куни келиб-кетиб турди, кейинроқ кимлигини ўзи тушунтирди. Қўзи ёшга тўлганича қилбарак эркакларининг аччиқ тақдирни ҳақида сўзлаб берди.

– Бизнинг эркакларимизни кўклар жазолади, – деди у. – Ўз ахлоқсизликларининг қурбони бўлдилар. Гўзал-гўзал хотинлари бўла туриб, уй, оила нималигини билмадилар. Юзларига қайси эшик очилса, шунга кириб кетавердилар. Туғилган болалар оталарини танимайдиган бўлди. Тангри fazablаниб, бир кечада уларнинг қиёфасини шу қадар ўзгартириб юбордики, юзларига қараб бўлмасди.

Сўнгра кўзларини артиб жилмайди, қўлини Тугарнинг қўлига қўйиб:

– Агар сизнинг аскарларингизнинг ҳар бири сен каби бўлса, – деди, – яна бир жанг қилишсин. Аёлларимиз сизнинг ғолиб чиқишингизни, бу тупроқлар билан бирга бизга ҳам эга бўлишингизни исташади.

¹ Элиг – ҳукмдор. шоҳ

Тугар бек қаршисида буюк қүшинлар дош беролмаган
Ўғуз қүшини бу гал нега енгилганини, қилбаракликларга
ўқ-қилич кор қилмаслигининг сабабини билмоқчи бўлди.

Қиз деди:

— Бизнинг эркаклар сиздан кучли эмас.

Тугар кулди:

— Унда нега бизнинг қиличимиз уларга ўтмайди?

Қиз ҳам кулди:

— Улар жангдан аввал дараҳтлардан йигилган оқ қатрон елим билан тўлдирилган ҳовузга кирадилар, сўнг елимли баданлари билан оқ қумга думалайдилар.

Куриганидан кейин қора қатронли ҳовузга кириб, яна қумга думалайдилар. Баданлари қат-қат елим, қум билан қопланади. Бу либосни ҳеч нарса билан кесиб бўлмайди. Агар уларни енгмоқчи бўлсангиз, елим тегмаган жойларини нишонга олиш, оёқларининг остига темир тиканаклар сепишингиз керак.

Тугарнинг ишонгиси келмасди:

— Қалин этиклар, кўн чориқлар бизни тикандан асрайди.

Хуш, отларимиз-чи? Бизни тузоққа туширмоқчимисиз?

Қиз пинагини бузмай деди:

— Йўқ! Ўн кун сен билан бирга бўлган дамларимни умримнинг бутун йилларига алмашмайман. Ишон менга! Ишон, ўз элингни ҳам, мени ҳам халос эт. Отларингизнинг тақасини алмаштиришингиз керак. Мен сизга бошқача тақа бераман. Неча мингтаси керак бўлса, ясатаман. Мен сенга ёрдам қиласман, сен эса мени олиб кетасан...

Тугар шундоқ ҳам унга мафтун бўлиб қолган эди. Бу сўзлар кўқдан тушган инъом эди. Гапни бир ерга қўйиб, онт ичдилар.

Шундан сўнг Тугарни отга миндириб тун қоронгилигига икки дарё оралиғига жўнатдилар. Жўнатдиларким, ўз элида ўзига ўхшаган эркакларга Қил Баракни енгиш йўлини ўргатсин, ўртадаги душманчилик кўтарилсин, истаган вақт келиб-кета олсинлар, бу гўзал аёллар севги лазатини тотсинлар.

Тугарнинг қайтиши элда овоза бўлди, ҳаммадан кўпроқ Ўғуз хон севинди. Қилбарак ҳокимининг қизи билдириган таклифни тинглади. Тугарнинг сўзларидан Ўғуз хон ҳам хукмдор қизининг ростгўйлигига, самимияти ва севгисига

ишонди. Гүё маҳфий бир фармон Үзб йигитларининг юзини қылбарак томон бурди. Тугарнинг севгилисисининг кишилари уларни қарши олар, жант учун лозим бўлган қурол-яроғни тўплаб, Үзб хон қушинига жўнатар эдилар. Бу борди-келдилар қылбараклик гўзал хонимлар билан севги можарола-рига ҳам тўла эди. Бўйдоқ йигитлар ортга қайтаркан, ёйининг гўзал қизларини ҳам ўzlари билан олиб келар, янги танишган аёлларидан болалар ҳам туғила бошлаган эди.

Үзб хон қурбонлар ўрнини тўлдириш, қасос олиш учун Итил билан Улусув оралиғида бир неча йил қолиб кетадиган бўлди.

* * *

Хотинининг ўлимидан сўнг Үзб хон Оз эрларининг бошлиғи Алпон бекнинг қизи Үгдил хонимга уйланди, ундан ҳам уч ўғил кўрди. Ўсмирлик чоғларида фолчиларнинг унга «олти ўғил кўрасан», деган башоратлари тўғри чиқди. Катта ўғиллари йигит бўлиб етишди. Кичикларини семиз, сержун қўйларга миндира-миндира от минишни ҳам ўргатишиди. Энди Үзб хоқон йўлга чиққанида ўнг ва сўл томонида учкур от миниб олган олти ўғли елиб юради.

Қўшни эллардан Үзуга мадад учун келган, ўзб қизларига уйланиб, улар билан боғланиб қолган йигитлар ҳам кўп эди. Карвон билан Үзуларнинг эски юртларидан келиб, кунботар билан савдо-сотиқ қиладиган кишилардан ҳам аксарияти Үзб хоннинг сўнгти жангда енгилганини эшитиб, ҳамма ишини ташлаб Үзб қушинига қўшиларди. Улгайиб қолган ўсмирлар қурол ишлатишни ўрганмоққа шошардилар. Шунга қарамасдан Үзуннинг аввалги куч-кудратини тиклаши бир-икки йиллик иш эмас эди. Бунинг учун бир неча ёзу қиши ўтиши керак эди. Бу йиллар Үзуннинг энг оғир, энг бекарор йиллари бўлди. Элга келиб қўшилганлар, элдан кетиб қолганлар, юрт солиб бўлак бўлиб чиққанлар, қылбаракнинг лаззатли хотинларига илакишиб юртдан жудо бўлганлар ҳам бор эди. Ўн мингларча инсоннинг емак-ичмагини таъмин этиш ҳам оғир эди. Тўғри, Ёйиқ билан Итил оралиғида бир неча йил қолиб кетишларини билиб, эл чўлларда алоҳида-алоҳида овуллар бунёд этган, ҳар уруғ ўз тирикчилигини ўзи кўради. Керак бўлганда улар бир имо билан дарҳол тўпланар эди-

лар. Бироқ карвонлар ҳаяллаганда, Чиндан, Яңгикентдан келадиган гуруч, дори-дармон, кийим-кечакнинг кети узилиб қолганда фақатгина қўй-қўзининг гўшти, сут-қатиқ, ов ўлжасига кўз тикиб яшаш мушкул эди.

Қилбаракнинг аёллари тасаввурга сифмас даражада ишончли чиқдилар. Ўзлари севиб қолган Ўғуз йигитларидан юз ўғирмадилар, уларнинг барча истакларини бажо келтириб турдилар. Улар ўзлари билан қилич-қалқон, от тақаси, жанг майдонига сочиш учун кирпига ўхшаш думалоқ, ўткир тишли темир тиканаклар ҳам келтирдилар.

Ўғуз хоннинг жангга ҳозирланаётганини билмасаларда, унинг мағлубият билан чиқиша олмаслигини, чекиниб кетиб қолмаслигини ҳам ҳис этардилар. Шунинг учун ҳам пинакларини бузмас, ўзларига жуда арқайин эдилар. Бинобарин, кутилмагандан қанчадан-қанча аёлу қизларнинг гойиб бўлиши, қочиб Ўғуз йигитлари ҳузурига боришлиари Қил Баракни букиб қўйган эди. Ўлка уйма-уй нураб борар, жанг майдонида улардан енгилганлар эндиликда бирма-бир уларнинг ўчогини сўндиримоқда эдилар. Ўғуз йигитларининг қиличлари уларнинг баданларига ўтмасада, лекин бу йигитларнинг Ўғуз аёлларининг бошини айлантириб қўйган эрлик қувватлари ханжарга айланиб қилбаракликлар юрагига санчилмоқда эди. Ўлканинг қони оғриқсиз-азобсиз оқиб ётарди. Кучга таслим бўлмаган ўлка севигига таслим бўлган эди.

* * *

Тугар бек Қил Барак элигининг қизига уйланиб, удумга кўра унга ўғузча от ҳам қўйиб олган эди – Болжон Бека. Ундан икки ўғил туғилган эди. Бирининг отини Бориш хон, иккинчисининг отини Чуваш хон қўйган эдилар. Бироқ болаликдан уларнинг жуссадор, суяги йирик бўлганлиги учун «Булар бир жуфт буғробага¹ ўхшайди», дердилар. Болжон Бека Қилбарак билан муносабатларини узмаган эди. У ерда нималар бўлаётганини билиб олиб, Тугар бек орқали Ўғуз саройига етказарди. Саройда кезиб юрган, «бу гал қилбаракликларни олқорлаймиз², кум билан, елим билан ўраниб-чирманишлари энди уларни кут-

¹ Буғро – наслдор түя

² Олқорламоқ – фавқулодда ҳужум қилмоқ

қара олмайди», қабилидаги гапларни ҳам Тугар бекдан эшитар экан, бундай деди:

— Олқорлаш билан, ұжум қилиш билан иш ҳал бўлмайди. Ўғуз хон элчи жўнатиб, отамга «Жанг қилиш учун жой танла!» десин. Қилбарак низомида ҳам илгаридан жанг майдонини танлаш одати бор. Отам танлайдиган жойни биламан. Улар гапини айтсин, қолганини кейин кўрамиз, — деди.

Тугар бек бу гапни саройга етказди. Ўғуз хон ўз элчиларини жўнатди. Чиндан ҳам, жанг учун Болжон Бека айтган жой танланган эди.

Белгиланган кундан бир неча кун олдин Ўғуз хон қўшинини Итилнинг нариги қирғоғига ўтказди.

Кечалари Болжон Бека яширин йўллар билан Ўғузнинг юкли араваларини жанг майдонига бошлаб борди. Кирпи тиканаклар бутун чўл бўйлаб сочиб чиқилди. Тонгга яқин иш битгач, ортга қайтдилар.

Жанг куни Ўғуз хон чўлнинг тиканаксиз, очиқ жойида беш бўлук суворийсини сафга тизиб турди. Болжон Бека бу ерда ҳам қўл қовуштириб турмай, Ўғуз хоннинг ёнига борган, Қилбарак аёлларига маҳаллий лиbos кийдириб, от миндирганча қўшиннинг олдинги сафига тизиб қўйган эди. Ўғуз хонга бунинг сабабини тушунтириш анча қийин бўлган эди. «Аёллар ортидан саф тортиш низомимизга тўғри келмайди», — деган эди у. Бироқ Услу Хожа «аёллар билан елкама-елка жанг қилиш низомимизда тақиқланмаган бўлса, уларнинг олдинда туриши ҳам тақиқланмайди», дея уни ишонтирган эди.

Қилбаракнинг бу аёллари ўз эрларини, яқинларини додвой солиб чақиришлари керак эди. Бу овозни эшиттан душман чидай олмасдан, жангнинг бошланишини ҳам кутмай, чўлни кечиб Ўғуз қўшини устига бостириб келар эди. Бу — улар тамом бўлди деган гап эди. Темир тиканакли чўл қилбарак суворийлари ва пиёда аскарларини адо қиласади.

Бу тасаввурга ҳам сифмайдиган амал эди. Афсунчилар, жодутарлар, мунахжимлар эплай олмаган ишни Болжон Бека уddaлаган эди. Биринчи бўлиб унинг ўзи чинқироқ товушда отасини чақириб қолди:

— Кутқаринг бизни буларнинг дастидан. Ота, етиб келинг! Кутқаринг!

Сүнгра бошқа аёллар ҳам қий-чувга тушдилар. Қылбарақликлар тизгинсиз бир шиддат билан олдинга отилдилар, отилдилару, ўқ-найзани ишга солмай, ўғузлар билан юзма-юз келмай туриб чүлга түкилиб тушдилар. Ох-вой, дод-фарёд билан күзларини очганларида бошлари узра Ўғуз суворийларини күрдилар. Уларни ер билан битта қылган тиканаклар Ўғуз отларининг баланд, яхлит қўйма тақалари остида эзилар, ерга кириб кетарди. Йиллар давомида ушбу кунни кутган Ўғуз йигитларининг ўткир ўқлари, найзалари қылбаракликларнинг юзига, товонига санчилар эди.

Жанг тугаган эди. Аммо Болжон Бека бир жойда чи-даб тура олмас, майдонда тирик қолганларни излаб юради. Отасининг қаерда турганлигини билганидан у томон кўз ташлаб, унинг жангга кирмаганидан хурсанд бўлди, бироқ Ўғузнинг сараланган алп йигитлари барча жангларда бўлгани каби қылбарак қўшинининг бош қароргоҳи томон отилиб бораётганини кўриб чидай олмади, Тугар бекка:

— Отамни қутқар. Ўлдирмасинлар! — деди-да, ўзи ҳам сара суворийлар ортидан от қўйди.

Кувҳоқув узоқ давом этмади. Ўғуз суворийлари душманга имкон қолдирмади. Уларнинг ўрмонга етиб олишига йўл қўймай, тепалик ортидан кесиб чиқдилар.

Қылбарак элиги ўзини қуршаб олганлар орасида қизи ҳам борлигини кўрганда нима қилишини билмай қолди. Ўғуз йигитлари билан унинг ёнма-ён, мағрур туриши бояги қичқириғига мос келмас эди; қизини қучмоқчи бўлиб очилган қўллари икки ёнига шалвираб тушди. Тишларини фижирлатганча нимадир деб пичирлади.

Бироқ Болжон Беканинг ўзи унга пешвоз юрди:

— Бош эгишдан бошқа иложинг йўқ, ота, — деди у. — Қўрмаяпсанми, бутун ўлка сув каби оқиб Ўғузнинг ҳовузига қуйилмоқда. Мундоқ ҳушёр тортиб қарасанг, қолганлар орасида беш-унта қари-қартангдан бошқасини кўрмайсан. Ўғуз хон билан ярашиш, сулҳ тузиб яқин бўлиш сени ҳам қудратли қиласи. Шимолдан, зулмат элидан устингга бостириб келадиган тилбilmаслар қаршисида довдирааб қолмайсан. Шуни ҳам айтиб қўяйки, эндиликда қонимиз ҳам қоришиб кетди. Қылбарак қизларининг ўғузлардан туғилган қанчадан-қанча фарзандлари бор, улар-

ни қандай ажратиб оласан. Ўша болалардан иккитаси менники. Ўзингта душман деб биласанми уларни?

— Сен қайси юз билан айтмоқdasan бу сўзларни, сотқин, беҳаё!

— Мен сотқин эмасман, ота! Бахтимни, эримни, тайлөкдек икки мард ўғлимни, муҳими, ўз Тангримни топдим бу ерда. Бу сулҳ Ўгуздан ҳам кўпроқ бизга керак! Улар жуда қучли. Тангрилари ҳам қудратли. Сен ҳам уларнинг Тангрисига топин, сулҳ туз!

Отасининг ирkit юзи янада кўrimсиз бўлиб кетди.

* * *

Ўгуз хон Қилбарак элигини ўз чодирида қарши олди. Аламини, фазабини ичига ютган эди. Жангнинг талафотсиз тугашига Болжон Бека берган ёрдамни билар эди. Элда қилбарак қизларининг Ўгуз эли билан алоқаларига, у қизларга шайдо йигитлар жангла ҳаммадан кўпроқ жонбозлик кўrsatgанилигига муносиб баҳо бермоқда эдилар. Ана шуларнинг ҳаммаси душман билан юмшоқ муомала қилишга мажбур этарди:

— Мен айтмоқчи бўлган гапларни қизинг айтиб бўлиби сенга. Бош эгмасангиз, эгдирэмиз, дегандим. Айтганинг устидан чиқдим! Аммо ҳайф ўтган йиллар! Бизни кунчиқар юришидан қолдирдинг. Йўлимидан қайтдик. Ҳаммасининг ортда қолгани чин бўлсин!

Шундан сўнг олинадиган хирож, сулҳ шартларини келишиб олдилар. Битик битиб, муҳр босдилар.

Ўгуз хон Қилбарак элигини тағин ўз юргига ҳукмдор қилиб, йигитлари билан бирга ортга қайтарди.

Тугар, Болжон Бека ва ўғиллари ҳам улар билан бирга кетдилар. Бироқ қайтиб келганларида ораларида Чуваш хон йўқ эди. Болжон Беканинг отаси: «Ворисим, ўрнимда қоладиган ўғлим йўқ. Кўй, неварам қолсин. Ўлка бошқа қўлларга ўтиб кетмасин», — деган эди.

Болжон Бека узоқ ўйланиб туриб охири «майли» деганди. «Ўғлим бу икки элни абадий бир-бирига боғлайди».

Ўгуз хон учини олгач, юраги таскин топиб, Кунчиқарга юзланди.

Хоқон Итил бўйида қолиб кетган йилларда унинг хабарчилари Кунчиқар тоғларидан бошлаб Қора денгизгача

ҳамма ерга жар солиб, Ўғуз хоннинг инончини, ҳокимиятини тан олишга даъват қилишган, кўп жойларда бунга эриша ҳам олишган, Қора дengизнинг шимолида, қўшни ўлкаларда яшайдиган бир-бирига яқин, ўзаро тилларини тушунадиган улуслар билан жанг қилмай туриб сулҳ битими тузган эдилар. Жанубга юриш олдидан Ўғуз хон Услу Хожага деди:

— Сен доносан, Услу Хожа! Қилбаракда енгилдик, куч тўплаш учун узоқ йиллар Итил бўйида қолиб кетдик. Бу мағлубият хабари бутун ер юзига ёйилди. Истаган ҳам эшилди, истамаган ҳам. Сўнгги зафарларимизни уйимизга, юртимизга етказмасак, ичкари лиқиллаб қолади. Охирги жангда ёғийни енганимизни ортда қолганлар кутласа, бутун ўлка қутлайди. Ботирлар бусиз ҳам юртга эга чиқадилар. Ёғийлар авлодларимизга бош эгадилар. Юзта жангчи йигитни саралаб олиб, юртга хушхабар етказсам, енгил тортар эдим. Сен бунга не дейсан?

Услу Хожа табассум қилди:

— Оғзингга бол, улуф хоқон! Юртда қолганларни унуби бўлмайди. Қазилиқ тоғининг жануби Инжу дараси каби бўлиқ, ҳосилдор жойлар. Қўшинимиз оч қолмайди. Тегирмонга ун билан бормайдилар, деган нақл бор. Юкингни енгил қил, йиққанингни ортга жўнат...

Ўғуз хон унинг сўзини бўлди:

— Оталаримиз топиб айтган, Услу Хожа! «Йўлдошинг доно бўлса, қўлдошинг Тангри бўлсин!»

Сўнгра Кангар қабиласининг бошлиғи Олтибармоқ ўғли Чўжуқ бекни чақириб амр этди: кангар уруғидан бўлган йигитлар билан бирга ортга қайтасан, ўлжамизни элга адолат билан улашиб, хазинани саройга етказасан, йигит ёшига етганлардан қўшин тўплаб, ичкарида тартиб-интизом сақдайсан.

— Сифноққа, Талас билан Сайрамга ҳам қараб тур! Кетдилар, йитдилар деган гап бўлмасин. Шимолдан ҳам шубҳам бор. Бизни узоқда деб ёки енгилдига чиқариб ортимиздан пичоқ санчмасинлар.

Кўчдан айрилишни истамаган Чўжуқ бек хоқон амрининг адолатли эканлигини тушунди, таъзим қилганича улкан бир карвон билан ортга қайтди.

Юриш олдидан енгиллашиб олиш, олтин бўлса ҳам

ортиқча юк ташимаслик, чодирини яғмолатиб¹ ҳар йили бир марта ортиқча нарсалардан халос бўлиш Ўғузларнинг ўзига хос одати эди.

БЎЗ БЎРИ БИЛАН СУҲБАТ

Тонг олатўронлигидан Янгикентдагидан икки баробар ортиқ куч билан яна ерни зир титратувчи юришга чиқдилар. Хоқонликнинг олтин қуббали, олтин безакли ол байроти кўк узра ҳилпирај бошлади. Отларнинг туёғи замин саҳифасига бир элнинг мардлик, ҳаёт лавҳасини битди. Эрта тонгда кузатувчи қулоғуз дастасининг сардори Ўғуз хонга бир хушхабар етказди:

— Тангри яна биз томонда! Юришимиз хайрли бошланди. Бўз бўри олдимиизда кетмоқда!

Ўғуз хон эгардан кутарилди, Устюртдан, Орол денгизидан ўтганларидан сўнг бўлиб ўтган барча юришлар, жанг-жадалларни кўз ўнгига келтирди. Бўз бўри ҳамиша уларнинг олдиди юрган, йўл бошлаган, зафарга унданаган, куч-кудрат тилаган эди. Қамлар, қўшин бошлиқлари орасида шундай кишилар ҳам бор эдики, улар «йўлга тушишдан олдин чўлда бўрини топиб сўзлашдик, суҳбатлашдик, бошма-бош увлашдик, юришимизга омад тилади, у бизга мададкор бўлади», — дер эдилар. Фақат қилбарак билан илк жангдан ташқари ҳамиша Бўз бўри олдинда эди. Қилбарак билан илк жангда эса олдда у йўқ эди. Бунга эътибор ҳам бермаган эдилар. Бўз бўрининг йўқлиги ҳеч кимнинг эсига ҳам келмаган эди. Охирида мағлуб бўлдилар. Мана, энди яна тагин неча йилларни кўрган бу ёлдор-ёлмондор, номаълум бир қўл томонидан ўргатилган, салкам хачирдай келадиган Бўз бўри олдинда бормоқда эди.

Омадсиз жанг олдидан: «Шунчаки бўри-да, бир кун келади, бир кун келмайди», — деган эдилар. Бўз бўрининг олдинда йўқлиги бир ишора, жангда мағлубиятга учрашларининг илк аломати эканлигини сезмаган, бўрини тушунмаган эдилар. Бўри эса буни қандай тушунтиурсин? Тил чиқариб уларни огоҳлантирмайди-ку! Унинг олдинда йўқлиги — «йўлдан қайтинг, бу йўлдан борманг!» дегани эди. Буни тушунмаганларнинг ҳолига вой! Кейин ҳоллари вой ҳам бўлди...

¹ Яғмолатмоқ — тарқатмоқ, бўлиб бермоқ, талон-торож қилдирмоқ

Ўуз хон бу сирни энди англаб етди. Ўзидан ўпкалади: «Тангрининг элчиси бўласан, ҳолбуки, кўз ўнгингда ошкора турган шу оддий нарсани кўрмайсан. Бўз бўрини ҳам бошқа башоратчилар қаторида кўрдинг. Унинг улус онаси, дояси, қўрувчиси, йўл кўрсатувчиси эканлигини унудинг. Буни қараки, у яна сени ташлаб кетмади. Яна сенинг олдингга тушиб, омад тиламоқда, йўл кўрсатмоқда. Борадиган йўлинг хато эканлигини, хайр келтирмаслигини билганида эса у фойиб бўлди. Шуни англамай ким бўлдинг сен?»

Шу хаёл билан отини илгари сурди. Ортидан чопгандарга қўл кўтариб, «тўхтанг!» ишорасини қилди. Ёлғиз ўзи бормоқчи эди. Оқ отини бўз бўрининг ортидан қўйди. Бўри ҳам гўё шуни кутар эди. Оқ отнинг яқинлашганини кўриб у ҳам тезлашди. Шу тариқа, олдинда Бўз бўри, орқада Оқ от, тепалар оша кетдилар. Кўққисдан Ўгузнинг миясига шошқин бир фикр келди. Фақат эндигина у қилбарак одамларининг боши итга ўхшашига истеҳзо билан эмас, бошқача назар билан қарай бошлади. Бўз бўрини севган ўгузлар ит бошли, жундор қилбаракликларнинг бўрига ўхшаш эканлигини нега кўрмади эканлар... Нега уларнинг устига бостириб бораётгандарида Бўз бўри йўл бошламади? Бу бир тасодифмиди, мағлубият ҳақида олдиндан огоҳлантиришмиди ёки умуман бу жангнинг олдини олиш истагимиidi? Балки Қилбарак билан Бўз бўрининг бирор яқинлиги бордир? Балки Қилбарак унинг ана шу ёрдами билан голиб чиққандир бу жангдан? Шошма! Айтайлик, шундоқ ҳам бўлсин! Бўз бўри бутунлай аразлаб кетиб қолмади-ку! У бугун яна сенга йўл бошламоқда-ку! Демак, у сенинг юришингга, жанг-жадалингга қарши эмас. Фақат мана шу урушни – Қилбарак билан юзма-юз келишингни истамаган! У билан ярашганингни кўргандан сўнг яна сен билан бирга кетмоқда... Демак, Бўз бўри сени ҳаммадан устун деб билади, у ҳам Улуғ Тангрининг амрини бажараёттир...

Ёвшан буталари кўпайиб, тўқайга айланган бир дарага етганда Бўз бўри секинлашди. Ортдан келаётган кишининг ёйга, найзага қўл чўзмаганини кўриб тўхтади. Ортини қалин бутазорга ўтириб, Ўгузга юзма-юз чўнқайди. Шу ўтиришида ҳам бўйи қарийб одамнинг бўйидек ке-

ларди. Ўғуз хон нима қилишини ўзи ҳам билмай отдан тушиб, Бўз бўри билан рўбарў туриб қолди:

— Гуноҳимни кеч, Бўз бўри! Эй улусимнинг қўриғбони! Онам, отам, оғам, йўлим бўлган бўри! Бир пайтлар жаннати отамнинг олдидаги сен ҳақингда ёмон гаплар айтган, сени шунчаки қўйлар кушандасига чиқарган эдим. Хон отам сени мендан кўра яхшироқ тушунар экан. Бир куни менинг олдимга тушиб йўл бошлашингни англаб етмай, сенга ўқ узган эдим. Сенинг уруғимиз аъзоси сифатида қўқдан тушиб келганинг ҳақидаги Қам отанинг гаплари тўғри эканлигини энди англатдинг менга! Тилингни энди тушундим! Айтганларинг, айтмоқчи бўлганларинг шу қадар муҳимлигини энди англаб етдим. Мени кечир. Сен кечирсанг, Тангри ҳам кечиради.

Бу гапларни айтар экан, Ўғз хон ҳайратга тушди. Қўқисдан унга шундоқ туюлдики, гўё қаршисидаги манави бўри ўзи Иссиққўлда қояларга сиқиб бориб ўлдирган бўрининг айни ўзидир... Бунинг ҳам қўзларида инсон қўзлари каби билгисиз бир кадар, айни пайтда ўзига жалб этувчи бир раҳм-шафқат ва марҳамат бор эди.

Ана шундай хаёллар оғушида ҳалигача тиз чўкмаган Ўғуз хон тиз чўкди. Курч, салобатли гавдаси билан бўрининг қаршисига чўккараб ўтириди. Тиз чўкиб ўтирганида ҳам бўйи бўрининг бўйидан бир қарич баланд эди. У бўри билан ёлғиз қолган эди. Қўзлари унинг қўзларидан, узун соchlари унинг ёлидан фарқ қилмасди. Ўғузнинг яшилтоб қўзларида йиллар бўйи қўрмаган түгма кишисини, қариндошини топган инсон меҳри, севинчи порларди. Ўзига қолса оғушини кенг очиб бўрини кучиб олар, юзига бошиб, Қилбарак билан бўлган жангда йўқотган барча йигитлари, алпларининг алами учун дод солар, хўнгир-хўнгир йифларди. Жангда йўқотганларининг ўрнини негадир энди, муваффақиятсиз урушда унга зафар тиламаган Бўз бўри билан юзма-юз қолгандагина қаттиқ ҳис этди. Аммо унинг бу изтиробига Бўз бўрининг ундан қочмай, қўрқмай шундоқ қаршисида туришидан туғилган бир севинч ҳам қоришиб кетган эди.

— Кел, танишайлик, гаплашайлик сен билан! Бундан сўнг сен бошламаган йўлдан юрмайман! Сени олдимда қўрмасам бир қадам ҳам босмайман! Тангirim менга ёр

бўлса, сен менинг қариндошим бўласан! Билагимнинг кучи, қўзимнинг нури бўласан. Абадий омон бўл! Уруғимдан бири бўлиб қол!

Бўз бўри ҳам Ўғузникига ўхшаш кўзлари билан унга тикилар, эҳтимол унинг гапларини тушуниб турар, довруғи ер юзини тутган бир Бўри фарзандининг охирига келиб ўз олдига тиз чўкиб турганидан севинарди. Ҳа, бўри тушунган, ҳамма сўзларини тушунган эди! Бу сўзлардаги изтиробни, аламни, сўнгсиз муҳаббатни англаб етган эди. Мабодо у тил чиқариб гапирса, худди шу Ўғузхоннинг тилида гапирав эди. Бу нигоҳларнинг тилини Ўғуз хон жуда яхши билар, яхши англарди. Гуё Бўз бўри йиллар мобайнида мана шу суҳбатни кутган эди... Бўри Ўғуз хон чўчи-масин дегандек аввал ерга ётди, йирик, кўркам бошини олдинги оёқларига қўйиб қаршисидаги кишига бошдан-оёқ назар солди, сўнгра ёш боладек эмаклаб Ўғуз хон томон кела бошлади. Гуё ўлжасини чўчитиб қўймаслик учун ер бағирлаб келарди. Ўғуз хон Бўз бўрининг унга ўлжа каби боқмаётганини ҳис этиб турарди. Эрта тонгдаги бу тасодифий учрашувнинг Тангри билан боғлиқ эканлигини ҳам билар эди. Тангрига илтижо, юкунч қилган пайтларида унинг бутун вужудини муққаддас туйгулар қамраб олишига сабаб ҳам шу эди... Кўзларига севинч, юрагига фараҳ тўлган эди. Бўз бўри Ўғуз хоннинг ҳеч бир ҳаракатини кўздан қочирмасдан секин яқин келди, хуркмасдан, бирорта туки ҳам титрамасдан бошини Ўғуз хоннинг тизига қўйди. Хоқоннинг кўзларидан ёш сизиб чиқди. Секин бўрининг бошини силади, қўйнинг бели каби кенг, жундор курагини сийпалади, сўнгра унинг бошини кўтариб, ўтакани ёргудек кўзларига тўйгунча боқди. «Бу бўри пустининг ичидан ҳам инсон фарзанди бор», – деб ўйлади. Кўзлари ҳам худди инсонникига ўхшаш, қўрқув нималигини билмайдиган, дадил кўзлар эди. Оний бир лаҳза ичидан Бўз бўри билан боғлиқ барча ривоятлар, нақллар, турк наслини тўратиб, қўриб-асраб, кўпайтирганлиги ҳақидаги ҳангомалар хаёлидан яшин каби ўтди. Ана шундай бир туйғу оғушида узун қўллари бўрининг бўйнига чирмашди. Уни бағрига босиб шивирлади:

– Тангри сени асрасин, Бўри қариндошим!

Бу ҳол худди туш каби бир лаҳзада бўлиб ўтди... Бир

нече дақиқа ўтмай, Бұз бүри бутун күркү салобати, ваҳимаси билан оёқда турар, Үғуз хон от устига қайтган эди. Бұз бүри ұзларини излаб келаёттан кишиларни сезган заҳоти сапчиб оёққа турған эди. Чиндан ҳам, хоқоннинг «Мени ёлғиз қолдириңг!» деганига қарамай қўриқчи алп-лардан бир дастаси сездирмасдан унинг ортидан келган, юлғун буталари орасида Бұз бүри билан гаплашиб турған Үғуз хонни кўрганда тиллари танглайларига ёпишиб, қотиб қолган эдилар. Хоқон ва Бұз бүри оёққа қалқанини кўриб шоша-пиша отларини ортга бурдилар. Аммо энди фишт қолипдан кўчиб бўлган эди. Хоқон билан Бұз бўрининг учрашувини ярмида бўлиб қўйган эдилар.

Үғуз хон қайтар экан, қўшиннинг олд жабҳаси алла-қачон бу учрашувдан хабар топған эди. «Үғуз хон билан Бұз бўри кўришдилар, сұхбатлашдилар, қучоқлашдилар!..» деган хабар эл ичиде елдек тарқади.

Үғуз хон ортга елиб келар экан, маҳкам сиқилган бўрининг калласидек муштлари бош узра олдинга чўзилган эди. У жилмайиб деди:

— Бұз бўрини шарафлайлик, беклар!

Бұз бўри тепалик ортида бу гапларни тинглаб ўтирадар эди.

* * *

Бу гал қуёш сўлдан чиқди, кўч ҳам сўлга бурилиб, карнай садолари, қўс, қобирға¹, довулларнинг гум-гуми остида Бұз бўрининг увиллашига ўхашаш бир сас билан қуёшни қаршилади. Итил Каспийга қўйиладиган жойнинг ўнгидан ўтиб, денгиз ёқасидан бўлмаса-да, унинг яқинлигидан илгари юриб, қаршиларидан чиқсан дарё қирғоғи бўйлаб кетдилар ва ўша пайтлар Қамар денгизи ҳам деб аталган Қора денгизга юз тутдилар. Улар худди мана шу ерда, қамарларнинг эски юртларида улар билан ҳисобкитоб қилмоқчи эдилар. Кечиб келган ерлари ҳам Орол бўйлари, Устюрт каби дашт эди. Кунботар томон юрганлари сари узоқдан Қазилиқ тогининг булутларидан фарқ қилмайдиган тепаликларининг уфқа туташ чизгилари кўзга ташланаркан, манзара аста-секин ўзгариб борар, қум саҳролари ўрнини бўлиқ пичанлар, ўт-ўлани от қорнига

¹ Қобирға — ноғора тури

чиқадиган ўтлоқлар эгаллаб борарди. Сурувлар, йилқилар түйгөнчө ўтлаб, роҳатланарди.

Ўғуз хон ёғийлар билан жант қилаётганида унга илкис ортдан хужум қилиб қоладиган, бир тилда гаплашсаларда, бирликдан қочиб юрган қамарларнинг изини топмоқчи эди. Қора денгиз яқинида олтин чодирини қурди, эл ҳам шу ерда қароргоҳ тикли.

Ўғлонлари, қўшин бошлиқлари денгизгача бориб келишиди. Лекин қамарлардан хабар берадиган киши топилмади. Юртларини қолдириб, фойиб бўлган эдилар. Кимдан сўрасалар: «Жанубга томон кетишиди!» – деб жавоб берди. Ўғуз хон янгидан кунчиқарга бурилди. Қазилиқнинг шимолий этакларини кеза-кеза, йўлларни излай-излай илгариладилар. Қамарлар бу тоғларга кириб, дараларга сингиб кўздан фойиб бўлишлари мумкин эмас, жанубга кетганлари аниқ эди. Лекин қайси йўл билан? Қора денгиз бўйларида из қолдирмаган эдилар. Довонлардан ошиб кетган бўлишлари мумкин. Бироқ бу ерларда яшайдиган маҳаллий аҳоли уларни кўрмаган эди. Энди фақат битта йўл қолган эди.

Ўғуз хоннинг қулоғузлари кўчдан илгарилаб борган жойларидан турфа хабарлар келтирадилар. Қилбаракнинг яксон этилганини эшитганлар ваҳимага тушган эди. Чўлда яшовчиларнинг аксарияти тушунарли бир тилда гаплашадиган улуслар эди. Улар кўчни севинч билан қарши олар, от, мол-ҳол, қўй-қўзи туҳфа қилиб кузатиб қўярдилар.

Сафар давомида ўнг томондаги тоғлар кўчга йўл кўрсатиб борар, Каспийга яқинлашган сари қўшиннинг йўли жанубга бурилар экан, денгиз билан тоғ оралиғидаги бўлиқ ўт-ўлан, сувга мўл далалар тобора торайиб борар, эски йўллар Каспийнинг кўм-кўк сувлари кўриниб турадиган тоғ ён бағрига бошлаб борар, даралардан кечиб ўтар, сўнг яна текисликларга эниб тушар, оппоқ кўргонлар каби қаршини кесиб турган қорли тепаларнинг этакларига уланиб кетарди. Тоғ этакларининг кўзни қувонтирадиган ям-яшил ўт-ўланлари орасида онда-сонда бутларни эслатадиган, жониворларга ўхшаш қоятошлар чүнқайиб турарди. Ўғуз хон бундай қоятошларни Селенгада, Ўрхон атрофаларида кўрган эди. Эҳтимол шундандир, бу жойлар унга туфма, гўё бир карра яшаб, қўниб ўтгангандек туюларди.

Тор Кечид ёхуд кейинроқ дунёга келган тоифалар Дарбанд деб атган, жанубга кетадиган барча йўлларнинг кесишув нуқтаси бўлган чоғроқ қалъа хабарини Ўгуз хон қадимий маълумотлардан билар эди. Қалъага яқинлашган сари экин-тикин ерлари ҳам жонланиб борарди. Ўнг томонда юксалган боши қорли, кўкси ўрмонли, этаклари ям-яшил ўтлоқлар билан қопланган тоғлар Ўгуз хоннинг руҳини яшнатиб юборган эди. Гүёки қўч бутун йўлни ана шу тоғларга қовушмоқ учун босиб келган эди. Фақат энди неча йиллардан бери яйловларни сайр этмагани, муқаддас жойларга қурбонлик қилмагани ёдига тушди. Кечидга яқинлашган сари қаршидаги қорли чўққилар янада баландлашар, бу салобати билан гўё «Мендан ошиб жанубга ўтиб бўлмайди», — деяётгандек туюларди. Тоғ этакларидағи экин-тикин ерларида қўч пайдо бўлганини кўрган ерли аҳоли далалардан, боғ-роғлардан чекиниб кетардилар.

Услу Хожа Ўгуз хонга:

— Тоғликлар отни яхши қўришади, Улуф хоқон. Амр эт, қўчни яхшилаб қўриқлашсин, — деди.

Ўгуз хон хаёлга берилган эди:

— Келгуси ёзгача шу ерда қоламиз. Жанг қилиш истагим йўқ. Ўзлари келиб итоат этишларини кутиб турман, — деди.

Экин-тикинидан ажраб қолган қалъа ҳалқи бир неча ой чидаса ҳам, лекин охири элчи жўнатиб, хоқонни қалъага таклиф қилишдан бошқа чора топмадилар.

Баҳор олди қалъа элчилари оқ байроқ кўтариб Ўгуз хоннинг ҳузурига келдилар. Ҳадя, армуғон сифатида тўққизта зўр от келтирдилар. Ўгуз хон элчилардан сўради:

— Бир неча ойдан бери шу ердамиз, нега ҳузуримизга аввалроқ келмадингиз? Қучингизнинг озлигини кўра-била туриб, нега итоатсизлик қилиб, бизни менсимадингиз? Уларга қарши тура оламиз, деб ўйладингизми?

Элбоши деди:

— Буни қалъада тушунганлар бўлгани каби тушунмаганлар ҳам бор. Ўшаларнинг нотўғри гапига кириб кела олмадик. Сўнгра доно кишилар ўртага чиқиб, ўгит бердилар, нима қилишимиз лозимлигини тушунтирудилар. Итоат этишни, қон тўқмасдан бир битимга келишни маъқул кўрдик ва хизматингизга келдик.

Ўғуз хон сұради:

— Бу тоғларда яшайдындарнинг ҳаммаси ҳам сиздек сүзлашадими?

— Йұқ, биз тилини тушунмайдынлар ҳам бор.

Ўғуз хон деди:

— Модомики, айбингизга иқрор экансиз, мен ҳам сизни кечираман. Қалъадан ўтиб кетаман.

Шу пайт отбоқарлардан бири Ўғуз хонға күчдан бир йилқи от ўғирлаганини хабар қилди. Йилқи билан Ўғуз хон ёқтирадын отларни ҳам олиб кетишганди... Сутдек отлар...

Ўғуз хон «отлар топилмаса қалъани вайрон этишини» айтди.

Бутун тоғларни излаб, ниҳоят, отларни топиб келтиришди. Сұнг құшин ўрнидан жилди. Қалъа дарвозалари очилди. Дарбандлыklар бу мисли күрилмаган күчнинг томошасига чиқиши. Хоқоннинг суворий құшинлари ва бош-охирі күринмайдынан күчи дарбандлыklарнинг ўтасини ёрди. Бироқ Ўғуз хоннинг чехрасини очиқ күриб құнгиллари таскин топди. Ўғуз хоннинг суворий бошлиқлари олдига келиб, құшинга құшилиш истагини билдирған қалъа йигитлари сафга олинарди. Ўғуз хон қалъага бошчилик қилиш ва хирож тұплаш учун нойиб тайнилаб ўтиб кетди.

ЭСКИ ВА ЯНГИ ЮРТ

Бу Самарқанд билан Балх орасидаги дафъалар-ла ўтилған темир дарвозали Дарбанд эмас, Қазилиқ билан Каспий орасидаги кечик эди. Кассулар, құтлар, модарлар, сумерларнинг юртларига, Ассирия, Митанна, Сурия, Ливия, Фаластиң ва Миср томонларға очилған дарвоза эди. Бу – Жануб билан Шимол кесишгандай жой эди.

Ўғуз хон Қора денгизнинг шимолини ёқалаб ўтадын йүллардан, келтлар, финикиялыklар, баласақлар, этруслар, эллинлар юртига борадын йүллардан ҳам хабардор эди. Ер юзини ел каби айланиб кезиб юрадын саїёхтарнинг, одамларнинг кунботар томонда яшайдын улуслар ҳақидаги суҳбатларини айтмаганда ҳам, гарчи шунинг үзи ҳам ер юзининг ҳар пучмоғини таниб-билиб олиш учун кифоя эди, бунинг устига карвонлар аста-секин, бироқ

замонанинг ўзи каби тин олмасдан ер юзининг у чекка-сидан бу чеккасига, бу чеккасидан у чеккасига қатнар, улар кийим-кечак, озиқ-овқатдан кўра кўпроқ фикр, та-саввур, билим, маълумот ташир эдилар. Ўғуз хон ўз уру-фидан бўлган алп эрлар ер юзининг энг узоқ гўшаларига ҳам тарқаб кетганидан севинар, фақат уларниң мусофири-чиликда яшашларидан сиқиларди. Унинг фикрига кўра бунинг илдизи битта – инонч билан эл бирлигининг йўқлиги эди. Узоқ йўллар юракларни ҳам узоқлаштириб кўйган эди. Тангри уларни қуш каби озод яратган бўлса-да, бу озодлик келтирган изтироблар ҳам кўп эди. Ер юзи уларниң иродасига эмас, Тангри иродасига боғлиқ эди. Кунчиқардан Кунботаргача бутун саҳролар, энг юксак тоғлар уларники эди. Албатта, бу бепоёнилик ҳам кифоя эмас эди. Чўлларниң юзи йилдан-йилга сарғайиб борарди. Улусниң экинчиси билан аскари, чўпони билан сав-догари, яйловдагиси билан кентдагиси тобора бир-биридан узоқлашар, турмушлари билан бирга феъл-атворлари ва тиллари ҳам ўзгариб борарди. Тангри Ўғуз хонни бу бего-налашувни тўхтатмоқ, эл-юртни, уруғ-қабилаларни яккаю ягона Тангрига боғлаш билан бирга уларниң ўзларини ҳам бир-бирига боғлаш учун яратган эди. Ўғуз хон ҳудуд-дан ҳудудга ўтган сари яратган унинг гарданига нақадар оғир юк қўйганини янада яхшироқ англаб етмоқда эди.

Балки Тангри ўч олаётгандир улардан. Уни унугланла-ри, арzon заминий ашёларга, қурама тангричаларга, бут-ларга топинганликлари учун. Балки улус Қўқ Танрини та-ниб олса, Ўғуз хонниң измини тутса, кўк юзи очилиб кетар. Буни Тангрининг ўзи билади.

Тор Кечиддан ўтиб, Кунчиқарга юрган сари сўл то-монларида бутун турк элларининг севимлиси бўлган Кас-пий денгизининг кўм-кўк сувларини, ўнгга боққанда ранг-баранг яйловларини, Олтойларни, Олатовларни эслатиб юборадиган боши туманли тоғларни кўрганида Иссиққўл ёқасини, Эркўнни, Қам Отани хотирлади. Дунёниң ва яралишниң бутун тарихини биларди Қам Ота. Уни тингла-гандан ер юзининг сирлари бирма-бир очилар, Ўғуз улуси-ниң Тангри томонидан севилган, сара бир улус эканлиги-ни янада чуқурроқ ҳис этар ва севинар эди. Айни замонда бу туйғу ичидаги изтиробларни кувиб чиқара олмасди.

Кўкларда Тангри бизни синамоқда. Эндиликда Торим кумликлариға боққан бирор-бир кимса қадим замонларда бу жойлар ер юзининг энг кўркам бир маскани бўлганини, инсон фарзандига кўқдан илоҳий билимлар нозил бўлганини, ўша олис, муқаддас замонларда яратилмишнинг яратмиш билан ҳар куни алоқа қила олганини, амали, билими билан бутуннинг тасавурига ҳам сифмайдиган нарсалар яратганини, ернинг усти у ёқда турсин, остида ҳам муҳташам кентлар бунёд этганини қаердан ҳам билсин? Бу жаннат гўшаларни биз қурган эдик!.. Шимолда Олтойлардан, жанубда Танқутдан, Тибетдан бошлаб юз минг, минг-минг аршин узунликдаги еrostи дарёлари, коризлари бор эди Торимнинг. Тоғларнинг кўз ёшидек тиниқ сувлари эндиликда Такламакон деган даштга олиб чиқилган эди. У ер ости дарёларини ким бунёд этган, қачон бунёд этган – ҳеч ким билмасди. «Ер юзининг барча дарёларидан узун эди у коризлар. Қаердан келишини, қаердан бошланишини биз ҳам билмасдик. Аммо «бизнинг ота-боболаримиз яратган бу коризларни», – дер эдилар... Сув ва тупроқларнинг, Тангриларнинг тилини биладиган бир халқ эдик. Яралмишдан бери келаётган барча билимларни, сирларни мингларча, ўн мингларча битикларда, лавҳаларда асраб келар эдик. Кўкларнинг марҳамати, манглайдаги битилгани билан юксалдик, довруқ-шонимиз дунёни тутди. Хўш, кейин-чи? Кейин нималар бўлди? Кўклар нега бизни синдириди? Гуноҳимиз не эди? Башар шажарининг илдизи, боши бўлганимизми? Биринчи бўлиб яралганимизми? Буюклигимизми? Селдан-дўлдан, қорёмғирдан, қуёшдан кўрий олганларимизни бутлардан ҳам кўрий олдикми? Оққан сувларимиз оқмас, очилган гулларимиз очилмас бўлди, бошимизда ўлим кўлкасини ҳис этганча бунинг боисини ахтармоқقا тушдик, минг йиллар мобайнида яратилган битикларимизни Торим дарёси бўйларида қурган еrostи саройларимизга, ари уясига ўхшаган мағораларга бекитдик, бироқ уларни қум селлари босиб қўйди... Кўкларнинг ғазабидан, манглайдаги ёзувдан, бутларнинг дастидан қочиб сўнгги денгизларни ҳам кечиб ўтдик. Эски юртларимизнинг хотираларини ўша ерларга ташидик, янги жаннат гўшалари яратдик. Афсуски, бутлар ўша жойларда ҳам биздан қўл тортмади. Дарёлар

тошиб юртларимизни босди. Ҳар куни бир хонадонни вайрон этди. У ердан жанубга, янада кенгроқ жойларга күчдик. Ерли кўчманчилар билан қоришиб кетдик. У ерларда ҳам кентлар тикладик, сойлар чиқардик. Ер юзининг энг буюк кашфиётларини қилдик, ёзувни, билимларни яратдик. Бироқ оёқ остидан чиқсан фалокатлар у ерда ҳам бизни тинч қўймади. Улар қувди, биз қочдик. Бу гал экин-тиқиндан юз ўтириб, қушлар каби озод яшаймиз, сел-сув олиб кетадиган ҳеч нарса сақламаймиз, дедик. Чўлларга кўнгил қўйдик. Тўшагимиз – ер, кўрпамиз осмон бўлди. Ўзимизни яратганинг ихтиёрига топширдик, нима қилса қилсин, дедик. Чалабийлар, бутпарастлар инончимизни йўқотмоқчи бўлдилар, сувимизни тўсдилар, бу ерда ҳам чўлларимизни қурғоқчилик босди. Туганмас бир кураш, сўнгсиз бир синовдир бу!

Ўғуз хон ҳамон ўйлар эди: «Қам Ота тўғри айтарди. Биз ҳамон омадсизлик оғушидамиз, ундан қачон қутулишимизни билмаймиз».

Қам Ота тағин нималар дер эди? Айтардики, биз озодлик шайдоси бўлганимиз учун ҳам сочилиб кетдик ер юзига. Ерни яхлит кўрмоқчи бўлдик. Улкан саҳроларни пиёда-яёв кечиш мушкул бўлганидан от билан дўстлашдик. У бизнинг қанотимиз бўлди. Худди шу қанот билан учдик, кунчиқардан кунботаргача оёғимиз тегмаган жой қолмади. Чўллар яшаб бўлмас ҳолга тушиб қолгач, юз мингларча турк селлар каби Чин, Ҳинд сари оқиб кетди... Тангри жонзотларига шафқат қилмаган оч, совуқ, паноҳсиз чўллардан қочиб кетдилар. Кетаркан, эски турмушларидан, урф-одатларидан, қисматдан, чўлдан, ўз илдизларидан, ўз халқларидан бутунлай воз кечиб кетдилар... Ўтганлардан неки қолган бўлса, ҳаммасини улоқтириб ташламоқчи бўлдилар... Ўзимиздан тарқаганларнинг ўзимизга қарши чиқиши оғир аламдир.

Илк бор қадам босаётгани бу ерларда Қам Отанинг сўзлари нега миясидан ҳеч чиқмаяпти, ўзи ҳам билмасди. Киндик қони томган ерларидан узоқлашгани, ер юзининг бепоёнлигини кўргани сайин уругининг ўтмиши, келажаги кўпроқ ўйлантирас эди уни.

Хозир бораётган йўли ота-боболарининг йўли эди, бу йўлдаги сафарлар ҳеч қачон бир томонлама бўлмаган. У

буни ҳам биларди. Бу йўл туркнинг шоҳ томири эди. Минг йиллар аввал ҳам бу унинг гавжум йўли эди, бутун ҳам...

Қам Отанинг унга англатмоқчи бўлганлари ҳам эл-юртнинг ўтмиши билан боғлиқ сирлар эди. Бу йўллар қаердан бошланади, қаерлардан ўтади? Ўша олис замонларда бўлиб ўтган воқеаларни қўриб-асрайдиган бирор маълумот, бирор лавҳа топилиб қолармикан? Бешигимиз бўлган ҳеч бир ердан риштамизни бутунлай узиб кетмаганмиз, қаерга юзланиб бормагин, тағин ўз улусимиз вакиллари чиқади қаршингдан, бироқ улар сон-саноқсиз жангларда қирилиб камайдилар, ўксиз ва мададсиз қолдилар. Бирлашиб яхлит эл бўла билмай, тепаларидаги бошқа бир ҳукмдорга тоқат қилиб яшайдилар. Бошларига тушган балоқазоларга чидаб, яна қанақа фалокатлар ёғилишини куттиб кун ўтказадилар.

Ўғуз хон ўзи оёқ босган бу юртларда йўқотган дунёларини янгидан қуражагига, улусининг қадимий салобатини, довруқ-шонини қайтаражагига ишонар эди.

Бу аввалги юришларга ўхшамаган, муқаддас бир юриш эди, олтин, мол-дунё, кийим-кечак, озиқ-овқат ҳарислиги эмас, унутила бошлаган, охирги аломатлари Қам Ота билан йўққа чиққан олис, сирли дунёни томирларида гувиллаб оқаётган, қонларида уйғонган бугунги дунё билан қовуштиromoқ истаги эди. Эҳтимол, олдинда кетаётган Бўз бўри ҳам шунга даъват этаётгандир; у Инжу ёқасидан чиққанларидан бери ўтган узоқ йиллар мобайнида ундан айрилмаган, энг қийин юришларда ҳам олдинда борган, йўл қўрсатган, хоқоннинг ва йигитларининг руҳини, фикрларини алғов-далғов қилиб юборган эди.

Тор Кечиддан Жанубга йўл олганларида қаршиларидан чиқиб қоладиган қоровул бўлукларнинг уларга кучи етмасди. Кичик-кичик овулларда яшайдиган аҳоли эса уларни ёрдам ва тинчлик умиди билан қарши олардилар.

Ўғуз хон ўғрилардан қайтариб олинган сутдек оқ отининг устида бўлса ҳам, гўё от устида эмас, ўзига ҳам охиригача маълум бўлмаган бир муқаддас парвозда, бир руҳ қанотида, нотаниш ерларга эмас, нақ Тангрининг ҳузурига бораётгандек ҳис этарди ўзини.

Тетапоя бўлгандан бери отдан тушмаган ўғиллари ҳам унинг қаватида эдилар. Уч кунлик йўлдан сўнг баҳор тош-

қинлари уйғотиб юборган бир дарёга келиб тұхтадилар. Сел дарё устидаги эски ёғоч күпrikнинг бир қанотини ювіб кетген эди. Соҳилдаги дараҳтларни қулатыб, иккі кунда күпrikни аравалар үтадиган қилиб тикладилар. Сұнг болуд, писта үрмөнләридан, арпа, буғдой далаларидан, олмазорлардан үтдилар. Толиққан овуллардан бир-иккитаси шу боғлар орасига юрт солиб қолди. Бу ҳам бир анъана эди. Улар Үзүз низомини буза олмасдилар, судралиб юриб күчни ортга тортгандан күра бир йұла узилиб қолғанлари яхши эди.

Денгиздан чиқиб келған кун шуылаларida ял-ял ёнған қорли тоғ чүққилари Үзүз хоннинг бутун вужудини орзиқтириб, англашилмас бир түйғу ичини үртаётган бүлса-да, лекин үзи учун ҳам номаълум бүлған бир манзил сари дағват этаётган орзу янада кучлироқ эди. Элнинг қисмати, күклардан, Тангридан келған амр уни илгари бошларди.

Бир тоғ этагида қурбонлик қилаётғанларға дуч келдилар. Бироқ қурбончилар даҳшатли күч яқынлашиб келаётганини күриб, отта минғанча тоғ томон қочиб кетдилар. Олдинда бир маъбад, муқаддас, ялавочлар номи билан боғлиқ бир жой борлигини кузатувчилари Үзүзга илгарироқ хабар қылған эдилар. Ялавочлар билан боғлиқ бұлса, демек, бу Үзүз хонга муносиб жой экан. Бу қадар машаққатли йүллардан, оғир жанглардан сұнг илк бора унинг юрагида Эркүндагига үхаш бир түйғу оловланди. Олисолислардан күзға ташланиб турған, от ёли сингари қаварық тошға айланиб қолған қоялар уни үзига чорларди, қурбонликнинг бу қоялар этагида қилинишини, бу ердаги қадимий иморатларни күрганда қоялар уни үзига ажиб бир жозиба билан тортишида Тангри билан боғлиқлик борлигини англади. Құлинин юқори күтарди. Күч тұхтади. Эл уловидан тушди. Құп үтмай тоғнинг яшил этакларидан денгизгача бутун адирларни оқ чодирлар қоплаб олди. Үзүз хон үз чодирини юқорига, қояга тақаб тикдирди, сонсаноқсиз қўйлар қўйилди. Дарагини анчадан бери эшитиб келаётғанлари, кузатувчилар аллақачон бориб қайтгани Исмаха номли турк улуслари яшайдиган шаҳарға элчилар жұнатылди: «Дунёгаadolat нурини сочиб келаётган Үзүз хон урушни истамайди, бош эгиб, алоқа үрнатишиңгиз-

ни хоҳлайди. Биз мардларча жанг қиласиз, ортдан тиф санчмаймиз! Қаршимизда ҳеч ким дош бера олмаслигини биласиз. Бизга қўшилингким, бегона душманлар устига янада кучлироқ бўлиб борайлик...»

Ўғуз хоннинг элчиларини иззат-икром билан қарши олдилар. Жуссаси кўзни қувонтирадиган бир даста от ҳадя этдилар. Ўғуз хонни қалъа ташқарисида, тўй-тантана билан кутиб олдилар. Кўч ўн тўрт кун шаҳарнинг жанубида қароргоҳ тикиб турди. Тошлардан тикланган қалъа, гўзал саройлар бу ернинг қадим замонларга бориб боғланадиган машҳур жой бўлғанлигидан дарак берарди. Исмах уруфи очиқкўнгил, жасур кишилар экан. Ўғуз хонни хурсандлик билан қарши олган бўлсалар-да, унинг баъзи димоғдор аскарларининг шаҳардаги ўзбошимчаликлариға чидай олмадилар. Бир нечасини тутқун этиб, хирож беришни тұхтатдилар. Ўғуз хон олдинда турган оғир жангларни ўйлаб, урушдан қочди. Ўтин йиғдириб дарвозаларни ёндирса ҳам қалъани олиб бўлмаслиги аён эди. Шаҳар оқсоқоллари аскарларни тутқун этган қизиққон йигитларга танбеҳ бериб, битимнинг бузилганлигидан хафа бўлдилар. Янгидан элчи жўнатиб, сулҳни қайта тикладилар. Хирож жўнатиб, энди орани бузмасликка ваъда бердилар.

Исмах беги қизи Сўлмасни Ўғуз хоннинг ўғилларидан ёки саройга яқин қўшин бошлиқларидан бирига бериб: «Бирлашсак, қонимиз қўшилса», – дейишни истарди.

Услу Хожанинг ўғли Эрдам Ўғуз хон билан бирга саройга бораркан, ташриф буюрган сарой хонимлари орасида ҳаммадан ажralиб турган, илк қараашдаёқ ўзига хос нуфузи аён бўлган, охирги зиёфатда гўзаллик Тангриси каби порлаб турган, элбегининг хотини билан ёнма-ён ўтирган, бир оздан сўнг унинг қизи эканлиги маълум бўлган тоғ чечагига ўхшаш Сўлмасни кўриб, шундоқ ҳам унга шайдо бўлиб қолган эди.

У отасига кўнглини очди. Кутлуғдан кейин уруфининг тақдирни фақат Эрдамга боғлиқ бўлиб қолганини билгани учун ҳам унинг ҳар бир қадамини кузатиб юрган, ёлғиз ўғелининг йилдан-йилга орқага суриб, ҳамон бўйдоқлигича юрганидан ташвиш чекиб, унинг уйланадиган кунига қурбонликлар атаган Услу Хожа севинчдан кулишини ҳам, йиғлашини ҳам билмасди. У Ўғуз хон ҳузурига борди. Эр-

дамнинг хоҳиши маҳаллий бек хоҳиши билан мос тушарди. Эрдам Сўлмасга уйланди.

Шундан сўнг Ўғуз хон ўз низомини ўрнатиб, энг севимли тангричилардан Тирик Бобони бу ерда элнинг каттаси, тўғрироғи, одамлар айтгани каби «Ўғузнинг кўзи» қилиб қўйиб, маҳаллий кузатувчилар кўрсатган йўл билан шаҳар этагидан оқиб ўтадиган дарё ёқалаб Кур – Ораз қўшиладиган жойга етди, аммо иссиқлиги боис бу ерга қўнмади. Дарёларни кечиб, қадимий турк йўли билан жанубдаги булутлар оғушида ётган тоғлар сари юрди.

Ўғузнинг тангричи «бобо»лари ер юзига сочилиб кетган эди, бугун ҳам ер юзида уларнинг сон-саноқсиз излари, сўнгти оромгоҳлари, маъбадлари қўриниб сақланмоқдадир...

САВОЛОНДА ИЛК ЁЗ

Олти кундан сўнг сийрак ўрмонли чўллардан, экинзорлардан кечиб ўтиб, Саволон яйловларига чиқиб борищди. Чўл булутсиз бўлганидан бу ерда Каспий сувлари кўзга яққол ташланиб турарди. Кўч қўнган яйловлардан денгизга эниб борадиган тоғ силсилалари, ўрмон билан қопланган доvonлар йўлсиз, изсиз, ўтиб бўлмас бир ҳолда эди. Яйловнинг ўртасида Саволоннинг қовун тилими каби қорли тизмалари кўзга ташланарди. Кўч Хазаргача чўзилиб кетган ўрмонлардан бошлаб Саволоннинг қишин-ёзин эримайдиган муз тоғлари қадар, булоқлари жилдираб, ирмоқлари шовуллаб жанубу шимолга ошиққан, ўт-ўланлари одамни яширадиган бутун яйловга сочилиб кетган эди. Ўғуз хоннинг олтин қуббали чодири яйловнинг тия ўркачидек дўнг бир ерига тикилган эди. Чодирнинг орти бургутлар макони бўлмиш чўнг қоялардан иборат эди. Қаршида ям-яшил ўт-ўлан денгизи чайқалиб ётарди. Бу ўт-ўланлар устига булутранг ўтовлар тикилган эди. Ўғуз хон чодирининг сўл томонидаги нишабликларда қадимий бутларни эслатадиган қоялар кунчиқар томон чўзилиб кетган эди. Гўё ер юзининг бутун жониворлари шу ерга йигилиб, тошга айланиб қолган эдилар. Эл йўлидан ажralиб чиққан бир сўқмоқ сўлга, кунчиқарга бурилиб, Ўтукен ўрмонларини эслатувчи сийрак дарахтзорлар орасидан ўтгач, яйловнинг Саволондан кейинги энг юксак тепалигига чиқиб борар, ундан ошиб кунчиқар нишаблигидаги юртлар сари чўзилиб ке-

тарди. Айтишларига кўра, бу йўл билан икки-уч кунда Каспийга етиб олса бўларди. У ердан сўлга бурилсанг, яна Муғон чўлига чиқасан. Узоқ йўл, Муғон жазирамаси Ўфуз хонни толиқтирган эди. Совуқ тушгунча шу ерда қолмоқчи эди. Тушдан сўнг эл беклари ва сарой аъёнларини шўланга тўплади. Бу ердан боши-охир кўринмайдиган қўшинини томоша қилиб юраги тоғдай кўтарилади.

Ўфуз хон деди:

— Беклар! Тангри тоғларининг, Олатонг экизи бўлмиш Саволонга келдик. Ер юзининг йўллари кесишиади бу ерда. Барча улуслар шу ерни муқаддас деб билади, шу ерга интилади, шу ерга келади. Тангри иродаси ила байроғимиз бу ерда ҳам юксалди, будунимиз бу файзли ерлардан ором топсин. Йўл чарчоғини чиқариб, кузги юришга ҳозирланинг!

Сўнг найзага бутунлигича ўтказилиб пиширилган кийик гўшти тортилди. Ўфуз бекларининг гавжум йигини бошланди.

Ўша баҳорда Ўфуз хон катта ўғиллари ва қўшин бошлиқларини, ҳар бирига бир туман суворий бериб, кунботарга, Кўкча кўлининг нариги томонига, Қора денгиз бўйидаги кўлухлар яшайдиган юртларга, шимолга, Озар кўлининг кунботар қирғоқларига жўнатди. Улар Ўфуз хоннинг ёрлигини бу элларга етказиш билан у ерларда яшайдиган уруғларни бирлашувга даъват этишлари керак эди. Қамарларни ҳам излаб кўрмоқчи эдилар.

Баҳор сўнгига Тор Кечиддан Қора денгизигача бўлган барча эллар жанг-жадалсиз, ихтиёрий равишда Ўфуз хон байроғи остида бирлашувга розилик беришган эди. Бу юришларда Ўфуз хон катта ўғилларининг қўшинни бошқариш салоҳиятини синовдан ўтказмоқда эди. Ҳар бирининг ёнига ишончли одамини қўйиб, сўнгра жанглар, музокаралар қандай олиб борилганини суриштирас, энг кичик тафсилотларни ҳам синчиклаб ўрганар эди.

* * *

Ёзниг илк ойида Ўфуз хон сара беклари ва аёнлари билан от бошини Саволонга сурди. Сўз олонми¹ ёки сув

¹ Сўзолон — сўз олган. Саволон номининг келиб чиқиши ҳақида сўз кетяпти.

қолган... Қайдан келиб чиқсан бу ном? У аҳд қилган, оти-ни Саволон бошидаги күлдан сұғармоқчи эди. Иккінчи томондан, Ота Үнгурга үхшаш жой ахтарарди. Ота-бобо-ларидан илк инсонга бешик бұлған топиноқ тоғлар қато-рида Саволоннинг ҳам номини эшитган эди. Уч кунлик йўлдан сўнг отлар уларни кутсол тоққа олиб чиқди. Тоғ бошида, тишлардек тизилиб турган қоялар орасида шаб-нам қаби тиниқ кўл сувидан ичди. Чодир қуриб, кундуз-лари ёндириган, кечалари музлатган тоғда салқинлаб, бир неча кун ором олиб ётар экан, олис юртларнинг тўққиз ой давом этадиган совугини эслади. Бу муздек сувлар билан ёнма-ён қайнаб чиқаётган иссиқ булоқлар тоғнинг ёнар бағридан отилиб чиқаётган қўшиқ, нағмалар эди гўё. Бу ерда эрталабдан кечга қадар йигитлари тош ёки тупроқ уйиб ясалган ҳовузчаларда ётиб олиб ҳордиқ чиқа-рардилар. Сўнг Ўғуз тоғнинг кунботар нишаблигига энди. Чўпонлардан, йилқибоқарлардан шу атрофдаги фор, ун-гурларни суриштирилар. Кўрганман деган киши топил-мади.

Умидларини узиб, яна жанубга, ўз қароргоҳларига қай-таётганларида қулаб тушган бир дараҳт тўнкасининг ёнида тошга суюнганича сибизға чалиб ўтирган бир чолга дуч келдилар.

Ўғуз хон сўради:

— Саволонда унгур йўқми, қария?

Қария сибизғасини тўрвасига солар экан:

— Саволон катта жой, хоқоним. Ким билсин? Сен бизнинг яйловларга қўнган Ўғуз хонсан, шекилли. Бизни оёқости қилганлар кам эди...

Ўғуз хон довдираб қолди:

— Биз оёқости қилмаймиз, қария, оёққа турғазамиз.

Қария пинак бузмади:

— Оёққа турғазишингизни истамаймиз, оёғимизни кесмасангиз бўлди.

Ўғуз хон қаҳқача урди:

— Сен бу тоғларга муносиб инсон экансан.

Чол қандайдир хаёлга бориб суҳбат йўсинини ўзгар-тири:

— Саволоннинг ҳар қадамида бир сарой вайронаси, бир қалъа бор. Фақат бир томондан қурилса, иккинчи

томондан яксон қилинади. Тирикларни излаб юрган бўлсангиз, қароргоҳингизнинг юқорисида, тоғ устидаги қалъани бориб кўринг.

Ўғуз хон отига қамчи босди.

Эртаси кун ўрдадан чиқиб, отларнинг бошини тоқقا қараб озод қўйдилар, суворийлар учун, от туёқларининг саси учун яралгандек бу йўлдан гўё булутлар томон учиб борар эдилар. Шу тариқа елдек югуриб, уч томони жарлик бўлган бир юксаклиқда папоқ каби тиккайиб турган қалъага бориб етдилар. Бу ерга фақатгина сўқмоқдан ажралиб, илондек узайиб ётган, жарлик устига олиб борувчи тор йўлак орқали чиқиш мумкин эди. Қалъанинг ташқи тарафидаги қоя қавариб чиққан, остида кўчки йўли бор эди. Кўчки йўлидан, фор этакларидан сувлар сизиб ётарди. Аммо бу ер яшайдиган жой эмасди. Қалъанинг кунчиқар тарафида Тангри томониданми ёки инсон қўли биланми яратилган одам бўйи ёриқлар бор эди. Улар ердан жуда баландда эди. Қалъа яхлит бўлиб, инсон қўли бунақасини қура олмасди. Аммо ичидা ҳаёт борлиги кўриниб турарди. Қалъа белини ўраб, ёриқдан ичкарига кетган сопол қувурлар олисдан ингичка камарга үхшаб кўринарди. Туби кўринмаган ўпқон устида, қалъанинг қўл етмас белида бу новлар, бу ариқ қандай барпо этилган, сопол қувурлар у ерга қандай қилиб ётқизилган, сув бу ерга қайдан, қандай қилиб кўтарилади – айтиш мушкул эди. Қалъанинг очиқ кўз каби кунчиқарга қараган тешикларининг бирида учларига тош боғланган, оёқ қўйиб чиқиш учун илгаклар қилинган иккита арқон осилиб турарди. Демак, Ўғузнинг келишидан чўчимайдилар ёки шуни кутмоқдалар. Ёриқ оғзида сочи соқолига қўшилиб кетган, бироқ бақувват, новча бир киши турарди.

У Ўғуз хонга юzlаниб:

- Марҳамат, буюк хоқон! Келишингизни билар эдим, – деди.
- Сен кимсан?
- Мен ҳам сен қаби Тангрининг бир қулиман.
- Бироқ менинг кунчиқардан кунботаргача чўзилиб ётган бир элим бор. Ер юзи байробимнинг кўлкасига сиғинади.

— Менинг эса мана шу қоп-қора ғордан бұлак ҳеч нарсам йүк.

Ұзи билан бир тилда, бу қадар дадил-дадил гаплаша-ётган бу киши Ұғуз хонга Қам Отани әслатди. Аввал Ұғузнинг икки соқчиси чиқди. Сүнгра ұзи худди қоплон каби юқорига күтарилди. Ичкари киришдан аввал қалъя тубида қолган бекларига күз ташлади.

Ұғуз хонғор әгасининг ёнига етиб бориб, иккаласи ердан бир қулоч күтарилган қүёшга юзма-юз туриб қолганида, әзтибор билан қараган киши уларнинг ғоят үхашалигидан ҳайрон қолган бўларди.

Пастда эканлигида ёнма-ён турган бир неча ёриқлар борлиги уни қизиқтириб қўйган, «Бир уйга бир эшик кифоя эмасми? Булар нега керак экан?» — деб ўйлаганди. Бироқ энди юқори чиққанидан сўнг бу ёнма-ён ёриқлар битта жойга олиб бормаслигини, ҳар ёриқ алоҳида хонага боғлиқлигини кўрди, айни пайтда бу яратганнинг иши эмаслигини, бу хоналар қўлда ўйилганини англади, бироқ, афтидан, бу иш шу қадар қадим замонларда қилинган эдики, йўнилган излар йитиб кетган, деворлар қорайиб, ташқаридаги тошлардан фарқланмайдиган ҳолатга келиб қолган эди.

Сўл томондаги киришдан хона ичига қадам босдилар. Оёқ товушлари Ота Мағорадаги каби қайдадир теранликларда акс садо берар, ичкаридан сув товушига үхаш шилдираш эшитиларди. Хона еловгай бўлиб, ёруғлик тушадиган бирор туйнук бўлмаса-да, мағоранинг олис-яқинлиги маълум бўлмаган тўридан кўнгилга баҳра берадиган бир шабада эсарди. Ичкарида ўчоқ ёниб турарди. Ұғуз хоннинг кўзлари қоронғиликка кўниkkанидан кейин тошлар юзасидаги тушунксиз чизги, тамфа ва белгиларни кўрди. Уй әгаси унга жой кўрсатди. Бу қўй териси тушалган тош эди. Фор әгаси жилмайди:

— Ёқмаса, бизни айблама! Бизнинг тахтимиз, ўтирадиган ўрнимиз юмшоқ эмас.

Ұғуз хон деди:

— Менинг тахтим — эгар. Ундан бу ер юмшоқроқ...

Гўё унгурнинг остки бир ёки бир неча қаватлари бордек овоз теранликларга ёйилиб кетар ва у ерда акс садо берарди.

Ўғуз хон:

— Бизнинг тилимизни яхши билар экансан, — деди.

Хона эгаси:

— Бу ота-боболаримизнинг тили, — дея жилмайди.

— Бизнинг улусданмисан?

— Озарларданман.

— Улар ҳам бизнинг элдан. Бу ерга бирга келдик.

— Элларга, улусларга хоқонлар номини бериш қадимий удумлардан. Сен билан келганларнинг барчасини Ўғуз эли, яъни сенинг элинг деб атайдилар.

— Бунинг сабаби маълум. Ёрлигни мен берганман. Яъни мен элнинг каттаси бўлганим учун ҳам эл меники. Ҳар бир киши менинг ўғлим, қизим, яқинимдир. Озарлар ҳам шундоқ.

— Чиндан ҳам оз қолдик. Бу қадар йўли машақатли, тақдири чалкаш элни топа олмайсан. Юз карра тўпланиб, тагин тарқаб кетдик. Агар сизнинг Тангрингиз уларни янгидан Муғонга, юртимизга, ҳамон номини сақлаб келаётган Озар кўлининг ёқаларига келтирган бўлса, унга шукурлар бўлсин!

— Яккаю ягона гўзал Тангримиз истаганини қиласди.

Сўнг Ўғуз суҳбатдошига қўз тикиб:

— Кимдан яшириниб ётибсан бу ерда? — деб сўради.

— Ўзимдан.

— Мени қайдан танийсан?

— Ер юзининг буюк инсонини ким танимайди?

— Кимсан ўзинг?

— Мен бир мағ бўламан! Ўтга топинаман, яратганга топинаман.

— Биз ҳам яратганга топинамиз. Яратган Тангридир. Улуф, ягона, гўзал Кўк Тангри.

— Сизнинг тангричи эканлигинизни биламан ва ер юзини яккаю ягона Тангри йўлига солмоқ истагингизни ҳам сезганман.

Ўғуз хоннинг товуши деворларга гурзи каби урилади:

— Бу шунчаки истак эмас, Тангрининг амридир. Онамнинг тилла каштали йўргагидан илк дафъа кўк юзини кўриб, миямнинг тарҳи очилди. Чодирнинг очиқ туйнуғидан бир парча осмон кўриниб турарди. У ердан бир даста нурнинг чодирга сизилиб тушганини кўрдим. Бу нур ичи-

дан бутун борлигимни қамраб олган бир күз тикилиб турарди менга. Бир боқиши билан хилқатнинг барча сирларини очиб ташлади. Сўнгра хоқонлик саройида тизилиб турган бутларни кўрганда шайтонни кўргандек бўлдим, улар менга инсоннинг ўз-ўзини масхара қилиши бўлиб туюлди. Ҳаммаси ана шундан бошланди.

Мағ деди:

— Қизиқ бўлган экан. Мен тушимда сенинг бу ерларга келишингни кўрган эдим.

Ўғуз хон кулди:

— Бизнинг қамлар бошқа бирорвнинг тушига кира олади. Оғир жангларда душман қархисини ўт, сув, бўрон билан тўсиб, уларни адаштириб, бошқа йўлларга солиб юборишни ҳам эплашади.

— Нил, Месопотомия коҳинлари, бизнинг мағлар, сизнинг қамларингиз, шомонлар – ҳаммаси бир булоқдан сув ичган. Изи йўқолиб кетган қадим замонларнинг сўнгги ивир-шивирларидир улар. Кўкларнинг тилини ёлғиз ўшалар билар эди. Ҳайфки, инсон фарзанди ўз қўполлигидан, вайронкорлигидан халос бўла олмади. Йиқитади, яксон қиласи. Иккинчи томондан бўрон-қасиргалар, ёнғинлар, зилзилалар ўтмишнинг барча изларини ўчириб ташлаётир.

Ўғуз хон ҳайрат ичиди эди. Мағ гўё унинг фикрларини ўқир, йиллар бўйи уни ўйлатган, юришларга давъат этган туйғуларини такрор сўзлаб бораётган эди унга. «Демак, хаёлот кишиларининг дарди ҳамма ерда бир хил, улар инсоннинг вайронкорлигидан, қадим замонларнинг тилини, низомини унугиб бораётганидан афсусдадирлар», – деб ўйлади у. Шу хаёл билан мағга деди:

— Инончингиз қанақа эканлигини билмайман. Лекин билишим керак. Хато қилмасам, сизнинг динингиз ҳам шунга унрайди. Эзгулик яратади, ёвузлик вайрон қиласи. Бу йўлингиз билан ёвузликнинг ёнини оласиз, унга ҳаёт баҳш этасиз.

Мағ титраб кетган каби бўлди, қўноғини диққат билан кўздан кечирди, юзини сезилмас бир табассум қоплади:

— Бу бизнинг истагимизга боғлиқ эмас. Кеча билан кундуз, туғилиш ва ўлим, яхшилик ва ёмонлик... Ҳамма нарсанинг икки қиёфаси бор.

Ўгуз хоннинг лабларига ҳам истеҳзоли бир табассум қўнди:

— Бирининг яратганига иккинчисининг кучи етадиган бўлса, икки баҳодир каби уларнинг жанглари абадий давом этадиган бўлса, демак, бу жангнинг фолиби бўлмайди. Бу Тангрининг иши эмас, унинг қулларининг ўйинидир.

— Йўқ, бу ер юзининг низомини сақлаш йўлидир. Биз ҳам бунга бас кела олмаймиз.

— Гап йўқ. Лекин улар Тангри деб аталмайди! Тангри низомни қўримоқ учун уларга шундай амр берган, уларни бир-бирига юзма-юз қўйган, уларни мангу жанг-жадал, кураш йўлига солиб қўйган. Тангри ягонаидир!

— Аммо сенинг Тангрингнинг бор-йўқлиги сезилмайди.

— Менинг Тангрим ягона бўлса-да, ҳисобсиз кўзи, ҳисобсиз қўли бор. Қуёш ҳам, ой ҳам унинг измида юради, унинг амрини адо этади.

— Сиз ҳам қуёшга ишонасиз, биз ҳам, сиз ҳам оловга ишонасиз, биз ҳам.

— Тўғри, биз оловни покловчи куч деб биламиз, бегона эллардан келганларни оловдан кечирмай яқинимизга йўлатмаймиз. Биз ҳам қуёшга топинамиз. Бироқ биз оловга, қуёшга, тупроқقا Улуф Тангрининг кўзи, қўли, оёфи, бир парчаси каби қараймиз. Улуф яратганинг унутсанг, оловга ишончингнинг сопол, тош бутлардан фарқи қолмайди.

Мағ ўз суҳбатдоши фикрининг теранлиги, сўзининг тугаллиги қаршисида шошиб қолган эди. Жангари, сўздан кўпроқ қиличга ишонган, купол бир кишини кутгани ҳолда дунёning баланд-пастини биладиган буюк бир тафаккур эгасига дуч келиб турар эди у. Эҳтимолки, шунинг учун бошқа йўл ахтариб кўрди:

— Сенинг айтганларинг мана бу тошларга сингиб, йўқолиб кетади. Бизнинг айтганларимиз ёзилади ва яшаб қолади.

Ўгуз хон жилмайди:

— Хафа бўлма, бу ҳам Тангрининг марҳаматидир. Сизлар яширинча терига ёзасиз, биз эса одамларнинг юрагига нақш этамиз.

— У юраклардан умид қилма, бир томондан олса, иккинчи томонга сотади.

— Шунинг учун ҳам Тангри менга қилич берган. Қара, мана шу күриб турган қиличинг күкдан тушган. Чақмоқ тошидан ясалган. Күкдан келганинг ҳукми — ёрлиғи ҳам Тангри номи билан боғлиқ. Махтуқотнинг қонини тұқмоқ оғир иш. Аммо Тангри ҳукми шу экан, уни амалга ошироқ лозим. Менинг ҳаётсиз, совуқ, қурғоқчил шимол чүлларига қувилган, ёзувга құли қовушмаган әлларимга бу битикларни англатмоқ учун күп йиллар керак. Шунинг учун ҳам мен қиличимни, ялавочлигимни қалқон қилиб чиқдим. Мен үлкаларни забт этмайман. Күнгилларни, назарларни, фикрларни забт этаман. Күзлар күкка тикилсін, Тангрини күрсін дея. Афсуски, күпларнинг боши танидан жудо бұлғачгина, күзи күкларни күради. Мен талон-торож қилиш учун эмас, Тангрини танитиш учун келганиман.

- Тангрининг нақадар күп жангчиси бор, Улуғ хоқон!
- Биз ҳаммамиз унинг жангчиси бұламиз...

Сұхбат шу ерида үзилди. Юзаки қараганда сокин, аслида кескін сүз кураши охирига етган эди. Наинки охираға етган, әндигина бошланған эди.

Мағ гүё қаршисида ўтирган манави кишининг құноқ эканлигини унугтан эди. Секин бөш эгиб ўрнидан турди. Оғир-оғир юриб хонанинг олис бурчига борди. Токчадан күза ва қадақ келтирди. Таласун¹ сузіб Үғуз хоннинг олдига қўйди.

— Мәҳмонаимсан, ич! Низомларимиз үзгармасдир. Қайда, қандай яшашимизнинг аҳамияти йўқ.

Сўнгра силлиқ ёғоч билан кулни ковлади. Унинг орасидан олган кўмма нонни қоқиб кулинин тўқди. Қаршисидаги тош устига дастурхон ёзди. Қўллари куйтанича нонни ушатиб, буғланиб турган катта бир бўлагини Үғуз хоннинг олдига қўйди.

— Сизни кўнгилдагидек мәҳмон қила олмадим. Айбга буюрманг, топганим шу.

— Борингни беряпсан. Ота-боболаримиз буни жуда қадрлашган.

— Тўғри, буюк хоқон. «Мұл бергунча, йўл берсін». Бу ҳам оталаримиз сўзи.

Ўғуз хон эшик олдида таянган қоровулларга кўз қири-

¹ Таласун — шароб

ни ташлади. Сүнг нондан бир парча ушатиб, буғели ҳоли-ча оғзига солди.

Мағ ҳам кавшана бошлади.

Ов гүшти, құй кабоби, гуруч қайнатмаси, қийма, угра, қовурдоқ Үғуз хоннинг севимли таомлари эди. Лекин бу ерда нокулай ахволга тушиб қолди. Нимқоронғи үнгурда, ўчоқ бошида ўзи еб турган, хоқонлик шаңнига мос келмайдиган мана шу иссиқ, юмшоқ ноннинг таъми дунёning энг лаззатли таоми каби қолди унинг оғзиди. Шошмасдан, бу мафора эгаси айтган гапларни мулоҳаза қила-қила ўз улушини еб тугатди, таласунни ичди, сўнгра жилмайиб:

— Қўлинг дард кўрмасин! Ҳеч бир хоқонлик зиёфатла-ри арзимайди сенинг бу лаззатли емагингга, — деди.

Мағнинг тош ранги урган юзлари нурланди. Йирик, қайғули кўзларida ўткинчи бир шуъла порлади.

— Мен ўн йилдан бери шундай яшайман.

— Ўн йил?

— Ўн йил!

— Мен ҳам ўттиз йилдан бери отнинг устидаман.

— Эшигтанман. Кучинг, ҳукминг, низоминг бўлмаганида элни Чиндан бу ерларга етказиб кела олмасдинг.

— Аммо сени нега излаганимни сўрамадинг.

— Хоқонлар у қадар бекорчи кишилар эмаски, элидан ажralиб бир кишини излагани чиқса. Сўзни ҳам нишонга аниқ уришингни кўрдим. Биламан, айтмоқчи бўлганингни ўзинг билан қайтариб олиб кетмоқчи эмассан.

— Бир неча саволим бор.

— Марҳамат.

— Зардуштийлик битта шахс номи билан боғлиқми?

— Ҳа.

— Яшаб қоладими?

— Яшайди...

— Нега юкунч, илтижо ва битикларингиз бегона тилда?

— Бегона тилда эканини қаердан биласан? Келиб чиқишининг ўзи шу. Аввало йўлсизни йўлга солмоқ керак.

— Инончнинг қудратига ишонасанми?

— Инончимиз биз билан туғилиб, биз билан ӯлади.

— Унда нега бу қудратни бегона қўлларга берасиз?

— У уни эгаллаган кучни ўзига қарши йўналтиради.

— Демакки, бизга қарши.

Мағ жим қолди. Құноқнинг сүзини тақрорлашни истамагандек, деди:

— Буюк хоқон, сен үз инончинг билан инсон фарзандыннинг нигоҳини Турон чүлларига қаратдинг. Биз ҳам ер юзининг күзларини Озарлар юртига қаратмоқ истаймиз. Чүл ҳаёти кишини ростгүйликка үргатади. Эзмаликка, фиди-бидига эхтиёжлари қолмайди. Сиз Тангрининг түғри йүлидасиз. Биз адашғанларни ҳам шу йүлга солишини хоҳлаймиз. Үз тилларида. Бошқа йўл тополмадик. Халққа уч нарсани үргатмоқчимиз. Фикр ростлиги, сўз ростлиги, иш ростлиги. Учаласи ҳам ўгузларнинг фазилатидир. Бошқа яна бир истагимиз — кишиларни тупроққа, экин-тикинга, кентга боғламоқдир.

Ўғуз хон унинг сүзини бўлди:

— Бизнинг экинчи-тикинчи, ўтроқ уруғларимиз жуда кўп. Улар еридан қўзғалгани йўқ. Юртларимизни бўш ташлаб келган эмасмиз.

Мағ хаёлга толган эди:

— Ҳар будуннинг үз тақдиди бор. Қаерни хоҳласа, ўша ерга қунади, сувенини қишлоқдами, яйловдами кўпайтиради, хилқат билан муроса қилиб яшайди. Қалъаларга, далаларга боғланиб қолиш билан сизнинг сафингиз камайиб қолишидан кўрқаман.

— Бизнинг сафимизни экин-тикин эмас, юзимизга бекилган қалъалар камайтиради.

Ўғуз хон тин олиб, нигоҳини мағнинг кўзларига тикиди. Унинг кўзларида ҳам Бўз бўриникига ўхшаган бир жозиба бор эди; чеккадан кузатиб турган кимса бўлса эди, иккаласи ҳам бир-бирига бўри нигоҳлари билан боқиб турганини кўрарди. Бу сезги унинг овозига қандайдир бир ўйчанлик бахш этди:

— Чиннинг бу бошидан нариги бошигача йўл босдим, кўрдим, англадим. Биз дунёning ilk экинчилари бўламиз. Ота-боболаримиз улкан кентлар бунёд этган, жаннатмонанд юртлар яратган. Уларни кум босди, сел олиб кетди. Тангрини ранжитишлари бунга сабаб бўлди. Минг йиллар аввал Озар кўли бўйларида, Кур-Ораз орасида экинчилик қиласардик. Юришлардан тўхтаб, турғун яшаб қолганимиз учун турук дедилар. Яъни тўхтади, турди дегани. Худди

ана шу турғунлик Озарларни фалокатга етаклади. Қирилди, туганди, юртидан жудо бўлди. Кўз кўрганидан қўрқади. У эса кимга талпинишини билмай қолганидан шу ҳолга тушди. Тангри ғазабга келган эди. Бунинг нажот йўли битта: бир Тангри, бир Хоқон, бир эл!.. Ягона Тангрига топинмагумизча қайга борсак ҳам бошимиздан ажал шарпаси аримайди. Бизнинг ўтроқ-кўчманчи улусимизнинг тайин юрти, тупроқлари, экин-тикин далалари, қишлови, яйлови бор. Куни жанг-жадалда ўтадиган йигитларимизнинг ҳам ерларига ҳеч ким кўз тика олмайди. Биз ўз эпчиллигимиз билан қаерда пайдо бўлиш, қачон тарқаб кетиб, қачон тұпланиш лозимлигини бир сир сифатида қўриб-асраб келаётганимиз учун ҳам бошқалардан кучли бўлиб келганмиз, ўзлигимизни асраб қолганмиз. Буюк юртимиз бор. Унинг фақат бир томонига қўнсак, бу юртни қўрий олмасдик. Ўтириш билан эл-юртнинг қанотини кесиб бўлмайди. Бу бизнинг ҳаёт тарзимизнинг, фикри-мизнинг қолоқлиги эмас, балки куч-қудратимиздир, йўли-миз, низомимиздир. Тангрига яқинлашмоқ, ҳар кун у билан юзма-юз сұхбатлашмоқ йўлидир. Иончимиз кўқдан келган, деймиз. Бироқ сиз ионч бағишлиған низомсиз, йўлсиз, бузғунчи улуслар бор. Онани билмайдилар, қарин-дош-уруғни билмайдилар, ота қизига, ўғил онасиға, оға синглисига кўз тикади, уйланади. Ўз низомсизликларини бошқаларга ҳам ёймоқчи бўладилар. Улар сизнинг ионон-чингизни кўр-кўrona манманликларининг қуролига айлантироқчи бўладилар.

— Сиз ҳам ахир топиноқ қурган, Тангри уйини тиклаган кишилардан эмассиз-ку.

— Тангри уйи бизнинг юрагимиздадир. Фақат битта буюк топиноғимиз бор. Чегараси кўк, ой, юлдуз, кўз илғамас олисликдаги ерлар, сувлар. Бу абадийликнинг, мангуликнинг иончидир. Бу — Тангричиликдир.

— Асрай оладими сизни Тангриңгиз?

Ўғуз хон қайфуга ботди:

— Бу бир манглай ёзувидир... Ҳамма жойда бизга чоҳлар қазилса-да, биз ер юзига беклик қилган бир улус бўламиз. Машаққатли ҳаёт бизни Тангри йўлидан қайтара олмайди. Бизни урушқоқ, жангари деб ҳисоблаганлар Тангри йўлида юрганимизни, ер юзига низом келтирганимиз-

ни, ичи самовий туйгулар билан тулиб-тошган, ҳар ердан ҳақиқат ахтарган, тангрисоллик яратган бир будун экан-лигимизни билмайдиларми? Битикдан гап очдинг. Ёзмоқ-битмоқни ҳам биз ўргатганмиз-ку уларга... Чиндан Қора денгизгача бўлган ерлар бизнинг қофозимиз, ёзувимиздир. Тош демадик, ёғоч демадик – ҳаммасига ёздиқ. Тери, қофоз ёниб кетиши мумкин, тош ёнмайди дея қояларни безаб чиқдик. Бундан буюк, бундан чиройли ёзув бўлмайди. Тангрини танимаган, ҳар бири ўзига юзлаб бут ясаб олган улусларнинг ичи, фикри ҳам юзга бўлиниб кетган.

– Чин билан муносабатингизда буни сезганман.

– Чин билан ёнма-ён яшаб туриб, узоқ давом этадиган яқинликка умид қилиш мумкин эмас. Чинликнинг назарида яқинлик унга бўйинсуниш демакдир. Бу бизнинг низомимизга, Тангри хоҳишига зид келади. Ўрни келиб қолди. Мен сенга яшаб келаётганинг мана шу мағорага менгзар унгурлар ҳақида, элнинг буюк Қами айтган гаплар тўғрисида сўзлаб бермоқчиман. Эндиликда нимагадир эришганга ухшайман...

Сўнгра Ўғуз ўз элининг ўтроқлигию кўчманчилиги сабабларини Қам Ота тилида яна бир бор айтиб берди, дунёда бўлиб ўтган барча воқеалар битикларда кўриниб келганлигидан, Ота Унгурнинг таланиб, вайрон этилишидан, Қам Отани фойиб бўлишидан сўзлади.

Мағ оғир изтироб билан:

– Кўряпсанми, хоқоним, – деди, – фақат битта билим ўчоги ва бир тилга таянилса, билги ташиганларнинг белини синдирадилар. Юртнинг ҳар бир хонадони бир билим ўчогига айланмоғи керак.

Ўғуз хон деди:

– Қам Ота мен ўйлагандек ўйламасди. Ер юзидағи кўчларимизнинг қаердан бошланганини у биларди. Фақат бир гал бу ерларга келажагимни билганида, «У ер билан бу ернинг илдизи бир», деган эди. Мангу битиклар мени гангитиб қўйганини кўриб аччиқ-аччиқ кулган эди, «Нималар йўқотганингни билсанг, жинни бўлиб қоласан, – деганди у. – Ота-боболаримиз гўзал бир ҳаёт оғушида икки юз минг-уч юз минг йиллик тарихни ўз ичига олган буюк бир хазинанинг эгаси бўлишган. Қадимий ерости саройлари ари уяси қаби инсон фарзандининг ақл, зако шира-

си билан лиммо-лим тұлиқ, эди. Бу буюк бойликларни яраттган кишилар беш юз, минг йил умр құрганлари боис үзларини ұлмас деб билғанлар, бироқ уларнинг үлимни унүтиб құйғанлари, құнғилларини парда қоплаб олгани, яраттандан юз үғирғанлари, үзларини ер юзининг эгаси деб ҳисоблашлари ягона Тангрини ғазаблантирган, уларни беомон құм бүронларига, тұғонларга, тошқынларга маҳкум этган. Уларнинг бошига ваҳший тоифаларни юборған. Тангрининг энг буюк билимлари, битиклари ҳам құм ва сувнинг остида қолиб кеттган... Илк ёзув ҳам, илк сүз ҳам, илк битик ҳам, барча сирларнинг калити ҳам үшанда эди. Ер юзининг энг буюк күчлари ҳам үшанда бошланған эди. Бобокалонларимиз йүқтотған нарсаларининг жуда оз бир қисмини, хотирада қолғанларинигина қайта тиклаганлар. Қадим дунёning сирлари эса ҳамишалик бой берилди. Тангрининг бизга инъоми бұлмиш муқаддас Імғир тошини ҳам үғирлаб кетдилар.

Мағ қандайдыр хаёлга бориб деди:

— Саволоннинг этагида бир кент бор. У ерда ҳам күқдан эндирилған бир тош бор эди. Болалик йилларимда ўзим ҳам құрганман уни. Бир күмада сақланарди. Курғоқчилик пайларыда ташқарига олиб чиқардилар. Теграсида айланыб дуо үқір әдилар. Құклар ўз ёмғирини жүннатарди. Маторага чекинганимдан сұнг нима бұлғанидан хабарим йүқ.

Үғуз хон жилмайды:

— Бу ҳам бирлигимизнинг бир намунасидир...

Мағнинг юзида құлкалар пайдо бўлди, у Үғуз хоннинг изтиробига құшилған ҳолда, тазиқ, ассур босқынчилари озарларнинг юртида нимаики бўлса, ҳаммасини йўқ қилиб, уларни фикрий қулликка, жаҳолат зиндонига солмоқ учун қандай тузоқлар құрганликларидан, ҳамма нарсаларни ўз номларидан эълон қылғанликларидан, озарлардан үрганиб, сўнгра уларнинг қўксига тиф санчганликларидан сўзлади. Мен қўриб турған нарсаларни қўл етмас ерларга ташиб кетдилар, тошга кўчирдилар, тупроққа қўмдилар, лекин барибир кўздан яшира олмадилар.

Энг қизиғи Үғуз хонни ишонтиromoқ учун кўрсатган намуналар эди:

— Мана қара, — деди у. — Зардушт очган йул, у яраттан билим ер юзида ҳозирга қадар яратилған барча инончлар-

нинг, тушунчаларнинг энг йирик жиҳатларини бирлаштиради. Зардушт ўз илдизидан бўлганларга алоҳида қўз билан боқармиди? Бироқ унинг сўзларини ҳар элга бошқача қилиб тарқатадилар. Унинг номи билан ўз бузгунчиликларини пардалашга, чўлларда яшаган туркларни ваҳший, тараққиётдан узоқ қилиб кўрсатишга уринадилар. Бир-биридан олис, фарқли фикрларни, турли улусларнинг зўравонлик курашларини бу инончга ўраб яширишга, ваҳший истакларини ялавоч каломи каби тарқатишга тиришадилар. Бу бизнинг бир-биirimизни тушунишимизни қийинлаштиради. Зардуштнинг сарой чангларида булғанмаган тушунчалари билан сенинг тушунчаларинг орасида фарқ кўрмадим. Бизни ўзингдан айри тутма!..

Ўғуз хон Тангри тоғларида йўқотганларининг изларини Саволондан, ер юзи яралгандан бери муқаддас ҳисобланган, ажойиб бир ўтмиши бўлган бу тоғлардан топа олмагани учун ҳам, қўққисдан олис йилларнинг юки елкаларини босиб қўйди. Ора-сира чўғланиб турган ўчоқقا узоқтикилаб, ўзига келди, ўрнидан туриб деди:

— Сен ҳам билиб қўй! Мен биз билан илдизи бир бўлғанларга қарши жанг қилгани эмас, уларни душманлар қўлидан халос этишга, тилсиз элларимизга тил, сасиз улусларимизга сас бўлиш учун келганман. Бу ерлар мангугта қадар Озарларнинг ва менинг алп йигитларимнинг эл-юрти бўлиб қолажак. Буни ўзингникиларга етказ, йўлимни кесиб чиқмасдан, менга мададкор бўлсинлар...

Мағ:

— Ой янаги бадирлаганда ишончли бекларинингдан бирини жўнат, таклифингни кенгашиб кўрамиз, — деди.

Ўғуз хон унгурдан тушиб келганида қуёш Қалъя ортига чекинган, Қалъанинг кўлкаси кунчиқар томонга, тобора тундлашиб борувчи сояларга қоришиб кўздан йўқолган эди. Худди тутун каби, худди туман каби. Эҳтимолки, худди йўл каби.

* * *

Кечқурун Ўғуз хон мағ билан учрашувини бошдан-оёқ Услу Хожага гапириб берди, унинг саволларига жавоб қайтарди. Бу суҳбатлар бир неча кун давом этди.

Яйловга чиққандан бери ҳар куни эрта саҳарлаб Ўғуз

хон Услу Хожа билан биргаликда отларини тоғнинг энг юксак нуқтасига суриб борар, қүёшни ўша ерда қаршилар эдилар.

— Бу ердан қараб туриб Тангри тоғларини эслайман, — дерди Услу Хожа. Ўртаниб кетарди. Ўгуз хоннинг таскин-тасаллисига қарамасдан билгисиз бир изтиробдан халос бўла олмасди.

Ўгуз хоннинг мағ билан қўришганидан, унинг бу учрашув борасидаги суҳбатларини тинглагандан кейин Услу Хожа ўзгариб қолган эди гўё.

Бир куни яна олатўронликда юксакликка кўтарилидилар. Таъзим қилиб, қўёшни қаршилаганларидан сўнг Каспийга қадар узаниб ётган даралар, ўрмонли адирларни тўлдириб турган сутдек оппоқ туманни томоша қиласдардилар. Бу туманли тоғларнинг нариги томонидан уларнинг юзига нур ёғдираётган қўёш билан ўз ораларида қандайдир бир яқинлик, туғмаликни ҳис этар, қўёш ўз ичларидан кечаетган барча туйгуларни ўқиб турганлигига ишонар эдилар.

Услу Хожа кунчиқарга термулиб туриб:

— Менга шундоқ туюладики, — деди, — гўё айтмоқчи бўлган ҳамма гапларимни айтиб бўлдим сенга. Йўлим ҳам Тангри билан Саволон оралиғида экан. Юришга отлансанг ҳам, мени бу ердан жудо этма. Ўз қароргоҳимни топдим... Сенга шунча юк бўлганим етар!

— Бундан кейин ихтиёр ўзингда, — деди Ўгуз хон. Изоҳсиз, дилтанг бир туйғу оғушида от бошини ортга, ўрда томон бурди. Фақат арча дараҳтларининг эрта наҳорда оқ чодирларга қадар узаниб ётган кўлкаларига етгандагина бош маслаҳатчисининг, фармонбардорининг тайсаллаб қолганини, ўз ортидан етиб келмаганини сезди. От бошини яна ортга бурди. Унинг истагини сезган беклар ҳам ортга қайтдилар. Қўёшни қаршилаган жойларида Услу Хожа от бўйнига ётиб қолган, юраги уришдан тўхтаган эди.

Ўгуз хон севимли маслаҳатчисини йўлнинг ўрмон ичидаги овулларга буриладиган жойида, қадимдан яйловда вафот этганлар дағн қилинадиган мозорда тупроқса топширди. Устига кичкина бир мақбара ҳам қурдирди. Шу-шу довоннинг номи «Хожадўнга» бўлиб қолди.

Унинг ўғли Эрдам охиригача Ўгуз хон билан бирга

бұлди. Аммо бир тұп қариндош-уруғлари – кексайиб юра олмай қолған тангричи Улубобо бошчилигіда әрдамлилар ажралиб чиқиб, юрт солдилар. Улар ҳар баҳор Үфуз хон құниб үтган яйловларга чиқиб, Услу Хожа рухини шод этар әдилар.

* * *

Элчилар қайтиб келишди. Қазилиқ төгининг у томониу бу томонидаги, Озар күли билан Күкча күли орасидаги кичик-кичик эллар, бекликлар, уруғлар бир-бiri билан чопишиб ётардилар. Бошбошдоқлик авж олган әди. Озарлар, кангарлар, сабирлар, каспийлар, албанлар уларнинг келишини құтлар, түп-түп бўлиб Үфуз хон ҳузурига келардилар. Каспийнинг нариги томонига суқилиб киришдан олдин бу томондаги ерли халқларга тинчлик бермай келган қамарлардан улар ҳам безор бўлган әдилар. Бироқ энди тұядан катта фил келиб, туя пусиб қолган әди.

Ярим ой ўтгач мағнинг ўзи хабар жүнатди: «Бегоналарнинг зулмидан халос бўлишга ёрдам берсангиз, биз ҳам сиз билан алоқа ўрнатамиз».

Кузга қараб Үфуз хон, әлатни қўриқлаш учун кучли бир суворийлар дастасини қолдириб, қолған қўшини билан Саволон этагидаги кичикроқ бир кентга йўл олди. У ерда манер элчилари билан учрашди. Элчилар унга «Улуғ Тангрининг ялавочи»деган юксак сўзлар билан шарафланган бир битик келтирган әдилар. Ман элиги қўшнилари билан чиқиша олмаётганидан шикоят қилас, ассурлар, ванликлар, уарлар, форсларни номуссиз ва ёлғончи деб атар, элини улардан қўrimoқ учун мадад ўтинар, буюк хоқоннинг бу ерларга келганидан хурсанд эканлигини изҳор этарди. «Бу яйловлар, чўллар бошдан-оёқ сеники. Бизнинг бегоналар зулми остида эзилишимиз – сенинг ҳам эзилишинг демак. Минг йиллардан бери эшигимизга хизматкор бўлиб келгандар энди бosh кутариб, бизни шохламоқчи бўляптилар. Чунки Тангри уларни яхшиликни билмайдиган қилиб яраттан. Емагимизни ейдилар, либосимизни киядилар, бироқ қингирлиқдан қўл узмайдилар, ён атрофимиздаги тоифаларни бизга қарши қўзғаб, ортдан тиғ санчадилар». Битим охирида элик яна тез орада қўришмоқ истагини билдири, бунинг устига ўғли ва йи-

гитларини Ўгузниң ҳузурига жүнатаражагини, уларга от миниш, ўқ отиш, қилич чопиши, найза улоқтириш кабиларни ўргатишиларини илтимос қилди. Улар ҳам элчиларга қўшилиб келган эдилар. Бу битик Ўгуз хоннинг табассумига сабаб бўлди. У Манна тож-тахтининг бўлғуси соҳибига отабеклик қилишни Эрдам ва унинг ёнидаги йигитларга топширди. Сўнгра эликка шундай жавоб ёздирди: «Ер юзининг бутун ўлкалари бизга бош эгиб, эл бўлдилар. Эгилмоқ истамаганларни эгдик!.. Билагимизни қайира-диган билак, қиличимиздан устун қилич йўқ. Бу юртларни сен бўлсанг ҳам, бўлмасанг ҳам тозалаймиз. Қавати-мизда сени кўрсак, билак кучимизга куч қўшилади. Сен душман деб атаганларингнинг тилини қисқартириб қўйиши-да биздан зўри йўқ. Ўғлинг, йигитларинг Тангри изни билан Ўгуз эрларининг ёнида бутун жанг сирларини ўрганиб, ҳузурингга тенги йўқ жангчи, қўшин бошлиқлари бўлиб қайтадилар. Юрагингда губор қолмасин дея ўғлим Юлдуз хонни Улуғ Тангри бизга ато этган жанг илмлари-ни қўшинингизга ўргатиш учун жўнатмоқдаман. Тангри изни ила учрашиб, қолган барча ишларни юзма-юз ўти-риб келишиб оламиз».

Юлдузхон чопарларга қўшилиб Учқояга жўнади.

* * *

Манер элиги Ўгуз хоннинг ўғлини катта тантана би-лан қарши олиб, деди:

— Ер юзида от чопиши, ўқ отишда Ўгуз эрларининг олдига тушадигани йўқ. Сен, Ўгуз ўғли, бу сирни қўши-нимизга ўргатишинг лозим!

Юлдуз хон манерларнинг қўшинини кўздан кечиргач:

— Бу қўшин билан жангга кириб бўлмайди, — деди.

Элиг тутилиб қолди:

— Бу қўшиннинг сон-саноқсиз ғалабалари бор.

Юлдуз хон:

— Жангчиларингиз бақувват, бунга гап йўқ,— деди.

— Лекин қўшинни янгидан тузиш керак. Бунақанги ара-лаш-қуралашда ўз қўл-оёғингизни ўзингиз боғлаб бера-сиз. Суворийнинг пиёдадан фарқи йўқ. Тирандозлар, қи-личбозлар, найзакашлар қоришиб кетган бир-бирига. Уларни ажратмоқ керак.

Бу гап эликка ёқиб тушди:

— Билганингни қил, хоқон ўғли, — деди у. — Ўғуз учун қанча ҳаракат қилган бўлсанг, бу ерда ҳам шундай қил. Бу қўшин сизнинг энг жанговар қўшинингиз бўлмоғи лозим.

Юлдуз хон бир неча ой манер қўшинини янгидан тузиб, суворийларга жанг санъатини ўргатди. Уларни Ўғуз қўшинидаги каби бўлукларга ажратдилар. Манлар Ўғуз хоннинг дунёни ваҳимага солган довругини, қўшинининг қудратини энди англаб етдилар. Қўшиннинг бундай тузилиши уларнинг қўзини очди. Гўёки томирларига янги қон юурган, кўзларига зиё келган эди. Қўшин жонланиб қолган, отларнинг ҳам ранг-рафтори ўзгарган эди.

Бир неча ойдан сўнг Юлдуз хон катта тортиқлар билан, ёнига Манер шоҳининг қизи Минсуни олиб ортга қайтди. Ман элиги Ўғуз хон билан яқинлашиш йўлини ахтарар эди. Бунинг энг қулай йўли қизини Ўғуз ўрдасига жўнатиш эди. У узоқ ўйлаб, даҳшатли қўшнига жўнатмоқ учун бундан-да қимматли армуғон топа олмаган эди. Қизларини бир-бирига бериб қон-қардош тутинмоқ, шу йўл билан урушларнинг олдини олмоқ, айланма йўллар билан қўшниларидан ўз ерларини абадий қўриб сақламоқ учун ўз фарзандларидан кечмоқ бу элнинг қадими одатларидан эди. Ўз қонлари қоришса, элларининг ҳам қони қоришган, яқинлашган деб ҳисоблардилар. Бу сарой инжулари кимнинг қўлига тушишини билмай туриб, кўнгилларининг бу парчасини хоқонликка, тахтга, ўлкага қурбон сифатида берар эдилар. Тишлари тўкилган туллак ваҳшийлар бу армуғонларни кўрган заҳоти жонланар, кўзлари ёна бошларди. Бироқ бу гал Тангрининг ўзи йўл очган эди. Минсу хоқоннинг ўғли Юлдузни кўрганидан бошлаб ақлу ҳушидан айрилган эди. Юлдуз хон ҳам саройнинг бу тенгсиз чечагига шайдо бўлиб қолган эди. Етти кеча-кундуз тўй қилиб, Минсуни Юлдузга олиб бердилар. Ман йигитлари ҳам жанг санъатининг бутун сирларини ўрганиб олмаунча Ўғуз қўшинидан ажрамадилар.

Қароргоҳ гавжум эди. Катта денгизлар оралиғидаги яйловларга, қўшалоқ сойлар орасига сочилиб кетган ярим кўчманчи улусларнинг беклари бошқаларга итоат этишдан, камситилишдан, кети узилмайдиган ички курашлардан толиққан бўлиб, «Манлар боғланган бўлса, биз ҳам

боғланайлик», дея Ўуз хоннинг ҳузурига келмоқда эдилар. Ўша пайтлар Муз тоғлари деб ҳам аталган Қазилиқ-Қофқоз тоғларининг жанубига ошиб ўтишларидан олдин довруғи ер юзини тутган, кунчиқардан тұғондек ёприлиб келган, номини ўзиёқ саройларни ларзага солған, ҳукмдорларнинг тожини бошидан учирған хоқон билан ҳамкорлик қылмоқчы, ўртага күпrik солмоқчи бұлғанларнинг сон-саноғи йўқ эди. Кунботар денгиз, Одалар денгизи, Қора денгиз атрофидаги катта-кичик ўлкалардан элчилар ёприлиб келарди. Ҳар бири унинг ҳузурига бориш, уни ўз ҳузурига чақириш, унинг кўлкасидан паноҳ топиш ҳақида ўйлар, буни ўзи учун катта шараф деб биларди.

Кузга яқин ўтиб бўлмас қоп-қоронғи ўрмонлари денгизга қадар эниб борган, тоғ этакларидаги ям-яшил ўтлоқлари от тизидан келадиган, сукутга чўмган, шу сукунати билан юракларга мунг солған кимсасиз чўлларда Ўғузнинг ич беклари билан Қазилиқ тоғининг бу юзида яшайдиган юртларнинг беклари бир битимга келишди.

Ўуз хон сартлик билан деди:

— Беклар, Чиндан бери бутун улуслар бизга боғланиб, бўйинсуниб, эл бўлди. Ер юзининг боши бўлмиш, Тангрининг танлагани ва севимлиси бўлмиш, ер юзига хоқон бўлмоқ, интизом яратмоқ учун жўнатилмиш бизлар қул бўла олмаймиз. Бироқ Каспийнинг бу томонида яшайдиган кишиларимизни қулга айлантиридилар. Бир тўхтамга кела олмадингиз. Бирлигингиз йўқлиги учун ҳам енгилдингиз, топталдингиз. Биз бу ўлканинг ягона эли бўламиз. Бир Тангри, бир хоқон, бир эл! Бизни эзганларни биз ҳам эзамиз! Ҳар бири бир тоғнинг бошида бир тош қаль-ача қуриб, ўзини ер юзининг хўжаси деб билганларнинг ўрни қаер эканини кўрсатиб қўямиз. Нари борса бир даранинг, бир тепанинг беги эканликларини англатиб қўямиз уларга! Тангри ер юзининг бутун тупроқларини, сувларини бизга ато этган.

Келганлар инонч сўзини эшитганда жимиб қолдилар. «Ионч ўзгармасдир», дея ранжиб, йигинни ташлаб кетганлар ҳам бўлди. Бироқ Ўуз хон инончни шунчаки айтмасди. Самовий куч-қудрат билан бирга Тангридан чексиз бир билим берилган эди унга. Ўзи билан сўз талашганларнинг ич-ичини, бўш жойларини дарҳол пайқаб оларди:

— Сизни мажбур қилмоқчи эмасман, беклар, — деди у.
— Бироқ гапингизни билиб айтинг. Ионч амали сизлардан аввал яратилган тұралар, низомларга бориб боғланади. Қаранг, нималар рүй бермоқда. Бизлар, туриш-турмуши жаңдан иборат бўлган кишилар танг қоламиз бу яралмишга, яратганга нолойик ишлардан. Инсон фарзанди ҳам қурбонлик қилинадими, ахир? Бундай қурбонлик билан ер тўймайди. Иончларингиз кўп, лекин уларнинг кўзлари оч. Яралмишнинг жонини фақат яратган ола билади. Сиз элнинг энг кўркам ўғлонларини, гўзал қизларини ўzlари истамаган ҳолда қўйдек бўғизлаб, сўнгакларини кушларга титкилатасиз. Бу қон ташналигидир. Ионч бунақа бўлмайди. Тангри мени бу йиртқичликка қарши жўнатди. Айтганимизга бўйсунасиз! Тил билан англамасангиз, қилич билан англатамиз. Мен йўлимдан чекинмайман. Йўқ, деганга ўқ бўлиб санчиламан.

Ўуз хоннинг кўзларидан ўт сочилади. Энди унга бир гап айтиб бўлмасди. Чиндан ҳам, у Қазилиқ тоғининг жанубида энг сара кишиларнинг, қизларнинг тириклайнинг қурбон қилинишини кўрганида бафри ўт олиб ёнган эди. Бу узун сафарга, олис йўлга уни жўнатган Тангри номи билан онт ичган, «Инсон фарзандини бу ваҳшийликдан мен қутқармасам ким қутқаради?» деган қарорга келган эди.

Бу йигинда Қазилиқ тоғларининг жанубидаги барча яқин улусларни бир кўлка остига йиға олган буюк куч ва сўз соҳиби, душманлардан ўч ола биладиган қудратли кўл ва қилич намоён бўлди. Ўуз элининг байроби бу ўлкада абадий тиклангани ҳақидаги хабар ҳаммага етказилди. Ўуз хон бу бирликни низомга келтирди. Манерлар, улардан жанубда яшайдиган модарлар, Озар кўли атрофида, Арбил ҳудудида жойлашган ўн ерли уруғ Ўн Ўқ номи билан Ўуз элига қўшилди.

КАР КИШИ

Ўузнинг ўзидан аввал сўзи етиб борарди. Ерли беклар билан учрашув хабари зудлик билан бутун ўлкага тарқади ва Озар кўлининг жанубига ҳам етиб борди.

Бу жойлар юз йиллаб тинчлик билмай келган ерлар эди. Қўшачой орасидан бошлаб Нил дарёсига қадар яшай-

диган элларнинг бошида турган қутлар, улубайлар, кас-сурлар, эломлар аввалги қудратларини йўқотиб, ассурлар оёғи остида инграмоқда эдилар. Ҳар хил номлар остида ўз эллари, катталари, қўшинлари ҳам бор эди. Бўлганидан бўлмагани яхши эди! Ҳар қалъа, ҳар кент ўзини алоҳида бир эл деб биларди. Ҳаммаси бир-бири билан жанжаллашиб келарди. Ассурларнинг билимдонликда чинликлардан қолишмайдиган, йўқни бор қиласидиган кашфиётчилари, элчилари, жосуслари учун чек-чегара йўқ эди. Бу ёқдан шўнгиф, нариги ёқдан чиқардилар. Кулбалардаги пинҳона суҳбатлардан ҳам хабар топар, кечаю кундуз қўшни юртларда санқир, тиккайган бошларни кесар, йилда бир неча марта хирож номи билан үлкаларни талон-торож этар эдилар.

Шимол дарвозаси ана шундай бир пайтда очилган эди. Манлар билан тўқнашиб, сўнгра ассурларни қуюндеқ тиз чўқтириб ўтган қамарлар, қисқа муддатга бўлса-да, шу ерда туриб қолган эдилар.

Улар Мисрга қадар ҳамманинг сарҳадини белгилаб берган эдилар. Бу ерда бошқа эллар аввал қамар суворийлари қаршисида тиз чўккан бўлса-да, уларнинг бунда узоқ қолиб кетмаслигини сезиб, улар билан муроса қилиш учун молларини, олтинларини аямаган, ниҳоят битим тузиб алоқа ўрнатган эдилар. Бу алоқа қамарларни парчалаб ташлади. Қамар жангчиларининг бир қисми бу битим остида ёлғон борлигини кўриб, жангга ташланган, бироқ оз бўлганликлари учун мағлубиятга учраган эдилар. Шундан сўнг уларнинг бир қисми Озар кўлининг кунчиқаридан жанубга – мадар тупроқларига, иккинчи қисми эса Қора денгиз, Одалар денгизи бўйидаги яйловларга ёйилган эди. Улар жанг майдонларида мағлубият нималигини билмай, узоқ йиллар шу ҳудудларнинг ягона сўзи, ягона қудрати, ҳукмдори бўлиб келган эдилар. Бироқ кейинчалик Озар кўлининг жанубидаги қамарлар ўзлари билан айни бир ўзакдан бўлган ерли улуслар билан уруш абадий давом этмаслигини билиб ўтроқлашган, чатишиб-қоришиб кетган эдилар.

Қамарлар калтагидан қутулиб, қаддини тиклаб олгандан сўнг ассурлар яна эскича ваҳшийлиги билан қўшнilarининг нақ кўксига келиб қўнган эди.

Манларнинг бу қалъа ва кентларнинг бошини қовуш-

тириш истагини бир томондан ассур босқинлари, иккинчи томондан эса модар улусларининг «ўз уйим – ўлан тўшагим!» қабилида иш тутишлари йўқقا чиқаарди.

Ана шундай бир пайтда ташна чўлларга баҳор ёмғири бўлиб, оғиб бораётган деворга тиргак бўлиб Ўғуз хон келган эди.

Улар қамарларни курган эдилар. Бу суворий кўчманчиларнинг кўзи тўқ бўлиб, оз-кўп деб ўтирмас, кундалик ризқ топғанларига шукур қиласардилар. Ассур, Манна, Мадар берадиган хирож олдида уларнинг хирожи арзимас эди. Йўлини кесиб чиқмаса, ҳеч кимга тегмас эдилар. Бу гал ҳам Ўғузлар келиши билан ўз шон-шуҳратлари тикланишига, бузғунчи, ожиз бошлиқларидан халос бўлишларига ишонар, ўғузлар билан яқинлашув йўлини изламоқда эдилар.

Ўғузлар билан Қамарларнинг яқинлигини, бир илдиздан келиб чиққанлигини билгач, Озар кўли атрофида яшайдиган кўпгина улуслар жонланиб қолган, ассурлардан халос бўлиш йўлларини ахтараётганларнинг сони кундан-кунга ортмоқда эди. Улар бегоналарни тез-тез ўз ерларидан қувиб турар эдилар. Бунинг бошида аслан кассу улусидан бўлган «Кар киши» деган бир инсон турарди. Отаси унга берган Тутуқ номини ҳамма унутиб юборган эди. Элнинг нуфузли уруғларидан эди. Бироқ ҳали оёққа турар-турмас, ҳаёт тотини татиб улгурмай унинг юрти яксон қилинган, кентларга ўт қўйилиб, мингларча киши бола-чақаси билан олиб кетилган эди. Кишассуга етганларича йўл бўйи ўлганлару ўлдирилганларнинг сон-саноғига ета олмадилар. Ёв уларни ҳам тутқунликда сақлаб, қалъа қуришга, ариқлар қазишга мажбур қиласган эди. Отаси элбеги эканлигини айтиб, тош ташишдан бўйин товлаганида қалъа устидан қояларга улоқтирган эдилар. Бунга чидай олмаган онаси дунёдан кўз юмган, опасини саройга олиб кетишган эди. Бу ерда болалар қўриқланмаслигини сезган Тутуқ кунларнинг бирида икки тенгдоши билан Кишассудан қочиб, бир неча кун оч-ташна йўл босиб, ниҳоят, ўз юртига етиб олган эди. Отаси онининг дардикку бир томон, иккинчи томондан опасининг душман кўлида қолиб кетганлиги йиллар бўйи уни ўртаб келган, емай-ичмай фақат шуни ўйлагани-ўйлаган эди. Ўшандан

бери у ассур сўзини эшитиши биланоқ кўзларини юмиб, қулоқларини бекитиб оларди. Шу сабабли ўртоқлари ҳазиллашиб уни «Кар киши» деб атардилар. Эндиликда у улгайиб, туппа-тузук йигит бўлиб қолган эди. Болаликда отасидан эшитган, хотирасига қаттиқ ўрнашиб қолган бир нақл унинг йўли, йўлбошчиси бўлиб қолди: «Бир тақа бир отни, бир от бир йигитни, бир йигит бир юртни қутқарар». «Отамни қўрий олмадим, энди элни қўришим керак», дея бутун ўсмирлик йилларида ўзини жангга тайёрлаб борди.

Қамар юришлари тугар-туганмас Тутуқ ассур қузғуларига сездирмасдан дўстлари, тенгдошларини тўплай бошлади. Ассурия ёқасидаги кентлар бирданига кутарилиши керак эди. Бу яширин ҳаракат эзилган мадарларнинг қаддини тиклади. Уларнинг қонида олис ўтмиш хотираси уйғонган, парча-парча бўлиб, уруғ билан уруғ, қабила билан қабила, овул билан овул урушларидан боши чиқмаган улуслар бошларида ажал қаноти очилганини англаб етган эдилар. Бир қудратли қўл кунботардан астасекин уларни бўфмоқда эди. Бироқ ҳали ассур саройи тинчимаган эди. Мадарларнинг оёққа турганини сезиб қолишганди. Ҳаракат бошида Тутуқ бек турганлиги учун аввало уни орадан кўтармоқчи эдилар.

Оқшом чоги овдан қайтар экан, Тутуқ кимdir ўз ортидан тушганини сезиб қолди. Орқадан уч отлиқ яқинлашмоқда эди. Уларнинг ассур суворийлари эканлигини билиб, воқеани тушунди ва от бошини озод қўйди. Йўқса душман ўқига дуч келиши мумкин эди. Овулгача ҳали анча бор эди. Қочҳо-қув бошланди. Даралар, тепаликлар ортда қолди. У от чоптириб борар, бироқ ёвдан қочиб бораётганлигини бошқа бирор кўриб қолишини истамасди. Овулни қуршаб олган боғларга етиб борганида ўзини эгардан пастга отди. Илк ўқи унга яқинлашиб қолган суворийлардан бирининг кўксига санчилди. Сўнг қолган икки ассур аскари ҳам отдан тушдилар. Тутуқ қилич яланғочлаганича икки душман билан юзма-юз қолди. Бу унинг ilk жанг эди. Ўз устига бостириб келаётган темир либосли, кўзларига қон тўлган бакувват ассур аскарларини кўрганида кўққисдан отасининг қўл-оёғидан тутиб қалъя девори устидан пастга улоқтирганлари худди ҳозиргидек кўз олди-

да жонланди. Гүё орадан ҳеч қанча вақт ўтмагандек эди. Гүё отасининг қотили эди мана булар, энди унинг ўзини ҳам ўлдирмоқчи эдилар. Тутуқ билакларида отасининг қудратини ҳис этди. Арслонга айланди. Құллари олдинга чўзилди, тоғни қулатгудек важоҳати бор эди. Ассур жангчиларини турган жойларида гир-гир айлантириб, бошлари узра қилич ўйнатди. Уларнинг барча ҳаракатлари беҳуда кетди. Ассурлар атиги бир йигит қархисида ожиз қолаётгандаридан ғазабланган сари Тутуқ тобора дадилланди, охири иккаласини ҳам ўз қонига бўяб ерга қулатди. Душман билан бўлиб ўтган бу илк жангда Тутуқ девор тирқишиларидан уларни кузатиб турган ерли аҳоли жимгина чиқиб келиб, уларни қуршаб олганларини, нафас ютиб жанг натижасини кутиб турганликларини сезмай қолган эди. Қиличининг охирги зарбаси қалъани ларзага келтирган қувонч садоларига уланиб кетди. Уни құлларида кўтариб кетдилар. Шу оқшом кентда ассурдан ном-нишон ҳам қолмади. Ўлгани ўлди, қочгани қочди. Юртларини душмандан тозалаш истагида бўлганлар Тутуқ атрофида тўплана бошладилар.

* * *

Манлар билан битимдан сўнг Ўғуз хон хабар ва мактубларини етказиш учун Кун хонни отлиқ бўлуги билан жанубга, мадарларга жўнатди. Кун хоннинг келиши Тутуқнинг эндингина оёқقا туриб, ассурларни ўз тупроқларидан қувиб чиқараётган кунларга тўғри келган эди. Ўғузларнинг яқинлашганини эшитган мадарлар отланиб, Кун хонни қарши олишга шошилдилар. Аввал элчилар бориб келишди. Сўнгра бир сойлиқда от устида учрашдилар. Бу сойлиқдан ҳар икки томондаги тоғ нишабликлари яққол кўриниб турарди. Бир томонда Кун хоннинг ўн мингдан ортиқ суворийси, иккинчи томондан эса бир неча юз кишилик ярми отлиқ, ярми пиёда мадарлар турарди.

Кун хоннинг бўри бошли байроби билан Тутуқнинг илон бошли байроби юзма-юз ҳилпираб турарди. Мадарлар алп келбатли ўғузларни кўрган заҳоти улар қандай қилиб ер юзини остин-устин этганлигининг сабабини англаб етдилар. Мадарлар буларни ассурлардек бир жинни ҳисоблаб хато қилганликларини тушундилар. Минг йиллардан бери ўзини дунёning эн кучли, енгилмас қўшини

деб келган ассурларнинг уруш борасидаги маҳоратига гап йўқ эди. Бироқ ўғузлар бошқача эди. Ўзлари ҳам, отлари ҳам безак-тузаксиз, жангга эмас, гүё сайр этгани кетаётгандек, енгил, эгарда ўтиришлари осойишта ва қурч... Гүё худди шунинг учун туғилгандек эдилар. Ассурларнинг соқолли башараларида ирганч бир тўқлик, димоғдорлик ифодаси бор эди, кишига юқоридан туриб назар ташлардилар. Буларнинг эса қорамтири, туксиз юзларида болаларча жозибали бир соддалик, тўғрилик бор эди. Кунчиқардан қунботаргача бутун ер юзини эгаллаган бу суворий алплар ваҳшийга, қотилга ўхшамас эдилар. Аммо Тутуқ бу нурли чеҳралардаги қатъиятни ҳам сезиб турарди. Қолаверса, ортда тарапнг камон каби саф тортиб турган ўн минг суворийнинг савлати дунё буларга бўйин эгишдан қоча олмаслигининг далили учун кифоя эди.

Низомга кўра аввал Тутуқ гап бошлади:

— Буюкxoқонxушkелибdi юртимизга!

Кун хон деди:

— Яша! Аммо мен xoқon эмас, унинг ўғли бўламан.

— Ўгуз хон эмасмисан?

— Бизнинг ҳар биримиз Ўғуздирмиз. Лекин Ўғуз хонённинг мен каби олти ўғли бор.

Тутуқ довдираб қолди: «Ўғли экан. Бу қўшин фақат битта ўғлиники. Олти ўғил тўпланса кучлари қанчалик бўлар экан?...»

Музокара узоқ давом этиши аниқ эди. Бошқа гап-сўзсиз отдан тушдилар. Мулоқотлари анча чўзилди. Кун хон юртларидан, Чиндан, кунчиқардан бошлаб бутун ер юзи ўзлариники бўлишидан, отаси Тангрининг ялавочи эканлигидан, у тарқатайтган Кўк Тангри инончидан, юриш бошлагандан бери олиб борган улкан жангларидан, манлар билан келишувларидан, бу ўлгадаги яқин уруғларга ёрдам бериш истагидан сўз очди. Кун хон ён атрофда яшайдиган улуслар турмушини ўрганиб чиққан эди. Бироқ ҳозир Тутуқдан эшитганлари уни гангитиб қўйди. Юз йиллаб ҳукмронлик қилиб келаётган ассурларнинг қонхўрлиги, улусларни эзиб-топташ, йўқ қилиш учун улар бошига битмас-туганмас азоблар согланлиги уни фазаб отига миндирди, у ўлжасига ташланмоқчи бўлган арслон қиёфасига кирди. Узоқ йўл кечиб бу ерга келган отасининг идрокига

яна бир бор қойил қолди. Бу инсонларни ассурлардан халос этиш Тангрига энг юксак юқунч эканлигини англади.

— Бундан ортиқ чидай олмаймиз, ҳар бир мадар шундай фикрда,— деди Тутуқ.

— Ассур жосуслари уйғоқ. Кулоқларини динг қилиб туришибди. Назарларидан ҳеч нарса четда қолмайди, — деди Кун хон.

— Улардан құрқадиган пайтларимиз үтиб кетди. Эл-улус ҳамма жойдан душманларни қувиб чиқармоқда. Битта-иккитасининг қаршиисини ола биламиз. Лекин бундай катта селга қарши бориб бұлмайди.

— Биз бу ишда ёрдам бера оламиз.

— Энди ёрдам бера олмайсиз. Парчаланиб кетдик. Ки-чик бир ҳудудда йигирма саккизта майда беклик бор. Қайси бири билан гаплашасан уларнинг? Аввало уларни бирлаштироқ керак, токи элимиз яхлит бўлсин, душманларга дош бера олсин.

— Бу хоҳишингизни хоқонга етказамиз, — деди Кун хон.

Сўнгра отасига хабар жўнатиб, Тутуқ билан танишганини, нималар ҳақида суҳбатлашганини етказди. Хабар олиб келганлар орасида иниси Денгиз хон ҳам бор эди. Отасидан ёрлиқ, қўрсатма келгунига қадар Кун хон билан Тутуқ кунларини бирга ўтказишиди.

Тутуқнинг яқин дўстларидан Қоратош ва Қадаши шу атрофдаги машҳур от эгалари ҳузурига жўнатилди. Кун хон учун зотли учқур отлар саралаб олинди. От чопдилар, ўқ отдилар. Тутуқнинг атрофига йигилган йигитлар назарида Кун хон гўё жантангриси эди. Унинг бу маҳоратини ўрганиш асносида яқинлашиб кетдилар.

Бир неча кун давом этган суҳбатларда Кун хон янги танишининг бошидан кечирган фожиаларини, юртидан олиб кетилганлиги, отасининг қалъадан улоқтирилгани, опасининг ҳамон душманлар қўлида эканлигини билиб олди, билгани сари унга ачинди, меҳр қўйди; бўлғуси жангларда бир-бирларидан ажралмасликка аҳд қилдилар.

Бўри бошли байроқ билан илон бошли байроқ эрталабдан кечагача бирга эди.

— Байробингизда нима сабабдан илон боши бор? — сўради Кун хон.

— Бизнинг уруғ илонга топинади. Биз заҳарли эмас-

миз, йўқ. Илон каби тегмаганга тегмаймиз. Яхшига яхшимиз, яхшилар учун оғзимизда олтин ташиймиз, ёмонни кечирмаймиз...

Кун хоннинг қизиқишини кўриб изоҳ берди:

— Отам билим кишиларини севарди. Элимизда эски битикчилар бор эди, қари-қартанглар келиб турар эди унинг хузурига. Қадим замонлар ҳақида сұхбатлашардилар. Уларнинг сўзларини энди англаб етаяпман. Сен отангни Тангрининг кути дейсан. Жуда қадим замонларда бу ерларнинг ва Қўшачойорасининг ҳукмдори бўлмиш бизнинг ота-боболаримиз ҳам ўзларини қутли дер эдилар. Улар ҳам ўзларини кўкнинг кути деб ҳисоблардилар. Сўнгра бу кунга қадар ҳудуднинг энг катта улуси бўлган улбайларга ҳам бошқа улуслар лулли — ваҳший, бегона, келгинди, кўчманчи дер эдилар.

Кун хоннинг кўзлари йўл кетди:

— Бизнинг бу оқинимиз на биринчиси, на охиргиси. Хоқон отам шундай дейди. Биз оталаримизга ўхшаган фарзандлармиз. Уларнинг йўлидан бошқа йўлимиз йўқ.

Бу сўзлар уларнинг учрашувидан икки-уч минг йил олдинги даврга нур сочиб турар, бу нурдан янги фарзандлар дунёга келарди. Бинобарин, қадим замонларнинг шонли тарихи бир неча юз йиллик ассур асорати даврига келиб узилиб қолар ва эски беклик билан ҳозирги қуллик ўртасидаги ўпқон юракларни ўттар эди. Ассурия мадлари, урап ва алароидларнинг халқни муттасил эзиб, қалъаларни вайрон қилиши, кишиларнинг қиличдан ўтказилиши, кентларнинг ҳувиллаб қолиши, минг-минглаб катта-кичикнинг асир қилиб олиб кетилиши ҳамон тўхтовсиз давом этарди. Тутуқ буларни чуқур фусса билан сўзлаб берди.

Элчилар қайтишди. Ўғуз хон бу алоқани маъқуллаган, Кун хонга Тутуқقا ёрдам қилиш ҳақида топшириқ берган эди.

Умуман, мадарларнинг байроғида илон сурати борлигини эшитганда у Қам Отанинг сўзларини яна бир бор хотирлаган, кўклар билан боғлиқ бўлган бу икки улус яқинлашувини ҳам Тангри иродаси деб билган эди.

Кун хон бутун бошли бир қўшинга бас кела оладиган суворий бўлукларидан бирини мадарларга ёрдам учун қолдириб ортга қайтди.

* * *

Жанубда мадарлардан белига қувват кирган, мадлар билан келишиб бирлашган Ўғуз хон Ачичой бўйлаб Озар кўлига қайтди, у ердан Чалдирон даштига йўл олди. Боши қорли Афри Хонтангрига ўхшашлиги билан олисдан уни ўзига чорлаб турарди. Бироқ у ерга етиб бормай, ўнгдан сўлдан тоғларга тулашиб кетган кенг бир пастқамликда қўққисдан урар қўшинига дуч келди. Бу Ўғуз хоннинг Қазилик тоғларидан жанубга ошиб ўтгандан кейинги илк катта жанги эди. Унинг қаршисини кесиб чиққанлар бегона уруғлар эди. Ички урушлардан тинчиб қолган Ўғуз «Билагимиз кучдан қолди, қиличларимизни занг босди, мардларга бу қадар ўтириб қолиш ярашмайди», дея ҳайқирди, урушлар орасидаги сукунатда қўшинини чулғаб олган лоқайдлик руҳини бир даъвати билан ўзгартириб юборди. Бирданига ҳар бир йигит бир арслонга айланди.

Ўғузнинг ўзи олдинда эди. У, қаватида ҳар бири ўн ёғийнинг ўтакасини ёрадиган қўриқчи алпларини демаса, бошқа оддий ўнбошилардан, тархонлардан фарқ қилмас эди. Шундоқ ҳам у инжу-олмосли хоқонлик тожини фақат шўланлардагина кияр, юришда, босқинда ўз суворийларидан ажralиб туришини истамайдиган Ўғуз бутун бошига юпқа теридан тикилган бўркини кийиб олган эди. Узун жингалак соchlарини ипак чилвир билан боғлаб олган эди. Ўғуз суворийларига бас кела олмасликларини сезган оғир яроғ-либосли душман қўшини майдон ўртасида темир қалқонларини бошларига тутганча, гўё улкан бир тошбақага айланиб, қаршидаги душман яқин келишини, ҳужумга ўтишини кутиб турарди. Суворийларнинг ўқ ёмғири тошбақадек бошини ичига тортиб олган ёғийга қандай таъсир этсин? Ён томондан ҳужумга ўтган суворийлар, буни сезган каби, қўққисдан ўз йўналишларини ўзгартириб, бу фаним тепасининг, чақилмас тошнинг устига тикка бостириб бордилар. Суворийлар тасаввурга сифмас бир эпчиллик, қулоқни йиртгулик бир ҳайқириқ билан душман атрофидан айлана бошлардилар. Аввалига ҳеч қандай тадбир ишлатмасдан, ўқ отмай, қилич чопмай, шунчаки давра солиб чопдилар. Ёғий қўшини бекиниб олган қалқонлари остидан бу телба қуюнни кузатар, кузатгани сари боши устида кўк, оёғи остида ер гир-гир

айланарди. Гүё ўзлари айланайтганлари каби оёқда тура олмасдилар. Уларни ўз уюрмасига солиб олиб ҳозир күкка учирив кетгүдек бу қуюнга чидай олмай, қалқонларини тушириб, ўқقا құл чўзган аснода суворийлар қаршисида бир лаҳза гангиб қолдилар. Ёйдан учган ўқ каби бу суворийлар тинмай от солиб, душман ичига ёриб кирмоқда эдилар. Кўз очиб-юмгунча Ўғуз суворийлари ўз сафларини тифдек тилиб келмоқда эди. Бу бир ажал тифи, қочиб бўлмас қисмат эди. Бир неча соат ўтгач, темир қалқонлар билан қўрина олмаслигини англаб етган душман қўшини арслон панжалари остида тилкаланган тулкидек тўлғонар эди. Бироқ Ўғуз тинчий олмасди. Бу Тангрини танимайдиган, инончсиз, йиллар мобайнида мазлум уруғлар қонини ичиб келган қаттол душманинг элбеги билан юзмажуз келишни истарди. Бироқ бунинг ҳожати қолмади. Ўғуз суворийлари ёғий жангчиларининг жасадлари орасида елдек кезиб юрар, қочмоққа йўл ахтарган кичик-кичик гуруҳларни қуршаб олиб қирап эдилар. Ёғий қўшинининг кичикроқ бир бўлуги гўё аввалдан ҳукми ўқилган, тақдири аён бўлган бу жангнинг охирини кутиб ўтирмай, ўз танхуярни¹ ўртага олганча қочиб кетмоқда эдилар. Кун хон алплари билан унинг ортидан тушди. Чалдирон билан Ван кули орасидаги довонга етганда тўхтади. Қачонлардир селдек оқиб тушган тош кўчкилари тоғ нишабликларини тусиб кўйган эди. Уларнинг орасидан кечиб ўтиш мушкул эди.

Шағалда отлар суриниб кетарди. У ортга қайтди. Жангдан сўнг Ван элбегисининг қўлида кўл бўйидаги кичкина бир қалья қолган эди. Енгилган элбеги Ўғуз хонга битиг жўнатди:

«Буюк хоқон бизни душман деб билмасин. Урарлар қадимдан озарларга яқин бўлишган. Урушган халқлар эмас, улус катталаридир. Буюк хоқон гуноҳимиздан ўтса, ҳамиша унинг томонида, амрига тобе бўлиб қолажакмиз».

Ўғуз хон унга «Бўйин эгиб, хирожни муддатида жўнатиб турсанг гуноҳингдан кечаман», деб мактуб жўнатди. Ораз бўйидаги кенгиш, ҳосилдор ерларда бир ойга ҳордиқ чиқариб, сўнг Гўйча денгизига чиқиб бордилар, баҳорнинг охирларида кўлухлар томондан Кур бўйлаб юриб, яйловларга етдилар. Саволондан қишлоққа қайтиб, ортда

¹ Танху – шоҳ

қолиб кетгандар билан кўришиб-қовушиб, қунботарга – боши қорли юксак тоғларга туташиб кетган чўлларда қароргоҳ қурдилар ва қиш бўйи сурув-йилқиларини шу жойда боқиб чиқдилар.

Ўузнинг босқинларини, юришларини қўркув билан кузатиб турган, нима дейишини, нима қилишини билмай қолган қўшниларнинг кутмоқдан ўзга чоралари йўқ эди.

Кўлух томондагилар Ўғуз элчилариға чираниб, хирож беришдан бош тортишган, «жанг қиласиз» деб жавоб берган эдилар.

Кур-Ораз оралиғида ўтказган қиши, эҳтимолки, Ўзунинг умридаги энг ажойиб, энг тинч даври эди.

Бошқа қўшнилар билан музокаралар узоқ давом этгани йўқ.

Кўлухларнинг қайсарлиги ҳам уни хафа қилгулик, куйдириб-ёндиргулик ишлардан бўлмай, расамадига тушиб кетиши аниқ эди. Бинобарин, унга фараҳ баҳш этган нарса фақат оёқ босиб борган ерларида унга қарши тура оладиган бир қучнинг йўқлигигина эмас, балки илк бора бу қадар бўлиқ, қорсиз, сувга мўл, ҳавоси юмшоқ бир жойда қишлаётгани, улуснинг қорин фамидан халос бўлгани эди. Кўй сурувлари, от йилқилари, тuya қайтабонлари бир йил ичида икки ҳисса ортган эди. Қўшин сақламоқ, аскар улушкини пайсалга солмай бериб бормоқ учун от, мол-ҳол, ҳосилнинг ортиқча қисмини сотар, озиқ-овқат, кийимбошга айирбошлар эдилар.

Баҳор келди. Ўғуз хон бу қадар юмшоқ қиш кўрмагани каби бу қадар фавқулодда бошланган иссиқ баҳорга ҳам дуч келмаган эди. Элчиларга менсимай жавоб қайтарган улуслар билан ҳисоб-китобни қурбон байрамигача тутатмоқчи эди. Ўн кунлик юришдан сўнг Кўлух юртига етиб бордилар. Бироқ элчилари бу хабарни етказиш учун анча олдин кетишган эди: «Ўғуз хон бизга билдиримасдан бостириб келди, деб юрманг. Жанг майдонини танланг, мен боряпман».

Кўлухлар уларни юртларининг ташқарисида кутиб олмоқчи эдилар. Бироқ Ўғуз хон улардан илгарироқ ҳаракат қилган эди. Ўз ҳудудларидан чиқиб олишларига имкон бермади. Тушга қадар давом этган жангда кўлухлар тормор бўлиб, ўрмонлар, тоғларга қочиб кетдилар. Гарчи бир

неча кундан сұнг қайта тұпланиб, Үгүз хоннинг устига бостириб келмоқчи бұлған әсалар-да, бироқ уларга бас кела олмасликларини билиб, хоқон қароргоҳыга сұлҳ таклифи билан әлчи жұнатдилар. Элчиларни чодир қаршиисида ёқилған гулхандан үтказиб, хоқон ҳузурига бошлаб келдилар. Бу сұлҳни қабул этган хоқон күлухларга товон солиб, қүшинига бир ярим ойча ҳордиқ бергач, Гүйча бүйидан кечиб үтиб, ёзни Олатоғ яйловида үтказdi.

Шундан кейин ҳам күлухлар бир неча бор аҳдлашувни буздилар. Үгүз бунга пинак бузмади, Кун хон бошчилигидаги бир бўлук сара суворийларни уларнинг устига жұнатар экан, деди:

— Мен бир ярим ой ичиде уларни яхши билиб олдим. Кучларини ҳисобга олмай чиранадилар. У ерга катта қүшин жұнатиш шарт эмас. Тинчтиб қўйишга сизнинг ўзингиз кифоя қиласиз.

Кун хон тезда күлухларни тинчтиб, Олатоққа қайтди...

* * *

Муттасил юришлар, үсмирилигидан бери ҳаётининг катта қисмини от устида, әгарда үтказиши уни оғирлаштириб қўйган эди. Фақат энди, шу қадар узоқ йўлларни босиб үтгандан кейингина ер юзини бир элга, бир үлкага айлантириб, бир байроқ остида тұпламоқнинг, жоҳил, очкӯз, еб-ичишидан бошқасини билмайдиган, бир парча нон, бир шапалоқ ер, бир қуттир эчки учун бир-бирининг душманига айланған, қон тўккан, юртларни вайрон этган кишиларнинг нигоҳини кўкларга, Улуғ Тангрига қаратмоқ нақадар мушкул бир иш эканлигини англаш етган эди. Қарийб минг йиллар аввал бошланған бир низом, сонсаноқсиз битиклар, тўраларнинг ўзи гүё кифоя эмас эди. Неча йиллардан бери давом этаётган кўчда кўрганлари ҳам унинг учун бир сабоқ эди. Бу юришлар гулханида ёниб кетаётган эл-юртнинг қўл-қанотини йиғишишириб олиш тобора қийинлашмоқда эди. Кўчни тўрт-беш минг кишилик тұпларга ажратмаса, уни емак-ичмак билан таъминлаш қийин эди. Буларнинг ҳаммаси Үгүзни чукур хаёлга толдирап, юртининг бундан кейинги ҳаёти, келажаги учун янги йўллар ахтарар эди.

* * *

...Ҳосилдор қишлоқ, ўт-ўлани одамни яширадиган яйловлар эл-юрт учун тўйга айланган эди. Тангри кўқдан ўз баракотини ёғдирарди. Туғиб-кўпайган қўй-қўзилар яйловларга сифмасди. Талон-торождан тушадиган ўлжага, бож-хирожга кўз тикканлар жуда оз эди. Улгайганлар қишлоқ-қишлоқ бўлиб ажralиб чиқиб алоҳида юрт тикиар, «Улус ортиб кетди, энди бу кўчга сифмай қолдик», дер эдилар. Ўгуз хон Озар кўли атрофида Янгикентдан ҳам гўзалроқ пойтахт қуриб, бу бўлиқ ерларда муқим яшаб қолиши мумкин эди. Бинобарин, ҳар тонгда қуёшни қаршилар экан, Тангри нури ила тўлиқ юрагида кўк, ялавоч номидан туғилган бу инонч ўйинларига чек қўйишнинг бир хоқонлик қурмоқ қадар қийин эканлигини ҳис этарди. Ундан ажralмаган, бутун ўтган йиллар давомида унга елкадош, йўлдош бўлиб келган беклар, кечагина от устига бир сапчиб чиқадиган йигитлар унинг кўз ўнгига оғирлашиб борар, ерга тушмоқ, тупроқ билан тиллашмоқ, экин-тикинга кўнгил кўймоқ истаганларнинг сони ортиб борарди. Ёши улуғлар ўтроқ хонадонларга кўзлари ёшга тўлиб боқар, «Умрнинг сўнгида шундоқ иссиққина бир кулбам бўлсайди», дея ҳавас билан сўзлардилар. Йўллар бўйи кўчдан ажralиб қолган қари-қартангларнинг фарзандлари кўзи ортда қолар, «ҳоли не кечди экан ота-онамнинг» дея ўртанар, маълум муддатдан сўнг ўзлари ҳам уларнинг ортидан кетар эдилар. Ўз идроки билан элга нур сочган, ҳар бири бир билим уммони бўлган Услу Хожа каби эл оталари тушиб қолган ерлар бора-бора каттакон кентларга айланарди. Минг йиллар кейин ҳам бу тангричи кимсаларнинг сифинган топинчоқлари Тирик Боболар, Бобо тоғлар, Бобо пирлар каби маъбад бўлиб қолаверарди. Ҳар бир қўл етмас тоғ этагида кейинроқ ишфол этиб бўлмаслиги билан Қиз қалъаси дея ном олган бир ўгуз қалъаси юксалажак эди.

У Олатовдан бу Олатоқقا, Хонтангридан Саволонга, Инжудан Кур-Оразга қадар йўллар бўйи, чўллар бўйи жангларда, юришларда ўлган бекларнинг, эл бошлиқларининг сўнгти қароргоҳлари, улуснинг ҳисобсиз ёдгорликлари бўлиб юксалиб турган кўрғонларнинг, хонтепаларнинг ҳар бири ўғузнинг юрагида бир тугунга айланиб қоларди.

Йўллардаги йўқотишлар нақадар кўп бўлса-да, эл катта-лашар, кўчдан ажралиб қолиш ясоқ эканига қарамасдан кенгashiб-кенгашмай қолиб кетаётганларнинг сони ортиб борар, йигитлар йўллар бўйи қаршиларидан чиққанлар билан севиб-севилар, юраклари измига бўйсуниб кетиб қолар, ер юзи бўйлаб сочилиб бормоқда эдилар. Тангри-нинг элчиси бўлса-да, Тангри унга абадий ҳаёт инъом этмаган эди, бошқалардек кексайиб бориши, касалликдан, йўқотишлардан, ўлим ва қонлардан ҳимоясиз эканлиги уни қаттиқ эзарди. Юрагида қоришиқ туйғулар бош кўтармоқда эди. Уни қийнаётган, роҳатини бузатган бошқа важлар ҳам бор эди. Ўз улусига яқин бўлган уруғлар – кангарлар, собирлар, озарлар, босиллар, кассурлар, манарларнинг бир-бирлари билан чиқиша олмасликлари сабабли бошқаларнинг ўлжасига айланиш хавфи юрагини сиқарди. Тўғри, уларни сўриб ётганларнинг хоқонлигини хоқонлик деб бўлмас, бу шунчаки ҳавойи гап эди. Йилда бир бора ҳар бир уруғ ўлпону хирож сифатида юзтacha қўй, ўнтача от бергани билан камбағаллашиб, ҳокимиятга қарам булиб қолмас, тағин тоғу далаларида озод, ўз удумлари бўйича яшашда давом этардилар. Бироқ Тангри томонидан танланган улуснинг эл қурмасдан, ягона низомсиз, бошлиқсиз яшашлари, ён-атрофда рўй бераётган воқеалардан йироқда қолишлари ўзлари кечиб келган йўлларга ярашмайдиган бир ҳол эди. У ўз халқининг қаршисида нақадар оғир бир йўл турганини кўриб турар, бу қонлар, жанг-жадалларнинг яқин орада тугамаслиги, юксалишу таназзуллар, бирлашуву ажрашувлар ҳали узоқ давом этиши юрагини аччиқ изтиробларга тўлдирап эди.

Ўғуз хон кейинги пайтларда юришларга тез-тез ўғилларини жўнатар экан, бу Тангри билан юзма-юз қолмоқ, унинг амрини ёймоқ истаги эканлигини таъкидласа-да, бошқа хаёлларга ҳам борарди. Аччиқ бўлса-да, бу ҳақиқат эди. У ўғилларига ишонар, ўзи иштирок этиши лозим бўлган, бироқ иштирок этмаган юришларнинг жўшқинлиги юрагида сўниб борарди. Қонлари қайнаганда ерли тинч аҳолини ранжиттан, Тангри элчисидан юз ўгиришга олиб келган ўринсиз талон-торождан, зўравонликдан, бошбошдоқликлардан элини тұхтата олмаслиги уни обруғизлантиради. Қўшни ўлкалар орасидаги муттасил қонли

жанглар уларни ҳам четлаб ўтмаслиги аниқ эди. Тўғри, ҳали-ҳамон ўзи мағлубиятга учратган қўшниларга нисбатан унинг қушини бениҳоя қудратли эди. Бойликлари мўл, аскар борасида ташвиш чекмас, қул бозорлари арzon қулларга тўлиб ётар, истаганча аскар ёллаш мумкин эди. Бироқ бир кунмас бир кун ҳаммасининг ниҳоясига етиши ва бирма-бир барча қўшнилари билан юзма-юз келишлари кутилган ҳол эди.

Баҳор ойларида суворийларига озодлик бериларди. Уларни назорат қила олмасликлари боис хуфиёна ёки ошкора талон-торожларнинг кети узилмас, бу эса эл шаънига қўлка соларди. Йилда бир бора хирож олганингдан сўнг бошқа қандай баҳона билан юртларни талашинг мумкин? Бу Тангри инончига уйғун келмайдиган бир иш эди.

Қўшачайорасида унинг ана шу хавфи рўёбга чиқди. Алоҳида-алоҳида аскарларнинг экин-тикин ерларини талаши, хоқон номи билан савдогарларни алдашлари ўгузларнинг келишидан севингланлар тасаввурини остин-устин қўлмоқда эди. Кишиларнинг бор-йўғини шилиб олиш, уларда ноҳуш тасаввур қолдириш мумкин эмасди. Йиллик бож маълум бўлганидан ва ўз муддатида бериб турилганидан сўнг бу яғмолашлар Ўғузнинг уруғ-аймоғига, Тангридан келган амрига соя ташлар, унга бўлган меҳр сўниб борарди. Етиб келаётган хабарлар, ерли бекларнинг шикоят-шиквалари хоқоннинг ичини тўлдириб юборган, унинг «қилган ҳар бир ишинг тўғрими?» деган шубҳаларини аланга олдиради. Шундай мулоҳазалар билан Ўғуз янги хукм чиқариб, аҳолини яғмолашни ман этди.

Ўғуз хонга бош эгиб келган уруғ беклари унинг Бобилга, Мисрга юриш бошлашини билганлари ҳолда истаган пайтда узун оёқли жанг отлари, хоҳлаганча аскар топиб беришини ўз зиммаларига олардилар. Улар ўз иззат- нафсларини биладиган, ота-боболари номидан фуур туюдиган, ернинг остию устидан огоҳ зукко кишилар эди. Кўй қурасига ўхшаш ҳовлиларга биқиниб олган шаҳарликларга, бу қўрада ўзларини ер юзининг хукмдори деб билган от-обрули, мансабдор бошлиқларга киноя билан қарап эдилар. «Қўрққанларидан ўз қўраларидан чиқа олмайдилар. У ерда нима бичиб, нима тикади, нима қуриб, нима бузади – тушунмаймиз. Барibir сиз қўриб турган бу тоғлар яйловиу қишлови билан бизники-ку, ахир».

Үгүз хон уруғио улуси билан ер юзининг у бошидан бу бошига юришидан севинарди. Бироқ энди Олтойларни, хонтангриларни, далаларни, Инжу водийсини, Устюртни эслатадиган бу эски ва янги юртда болалари ва хотинларини ўз ортидан эргаштириб юришни ортиқча деб биларди. Улуғ Топуқ байрами арафасида құл остидаги турроқларни бекларига бўлиб берди. Шундан сўнг шимолга қараб юрди. Бузлоқ тоги этагида, ўрмон ичиди, икки тоғ дарёси оралиғида чодир тикиб: «Битта қалъамиз шу ерда бўлади! Урушга кетганимизда хотин, бола-чақаларимизни оптимиздан эргаштириб юрмаймиз», — деди. Қўшни кентлардан, эллардан ҳам усталар олиб келинди ва жадал суратда янги кентнинг деворлари тикланди. Кейинчалик бу қалъа Қабала номи билан Ўгуз алпларининг бош кентларидан бири бўлиши лозим эди. Дарёлар тошиб чиққанда ҳам унинг остонасига етиб келмасди. Ўйларини шундоқ бир тангрисол ва хатарсиз жойга қурган беклар жангга дадиллик билан кира олардилар. Эл бекларига Каспий соҳилида, шимолдан келадиган йўллар устига, йўлларнинг ўрмонлардан чиқиш жойида яна бошқа бир қалъа қуриш топшириғини берди. Шаброн Ўгуз хондан сўнг Қофқоз Туркистонининг асосий марказларидан бирига айланди.

Кўк фарзандларининг илк маъбадлари ва хазиналари бўлмиш Ота Мағорани эслатадиган ерлар бирин-кетин излаб топилди ва улар топиноқларга, қурбонгоҳларга айлантирилди. Озарларнинг ўз юртларига қайтиши, Ўгузларнинг ўтроқлашуви билан кентларнинг янгича бир гуркираган ҳаёти бошланган эди. Бироқ Ўгузнинг истаги амалга ошмади. Бекларга берилган ерларда фақат қаринқартанглар, ҳолдан тойғанлар, ногиронлар қолди. Аёллар ўз эрларидан ажралиб қолишини истамадилар. Чунки ёлғиз қолишга қўрқар эдилар. Ўгуз йигитлари орасида, бу ерларга юрт солингандан сўнг, ерли қабилаларнинг қизларини севиб қолган, уларга уйланган, ортидан кетиб, неча кунлаб-ойлаб ортга қайтмайдиганларнинг сони ортиб бормоқда эди. Эл ўз низомини бузмас, ўзга элларнинг удумларига алданмасди, бироқ, ё Тангрим, бу тоғ келбатли кишилар гўзал қизларни кўрган заҳоти чунон юмшаб қолардиларки, ҳамма удумлар унутилар, битиг-митиглар ёддан чиқиб кетарди...

Шундан сўнг Ўгуз хон Ганжаёзи деган жойда, шимол-

даги Ачичой ёқасида, Ораз қирғоғида эскидан қолган бир неча кентни қайта тиклаб, деворлар билан қуршаб қалъаларга айлантириди.

* * *

Үфуз хон Саволонда исмини сўрамаган мағ билан учрашганидан бери элчилар келтирган битиг-мактублар орқали хабардор бўлгани, бўйсуниб, хирож бергани, ўз уруғидан бўлгани, бинобарин, урушни истамагани Ман элбегиси Акишар билан юрт сарҳадида учрашдилар. Манлар билан қадимдан душман бўлиб келган Ван ҳукмдорининг тумшуғи ерга ишқалиб, Шимолдан, Кунботардан Ман ерларига тез-тез суқилиб кирувчилар ўртадан кўтарилигандан сўнг Акишар ўзини Үфуз хонга қарздор ҳисобларди.

Ўз уруғдошларини бир байроқ остида тўплашдан бўлак буюк истаги бўлмаган, умр бўйи ана шу фикридан қайтмаган Үфуз хон ўзига ҳам билгисиз бир туйғу билан манларни, улардан анча юқорида жойлашган мадарларни бошқалардан айрича кўрап, уларнинг тупроқларига юриш қилишни истамас эди. Истаса-да, буни ортга суриб келарди. Кўнгилли бўлиб яқинлашгандарни қулдек эзиш ярашмайди. Кучимизни кўриб ўzlари тек турадилар. Ҳозирча эса улар оёққа турсинлар, юксалсинлар, куч тўпласинлар; бизга таяниб душманлардан ўч олсинлар. Ишончлари, лаёқатлари тиклансин. Кўшилар орасида бошларини баланд тутиб юрсинлар.

Бу фикрларини Акишар билан бўлишар экан, унинг ориятига тегишини, бўйнига миннат юки қўйишни истамади. Ўз куч-қудратидан сўзлаш ҳам ортиқча эди. Кўшини шундоқ кўз олдида, ўзи ҳаммасини кўриб турибди.

Манлар билан Үфуз хоқоннинг бирлашганини эшитган Бобил янсуси¹ қўшин тортиб, уларни Данела дарёсининг кунчиқаридаги Арбил йўлида қарши олди.

Озар кўли бўйларидан келиб, Үфиздан анча илгари Шумердан ва Кўшачой оралиғидан қасирға каби ўтганича бу ерларни юз йилга ўз қўл остида сақлаб келган Қутжангчиларидан сўнг Бобил бу томонлардан таҳлика кутмасди. «Бошлари ўзаро ички низолардан чиқмай қолган...

¹ Янсу — шоҳ, ҳукмдор

Хатар ҳамиша Ассур, Матиенна, Ҳитит, Алароид, Қамар элларидан – шимолдан келади».

Бу урушда осонгина зафар қозониш фикрида эдилар. Илк тұқнашувдаёқ манлар янчыб ташланадигандек эди.

Бироқ жанг бошланғандан сүнг Бобил янсуси янглишганини, худолар ундан юз үгирганини англаға. Бу фақат Тангри иродаси билан содир булиши мүмкін эди. Үнгі бокиб, оқ болут бостириб келаётганини күрди, сұлға бокқанда, қора болут бошини қоплади. Коҳинларни түпләди. Ердан, күкден ҳатто ажал келганида ҳам, олдини олмоқ улар учун қийин әмас эди. Жангларда коҳинлар кучи билан құпгина фавқулодда ишларнинг, құнгилсизликларнинг олди олинган эди. Бироқ бу ерда коҳинларнинг ҳам ожиз эканлиги аёң бүлди. Чunksи бошларини қоплаб олған нарса болут әмас, сара ва учқур от мингтан суворий бұлуклари эди. Бу бұлуклар жанг майдонини қуршаб турған тепаликлар орасидан ҳозирга қадар әшитмаганлари бир ҳайқириқ билан елиб үтар, ёйларидан виз-виз учған үткір үқлари ёв күксидан кириб курагидан тешіб чиқарди. Бобил құшини саросимада қолғанди. Жанг охирида баланд бир тепалиқдан олти от құшилған аравасида жангни кузатиб турған Бобил янсуси ҳибсга олинди. У үзи танийдиган Манна әлбегисининг ёнида, алп йигитлари қуршовида турған, бүйи ҳаммадан икки қарич баланд бүлған қоядек құрч Үғуз хонни күрганда үз мағлубиятининг сабабини тушуниб етди. Үғуз хон ва Акишар у билан мулойим, әлбекларга хос муюмлада бүлдилар. Бобил янсусининг ияклари титраб неларнидир шивирлаганини күрган Үғуз хон Акишарнинг тилемочидан унинг нима деганини сүради.

Худоларининг номини тутиб илтижо этмоқда.

Үғуз күлди:

– Бу шүрликлар худоларининг номини бир-бир санасалар, неча кун кетаркин? Бунақада жанг қилишни үрганиш учун вақт топа олмайдилар.

Сүнг тилемочга ҳар бир сүзини айнан таржима қилиши лозимлигини айтди:

– Гапимни унга түшүнтир! Улар ҳозирги турған Құшачойораси – шимолий тоғлардан денгизга қадар – бизнинг қадимий ота юртимиздир. Үқ үз садофига қайтади. Сен беклигингни давом эттиравер, аммо хирожимизни

бериб, бизга хизмат камарини белингта боғлашинг лозим. Биз бузувчи эмас, тузувчимиз. Сени қайта ўз ўлкангга янсу қилиб тайинлайман. Бошингни тик тут, енгилган бўлсанг ҳам, сулҳ туздим деб айт!

Бу Бобил ҳукмдори учун кутилмаган гап бўлиб, муқаррар ўлимдан бу қадар осон қутилиб қолишини хаёлига ҳам келтирмаган эди. Ўлдирмасалар бўлгани, бошқа неки буюрсалар, ҳаммасини бажараман, деган фикрда эди. Ўгузларнинг бўри бошли камарини белига боғлади, аҳдлашиб олдилар, Ўгуз бир бўлук суворийлари қуршовида уни Бобилга жўнатди...

АССУРЛАР БИЛАН ЖАНГ

Озар кўлининг кунчиқаридаги ўт-ўлани бўлиқ тоғ этағида отларини боқиб олганларидан сўнг қурбон ойида кунботарга йўл олдилар. Бу юришдан Акишарнинг кўнгли тўқ эди. Ўгуз хон уни узоқ йиллар мағлубият нималигини билмаган, ўзини яратганинг ердаги қўлкаси, очуннинг, бошқача айтганда, дунёнинг ягона ҳукмдори, танҳо соҳиби ҳисобланган, саккиз юз йилдан бери енгилмай келётган Осиё номли бу ҳудудда барчани қонга ботирган, сон-саноқсиз қўшинга эга бўлган, аскарлари энг ўткир қурол-яроғ билан шайланган, қутириб кетган Ассур шарроси¹ томон бошлаб бормоқда эди. Андоқ шоҳ эдиким, ёздирган битикларида, қоя тошларида ер юзининг энг баландпарвоз сўzlари ила ўз буюклигини, куч қудратини, уруг-аймоғини, енгилмаслигини, мардлигини таърифлаган, охирида жўшиб кетиб, аёлларга ўчлигини алоҳида таъкидлашдан ҳам тортинмаган эди.

Шарро Ман элбегининг бож-хирож тұлашдан бош тортганлиги, босиб олинган ерларнинг, аввалги босқинларда тутқун қилиб олиб кетилганларнинг ортга қайтарилиши талааб этилганлиги ҳақидаги мактубини олгандан сўнг тўрага мувофиқ машхур фолчиларини тўплади: « Тангриларимдан сўраб кўринг. Бизга кул бўлмоқни баҳт деб билган Акишар нега бош кўтарди экан? Ушбу жангта кирсаммикан? Кечагача қўл остимда бўлганлар наҳот энди қўлимни чопиб ташлай олсалар? Улар бу кучни қаердан

¹ Шарро – ассурлар шоҳи

олдилар? Күчманчи отлиқлар унга мадад беришмоқдами? Бу жангда наҳот мен мағлуб бўлсам? Хотинларим, болаларим наҳотки тутқун этилиб олиб кетилса?

Наҳотки тупроқларим бегона отлар туёғи остида топталса? Шамас Тангримдан сўраб қуриңг, наҳотки мени ажал кутмоқда?»

Фолбинлар кечаларнинг юлдуз фолидан кундузларнинг кўм фолигача барча билимларини ишга солдилар, гил ва папирус битиклари синчиклаб ўрганилди, «Бу жангда битта янсу ҳалок бўлади. Бироқ у сен эмассан. Бу жангда Кунчиқардан келган, ўзини Тангрининг ялавочи деб билган, сени менсимаган, қутуриб кетган Ўғуз хон ҳам иштирок этади. У бор экан, бизнинг ва тангриларимизнинг мавжудлиги қоронғи бўлиб қолмоқда. У маҳв этилиши керак», — дедилар. Сўнгра афсунгарлар чақирилди. Улар кўкларнинг барча жодуларини, уруш фаришталарини ишга солиб, жанг пайти манларнинг қўл-оёғини шол, қўзларини кўр қилиб қўйишлари, қаршиларидан ўпқон очишлари, шу тариқа ассур қўшинига мадад беришлари лозим эди. Ўғуз беклари бу жангда фолиб чиқиши, ассурларнинг енгилмаслик ҳақидаги уйдирмаларини зудлик билан йўққа чиқариши, ер юзининг ҳозирда танҳо ва абадий танҳо бўлиб қоладиган қудрати ассурлар эмас, ўғузлар эканлигини исбот этганлари ҳолда бу олди-соттига бир йўл чек қўйишни истардилар. Улар бунга ишонар, ўз қудратларига шерик чиқишига йўл қўймоқчи эмас эдилар. Хоқон эса ман қўшнини чамалаб кўрап экан, бу жангда ўз ўғилларининг маҳоратини ҳам синовдан ўтказмоқчи эди. Шунинг учун Акишарни олдинга жўнатди.

Ассурлар Ўғуз қўшини ўз ерларига кириб келганини билсалар ҳам, кучларини парчаламаслик учун унга қарши юрмадилар. Улар ман қўшини билан таниш бўлиб, жангда кўп бора юзма-юз келган эдилар. Ман эли юз йиллардан бери ассурлардан қўриниб келар, нажот йўлини улар билан алоқада, уларга соме бўлишда деб билардилар. Бироқ Қамар ва Ўғузлар майдонга чиқиши билан бу сомеликка чек қўйиб, хирож беришдан бош тортган эдилар. Эндиликда аввалги асорат ўчини олиш истагида енгилмас ассур қўшини устига босиб бормоқда эдилар. Ассур шарроси Акишарни унинг қўлдоши бўлмиш ўғузлар етиб кел-

гунча синдириб ортга қайтара олишига, парчалаб ташлашига, ана шу жүшқинлик оғушида чаирилмаган мәхмөнни қаршилаб, қийма-қийма қилиб ташлашига арқайин эди. Унинг «енгилмас» қүшини ҳали мағлубият аламини тортмаган, ёйдаги үқдек таранг турар эди. Шарронинг жанг борасидаги салоҳиятига эса гап йўқ эди. Фақат бир жойда янгишган – Ўгуз суворийларнинг нақадар эпчиллигини билмас, суюнган қояси нураб қолганини англаб етмаган эди. Қархисида фақат Кунчиқарнинггина эмас, балки бутун дунёнинг энг қудратли қүшини турганига ишонгиси келмасди.

Ўгуз хон ассурлар кўра олмайдиган олис тепалардан туриб жанг чизиқлари ёй ипидек таранглашганини кузатар экан, кўп бора синовдан ўтган бир савқи табийиси билан манларнинг кучи тугаганини кўрди ва суворийлар бошлиғи Эрдам бекни ёнига чақиртириди. Ўгуз суворийлари пасқамликлардан ёв сари пусиб боргандарича улар бошига булутдек ёпирилишлари лозим эди.

Эрдам бек ўз топширигини олган бўлса-да, қўшиндан ажралиб кетишни истамасди. Ўгуз болалигидан ҳар бир босган қадамини, юзидаги ҳар бир ифодани яққол биладиган, кайфиятини узоқдан туриб ҳис этадиган, аччиқширин кунларининг ажралмас йўлдоши бўлган бу мард жангчи нега эндиликда оёқ судраб қолганини англаб етмади... Кўрқаёторми? Йўқ, бундай булиши мумкин эмас... Туркка кўрқоқлик бегона эди. У жангдан кўрқмас, жангда ўлмоқни шараф деб билар, кўрқса фақат мағлубиятдан, ёлғондан, алданиб қолишдан, эгри сўздан кўрқар эди... Эндиликда Эрдамни қийнаётган нарса не бўлди экан? Нимани яшиromoқда ундан?

– Кўнглингдагини яширма, Эрдам! Айт манга! Нега оёғинг судраляпти? Нега буйруғимни бажариш учун ҳалигача отланмадинг?

– Ўгуз! – узоқ йиллардан бери у илк бора хоқонга «хоқоним» деб эмас, олис ўсмирлик йилларидағи каби ўз оти билан, уни ранжитишдан, жанг олди ўртага совуқлик тушишидан кўрқмай мурожаат қилаётган эди.

Бироқ бу хоқоннинг кайфиятини бузмади, чехрасини Эрдамга таниш бўлган нурли, самовий-илоҳий бир табасум қоплади.

— Очифини айтавер, Эрдам! Нима у сени қийнаётган?

— Бу бизнинг ҳозиргача кўрган жангларимиз ичидаги оғири бўлади, хоқоним!.. Ичимда шубҳалар кезиб юрибди. Қулоғузлар ҳам ҳар куни янгидан-янги хабарлар келтиришмоқда. Ассурлар бизнинг кучимиз сенда эканлигини яхши биладилар. Биз билмаган нарсаларни ҳам билишади улар. Ернинг остию устидан хабар берувчи фолчилари бор. То сен бор экансан, уларга илтифот ила боқмас экансан, кун кўрмасликларини тушунтирибдилар ўз ҳукмдорларига... «Жанг майдонида нима бўлса бўлсин, фақат Ўғуз ўлдириса бўлгани», — дебди у... Ер юзида тенгсиз, «енгилмас» деб ҳисоблашган ўз сара бўлукларини жангга солмасдан, фақат сенинг ортингдан тушиб, сени ўртадан кўтариш амрини борибди.

Ўғуз хон юракдан қаҳқаҳа чекди:

— Шу бўлдими энди Ўғуз ишонган қўшин бошлиғининг қайғуси?

— Менинг бундан катта қайғум йўқ! Яширмайман, сен ҳақингда нохушроқ туш кўрдим. От устида экансан, лекин у ҳозир миниб юрган отларингдан эмас эди... Бир пайтлардаги, Қил Барак билан илк жангимиздаги бир отнинг устида экансан. «Менинг отим яраланди, ўз отингни бер менга!» — дединг. Бердим! Енгдик душманни... Бироқ бир жарлик устида менинг сен миниб олган отим қоқилиб кетди ва жарликка қулади. Тангрим, хоқонимнинг юлдузи учдими, менинг отим ҳалок этдими уни, деб сўрадим. Тангрим «қўлингни узат», деди; узатдим, сенинг қўлинг гўё уч аршин, беш аршинча келарди, менинг қўлимдан тутиб қолдинг, от пастга қулади, сен эса жарликка боққанча нуқул куласи борибди.

Бош шаман Эран ота ҳам олдимга келиб: «Кўк Тангрим Ўғуз хон билан сени ўз хузурига чақирмоқда. Биттангиз кетасиз. Бу жанг қурбонсиз бўлмайди. Бирга бўлинглар! Биз Тангрига илтижо қиласиз, балки марҳаматини аямас. Буни сенга айтдим, хоқонга айта олмайман», — деди.

— Хўш, энди нима қиласиз дейсан?

— Маслаҳатчиларингдан сўраб кўр! Менга қолса, сен ассурлар излайлиган жойларда, хоқонлик саройингда бўлмаслигинг керак... Жанг майдонининг қоқ ўртасида бўлмоғинг лозим, бироқ...

— Нима бироқ?
— Бироқ у ҳам сен бүлмаслигинг, сенинг либосингдаги бошқа бир киши бўлиши керак. Душман бутун кучини унинг устига ташлаганида сен ортдан туриб қўшнимизни жангга йўллаб турасан...

Ўғуз хон «Ўйлаб кўриб, жавобини кейин айтаман», — дея Эрдамни кузатиб қўйгач, бош маслаҳатчиси — фармонбардорини чақиртириди.

— Бу жангдан неларни кутмоқдасан?

Маслаҳатчи нелардир деб ғўлдиради, у Ўгдил хотунга қараб-қараб қўяр, аммо нима дейишини билмасди. Ўғуз хоннинг ҳар бир сўзини қадрлайдиган, айтганларини китоб қилиб қўрийдиган, сўнгра уларни эл ичига ёядиган, аёлман деб ўтирмасдан, элнинг аччиқ-ширинини биргаликда тотадиган, шунинг учун ҳам эл орасида Ўғузнинг илк хотини Ойтож каби юксак ҳурматга сазовор бўлган бу хотуннинг бугун айтмоқчи бўлган гапи кўп, лекин кўнглидагиларни айта олмасди. Балки шунинг ҳам у маслаҳатчининг гапини кутиб турар, чунки у хоқон билан очиқчасига гаплашишини билар, ёлғон гапирмас, хоқонни ранжитиб қўйишдан чўчимас, иккинчи томондан, дунёning жуда кўп сир-асорини биладиган донишманд киши эди. Эндиликда у гап бошлашдан олдин талмовсираб аёлга қараб-қараб қўяётган экан, демак, иш анча чатоқ, ичидагиларни очиқ-ошкора сўйлашга йўл топа олмаяпти. Буни сезган Ўгдил хотун унга далда берди:

— Гапир, Билга Хазар! Бу жанг мени ҳам ташвишга солиб қўйди, бир томондан эса фолбинлар...

Билга Хазар айтмоқчи бўлган гапини ортга сурди:

— Нима дейишяпти фолбинлар?

Ўгдил хотун хоқонга тикилиб туриб деди:

— Фолбинлар «хоқон бу жангда эҳтиёт бўлиши керак, ассурлар унга тузоқ қўйишган», — демоқдалар.

Сўнгра рўй-рост гапиролмай қолишидан чўчиб, жилмайганча хоқонга қараб деди:

— Ўлим хавфи йўқ, дейдилар. Буни ўзим ҳам биламан. Дунёning энг зур фолбинларидан сўраб кўрдим. Уларнинг ҳаммаси: «У Тангрининг қаноти остидадир, бир юз ўн олти йил яшайди», — дейишди. Уларга ишонаман. Сен узоқ яшайсан. Аммо ўлимдан омон қолиш ишнинг фақат бир

жиҳати, холос. Мен сенинг номингга кўлка соладиган қурамалардан қўрқаман. Эл бошсиз қолса, бизни топтаб ташлашади... Бу жангда қўшинга сен бошчилик қилма...

Ўғуз хон хотуннинг оқилона гапларига амал қилиб ўрганган эди. Энди ҳам шу хаёлда эди. Бироқ ассурлар билан бўладиган бу жанг бошқа жангларга ўхшамаслигини хотини ҳам тушуниши керак-да. Бу гал у ўғилларини ўтга ота олмасди. Жанг майдонида кутилмаган мушкулликлар содир бўлиши мумкин эди, ассурлар юз йиллаб тўпланган уруш тажрибаларини ишга солишлари аниқ эди.

— Бу жанг бошқа жангларга ўхшамайди, мен четдан кузатиб тура олмайман, — деди Ўғуз хон.

«Айтганидан қайтмайди», деб ўйлади хотун.

Энди бор умид маслаҳатчидан эди, агар у Ўғуз хонни ўз гапларига ишонтира олса, яхши бўларди... Билга Хазар эса хоқонни ишонтиришни ўйламас, жангнинг қандай тугашини ҳам билмасди. У ҳам ушбу кунларда турли-туман донишмандлардан жангнинг қандай тугашини сўраб кўрган, бу ҳақда уларнинг фикрини билишга уринган, охирида уларнинг айтган гапларидан кўра кўпроқ ўз тушида кўрганларидан қўрқар, буни хоқондан яшира олмасди. Ўғуз хонни чўчитган, чуқур хаёлга толдирган нарса Билга Хазар билан Эрдам кўрган тушларнинг айнан бирбирига мос келиши, у ҳам Эрдамнинг гапларини такрорлаши эди. Бунинг устига, бу гап қаттиқ сир тутилиши учун Ўғуз хон либосида жанг майдонига кирадиган киши фақат Эрдам бўлиши мумкинлиги ҳақидаги фикр ҳам ана шу маслаҳатчидан чиққан эди...

Ўгдил хотун турмуш курганларидан бери илк бора Ўғуз қаршисига тиз чўкиб, унинг оёқларини қучоқлади:

— Хоқоним, — деди у, — жангда куч билан бирга айёрлик ҳам керак. Ёлғончиликда ном чиқарган ассурлар устига сенинг ўрнингга Эрдамнинг бориши уларнинг ўз амалларига мос келади. Сен ортда қолсанг, кучимиз икки баробар ортади...

Ўғуз хон хотунни қўлидан тутиб турғазди ва «майли» деди, сўнгра Эрдамни чақириб юзма-юз ўтириб узундан-узоқ сұхбатлашдилар. Эрдам хоқон учун қурилган тузоққа бошқа кишининг тушиб қолиши Тангри иродасига мос келмаслиги, шунинг учун ҳам жангда ўзига ҳеч қандай

кори ҳол бўлмаслигига хоқонни ишонтиromoқчи, Ўғуз хонни қийнаётган шубҳаларни тарқатиб юбормоқчи бўларди. Сўнгра у суворий бошлиқларига буйруқларни айтиб, топшириқларини бериб, тагин саройга қайтди.

* * *

Ўғузнинг олисда эканлигидан, Акишарнинг мағлубияти муқаррар эканлигидан севинган ассур қўшинининг илк ҳужумини қайтариб бўлмас, оғир зирҳли пиёда қўшиннинг юришидан ер титрар, жангда чиниқмаган фўр қўшин қурол-яроғини жанг майдонида қолдирганча тум-тарақай бўлиб кетишлари учун ассур пиёдалари ана шу салобатининг ўзи кифоя эди. Бугун ҳам манларнинг мағлубиятига тепаларидағи қўёшга ишонгандек ишонар эдилар.

Акишарга шундай туюлардики, гўё Ўғуз хон уни алдаб жангга соганидан сўнг уларни ёддан чиқариб қўяди ёки бир чеккада туриб олганича ассурларнинг манлар элбегисининг эзib-янчишини томоша қиласди... Аммо қўққисдан вазият ўзгарди. Ассурлар кўкнинг қорайганидан шошиб қолдилар. Жанг майдонидагилар қўёш тутилди деб ўйладилар. Тепалар ортидан узилаётган Ўғуз қўшинининг ўқлари ассур аскарларини бирма-бир ерга қулатмоқда эди. Бу мисли кўрилмаган бир ҳодиса эди. Ўзини ер юзининг энг улуғи деб ҳисоблаган Ассур шоҳи – шарроси кўзлариға ишонмасди. Шу лаҳзада у жанг тутаганини англаб етди. Узоқ йиллар тажрибасига таяниб майдонда сабот билан жанг қиласиган ассур йигитлари эндиликда фақат яратганинг мададига умид қилишлари мумкин эди, лекин бу гал яратган улардан юз ўтирган эди. Аммо шу лаҳза жанг майдонидан яна бир фавқулодда шамол эсиб ўтди. Олисдан учиб келаётган ўқлари ортидан Ўғуз суворийларининг ўзлари ҳам шиддат билан майдон сари отилиб келмоқда эдилар, олдда эса сўнгги пайтларда жанг майдонларида камдан-кам қўзга ташланадиган Ўғуз хоннинг ўзи... Унинг жангга кириши кутилган эди, чунки бу жанг ҳар ўн йил, юз йилда бир бўладиган оғир бир синов эди. Қўшин олдида нақ хоқон келаётганлиги Акишарнинг ваҳимасини тарқатиб юборди, Ўғуз йигитларининг бир кучига ўн куч қўшди...

Ўғуз хоннинг пайдо бўлиши Ассур шарросини хаво-

тирга солган бұлса-да, фолбинларнинг айтғанларини эслади. «Енгилсак ҳам, ҳеч бұлмаганда, бу Тангри әлчисини орадан күтариб таштаймиз», — дея бор-йўқ кучини хоқон томон жұнатди...

Бу пайтда Эрдам бек ўзини чиндан ҳам хоқондек ҳис этар, ҳар томондан ўзига бұлаётган ҳамлалар, ассурларнинг бутун кучларини йиғиб у томон яқынлашишга ҳаралат қилаётгандар унинг янгишмаганини күрсатар, хоқонини эҳтимолки сұнгти жанғдан четлаштира олгани, керак бұлса, унинг йўлида ажални ҳам жилмайиб қарши олишга тайёр эканлиги уни юракдан севинтиради. Ўғуз хон эса жанг майдонидан олисда, қуюқ ўрмон ичидағи қоялар устида туриб воқеаларни кузатар, «бу менинг ишим эмас, ягона Улуг Тангрининг амалидир, жангда биз эмас, Тангримиз зафар қозонади», — деб ўйлар эди.

Ўғуз суворийларининг ilk ҳамласидан гангиб, ўзини йўқотиб қўйган ассур қўшини аста-секин жонланмоқда эди. Уларнинг оғир темир либосли пиёда қўшинининг ўқ ёмғиридан омон қолган бўлуклари тезроқ юзма-юз қўл жангига киришини истардилар.

Ўғуз хоннинг майдон ўртасида, «ўз қўлларида» эканлиги ассурларни дадиллантириб қўйган эди.

Аввалдан берилган топшириққа қўра Ўғуз қўшинининг Кун хон бошчилигидаги кучли бир бўлуги олисда, пастқам бир жойда сақланаётган эди, сирдан бехабар бўлган Кун хон отасининг ҳам жангга кирганини қуриб, ўз йигитларини майдоннинг энг оғир жойига ташлади.

У қаршисидаги ёвнинг ўтакасини ёргудек «Ур-ҳо!» ҳайқириғи билан, қўлида қилич, ассур пиёдаларини кесиб ўтди. Бу Кун Хоннинг севимли жанг усули эди. Душман сенга елимдек ёпишиб олмасин. Устидан бўрондек кечиб ўт. Қаердан келишингни пайқай олмай қолсин. Сафлари сийраклашгач, қочишга тушишади. Бу усулдан ҳимояланыш ассурлар учун қийин эмасди. Оғир қалқон ва найзалилар билан отларнинг қаршисини тўсиб, уларни тўхтатиш мумкин эди. Лекин Кун хон уларга шу қадар тез ҳамла қиласын, тўзиб кетган сафларини қайта тўплай олмасдилар. Шу пайт тепаликлар ортидан ассурларнинг сұнгти умиди, ҳозиргача «ўлканинг қаноти» деб ном чиқариб келген суворийлар ҳужумга ўтди. Улар тўғри Кун хоннинг

суворийлари устига бостириб келмоқда эдилар. Уларнинг бу фавқулодда ҳужуми боис Кун хон сафларни ёриб ўтиб отасига яқинлаша олмади. Ҳайқирганича, оғир жангларда орттирган тажрибасидан келиб чиқиб суворийларининг бошини ҳужумга ўтган ассур отлиқлари томон бурди, бироқ худди шу пайтда қайдандир ҳайқириқлар эшитилди:

— Хоқон ўлдирилди! Ўғуз хон ўлдирилди!..

Бу ҳайқириқлардан ассурларнинг қанотлари янада кенг очилди, Кун хон эса гангиганича бир лаҳза нима қилиш лозимлиги ҳақида ўйланиб қолди. Қиличини қинига солиб, отасининг жасадини ахтариш қўшиннинг, Ўғуз элининг ўлими демак эди. Ёв билан юзма-юз тўқнашувга оз қолганда бирдан Кун хоннинг суворийлари ўнгга от солиб қолдилар. Ассурлар «Хоқон ўлдирилганини эшитиб қочиб қолмоқдалар», — деб ўйлаб уларнинг ортидан тушдилар, каттакон давра ясад ularни ҳар томондан сиқиб кела бошладилар. Шунда Кун хоннинг камончилари ишга тушди. Бироқ ассур қўшини шу қадар катта эдики, бу талафот ҳеч нарса эмас эди. Кун хоннинг ўнгга от солиб кетишини кўрган ассурлар, у юзма-юз келишдан кўрқиб қочмоқда деган хаёлда унга тезроқ етиш истагида елиб борар эдилар. Улар ҳам эски тузоққа тушган эдилар. Кун хонга етгунча камончиларнинг ўқлари ularни битта-битта қулатар, Кун хонга яқинлашиш ўрнига узоқлашиб, сафлари сийраклашиб борарди. Ўнгдан, сўлдан уларнинг изидан тушган, аввалига қораларини кўрсатмаган, сўнгра қўққисдан майдонга чиққан икки рангдаги қўшин, икки қанотни кўрганда ёв қўшини сиртмоққа тушиб қолганини сезиб, от бошини ортга бурди. Кун хон ularни қувиб борар экан, шарро қароргоҳини топиб яқинлашмоқ, отасининг ўчини олмоқ, шу тариқа жангга нуқта қўймоқ истарди. Ёвнинг ортдаги қароргоҳлари ягона эмас эди. Тепаликлар устида, узоқдан жанг майдонини кузатиб турган бўлуклар кўзга ташланарди. Шарро бу қароргоҳларнинг қай бирида эканлиги номаълум эди. Кун хон яна бир бурилганда иниси Ой хоннинг оти ёнма-ён елиб бораётганини кўрди. Юраги севинчга тўлиб, кўзларига ёш қалқди. Кучи юз карра ошиб кетгандек бўлди. Отилган ўқлар ёғийнинг «учқур қанот»ларини пардай тўқмоқда эди. Лекин олдинда, учқур отда елиб кетаётган бир душман су-

ворийсига етиш имкони йўқ эди. У тенгсиз бир отда эди. Ўғуз хоннинг оқ отини эслатарди. Кун хон қўл ишорати билан йигитларига «отманглар» деди ва ўз отини қистади. Қаршидаги от секинлашди. Кун хон жангда неча от алмаштирганини ҳам унугиб қўйган эди, ҳозир миниб турган оти ҳам толиққан эди, бироқ отларнинг ҳам ўз фурури бор, жанг ҳавосини улар ҳам ҳис этишади, сезилмасдан эгасига мослашади, унинг бир аъзосига айланниб кетади. Ҳозир ҳам Кун хоннинг оти бу қувди-қочди баҳсига кирганида бутунлай бошқа отга айланди. Оқаётган тери кўпикдан асар ҳам қолмади. Гүё янги бир қанот чиқаргандек оқ отга яқинлаша бошлади. Қандайдир бир туйғу Кун хоннинг ёйни олиб ўқ узишига, олдинда бораётган отлиқни қулатишга монелик қиласиди. Ортдан келаётган сафдошлиари унга тушунолмай ҳайрон эдилар.

Оқ отга каманд етадиган масофа қолганда Кун энкаийиб каманд отди, каманд ҳалқаси оқ от устида билонглаб, суворий бошида очилди ва унинг қўлларини сиқиб, отдан қулатди. Кун хон дарҳол отидан сакраб тушиб, отасининг ўлимига гүё шу айбор каби унинг бошига келди, бироқ бирданига қўллари шалвираб ёнига тушди. Қаршисида бошидан дубулғаси тушиб, олтин соchlари чамандек ёйилган, каманддан бўшалмоққа уринаётган, шу ҳолида ярадор кийикни эслатадиган бир гўзал турар эди. Оқ от эгасини қолдириб кетмай, ортига қайтиб келди. Туёқлари билан ер тирнай бошлади. Кун хон қўл узатди, қиз қўлини бермади. Уни мажбуран қўлларидан ушлаб турғазди. Қиз белидаги қиличга қўл узатмоққа уринар, бироқ уни сиқиб турган каманд бунга имкон бермасди. Қиз баланд бўйли эди, лекин унинг қаршисида ҳам ўзидан икки қарич баланд бир дев турарди. Қиз Ўғуз хон, унинг йигитлари ҳақида кўп эшитган эди. Аммо улардан бири билан илк дафъя юзма-юз келиб туриши эди. Қандайдир бир туйғу оғушида жангни ҳам унугиб қўйган эди. Илк боқишаёқ қаршисидаги алпнинг ўз соchlари каби узун, курагида ўйнаб ётган соchlари, силлиқ, туксиз юзи қизни ўзига жалб этди. Ҳозиргача ўзи кўрган йигитларнинг ҳеч бирига ўхшамайдиган, ўқдек тешиб кетадиган тиниқ, чиройли қўзлари, чўл ҳавоси ҳар бир мушагини таранглаштириб қўйган, мардлик, жасорат ёғилиб турган юzlари бор эди бу йи-

гитнинг. Афтидан, ҳаёти от устида ўтганлигидан бўлса керак, чекка соchlари ҳам, ҳатто қошлари ортга қийилиб кетган эди. Ёйга тортилган камондек учib кетишга шай турарди. Кун хон нима дейишини билмасди; ҳали кибор ассур оилаларида қамарлар ва ўғузларнинг тилини била-диганларни учратмаган эди.

— Кимлигини сўра!

Ортда турган сафдошларидан бирининг кинояси эди бу. Кун хон кулди:

— Бу тилбилмас тилни тушунадими? Нимани ҳам сўрапдим?

Бошқа бир сафдоши:

— Унда олиб кет уни, — деди.

— Хоқон отамнинг руҳи нима дейди? Жангга менинг ўчимни олиш учун кирдингми ёки душман қизининг ноzinini чекиш учун, демайдими?

Қизнинг юзига сезилар-сезилмас бир табассум қалқди. Кун хон: «Хоқонимизнинг ўлимини бу ҳам эштиби, шекилли... Ўшанга табассум қиляпти», — деб ўйлар экан, ичи ўртаниб кетди, бу жангдаги йўқотишлар нақадар катта бўлганлигини гүё энди англаб етди. Қаршисидаги эркак бўлганида, қиличи билан тўғраб ташлар эди. Бироқ асир тушган,chorasiz кимсаларга қўл кутариш уларнинг низомига бегона эди. Отасининг ўлими эса асирни ўрдага олиб боришга ҳам имкон бермасди.

У қизни чирмаб турган камандни ечди, ерга тушган дубулғасини олиб унга узатди. Қиз соchlарини йифди, эрракча либос уни янада жозибали курсатар эди. Кун унинг қўлидан тутиб, оқ отни курсатди. Қўл ишорати билан, «Кетавер, озодсан», — деди.

Қиз отга яқинлашиб, бир сакраб эгарга қунди, бурилиб Кун хонга боқди. Бу боқишида кўпгина маъно бор эди. Кин, фазаб, ўч олиш истаги, айни пайтда сўз билан ифода этиб бўлмайдиган бир розилик. Қиз отининг бошини бурди-да, елдек учib тепаликлар ортида кўздан фойиб бўлди.

* * *

Ўғуз хоннинг ўлими ҳақидаги хабар ҳам ассурларни мағлубиятдан асраб қола олмади, жанг тутаган эди. Бу тушга ўхшаш улкан зафар Акишарни руҳлантириб юборган

эди. У ўгузларнинг жангни ўз истаганларича олиб бориш маҳоратига, Кун хон суворийларининг мардлигига қойил қолган эди. Эски низомларни эсдан чиқариб: «Хоқон ўғли, бу жанг бизни қардошга айлантиради!» – деди. Отларини ёндоштирдилар, от устида қўл ташлашдилар. Бу ўлканинг юз йиллар мабайнида мағлубият нималигини билмай келган қўшинини енгиш орзусига етган Акишарнинг юрагида бу севинчдан кам бўлмаган бир қайғу ҳам бор эди. Бу жанг ўгузларни Осиёнинг ягона, бас келиб бўлмайдиган кучига айлантирган эди. Шуни ўйлаганда Акишарнинг ақли шошиб қоларди. Унга таянч бўлган, уни ўлимдан асраб қолганлардан энди гўё ажалдан қўрқандек қўрқмоқда эди. Бундан кейин энди Акишар ўз уйидаги ўзини меҳмондек ҳис этар эди. Шундоқ ҳам кўпдан бери ўгузларнинг иккинчи номини Ман улуси дея атаб, уларни юртнинг эгаси деб билар, тез орада қўшилиб-қоришиб кетган эдилар. Бу зафардан сўнг энди ўгузлар нима қиладилар, нимани истайдилар – буниси номаълум эди. Улар истаган қўшниларини юксалтириб, истаганини тиз чўқтира оладилар.

Бироқ ҳозир бундан сўз очиб бўлмасди. Қўшин аввали қудрати билан майдонда қолган бўлса ҳам, хоқон ўлган эди. Жасадни топиб, хоқонлик иззат-обрўси билан тупроққа топшириш лозим эди.

* * *

Ассур қўшинининг шимолга томон юриши, олдинда сўнги йўқ бир жанг турганлиги Тутуқни дадиллантириди. Ўч олиш пайти келган эди. Мадар элининг ҳар томонидан тўпланган йигитларни бошлаб, Ozар кўлининг жанубидан бегона ерларга кириб борди. Кетма-кет бир неча қалъани забт этди. Кишисувда ассурлар қаттиқ қаршилик кўрсатсалар ҳам, оғир жангдан сўнг барибир енгилдилар. Энг қаттиқ қаршилик кўрсатган жой – кентнинг ўртасидаги қалъа-сарой бўлди. Тутуқнинг кундан-кунга ортиб борган жанг маҳорати сарой учун кетган чопишмаларда ҳал этувчи омил бўлди. Қўлида қилич, жангнинг олд жабҳасида борар, душман сафларини бўлиб ташлаб илгариларди. Ҳар ҳовли, ҳар эшикнинг олдида каттакон қон халқоби лахталаниб ётар эди. Ҳолдан тойгунча жанг қилдилар. Тутуқнинг сўнгги зарбаси билан ассур бўлук бошлиғи тош

устига қулаб тушар экан, дарвоза очилиб, бир аёл ўзини ушбу жасад устига отди. Номаълум бир түйғу Тутуқни тұхтатиб қолди. Унинг чекиниб турғанини күрган аёл фаррәд солиб дарвоза томон қайтар экан, қайрилиб алам билан Тутуққа нигоҳ ташлади, қарагани ҳамоно қотиб қолди. Ким бўлди экан бу? Қаршисидаги киши бегона, бироқ мадарлардан эди. Кийими, лиbosлари таниш – кассуларники. Ҳатто чехраси ҳам туғма, жозибали эди. Ҳамон хотирасида тириклигича қолган отасиникига айнан ўхшар эди бу чехра. Тутуқнинг ҳам қўллари ёнига шалвираб тушган эди. У опасини излаб юрган эди. Бироқ қайдан топсин, қандай танисин? Орадан неча йиллар ўтди, балофатга етгач, бирор жойга тушгандир? Бу қадар улкан кентнинг қайси эшигидан ахтарсин уни?

Аёл беихтиёр Тутуқнинг она тилисида:

– Сен менинг эримни ўлдиридинг. Мен ҳам сизлардан бўламан, – деди.

Шунинг ўзи кифоя эди:

– Опамни излаб юрибман! Сен эмасмисан? Кўзларинг ўхшайди. Ўша сен эмасмисан?

Аёл унинг сўзини тутатишини кутиб ўтирмай:

– Тутуқ?! Укажоним, – дея унинг бўйнига осилди.

Йиғласинми, кулсинми? Бир томонда ўлдирилган эр, бир томонда уни ўлдириган ука.

...Бир неча кундан сўнг Тутуқ ёнига опаси Дурусуни олиб ортга қайтди. Кенжа ўғли Дурусу билан бирга эди. Тўнғичини юртда қолдирган эди. Тўғрироғи, у ҳалок бўлган отасининг ўрнини эгаллаган эди.

Оға-инилар: «Яратган бизни жангда юзма-юз қилмасин!» – дея ажрашган эдилар.

* * *

Ўгуз хон майдонга чиқишига шошмас эди, бу янги вазият уни қийин ўйларга солиб қўйган, йироқдан туриб боқар экан, Тангридан келган сўзлар, қўли қиличдан, найздан узоқ бўлган дамларда юрагини чулғаб олган инсонга муҳаббат олдида уруш унга бехуда бир нарса бўлиб туюлар эди; илк кунданоқ Акишарда бир лоқайдликни ҳис этган эди, энди бу ўлим хабаридан сўнг у ўзини қандай тутишини, фақат угина эмас, ўз шодлари, тархонлари ҳам

қайси томонга оғиб кетишларини билмоқ истарди. Бироқ ўғилларининг бу ўйиндан хабарсизликлари, оталарини чиндан ҳам ўлдига чиқарганлари, бундан изтиробга тушажаклари уни азобга солар, бироқ буни ошкор қилиб бўлмасди. Айни пайтда, соғ-омон экан, «ўлиш» ҳам фалати бир иш, ўғиллари учун бир синов эди. Ўлим Тангрига қовушмоқ экан, эртами-кечми – бошда бор савдо, агар шундай омонсиз кун келса у албатта ўғилларини йўқлар эди, бинобарин, ҳозир ўлимнинг айни пайти эди, у жангдаги зафар дардларни бир оз енгиллаштирган эди, ҳолбуки, ўлим мушкул азоб-аламлар, йўқотишлар устма-уст қалашган бир кунда ҳам келиши мумкин эди; хўш, унда нима бўларди? Ана шундай чалкаш туйғулар оғушида соғ-омон ўз яширин гўшасида ўтирган хоқон ҳамма нарсани Тангрининг ҳукмига боғлар, шошмасдан мададни ундан кутарди... Фақат бир ташвиши бор эди... Бу ташвиш ўлим хабари ортидан нималар келишини билмаслиги эди. «Хоқон ўлди», – дейдилар. Балки чиндан ҳам ўлгандирман, бу оғир кунда элини бошсиз қолдириб, ёлғиз ўз жонини ўйлаганча ортда қўл қовуштириб туриш эндиликда қўққисдан келган ўлим каби оғир туюлмоқда эди Ўғузга... Эрдамнинг гапига кирганлиги эндиликда фишт қолипдан кўчганидан сўнг изтиробга солмоқда эди уни, ўлим уни четлаб ўтган бўлса ҳам, Эрдамни четлаб ўтмасди, унинг ажал насибасини Эрдам тотган эди, у буни сезган экан, олисдан келаётган ажални кўрган экан, кўриб туриб унга ўз кўксини тутган экан! Айни пайтда ўзининг тирик эканлиги ақл бовар қўлмайдиган бир илинжга, гумонга ҳам йўл очар, балки Эрдам ҳам ўлмагандир, балки шунчаки яралангандир, отдан қулақ тушганлиги учун ўлдига чиқаргандирлар уни деб ўллар, тезроқ буни билишни истарди...

* * *

Муроса не эканлигини билмайдиган Кун хон бошига уриб отасини ёлғиз ахтарар, ҳеч кимни яқинига йўлатмас эди... Отасининг жасадини бошқа бирор кўришини истамасди у. Жасадлар қанчалик кўп бўлмасин, хоқоннинг жанг либосини фарқлаб олиш қийин эмас эди. Ўзи учун туфма бўлиб қолган, кўз очганидан бери кўриб келган, куч,

ўлмаслик, буюклик рамзи ҳисоблаган либосини, жангда киядиган бўркини, жанг чакмонини ер билан битта бўлиб ётган жасадлар орасида кўриб қолганида отини ўша томон қистади, бироқ хоқон либосида ўлиб ётган кимса отаси эмас, Эрдам эканлигини кўриб қотиб қолди. Йиғлашни ҳам, кулишини ҳам билмасди. «Тангрим, отам омон экан! Ол-қишилар бўлсин Сенга!» Бироқ отасининг болалик дўсти, чехраси ҳам отасиникига ўшаб кетадиган, хонадонларининг энг яқин кишиси сифатида меҳр қўйган, қўшиннинг кўзи бўлган Эрдамнинг ўлими ҳам оғир, жуда оғир эди... Иккинчи томондан, бу ажал Эрдамга хоқонлик либосида, хоқонлик ҳавосида, унинг юксак мақомида келган, демак, бу гўё Хоқон ўлими эди... Отдан тушиб, тиз чўқди ушбу либосда савлати янада ортган Эрдам ёнига, қилич тутмоқдан ҳозиргача очилмай келган бормоқларини ёзиб, жасаднинг юзига кафт босди ва ҳўнгир-ҳўнгир йиғлади. Олисроқда бу манзарани томоша қилиб турган қўшин бошлиқлари ҳам дод солиб йиғлай бошлаши: «Эл бошидан жудо бўлди, эл бошсиз қолди». Ҳеч кимнинг юрагига қил сифмас, фақат ота ўлимида шундай йиғлаш мумкин эди.

Кун хон юрагини бўшатиб, кафтини жасад юзидан олар экан, гўё чақмоқ ургандек бўлди уни, қизил қонга беланиб ётган Эрдам кўзларини очиб, ҳазин ва тасаввурга сифмас дараҷада ёқимли, эҳтимолки баҳтиёр бир табассум билан унга тикилиб турарди. Сўнгра шу табассум ичидаглари титраб, дадил бир овоз билан:

— Олқиши бўлсин сенга, Тангрим, — деди, — мени ниятимга етказдинг — хоқоним омон қолди!

Сўнг бу ишлардан хабари бўлмаган Кун хон олдида ўзини оқламоқ, ундан сир тутилганлиги учун узр сўраш оҳангидаги:

— Шундай қилиш керак эди! Эл учун... — деди.

Ўғуз хон ўрнига ушбу жангга кетар экан, Эрдам ўзини дунёнинг энг баҳтиёр кишиси деб ҳисобларди. Хоқон унинг раъйини қайтармаган, унга ишонган эди. Иккинчи томондан, бу қарор элнинг кекса, паст-баландни кўрган, йўл-йўриқни биладиган оқсоқоллар қарори эди. Қанча давом этиши номаълум бўлган бу жангда у Тангри ялавочи эвазини ўташи керак эди. Бу йўлда ўлмоқ ҳам шараф эди. Кўп йиллар аввал Ўғуз хондан сўрамай, юриш низомини

бузган ҳолда отаси Услу Хожани сандиққа яшириб ўзи билан олиб юрганларини эслади. Низомга кўра ҳаёти ўшандаёқ тугаши мумкин эди. Бироқ Ўғуз хон кечирган эди уни... Демак, хоқондан бир жон қарзи бўлиб, уни қайтармоқ пайти етган эди...

Бироқ Эрдам жангда ҳалок бўлмоқчи эмас, билак кучига ишонар эди. Фолбинлар хоқон бошида ўлим шарпасини қўрган бўлсалар-да, унинг бу кўлкадан асраб қолиниши Эрдамнинг бу қўлкага тушиб қолиши дегани эмас эди. Хоқон яширилса, кўлка ҳам фойиб бўлади. Азройил Эрдам деб келмайди. Алплар, йигитлар темир дубулға остида, жанг лиbosида уни танимасалар ҳам, Азройил танийди-ку, ахир, танийдию, қайтиб кетади.

Оқибатини билмаса-да, Эрдам юрагидаги кадарнинг бир чеккасида севинч ҳам бор эди. Жанг майдонида қулаб тушса ҳам, бу ўлим ҳаёт қадар лаззатли туюларди унга. Жангларда қанчадан-қанча яқинларини йўқотди, бир кун ўзи ҳам кетади. Юксак, қутсол, Тангри ялавочини асраб қолувчи бир ажал келса, нимаси ёмон!?

У ана шу туйфуларини боши устида эгилиб турган Кун хонга англатмоқ истарди. Шуни орзу қиласарди. Бироқ унга тикилиб туриб қўзларини юмди, қушдек учиб кетди. Унинг ўлими билан айни бир пайтда Кун хон ҳаммасини англаб етди. Отасини топмай туриб бу сирни ошкор қилмаслик лозимлигини ҳам тушунди. «Душманларнинг отамни ўлдига чиқаришлари янада яхши», – деган фикрда Эрдамнинг юзини бекитди, хоқонлик либоси билан ҳеч ким очмасин дея яхшилаб ўради, сўнг уни қўлларида кўтариб ўрнидан турди.

* * *

Хоқонлар ўлгани ҳамоно тупроққа топширилмасди, ҳамма кўрсин, йигласин, видолашсин дея элма-эл олиб ўтилиб, шундан кейингина дафн этиларди...

Акишар бир неча кун аза очиб ўтирди, сўнг эл бўлиб ўғузлар билан боғланганини қайта-қайта таъкидлаб, жунаб кетди. Аммо юрагига оғир бир тош осилгандек эди.

Тангри тепадан табассум билан боқиб турарди. Улар энди қайта қўришмас эдилар. Ўғузлар узоқ йиллар давом этадиган Бобил, Шом, Миср юришларидан қайтиб кел-

ганларида мадарларнинг жонланиб қолганини кўрар, Акишарнинг ассурлар билан сўнгги жангда ҳалок бўлганини эшиитар эдилар. Бироқ ҳозир ассурлар тор-мор этилган эди. Енгилган қўшинининг қолган-кутганини тўплаган шарро энди нима қилишини билмай гангиб қолган эди. Юз йиллар давомида ўлканинг ягона куч-кудрати бўлиб келиш уларни тўмтоқлаштириб қўйган, мағлубиятга қўника олмас, бироқ сарак – саракка, пучак пучакка ажралган, ўз қаршиларида қандай куч-кудрат турганлигини аён кўриб турар, шарро янгидан хужумга ўтса, қолган қўшинини ҳам бой беражагидан қўрқар, ортга қайтиш лозим эди; лекин шу алфозда ортга қайтишлари, юртларига бош эгиб кириб боришлари ҳам уларнинг тамом бўлганини кўрсатарди. Қандай тазийқ остида бўлса бўлсин, сулҳ тузишлари лозим эди. Бунинг йўлини излай-излай охири топдилар. Бўлиб ўтган жангда бир-бирларига қарши турган бўлсалар-да, бироқ буюк эл бошлиқларини дафн этиш маросимида иштирок этмай бўлмасди... Ассурлар каттакон бир бўлук билан қора кийиниб, қора байроқ кўтариб келдилар дафн маросимига...

Азанинг ана шу дақиқаларида Ўғуз хон ўз ёнидан ажрамаган соқчиларидан бирини Кун хон олдига жўнатди; ўрмоннинг одам қадами етмаган, ҳеч кимнинг хаёлига келмаган хилват бир ерида учрашдилар. Кун хон янгидан, лекин бу гал севинчидан тағин ҳўнг-ҳўнг йифлади. Эрдамнинг Кун хонга айтган сўнгги сўзларини эшитиб Ўғуз хон ҳам йифлади. Қўхна дўстини асл хоқон каби, ўз отасини кўмгандек буюк низом бўйича дафн этишни топширди унга. Тағин, менинг ҳалок бўлганим ҳақидаги хабар қанча кўп тарқалса, шунча яхши, деди. Ишни охирга етказиш учун шундоқ қилиш керак. Кун хон жаназага жуда катта, бироқ яширин, сезилмас севинч оғушида қайtdi.

Хоқон анча кейин, қўшин Озар кўлининг кунчиқарига кечиб ўтиб, душманларнинг ютидан узоклашгандан сўнг қўққисдан, кўқдан тушган каби пайдо бўлмоқчи эди. Ҳозирча эса амр бериб борарди.

* * *

Ассурларнинг бутунлай сафдан чиқиб қолишини Ўғуз хон истамас эди. Улар кетса, янгиси бош кўтаради. Ўзинг тор-мор этган қўшинни сенинг буюклигингнинг, куч-куд-

ратингнинг шоҳиди сифатида сақлаб туриш сени янада буюклаштиради, истаган пайтингда уни ўз жойига ўтқазиб қўя оласан. Ўғуз хон манлар билан боғланган бўлсада, ассурлар билан алоқаларни сақлаб қолишни ҳам фойдали деб биларди; ўлкада яшайдиган яқин уруғларнинг келажаги учун ҳам шундай қилмоқ лозим эди. Шуни ўйлаган Ўғуз хон сулҳдан қочмаслик кераклигини топширди. Унга кўра ассурлар ман эли билан урушмасликлари, Ўғуз элига эса йиллик хирож беришлари лозим эди. Бунинг устига, янада яқинлашиш, қариндош бўлиш учун шарро қизини зудлик билан тахтга ўтирадиган ворисга бериш истагида эди. Шу йўл билан хоқоннинг ўлимини, бу ишда ўз гуноҳини ювмоқчи эди, шоҳ қизи хун баҳосига тенг эди... Бу олисдан воқеаларни кузатиб бораётган Ўғуз хоннинг ҳам қўнглидаги иш эди. «Бизнинг қизларимизга талабгорлар ортиб бормоқда. Қўшни ўлкалардаги отли-обрўли кишилар бизнинг қизларимизга уйланишдан фахрланадилар, элчилару совчиларнинг кети узилмайди. Энди навбат бизга етди. Бу ҳам ўлkadаги буюк кучларни ўзимизга боғлашнинг бир йўлидир». Иккинчи томондан, Кун хоннинг тирноқсиз ўтишини истамасди. У дастлабки хотинларидан фарзанд кўрмаган эди. Шарронинг қизига уйланишга ўғлини қўндириш осон иш эмас эди. Аммо бўлғуси хоқон эл хоҳишига қарши чиқа олмасди. Ўғузлар сафар тадоригини кўриб бўлганларида ассурларнинг сулҳ тузилгандан кейин илк элчилари келишди. Улар орасида шоҳнинг алвон либосли, яшмоқли қизи ҳам бор эди.

Жанг майдонидан узоқлашиб, юрг тарҳадларига кириб боришгач, Ўғуз хон пайдо бўлди. Қўшин қаттиқ ҳаяжон ичидаги қароргоҳ тикди. Эрдам тупроққа топширилди. Ой икки бора тўлишиб янгилангандан сўнг Ўғуз ўғлига етти кеча-кундуз тўй берди.

Кун хон қўнгли бўлмаган бу уйланишдан бўйин товлай олмади. Фарзанди бўлмаса-да, Селジョンни севарди. Уни хафа қилишни истамасди. Бироқ хотинининг юраги кенг эди: «Менга парво қилма, бу бир удум, ўлкалар орасида тинчликни сақлаш йўлидир. Ундан чекиниб бўлмайди», — дея далда бериб турди. Фарзандларининг йўқлиги илк кўз очиб кўргани бўлмиш Селジョンнинг айби эмас, Тангри иродаси эди. Бироқ иниларининг тепапоя болаларини кўрга-

нида юраги орзиқиб кетарди. Янгидан уйланишга келганды, «Бу ҳам бир манглай ёзуви экан-да», – дея хон отаси-нинг раъйини қайтара олмаган эди. Етти кун жангчи биродарлари билан еди, ичди, шодланди. Ўғуз удумига кўра гўшангага тўйнинг охирида кириши лозим эди. Гўшангга, ўзи ҳали чехрасини кўрмаган хоқон қизи номига муносиб алоҳида чодирда канизаклари қуршовида безаниб тўй ту-гашини кутаётган ассур шарросининг қизи уни қизиқти-масди. Бироқ негадир шу кунларда оқ от устида ундан қочган, каманд отиб отдан қулатган бегона қизни, кета-ётганида ўзига ташлаган нигоҳларини тез-тез эслар, бар-моқлари қизнинг қўлини ҳозир тутиб тургани каби ўт бўлиб ёнарди. Тўй охирида Кун хон күёвлик чодирига йўл олди. Келин одатта кўра чодирнинг ўртасида, оёқ устида, юзини бекитганча уни кутиб турарди. Келиннинг турган ерида қалқиб кетиб, қулақ тусишига бир баҳя қолгани Кун хон-нинг назаридан четда қолмади, буни табиий бир ҳол деб билди. Бироқ келиннинг парда ортидаги қўзлари, нега-дир, соққасидан чиққудек катталашиб кетган эди. Бек яқин бориб секин унинг ҳарир пардасини кўтардию, донг қотиб қолди. Бу ўзи каманд солган ўша қиз эди... Иккаласи ҳам ҳолсиз ерга чўкди, Кун хон ассур қизининг ўз она тили-сида айтган сўзларидан ўт бўлиб ёнди. Қиз кўз ёш тўкиб шивирлар эди: «Хоқон ўғли сен экансан-да! Хуш кўрдик!»

Кун хон қизариб кетди. Жанг майдонида у айтган сўзларни тушунган экан бўлғуси хотини. Тангрининг ёзиги уни лол қилиб қўйган эди. Демак, ўша жанг ҳам, ўша қувҳо-кув ҳам тақдирда бор экан-да, ўзи каманд солган шарро қизи умр бўйи унинг камандида қолар экан-да, тўғри-роги, унинг ўзини ҳамишалик камандга банди қилиш учун келган экан-да!

- Отинг нима? – сўради Кун хон.
- Сумира, – деди қиз.
- Бизнинг тилни қайдан биласан?
- Бу тил – сиз ассур деб атайдиган биз атурларнинг сарой тилимиздир.

Қизнинг гаплари Кун хон учун янгилик, унинг би-лимларидан ташқаридаги бир нарса эди. Буни сезган Су-мира изоҳ берди:

- Коҳинларнинг айтишича, атур ёзувларини бу ерда

қадим замонларда яшаган, бизнинг элимизниң олис аждодлари бүлган сумарлар яратган эканлар. Улар худди сенга үшшар эканлар, ўзларини туркар, турк эр, яъни улкан одам деб атар эканлар. Ота-боболаримиз сумарларниң тилини күкдан келган, муқаддас тил деб билар, бу тилда сўзлашмоқдан гурур туяр эканлар. Атур элини бунёд этган улуғ бобомиз ҳам сумар бүлган. Бироқ эл ундан кўра кўпроқ тангриларимиз унга инъом этган Буюк Хотунга боғлиқ экан... Барча замонларниң энг буюк хотуни бүлган Сумарамида кунчиқар томондан, сизлардан келган бир хоқон қизи экан... Ёшлигига кезиб юрган тоғларини шу қадар қаттиқ қўмсар эканки, охири ҳоким Бобилда севимли хотини туғилган жойларга үхашаш бир тоғ-сарой курдирив, ҳовлисига сон-саноқсиз дараҳтлар эктирибди... Унинг кетма-кет қирқ беш авлоди олти юз йил Атур элиниң бошида туришган ва ҳаммаси унинг номини ташиган. Атур аёллари ўша замонлар хотирини юксак тутиб, ҳамон унинг тилида гаплашадилар. Аммо кейинроқ шаҳарларимиз вайрон бүлган. Чет элликларниң босқинлари, муттасил олиб келинган қуллар элни ичдан бузган, кулимизниң кули қолган, холос...

Кун хон кўзлари катта-катта бўлиб унга тикиларди. У отасини енггани учун уни кўришга кўзи бўлмаган, етти ётбегона бир шарро қизи билан юзлашаман деб ўйлаганди. Бироқ қархисида тили ширин, ўзини улардан – ўғузлардан ажратмайдиган, жозибали, Тангри инъоми бўлмиш бир гўзал турарди. Шунда Кун хон қўққисдан англақ етди-ки, ўша илк учрашувларидан бери ўзи ҳам сезмаган, кулининг ҳарорати бармоқларида қолган, қўлга тушганда ҳам пинагини бузмаган, отининг суръатига от ета олмаган ўша асира қизнинг, яъни бугундан бошлаб хотини бўладиган ассур гўзалининг ҳасратида ёниб келган экан. Улуғ Тангрига шукроналар айтганича Сумираниң бошидан пардасини олиб, қурч бармоқлари билан кўрган кунидан бери куз олдидан кетмаган олтин соchlарини силаб, бошини кўксига босди, бу олтин соchlар атрини тўйиб-тўйиб ҳидлади. Сумираниң кўзларидан ёш думаларди. Тангри уни, душман бўлса-да, илк кўришдаёқ севиб қолган, мафтуни бўлган, номи элларни ларзага солган Кун хонга инъом этган эди.

* * *

Бир йил кейин Кун хон билан Сумирадан ўша асрнинг иккинчи ярмида Инжу дарёсидан Бобилга қадар бутун Осиёни зир титратган, ўз номи билан ўғузларни юксалтирган, дарагини эшитибоқ титроқقا тушадиганлар Афросиёб деб атайдиган Алл Эр Тўнга туғилажак эди.

* * *

Сумиранинг келиши Ўғуз элига зимдан бир фавро солди, бу воқеа ўлка ҳаётини ўзгартириб, Ўғуз хонга ҳеч жангда олмаган бир жароҳат етказди.

Унинг елқадоши, қуролдоши, Кун хоннинг қайнатаси, қипчоқ беги Эрдўғон Кун хоннинг қайта уйланганидан ғазабга келди:

— Тангри фарзанд бермади деб Селжонни хўрлаш мени эл олдида ерга уриш билан баробар. Тангри элчиси қайси юрак билан қилди бу ишни? Тангриси олдида жавоб берсин! Ўз элидан бирорни олганида ҳам майли эди! Қилич чопиб енгган душманингнинг қизи менинг қизимдан тўрда утирадиган бўлдими? Кун хоннинг-ку қони қизиса қизигандир, унинг ёши бир жойга бориб қолган отаси қайтиб келганидан сўнг нега бунинг олдини олмади? Ўлган эди, ўлганича қолгани яхши эди...

Эрдўған бек ўз уруфи ва яқинлари билан бирга кўчиб кетди. Селжонни ҳам ўзи билан олиб кетди. Кейинроқ унинг дараги Ассур саройидан чиқди. Ассур суворийларига туркча жанг усулларини ўргатаётган экан. Шарро Эрдўғон келиши билан ўз мағлубиятини унуди, ер юзига: «Ўғуз эли билан биргамиз», — дея таскин ва ифтихорга тўла бир хабар тарқатди.

Ўғуз хон билан бирга Акишарнинг-да ассурлар билан сулҳ тузганини эшитган манлар ичидаги ҳам буни баҳона қилган беклар бош кўтаришди. Мадар улуслари унга қарши қўзғалиб, «Ўз элимиз, ўз хонимиз», — дея Тутуқни Мадар элбеги қилиб кўтардилар. Аввалдан олиб келинган ўғуз қизлари воситасида ўғуз уруғлари билан яширин музокаралар бошланди. Бу фавқулодда вазиятда она билан қизни, оға билан инини, ота билан ўғилни бир-бирига қарши қилиб қўймаслик учун мадарлар, манлар ва ассур орасида битим тузишдан бўлак йўл қолмаган эди. Ўғуз хон бу

юкни ҳам ўз елкасига олиши керак эди. Ассурлар заифлашган бир пайтда бу йўл учала қушнининг ҳам айнан кўнглидан бўлди. Бироқ ҳали уртада қамар деб аталадиган бир қудрат борлигини ҳам унутмаган эдилар. Уларнинг дараги гоҳ Шомдан, гоҳ Миср томонлардан чиқиб қоларди. Ўгуз хон ўз атрофида содир бўлаётган воқеаларни кўриб, қамарлар билан жанг қилиш фикридан қайтган, уларни ҳам ўзига яқинлаштириб, орадаги низоларга чек қўйиш ниятида эди. Қадимий юртларида уларни бир-бирига қарши қўядиган вазият бартараф этилган, сулҳга монелик қиласидиган душманчиликлар энди ортда қолган, унтилган эди. Бу сулҳ битта илдиздан келаётган улусларни ўлканинг ягона қудратига айлантираси эди.

* * *

Енгилмас деб ном чиқарган, дунёнинг соҳиби ҳисобланган ассур шарроси гангиб қолган эди. Ман-ўгуз бирлиги унинг қўшинини тўзғитиб юборгани каби бор оромини, умидларини ҳам тўзғитиб юборган эди. Бинобарин, ўн йиллаб қўшни улусларни қон қустиришига, ёш-қари, аёл-эркак демай барчани ҳайдаб келганлигига, кентларининг кулини кўкка совурганлигига қарамай, уни кечирган, жанг майдонидан озод этишган, бу-ку майли, ҳатто қиз бериб, қиз олишига ҳам монелик қилмаган, унинг ўлқадан йўқолиб кетишига йўл қўймаган эдилар. У бундан кейин нима қилишини ойдинлаштирмай туриб, Жанубда мадарлар хужумга ўтиб, ассур кентларини вайрон қилганлиги ҳақида хабар келди. Бу жангдаги мағлубиятдан ҳам оғир зарба эди. Хавотири тўғри чиққан эди. Неча замонлардан бери тарқоқ ҳолида келган қалъя, уруғларни Тутуқ бирлаштирган, мадар, кассу, элом, улубай, кангар, субар улусларининг бошини қовуштириб, мадарлар ўз давлатларини барпо этганликлари ҳақида ер юзига жарсолган эди. Янги бир куч майдонга чиққан эди. Шарроснинг доираси торайиб, бошига қора булутлар йигилмоқда эди. Фолбинларнинг гапи тўғри чиққан, Кунчиқардан бир сел келмоқда эди. Авваллари Ўгуз хонни ўлдириш, ўгузлар билан сулҳ тузиш орқали бу селнинг олди олинади деган фикрда эди. Янгишган экан. Ўгузлар билан ораларида бирон-бир жарлик йўқ, бир-бирларига хушфеъл эдилар.

Бироқ құшnilарига юз йиллар мабайнида қон юттириб келишган, құчларига бас келадиган күч, гапларини иккى қиладиган кимса, қиличларига қарши чиқадиган қилич топилмаган эди. Тұқин-сочин кентлари, мұл-құл сувлары, бұлық тупроқлари бұлған улусларнинг манлар, қамарлар, үғузлар билан яқынлашиб, үзиге қарши чиқиши янги фалокатлардан, узоқ давом этадиган хунрезликлардан дарак берарди... Қүйдек юввош, кечаю кундуз унинг хизматида бұлған манлар ҳам қамарлар ва үғузлардан ранг олиб, мутлақ үзгариб қолған эдилар. Энди айни шу ҳол жанубда тақрорланмоқда эди.

Шарронинг авзойини сезган кекса фармонбардор үз пинагини бузмади: «Бундан ҳам оғир күнларимиз бұлған. Бир йұли топилар...» Шу куни кечқурун ҳудди бу суҳбатни әшитгандек бир меҳмон келиб қолди. Үз гапига қарағанда Оққай деган бу киши савдогар экан. Карвонлари дунёнинг бу чеккасидан у чеккасигача қатнар эмиш. Шарродан бошқага айтиб бұлмайдиган гапи бор экан. Үрта бүйли, миқти, қиёфасидан күп нарсаларни күрган Оққай шаррода баш әгіб таъзим қилди. Шарро құли билан үтиргани жой күрсатди ва:

— Марҳамат, әшитаман, — деди.

Меҳмон нимадан гап бошлашини билмай үйланиб қолди.

Шарронинг ишорасидан сұнг тилга кирди:

— Менинг гапларимдан жаҳлингиз чиқмасин. Мен бир үлкадан үлкага юк ташийдиган туяман. Ер юзининг қаерида нима бұлаёттанини биламан. Мадарларнинг баш құтариши мени хавотирга солмоқда. Манларга бас келиш ҳам йилдан-йилга қийинлашиб боради. Анави Кар киши деб аталаған исөнчи бекорчи, парча нонга зор кишиларнинг нозик жойидан тутган. Шимолдан унинг қүнгли түқ. Сизнинг күёвингиз Кун хон ҳам онт ичиб у билан дүстлашған. Бугун бир-икки кентни вайрон қылған бұлса, әртага бутун Ассур юртига күз тикади.

— Сен фолбинлик құлма. Келажакнинг ишини кела-жак күрсатади. Менга мақсадингни айт.

— Сизга қарши бирлашғанларга бир үзингизнинг бас келишингиз қийин бұлади. Кимга құл узатасиз, кимдан мадад сұрайсиз? Урушмаган құшнингиз қолмаган бұлса.

— Бу түгри!

— Бироқ сенинг номинг машхур. Душман бўлсаларда, сен узатган қўлни қўшқўллаб тутадилар. Уларга бирлашмоқни таклиф этсанг, бошлари қўкка етади. Лекин бир шарти борки, бири билан бирлашув ҳақидаги битими ни бошқаси билмаслиги керак.

Ассур хукмдори кўнглида: «Бу бизнинг эски усули миз-ку», — деб ўйлади. Тилида эса:

— Хўш, кейин-чи? — деб сўради.

— Кейинини ҳам айтаман! Мадарларни бешикдаёқ бўғиб ташлашинг керак. Улар ўғузлар, қамарлар билан яқин бўлганликлари учун жангга кириш тўғри бўлмайди. Уларни ичдан емиришинг керак. Шунинг йўлини айтгани келган эдим.

— Айт ўша йўлни!

— Кентларингизда менинг ўттиз мингга яқин юртдoshim бор. Истроил ўғилларини назарда тутяпман. Биламанки, уларни ортга қайтармайсан. Чунки улар ўз юртларига қайтсалар, у ерда қолганларни ҳам оёққа турғазиб, устингизга бостириб келишларидан чўчийсан.

У гўё шарронинг фикрларини ўқиб тургандек эди.

Шарро:

— Йўқ, — деди, — бу ердаги қуллар бизнинг ичимизни, кучимизни биладиганлар устимизга бостириб келишига ишонмайман. Аммо улар шу ерда, ичимизда эртами-кеч ўт чиқаражакларини, бошқаларни ҳам шу йўлга бошлашларини биламан.

— Шунақа бўлишини билганинг учун ҳам, — деди меҳмон, — уларни ортга, ўз юртларига қайтармайсан. Улар эса ичкарида ҳам ўт чиқарадилар. Демак, фақат битта йўл қолади — уларни олдинга ўтказиш. Ўзинг чўчиётган қўшнилар орасига. Бир коримизга яраб қоладилар.

— Жанг қилиш учунми?

— Ҳа, жанг қилиш учун. Лекин бу жанг ҳозир бўлмайди. Ўн йил, балки йигирма йил кейин бўлар. Бу жанг энг кучли пайтида Мидияни ичдан бузиб ташлайди.

— Ўттиз минг киши бутун бошли бир эл ичидан нима ҳам қила оларди?

— Ўттиз минглигимизча қолмаймиз. Мадарларнинг ҳокимият тепасига келишини истамайдиган қўшнилар билан бирлашсак, бошқа улусларни ҳам гиз-гизлаб шу йўлга

солсак, сафимиз ўн карра ортади. У томонлардан абадий хатар бўлмайди.

Оққайнинг гапларига ишониб-ишонмаслик, бу ишнинг ортида кимлар турганини билиш мақсадида шарро суҳбат йўсинини ўзгартириди:

— Бу бир шунчаки олди-сотди гапми?

— Хоҳласангиз, олди-сотди деб ҳам ҳисоблашингиз мумкин. Уларнинг ҳаммасини сотиб олишга кучим етмайди. Энг катта фойдани кейин кўрасиз.

— Жанг сарой хазинасини бушатиб қўйди.

— Мен қул савдогари эмасман. Бироқ «ҳа» десангиз, уларни озод қилиш эвазига олтин тўплаб бера оламан. Бу ерда мен танийдиган бой яхудий судхўрлар кўп. Бу ишни улар билан биргаликда қиласиз.

Ассур шоҳи илоннинг ёғини ялаган одам бўлиб, тузоқ куриш унинг эски ҳунари эди. Бироқ Исройл ўғилларининг сезилмасдан сурилиб, Мидиянинг турли ҳудудларига, кўпроқ қўшни элом кентларига, мадарларга бўйсуниши истамаган тазиклар орасига жойлаштириб, уларни оёқقا турғазиш борасида чуқур ўйлаб кўриши, етти ўлчаб бир кесиши лозим эди. Оққай унга нажот йўлини кўрсатган эди. Кул қилиб келтирилган ўнг мингларча маҳбуслар оғир ишларга қўйилиб, доимий назоратда тутилсаларда, секин-аста қадларини кутариб олмоқда, маҳаллий аҳоли билан яқинлашмоқда, сезилмасдан эл-юрт ишларига тумшук суқмоқда, Ассурнинг қиёфасини, тилини, турмуш тарзини ўзгартиromoқда эдилар.

Шарро уйқудан уйғонгандек бўлди. Ўлкасидаги тинчлик нега бузилди? Бу фақат жангдаги мағлубият билан боғлиқ бўлиши мумкин эмасди. Жангни биринчи бор кўришлари эмас эди. Кул сифатида келтирилганлар эндиликда ёвузлик манбаига айланиб бораётганларини энди англаб етди. Ҳозиргача нега буни пайқамади экан? Ўлка ичида низом бузила боришининг илдизини нега чеккадан излади экан? Тўғри айтди меҳмон. Ҳайдаб келтирилганларнинг этиги тор келмоқда. Энди қолганларидан кетгандари яхшироқ. Бунинг устига, эвазига олтин оқиб келади. Кул қилиб келтирилганлар энди чидай олмайдилар. Уларни на ютиб бўлади, на туфлаб ташлаб бўлади. Бошимни оғритмасдан бор баракасига сотишим керак уларни...

Бир неча кундан сўнг Оққай саройга чақирилди. Савдо пишган эди.

Оққай, ваъда берганидек, Ассурдаги яҳудий судхўрлар, маҳбусларнинг қабила бошлиқлари билан учрашиб, талаб қилинган олтинни тўплади, борадиган жойларида зиммаларида қандай масъулият турганини қабила бошлиқларига тушунтирди. Бу ҳам бир йўли-да. Эҳтимол. Кунчиқарда яна бир яҳудий юрти барпо этилар.

Кунчиқарда Мидияга кетаётган қулларнинг сони ортиб бормоқа, ўн минглар яҳудий имида-жимида юртнинг энг гўзал ерларига жойлаштирилмоқда эди. У ерда кучайиб олгач, мадарларга қарши тура оладиган кучларни тўплаб, қандай аталишидан қатъи назар, ўз давлатларини қурадилар. Юзаки мустақил, ҳукман Ассурияга, моҳиятан Исроилга боғлиқ бир давлат. Табиийки, бу сургунда юрганлар учун кўкларнинг ва Оққайнинг энг катта армуғони эди. Қаёққа қўл узатсалар қўллари чопилиб турган бир пайтда кўзларига нур тушган, озод бўлган эдилар.

Шу тариқа Мидия бирлашган эллар сифатида оёққа турмоқчи бўлган бир пайтда унга чоҳ ҳам қазилмоқда эди. Ўлка ичидаги бошбошдоқликлар сабабли сургундагиларнинг қандоқ келиб жойлашганларини сезмай ҳам қолдилар.

Бунинг аламини ҳали Мидия саройида фитналар авж олганида, уйдирма туш таъбирлари остида қон душманчиликлари намоён бўлганида, ўз пушти камаридан бўлган қизлари, болаларининг сотқинлик қилиб, форс номи остида форслардан кўра кўпроқ яҳудийларга хизмат қиласиган бир салтанат қурган пайтларида тортажак эдилар. Аҳаманиш – дўстона қиёфа демак эди. Улар ўғузларга, мадарларга дўстона муносбатда бўлган, Мидия элбегисининг ўғуз қизидан бўлган неварасини кибор оилалардан бирининг ўғлига олганлари ҳолда, кейинроқ пичоқни «қўшни»-ларнинг курагига санчган эдилар. Буларнинг барчаси олдиндан ўйланган эди. Кимлиги аниқ бўлмаган, насли форс бўлган бир кимса, ўзига уйдирма нараб, шажара тузиб олиб, Азродан чиқиб келиб Астиақнинг қизига ўйланади, улардан туғилган фарзанд – Кир отаси Астиаққа қарши чиқади, қўшин ичига жойлаштирилган яҳудий ва тазиқларнинг қўли билан қўшинни ўз томонига оғдириб олиб, отасини енгиб, ўлкани қўлга киритади. Шу пайтгача танилмаган

бир уруг Аҳамонийлар номи билан барча қўшниларига душман бўлган янги бир империяга асос солади. Шу пайтгача номи тиланчи, саёқ маъносида қўлланган бир тоифа қўққисдан ўзини Мидия каби бир элнинг тепасида кўради. Бу Тангрининг масхараомуз ишларидан бири эмасми, ахир?

Зудлик билан Кир яхудийларни Бобил қўлидан қутқариб, илк бора Тавротни яхудийларнинг тўра китоби деб эълон қиласди, Мидия ва Бобилдан яхудийларни озод этиб, ўз юртларига жўнатади ва Қуддусни барпо эттиради.

Бироқ Кирнинг она томондан қариндоши бўлган Тўмарис ўз улуғлари ва Астиақнинг ўчини ундан олиб, бошини кесиб, қон тўла мешга солади.

Форс, тазик улусларига орий номини бериб, яқин қўшниларидан ажратмоқ ҳам ана шу қурилган қураманинг бир шоҳобчаси эди.

Мидиянинг машҳур ҳукмдори – ўз акрабоси, дўсти Алп Эр Тўнганинг овқатига заҳар солиб абадий лаънатга қолишга, ўлкадаги икки буюк кучни парчалаб ташлаб, минг йилларча давом этадиган Эрон – Турон айирмачилигини вужудга келтиришга ҳам саройда илдиз отган ана шу бегона элликларнинг фитнаси сабаб бўлган эди.

* * *

Бобилга жўнатилган элчи Ўғуз хон унинг юртидан кечиб ўтиб, бадавий кўчманчилар яшайдиган саҳроларга, у ердан эса Фаластин ва Мисрга юрмоқчи эканлиги ҳақидаги хабарни келтирган эди.

Озар қўлининг жанубидан Бобилга борадиган йўллар аввал қалин ўрмонлардан, қўшиннинг юришини қийинлаштирадиган тор даралардан, серқоя тоғ нишабликларидан ўтарди.

Бу ерлар Ораз бўйидаги тоғлардан деярли фарқ қилмасди. Сунгра йўл хурмозорлар билан қопланган далаларга, чидаб бўлмас жазирамага чиқиб борарди. Ўгузлар ўzlари учун янгилик бўлган хурмозорларга қароргоҳ тикдилар. Кўникмаган жойлари эди. Олисдан қалин туюлган хурмозорларнинг саринлиги, қуёшдан асрайдиган сояси йўқ эди.Faқат сувга тўлиқ қўлчалар бор эди. Йигирма кунлардан сўнг қадимий Ур, Уруқ кентларини кечиб ўтиб, дов-

руқ-шони ер юзини тутган Бобилга кириб борар, ундан ўнгга бурилиб, Фиротдан ўтгач, чўлдан, Фаластин томондан Мисрга етиб борар эдилар. «Келсин-чи, аввал кўрайлик Ўғуз хоннинг кимлигини! Сўнгра гаплашамиз», – деб жавоб берган Миср фиръявнига ўзининг ким эканлигини кўрсатиб қўймоқчи эди Ўғуз хон.

Чўллар, дарё бўйидаги суформа экинзорлар ўзи туғилиб ўсган жойлардан олисда бўлса-да, бироқ бегона эмас эди. Хўш, қани ўша қадим замонларда шухрати ер юзини тутган машхур қалъалар? Уларни бунёд этганларнинг сўнгги сўzlари, васиятлари не бўлди? Улардан қолган билимлар, китоблар кимларнинг қўлида? Кўздаги доф каби беўхшов қўргонлардан, ясси-юмалоқ пахса деворлардан бошқа ҳеч нарса йўқ эди. Бу қандай ҳаёт, Тангirim! Ўғузнинг руҳи фарёд чекарди. Шу сўzlарни айтар экан, ўз уруғаймоғи орасидаги яширин, англанмас бир тотувлик, охиригача аён бўлмаган, бироқ ҳеч қандай монелик туғдирмайдиган қўк бирлиги унинг ичидан қасирға каби кечмоқда эди.

* * *

Шаҳар яқинлигига Бобил януси – шоҳи, ёнида кечикроқ бир соқчи-кўриқчи бўлинмаси билан уларни қарши олди. Ўғуз қўшини чўлга қўниб, қароргоҳ тикди. Шоҳ Ўғуз хонни ўз саройида меҳмон қўймоқчи, унга қадимий Бобилни кўрсатмоқчи эди.

Инсон фарзандининг довруғи ер юзига ёйилган илк ўchoқларидан бири бўлмиш бу масканда йирик тош қолдиқларидан бўлак бир нарса қолмаган эди. Минг йиллар мобайнида бу ерни дунёнинг кўрар кўзи деб билган ҳар бир кимса ундан кўзини узолмаган, бу ердан ниманидир бузиб кетишга ҳаракат қилган эди. Кутлар, ҳититлар, мисрликлар, аккадлар, ассурлар... Ё жанг қилиш учун, ё сулҳ учун бу ерга келмоқни ўзларига шараф деб билардилар. Ҳар сафар йиқитиб-ёндирилган шаҳар кул остидан янгидан милтиллаб жонланган, тикланган, гўзаллашган эди. Сўнгги марта унинг илдизига ассурлар болта урган эди. Ҳозирги учқунлар уларнинг «ижоди» эди. Бир бора вайрон этганлари етмагандай, кул устига кул қалаган эдилар.

Ўғуз хон теран хаёллар оғушида эди. Пашиба ширага

ёприлгани каби ҳамма шу ерга ёприлади, жон-жаҳди билан шу ерга интилади. Биттаси қурса, юзтаси вайрон этади. Бир бойликка, битта хазинага юзлаб қўллар чўзилади. Жанубдан келган ваҳшийлар томонидан бу ерлардан қувилган ота-боболарининг охир-оқибат чўллардан маскан тутишига бир сабаб шу эмасми? Инсон аввало руҳан озод, эркин бўлмоғи керак. Қайси тоғ чўққисини истасанг, ўша ерга чиқ. Қайси булоқ боши, қайси дараҳт қўлкаси, қайси кўл қирғоғи руҳингни жалб этса, ўша жойга кўн. Кўз очиб-юмгунча юксалтири бу енгил, бироқ мангу ўлмас руҳий саройларингни. Куш каби озодсан, қайга истасанг, ўша жойга уча оласан. Қаерни истасанг, ўша жойга қайтиб келасан. Бу саройлар бошингга қулаб тушмайди, ерга чўкиб кетмайди, ўрнида баланд-баланд тош қолдиқлари қолмайди, дараҳтлари кесилмайди, қоялари сурилиб кетмайди. Ипларичувалиб кетмайди, шира босмайди. Ер юзидағилар ҳали бизнинг руҳимизнинг тангрисоллигини, тўгридан-тўғри кўкка боғлиқ эканлигини, қанотли кишилар эканлигимизни билмайдилар. Бир пахса кулба ясаб, бир ерга михланганча ўтириш билан ёз ва қишининг одимларига мос одимлаш ила ерлару кўклар билан бирга нафас олиш, улар билан бирга яшашнинг бошқа-бошқа нарса эканлигини кўрмайдими булар? Ҳаёт Тангрининг тасаруфидадир... Бизга бошқача йўл кўрсатган бўлса, бу бизнинг гуноҳимиз, билагимизнинг заифлиги эмас. Бу учуклар ер кўксининг яраси, доғидир. Уларни на қиртишлаб олиб бирор ерга элтиб тўкиб бўлади, на қояни, тошни бир-бирига ёпиштириб. Тозаланса, ўрига гул-чечаклар битарди. Аммо бу учуклар саратондек чуқур илдиз отган.

Кўққисдан манзара ўзгарди, харобалар орасидан кўзи думалоқ ўтовларга ўрганган Ўғуз хон учун текис томонлари билан еру кўкларнинг тархини бузиб тургандек туюлган, бир ёни учиб тушган бўлса-да, кўрган кишининг ақлини шоширадиган каттакон дарвоза ва унинг ортидаги маъбад кўриниб турарди.

Ўғуз хон маслаҳатчиси, вазири ва соқчи алплари қуршовида, маннали тилмоч ёнида, кўп олис бир ўтмишга қайтган каби пиллапоялардан маъбаднинг кенг дарвозалари томон чиқиб борди. Ичиди Ота Унгурга кирган илк пайтидаги каби туйфулар жўш уради. Гўё унинг наздида

қоронғиликда охиригача бора олмаган ўша мағорадан ушбу маъбадга узун бир ер ости йўли бор, у ерда йўқолганлар, Саволонда топилмаганлар шу ерда топилади. «Ҳозир қаршингдан Қам Ота чиқади», десалар, шунга ҳам ишонарди.

Бобил шоҳи: «Ассурлар ер билан яксон қилган шаҳардан фақат шу маъбад, яна бир сарой қолган», – деди. Уларнинг вайрон бўлишига тангри Мардук изн бермаган, ўз паноҳида асраб қолган. Бундан бошқа тағин сиз ҳали илгарироқ кўрган, бизни кўкнинг балоларидан асрагувчи севги ва уруш илоҳасининг шарафига тикланган, шумерлар Инон деб атайдиган Иштор дарвозалари қолган, холос, уларнинг ҳам ярми учиб тушган. Ўғуз хон ўз-ўзига: «Севги ва урушнинг ҳам алоҳида Тангриси бўлгач, оқибати не бўлсин!» – деб ўйлади. Улуғ Тангри ўз йўлидан озганларга бало йўллайди. Маъбад деворлари бўйлаб Ота Унгурда кўргани бутларга ўхаш тош, мармар, ёғоч шакллар бор эди. Шоҳ улар билан таништириб борарди.

Маъбаддан сўнг саройга бордилар. Шоҳнинг маъбад хақидаги сұхбати тугамаган эди. Унинг тилида Ўғуз хоннинг қулоғига таниш сўзлар чалинар эди. Энг кўп эшитгани ҳам Тангри сўзи эди. Буларнинг тилида ҳам яратганинг номи эди бу. Тилмочнинг айтишича, Бобилда тангриларнинг номлари ўзгартирилган. Шумерларда уларнинг сон-саноғига етиб бўлмасди. Энки – ичимлик сувларининг, курувчилик ва сеҳрарлик тангриси эди. Унинг хотини Нинхурсак – кўкларнинг тангриси эди. Уларнинг ўғли Энлил – ой тангриси эди. Ой тангрисининг ўғли Ут – қуёш тангриси эди. Иштор деганлари унинг қизи бўлиб, қадимий номи Инон эди. Думузун...

Ўғуз хон унинг гапини бўлди:

– Янсуга тушунтир: биз фақат битта яратганни биламиз. У ҳам Тангридир, Кўк Тангри. Ернинг ҳам, ойнинг ҳам, юлдузларнинг ҳам, севги ва урушнинг ҳам, хайру баракотнинг ҳам яратувчиси, йўлловчиси ўшадир. Сизнинг барча майда тангричаларингизнинг ишини бизнинг ягона Улуғ Тангримиз бажаради. Қуёшга эса биз ҳам ўт деймиз. Бобил шоҳи маҳаллий удумга кўра айни пайтда бош коҳин ҳам ҳисобланар эди, у Ўғуз хоннинг Кўк Тангрига топинишини, элини бутпарастликдан халос этганини эшитган, бироқ ҳозир ким тўғри йўлда эканлиги ҳақида

тортишиб ўтириш мавриди эмасди. Унга жавобан, «Буюк хоқоннинг инончини биламан», — деди, сўнгра шумераккат шаҳарларидағи ёдгорликлар жойини изоҳлаш билан гапида давом этди: «Ростини айтганда, кент-шаҳарлар маъбадлардан бошланади ёки маъбадларнинг ҳар бири — битта кент. Бу ерда юзлаб, минглаб инсонлар ишлайди. Коҳинлар, ёзарлар, битгичлар, папирус ва эски китобларнинг, гил лавҳаларнинг, мих ёзувларининг қуриқчилари, ҳокимлар, хизматкорлар...»

Шаҳар вайронлари ачиниш туйгуларини уйғотар эди. Орадан юз йил ҳам ўтмай туриб бу ерларнинг янгидан курилиши, жонланиши ҳеч кимнинг хаёлига ҳам келмасди. Ҳозир Бобилни тиз чўқтирган манлар ўшанда унинг кучи билан ҳисоблашар эдилар. Ҳозир эса Бобил шоҳи ҳамон эски пайтлардан қолган ашёлар билан мақтанар, буюк хоқонга кўпроқ ўша замонларнинг ёдгорликларидан, маъбадларнинг қачон битилгани номаълум китобларидан, битувчилардан, юртининг ўтмиш кунларидан ҳикоя қиласарди. Тангридан Қушачойорасининг тўфонгача бўлган охирги бошлиғига амр келган: «Саржия ойининг ўн бешида еру кўкни сув олади. Илк, ўрта ва янги даврнинг барча сирларини, инсоният илдизини, бугунини, келажагини, интиҳосини кўрсатувчи, бутун дунё сирларининг калити бўлмиш асарларни Қуёш шаҳри ёнидаги Сиппардга кўмиб ташла».

Инсон фарзандининг бошига ёғилган бу фалокатлар ер юзининг ҳамма жойида бир-бирига ўхшаб кетарди. Хоҳ эски турк мағоралари бўлсин, хоҳ Бобил чўллари. Инсонлар ўз яратганларини кўрмоқ учун тасаввурга сифмайдиган йўллар излайдилар. Бироқ Тангри инсон хотирасининг бардавом бўлишини хоҳламайди. Беш-ўн минг йил аввални билса, шунинг ўзи кифоя. Қолгани қандай йўл билан бўлса бўлсин, ўчирилиши керак. Кўп нарсани билса, кўқдан нозил бўлганларнинг изига тушади, Тангрига қўл кутаради. Ахир, эски битиклар Тангрининг ўз тилида, у жўнатган рамзлар билан ёзилар эди-да. Тангри юзию сўзини инсондан сир саклашни хуш кўради.

Ўғуз хон сўради:

— Бу ерда тўфондан аввалги ёзувлар ҳам борми?

Шоҳ ярасига тегиб кетгандек:

— Йўқ! — деди. — Бу йўллар бир неча минг йил аввалги давр жарликларида фойиб бўлади. Биз тангрилар тилини унугиб қўйганмиз ва бунинг жазосини тортмоқдамиз.

Ўуз хон яна сўради:

— Энг қадимий битикларингизда нималар ёзилган?

Шоҳ хоқонга синчковлик билан боқди. Узоқ Шимолдан, номаълум жойлардан келган бу бегона хоқон ундан бошқа шоҳларни қизиқтирган нарсалар ҳақида сўрамоқда эди.

Шоҳ деди:

— Тангрилар ҳолимизга ачиниб, буюк ота-боболаримизнинг эл низомини қўримоқ ҳақида бизга ёзиб қолдирган қонунларини асраб қолганлар.

Ўуз хон:

— Намунасини кўрсата оласанми? — деди.

Шоҳ:

— Энг эски битиклар гил лавҳаларда, папирусга, терига баробар ёзиб қолдирилган. Бири йўқолса, бири қолади. Энг эски битик бир минг беш юз йил илгари шумернинг машҳур бош кентларидан бўлмиш Ур кентида ёзилган «Урномия» қонунидир. Ассур яғмоларидан омон қолгани — шу.

Ўуз хон деди:

— Тангри бизни бу ерга бошлаб келган экан, бир минг беш юз йил аввал эл ҳукмдори бўлган кишиларнинг овозини эшитмай кетсак, гуноҳ бўлади.

Шоҳ кулди:

— Уни ёздирган киши ўз адолати билан мақтанади: «Мен етимни бойга ташлаб қўймадим, бевани зўравонликка ташлаб қўймадим. Бир сикласи¹ бўлган одамни бир минаси² бўлган одамга ташлаб қўймадим. Ўз қўшин бошлиқларимни, оналаримни, қардошларимни, уларнинг оиласарини ҳимоя қилдим. Уларга ҳамма нарсани бердим. Бироқ уларнинг инжиқликларига учмадим. Мен ғаддорликка берилмадим. Қирғинни, зўравонликни... ёмонликка даъватни тупроққа кўмдим. Ўлкада адолатни мен яратдим».

Шоҳ хоқоннинг тинглаётгани кўриб давом этди: «Кейинроқ қонунда шундай ёзилган: Биринчидан, агар инсон қотиллик қилса, у ўлдирилиши керак.

¹ Сикла — қадимий Шумерда ўлчов бирлиги, 8,4 г.

² Мина — қадимий Шумерда ўлчов бирлиги, 505 г.

Иккинчидан, агар инсон қароқчилик қилса, у ўлдирилиши керак.

Учинчидан, агар инсон бошқа бир инсонни озодликдан маҳрум этса, у тутиб маҳбус этилиши ва 15 цикл кумуш жарима солиниши керак...

...Олтинчидан, агар ёш йигитнинг хотинини бошқа бир одам зўрлаб, унинг номусига тегса, бу одам ўлдирилиши керак.

Еттинчидан, агар ўғил отани урса, қўли кесилиши керак».

Шоҳ қонунларни ўқиб тургандек изчил баён этарди:

— Қадимги замонларнинг ҳокимлари кўп бунақангি қонунлар чиқарганлар, айтган билан адо бўлмайди.

Ўғуз хон кулди:

— Айтмоқчисанки, ёзилганлар ўз йўлига, улусларни бошқа қонунлар бошқарган.

Шоҳ деди:

— Йўқ, бундай демоқчи эмасман. Бу қонунлар бўлмаганида Шумер юксала олмас, тарихнинг ибтидосига айланана билмасди.

Сўнгра қандайдир хаёлга бориб, қўшиб қўйди:

— Бу ерда жамиятни идора этишнинг барча йўллари, қўшниларимиз билан алоқаларимизнинг яхлит тарихи бор. Сизнинг таъқибингиздан қочган ассурларнинг шоҳи шундай деб ёздирган: «Мен буюк шарро, муҳташам шарро, дунёning шарроси, Ассирияning шарроси, ер юзи тўргўлкасининг шарроси, буюк Тангрининг сўзига қулоқ солган, доно, ҳақиқат қўриқчиси, адолат талабори, хайрҳоҳлик тажассуми, мазлумлар таянчи, буюк қаҳрамон, толмас эркак...» Тағин ёзади: «Ази, Амадана, Микони, Алая, Тепурзи, Турулимзи ўлкаларининг барча ҳудудларини ўз ўлкамга қўшиб олдим».

Ўғуз хон кулди ва тилмочга деди:

— Шоҳга етказ, буни ёзганлар дунё деганда Манлар билан Миср орасини тушунганлар. Улар дунёни қайдан билсин? Ер юзининг кечасини кундузга айлантирган, энг олис Кунчиқар денгизидан, Чиннинг шимолидан бош олиб келган мен бўламан. Менинг байробим соясига Ассирия каби юзта ўлка жо бўлади. Шоҳ битикчиларга буни ҳам ёздириб қўйсин.

Ўғуз хон шоҳга бир тўп чин шойиси ва зотдор бир от армуғон этиб, саройига қайтди.

Бутун оқшом шоҳга айтган сўзларини ўйлади. Чиндан ҳам на Қазилиқ тогининг майда беклари, на жанг қилгани димоғдор эл бошлиқлари Ўғуз дунёсининг юздан бирини ҳам кўрмаган эдилар...

Бироқ маъбаднинг кутубхонаси уни паришон қилиб кўйган эди: бу ерда бизнинг ҳеч бир изимиз йўқ. Шумерчадан қолган тангри, «ўт», «кур» каби беш-үн сўздан бўлак. Ахир, шумерчадан ҳам асар қолмаган-ку. Аккад, Ассур уни маҳв этган. Ота Унгурнинг ўғирланган кутубхонасидан ва Қам Отадан кейин бу қадимий алоқаларни, тарихнинг ибтидосига кетган йўлларни ким кўрсатади ва бунга ким ишонади? Бу ўттиз хил тангриси бўлган шоҳни у соҳиблик қилётган ҳар бир нарсанинг, бу тилнинг, ёзувнинг, ёдгорликларнинг, ҳалқлар онаси ҳисобланмиш шумерларнинг ўзлари билан алоқадор эканлигига ишонтирадиган киши топиладими? Кўргани бу қат-қат папирус ва тери битиклари, бу ҳисобсиз гил лавҳаларда у ёқда, Торим бўйларида балки ўн минг, балки йигирма минг йил илгари омонсиз бостириб келган, дунёning барча илк сирлари сақла надиган шаҳарларни аждаҳо каби ўз домига тортган, асл жаннат ўрнига чексиз қум уммонларини қолдирган фалокатлар ҳақида, ҳеч бўлмагандаги бирорта калима йўқми?

У қум уммони остида шундоқ бир китоб дунёси, ёзувлар, тангри каломи ила битилмиш дунёning бошидан охиригача бўлиб ўтган ва бўладиган барча воқеаларни асрар келган хазиналар шу тариқа мубҳамлигича қолмоқда. Ким билсин, балки қачондир бошқа бир тўфон содир бўлиб, қум аждаҳоси ортга чекинар.

Қам Ота у жойларни очун сирларининг қалити деб биларди. Бу ерда ҳам қачондир топиб олинар дея ҳамма нарсани тупроққа кўмганлар. Бир ёндан қум, бир ёндан сув бизни қувлай-қувлай чўлларга этиб солди. Энди эса бу лой кечиб юрган коҳинлар дунёning илк сирларидан лоф урадилар...

Ўғуз хон бу туйфуларини бўлишмоқ учун кимнидир излаб қолар ва ҳар галгидек фармонбардор-маслаҳатчи-сидан бошқа кишини топа олмасди:

— Қамлар биладиган биликларни қўришимиз, ўзимиз ўзимизни танитмоғимиз керак. Бу юришлар тугаб бўлсин,

үшанды кимлигимизни дунёга намойиш этаман. Бу маъбадлар ёлғонга чиқиб қолади.

Билга Хазар деди:

— Буюк хоқон, эл дейдилар, аммо мен бу ерларда элни курмадим. Ҳар бир кент ўзи учун яшайди. Бу ерда қалъалар бор, кентлар бор, бироқ биздаги каби чеки-чегараси күринмайдиган ўлка йўқ. У ернинг эл-юрти, тупроғи йўқ. Нима деб ёзсалар ёзсинлар. Булар таназзулга маҳкум.

Ўғуз хон деди:

— Мени ҳам ташвишга соглани – шу. Ассур шоҳининг ёзганлари мени уйқудан уйғотди. Буларнинг фақат тили ботир. Қўлларидан эса ҳеч бир иш келмайди. Аммо ҳар бири битта котиб тутиб тун-кун ўзини мақтайди ва бу мақтоворларни тошу деворларга кўчиради: «Мен Тангрининг ердаги кўлкаси...» Бошлари ишламайди! Фолиб билан мағлуб ёзуви орасида фарқ йўқ. Иккиси ҳам ўзини буюк ҳисоблайди. Улар инсон фарзандининг ўтмишига шу қадар тугуллар солиб, уни шу қадар чувалаштириб юборадиларки, келажакда уни ҳеч ким еча олмайди. Ўз ҳаётлари бир чеккада қолиб, ўзгаларга ақл ўргатиш билан машғулдирлар. Бири иккинчисига битта товуқ инъом этса, шуни ҳам лавҳада ёзиб қўяди. Шўрлик бўлмасалар, бошларини нега бу ахлатга суқадилар? Товуқ бериб, эртасига қайтариб оладилар ва шу билан иш битади. Инсон ҳам ахир бирбирига шу қадар эътиборсиз бўладими? Биз тўғри йўлдамиз. Буюк Тангри бизни ҳидоят йўлидан бошлаб боради, ўзимиз шу йўлдан озмасак!..

* * *

Бобилда суёқоёқ аёлларнинг кўплиги Ўғуз қўшини учун кутилмаган ташвишлар туғдирди. Кечалари аскарларни аёллар тўпланадиган сикертулардан, яъни фоҳишаларнинг ўйинга тушадиган, кўнгилочарлик қиласидиган жойлардан йиғишириб бўлмасди. Бундай жойлар эса кўп эди. Қонунга кўра ким истаса, бунақанги жой оча биларди. Жингалак сочли ва шу соchlари билан бошқалардан фарқланадиган, кезари¹ деб аталадиган аёллар бир жойга йиғилиб олиб, қамиш най билан арпа суви ичардилар. Йўлларда қули²

¹ Кезари – фоҳиша

² Кули – баччавоз

дайиладиган, күпчилиги қуллар орасидан чиққан бачча-вазлар ҳам кезиб юришарди.

Ўғлонларининг дин ўчоқларини талон-торож қилиши устига аёлларнинг бу кўнгилочар жойларига ҳам оёқ чиқарганликларини эшитган Ўғуз фазабга минди ва бу ёзуви эътиборсиз қолган ердан зудлик билан жўнаб кетишдан ўзга йўл қолмаганлигини англади.

Кўшин тинчиди қолганида хоқоннинг ўғиллари яна тўрт томонга бош суқиб, кент атрофларини ағдар-тўнтар қилиб чиқиб, қўйдан қўй, эчкидан эчки, олтиндан олтин яғомлай бошладилар.

Тагин Ўѓдил хотун Ўғузга ўғилларидан шикоят қилди:

— Сени ўйламайди булар! Тангрига хуш келмайди!
Бизни ўғри-қароқчига тенг кўрмасинлар...

Ўғилларининг, аскарларининг маҳаллий аҳоли мол-мулкига кўл чўзишлари уни хафа қилди. Ўғилларини тўплади:

— Айтинг-чи, нега низомларимизга риоя қилмайсизлар?

Кун хон сўради:

— Хон отам! Қачон низомни буздик?

Оға-инилар бир-бирларига боқар, нима рўй берганлигини тушунмасдилар. Хоқон ўрнидан сапчиб турди:

— Ер юзининг у бошидан бу бошига келдик, қарши мизда бош эгмаган киши қолмади... Бобил ҳам эгилди, тан берди. Буни яхши биласиз! Эндиликда от солиб бобилликларнинг кўнглини топташ, уйларини талон-торож қилиш қайси удумимизга мос келади?

Менинг ўзим борган жойларда кишиларни ранжит-маслик, Ўғузнинг номини ҳимоя қилиш ҳақидаги фармоним йўқми? Тангри элчисининг пушти камаридан бўлганлар ўйлаб кўрдиларми шуни? Сизни кўрган мендан хурсанд бўладими?

Кун хон:

— Тушундик, — дея отасининг фазабини босишга мос сўз ахтарди.

Бироқ хон унга эътибор ҳам қилмади:

— Менга қаранг! Тушунмадингиз! Бу ерда бир минг беш юз йил аввал яшаб ўтганлар низом ва китоблар ёзиб, унга риоя этганлар. Қароқчилик қилган, бошқаларнинг эркинлигига раҳна солганларнинг қўли кесилган, ўлди-

рилган. Элнинг интизомини бошқа йўл билан қўриб бўлмайди. Низомга бўйсунмаган бўйин чопиб ташланади, ҳатто ўз ўғлим бўлса ҳам!

Ўғиллари тиз чўкишди:

— Айбормиз, бизни кечир, ота. Бошқа такрорланмайди.

Хоқоннинг сўзи тугамаган эди:

— Бу юришлардан олган сабоғингизни ёддан чиқарманг. Тангри элчисини ўз туққан ўғли тингламаса, ким тинглайди? Бизнинг қудратимиз — руҳимизнинг буюклигida, адолатимиздадир!

— Талаб олганларимизни ортга қайтарамиз, бизни кечир, ота!

Ўғуз хоннинг ғазаби аста-секин босилиб, юмшалди, ичи тўлиб келди.

Кўрайлик-чи, у ўғилларига не деди:

Қартолга ўқ тегибди, ўқнинг парини қўриб: «Ўзимга ўзим қилдим», — дебди.

Тўрани билса киши, юришади ҳар иши.

Тўрасиздан ўзингни асра.

Ёлғон эшикдан кирса, тўра тешикдан чиқар.

Тўра қон билан қўринмас.

Бекларга ҳар хатар нафсидан келур.

Тўғрида тийик, эгрида қийик бордир.

Нафс ўнгингда, ор сўлингда, ҳар бири ўз қўлингда.

Бир қинга икки қилич сифмас, бир хотин икки эрники бўлмас, бир хонада икки устахона бўлмас.

Тўра битта бўлади, унутманг! Тўрани билмас жоҳил бўлманг!

Мол ҳарислиги, олтин ҳарислиги шароб ҳарислигидан ёмон!

Ўғиллари эшитдилар, хон оталарининг ҳовридан тушганини сезиб, хонани тарқ этдилар.

* * *

Бобилда бир неча кун ором олгач, қўшин Фирот соҳили бўйлиб жанубга йўл олди. Ҳамма жойда бир хил манзара эди. Ҳар кент кичик бир юрт эди. Қарши чиқишга ҳоллари йўқ, аммо мақтанишда териларига сифмасдилар. Йўл бўйи эски саройларнинг, қалъаларнинг вайроналари

юракни сиқар, юксалиш даврида ер юзининг энг буюк ижодкори бўлганлар эндиликда адойи тамом бўлган, маъбадлар олдида қўл чўзиб турганларнинг сон-саноғи йўқ, дарё бўйидаги экин-тикинлар гўё ўз-ўзидан ҳосил берарди. Деҳқон тупроқдан безган эди. Сиртига тери қопланган қайиқлар дарёда ҳолсизгина сузига сузига бораётганлигини пайқаб бўлмасди.

Чиндаки каби гавжум, фала-ғовур шаҳарларга дуч келишини кутган Ўғуз хон хаёлга ботган эди. Бу хаёллари ни йўл бўйи кенгашчиларидан фақат Билга Хазар билан баҳам кўради. Бобил воқеаларидан сўнг Билга Хазар хоқон ўғиллари ортидан хуфия қўйишни, улар маҳаллий аҳоли олдида ўзларини қандай тутаётганликларидан воқиф бўлиб туришни маслаҳат берган эди. Бораётган барча жойларида уларга қаршилик кўрсатишмас, совға-салом, армуғонлар олиб чиқар эдилар.

Ўғуз Басрага етмасдан кунботарга бурилиб, Мисрга бормоқчи эканлигини билдирганида, ботқоқликлардан, саҳродан кечиб ўтиш оғир эканлигини, йилнинг бу пайтида қўшин ҳолдан тойиб қолишини айтиб, уни бу йўлдан қайтардилар. Манлардан уларга қўшилган раҳбонлар бошқа йўл кўрсатдилар. Ўғуз хон вазиятни ўз беклари ва қўшин бошлиқлари билан муҳокама этгач, ортга қайтди, Дажла ва Фирот қўшиладиган жойнинг юқорисидан Дажланинг сўл соҳилига ўтди, қадимий Элом йўли билан Самира-нинг кунчиқаридан Эрбил йўли орқали тоғларга чиқиб борди ва қишига қадар ўша ерда қолди. Шу йўл билан келиши лозим бўлган Акишарга дуч келмади. Ўлка ичидаги мадарларнинг бош кўтаргани уни йўлидан тўхтатган, ортга қайтиши лозим эди. Мосул атрофида қишилагач, баҳор арафасида яловлардан кечиб ўтиб Раккага келди. Маҳаллий улуслар барча қўшни ўлкаларни зир титратган, номи тилдан тилга кўчиб юрган Ўғуз қўшинини кўрганда йўлларга тўқилиб чиқиб, уларни ҳадялар, армуғонлар билан қарши олардилар. Аммо Ўғуз хонни севинтирган нарса шажарлардек олис чўлларда, яловларда уларни қарши олганларнинг ўзлари билан бир тилли эканликлари эди. «Тангрим, ҳамма жойда биз бормиз!» — дея йўларди у. Фиротдан ўтгач, қадимий карвон йўлидан илгарилаганча

Ҳалаб қалъасини қуршовга олди, ҳеч ким ўзига қарши чиқмаганини, дарвозаларини очиб берганликларини күриб, қалъадагилар билан юмшоқ муюмлада бўлди. Бироқ жазирама уларни бу ердан ҳам ҳайдади. Жанубга, Дамашққа юриш қўшинни толиқтириб қўйишини ўйлаб, бу юришни баҳорнинг охирига қолдирди ва: «Кунчиқар дengизга борамиз! Отларимизни совутамиз», – дея ўша пайтлар қоришиқ тоифаларнинг қулида бўлган Антакия қалъасига юз тутди. У: «Шаҳарнинг ҳисобсиз дарвазаси бўлсада, уни ишғол этиб бўлмайди», – деб эшитган эди.

Таслим бўлиш ҳақидаги даъватга шаҳар ҳокими: «Агар отларингизнинг қаноти бўлса, учиб келиб меҳмонимиз бўлинг», – дея кулиб жавоб берган эди. Илк хужум ва дарвозаларни бузиш тадбири натижа бермади.

Ўғуз қалъадан нарироқда қароргоҳ тикиди. Олтин қубали чодирини минглаб ўтовлар қуршаб олди. Кун ботгач, Ўғуз хон қўшин шадлари ва барча эл бекларини кенгашга йиғди:

– Беклар! – деди у. – Ер юзининг охирига келиб етдик. Қаршимизда келтлар, фаранглар, эллинларнинг ўлкаси турибди. Уларни ҳам бўйсундирдимиз. Кунчиқардан Кунботарга қадар байробимизнинг қўлкаси тушмаган жой қолмайди. Унга йўл эса мана шу кентдан ўтади. Мағлуб бўлсан, буни бутун дунё эшитади ва барча йўлларимиз бекилади.

Беклар узоқ ўланиб қолдилар. Улардан бири деди:

– Уларни қалъадан ташқарига чиқаришимиз керак.

Бошқаси сўради:

– Чиқмасалар-чи?

Яна бирори деди:

– Лаҳим қазамиз!

Ўғузнинг овози янгради:

– Ўғуз ўрага сифмайди!

Билга Хазар деди:

– Девордан бир-бир ошиб тушсангиз кифоя.

Ўғуз хон бу фикр билан розилашди:

– Коронгиликда қалъа деворларига каманд отиб, битта истеҳкомни эгаллаймиз ва ундан шаҳарга ёйилиб кетамиз. Сезиб қолсалар, бошларига ёнар ўқларни ёғдирдимиз.

Эртаси куни Ўғуз камончиларнинг мадади билан қалъанинг сўл бурчини тозаласалар-да, арқон билан юқори кў-

тарила олмадилар. Истеҳкомлар бир-бирини ҳимоя қила-диган тарзда қурилган эди. Ўғуз хон жанг йўлини ахтарар эди. Охири чидай олмай олдинга от сурди:

— Э-ҳей, беклар! Баланд-баланд тоғ ошганда шу тош тепада тўхтадингизми?!

Шу пайт қалъадан отилган ўқ унинг олдинга сапчиган оқ отининг сийнасига тегди, Ўғуз хон ерга қулади. Қуриқчи алплари уни қуршаб олиб, ортга кўтариб кетдилар. От қулар экан, хоқон елкасидан яраланган эди. Неча йиллик жангларда илк бор тизи ерга тегиши эди.

Олти ўғлининг олтиси ҳам зор-зор йифлади.

Ўғуз хон:

— Хотинлардек негачуввос соласиз? Менга ҳеч нарса қилганий йўқ! Қилганида ҳам ўрнимда сиз борсиз! — деди.

Билга Хазар:

— Буюк хоқон, сенинг йиқилганингни душман ҳам кўрди, — деди. — Тунда кўч билан ортга чекинами. Ёвимиз, кучлари етмади, қайтиб кетдилар, ёки сенга бир кори ҳол бўлди, деб ўйласин. Эртага ихчам бир дастамиз шаҳар олдида бир кўринсин-да, сўнг ортга қочсин. Улар бизни бутунлай қочиб қолди деб ўйлаб, ортимиздан таъқиб этишга тушади. Шунда пистирмада турган қўшин ишни якунига етказади.

Ўғуз хон бу фикрга қўшилди. Эртасига қалъадагилар чиндан ҳам бу тузоққа тушдилар. Улар қалъадан чиқиб, Ўғуз қўшинини излар экан, тўрт ёндан ёприлиб келган суворийлар уларни ҳалқага олганича қириб ташлади. Ўғуз хоннинг араваси шаҳарнинг бош дарвозаларидан бири орқали қириб, дарё қирғоғига қурилган муҳташам сарой олдида тўхтади. Ана шу очиқ ҳавода унинг олтин тахти қурилди. Тўқсон минг кишилик қўшин ва йўл бўйи уларга қўшилиб келган аёлу эркаклар шаҳарни тўлдириди. Бироқ барибир қўшиннинг катта қисми ташқарида, чодирларда қолиб кетди. Бир неча кундан сўнг Ўғуз хон элчиларнинг ҳар бирига юзта суворий қўшиб Шом ва Мисрга жўнатди. Улар маҳаллий ҳукмдорларга унинг истак ва талабларини етказишлари керак эди. Унинг уруш низомини ҳеч тушунмасдилар. Бу ерларда жангдан олдин хабар жўнатиш одати йўқ эди. Ёвлашган ўлкага хабар қилмай босиб борилар, талон-торож қилинар, олинган кентларнинг кули қўкка соврилар, сўнг афсунгару башоратчилар илгарига ўтказилар, улар-

нинг тилида душман лаънатланар, ушбу кентларнинг яна қайта тикланиши учун тангриларга дуолар қилинарди.

Ўғуз хон босиб олган жойини вайрон этмас, мардларча иш тутар эди. Жанг олдидан элчилар жўнатар, музока-ра орқали итоатга киритиб, хирожини олар, жазодан қочиб юрганларни талаб қиласар эди. Бермасалар, иккинчи мактубни жўнатар, бўлиб ўтган воқеаларни эслатар, ёвга айбини кўрсатиб берар, ана шундан кейингина жанг пайтини белгилаб: «Кучингизни тўплаб туринг, мен боряпман», – деб хабар юборарди. Ора-сира, жанг олдидан душманлар билан от пойгалари, ўқ, қилич мусобақалари ўтказилар, сара йигитлар, қўшин бошлиқлари билан иш битадиган бўлса, қўшин жангта кирмасди.

Унинг элчиларини иззат-икром билан кутиб олган, шартларини қабул қилган улус бошлиқларини афв этар, кўп ҳолларда қайтадан уларни ўз тахтларига ўтқазарди. Унинг кучли эканини тан олганлар билан иши йўқ, божхирожни ўз пайтида, узлуксиз тўлаб турсалар, шу кифоя эди. Мағлубларни ҳўрламас, кўнглига ўтирса, қон кесишиб ўзига яқинлаштирасди.

* * *

Ўғузларнинг, уларга қўшилиб келган қардош улусларнинг жадал ортиб бориши, ўлкада энг катта кучга айланиши, Каспий ва Қора денгиз оралиғида ўрнашиб олиб, Одалар денгизи қирғоқларига қадар ёйилиб кетиши, манларни, мадарларни, урарларни ўз итоатига киритиши, Бобилни, Ассур элинни тор-мор этиб, улардан ўч олиб, сўнг сулҳ тузиши, ҳар икки ўлкада бемалол кечиб ўтиш мавқенини қўлга киритиши қўшни ўлкаларга ваҳима солган эди.

Ўғуз хон Антакияга ўрнашиб олганидан сўнг ўз байроғи остига олган ерларни бошқариш йўллари ҳақида ўйларди. Унинг низоми мустаҳкам эди. Қўшинида юз йиллар мобайнинда шаклланган, қуйидан юқоригача ҳар кимнинг мақомини ифода этадиган бир тақсимот, қатъий интизом мавжуд эди. Улуснинг қабила, тоифа, беклик қисмлари охирида келиб, ҳар бир аниқ уруғларга бирлашар эди. Бир ҳайқириқ, бир амр билан эл-юртини оёққа турғазиб, дунёнинг бу чеккасидан нариги чеккасига элта биларди. Янги қўнгандарни ерларида эса низом йўқ эди. Хилма-хил тузилмаларнинг оти бор эди, ўзи йўқ. Сон-саноқ-

сиз майда шаҳар-элатлар ўзларини эл ҳисоблаб, узлуксиз курашлар гирдобида қолиб кетган эдилар. Дабдабали номлар билан ўзларини давлат деб билганларнинг аксарияти бир истеҳкомдан ташқарига чиқа олмасди. Бу истеҳкомлар ичиди қишин-ёзин бекор ўтирас, риё экиб, ёлғон ундирардилар. Ҳаммасининг ўз битикчиси бўлиб, ҳар бири ўзига бир улуғлик, бир шажара уйдирив олган эди. Келажакда бу кимнинг қўлига тушса, довдираб қолар эди. Бир ерни улар билан бек, хоқон ўртасида қандай қилиб бўлиш мумкин? Ахир, уларнинг ҳар бири ўзини ер юзининг эгаси деб ҳисоблар, Ернинг тангрисол эгаси эса энди келганлигини англамас эдилар. Кунчиқару кунботар оралифи менинг қўлимда экан, майда қалъачаларида ўзларини буюк деб билганларнингвой ҳолига! Қўр ва карлар қавмигина ана шундай дунёдан хабарсиз келиб, хабарсиз кетадилар. Шуларни ўйлар экан, Ўгуз хон улусини кутиб турган аччиқ кунлар шабадасини ҳам ҳис этарди. Каспийдан Қора дengizgacha, Қазилиқ тоғидан Қўшачойорасигача – қаерга от суриб бормасин, чўллар ва яйловларни ўз эли билан тўлиқ кўрди. Эҳтимолки, тотувликлари йўқдир. Лекин бекорчи шаҳарнинг қорнини ўшалар тўйғазадилар. Ўзларини ер юзининг эгаси деб билгувчилар гүё уларни кўрмайдилар ёки одам деб ҳисобламайдилар. Юз йил, минг йиллар мобайнида ана шу тарзда яшаб, изсиз-сассиз ўтиб кетаверганлар. Рутубатли маъбадларда, битикчилар, доғули сарой тарихчиларининг келажак учун қандай уйдирмалар йўллаётганидан хабарлари йўқ. Танилиб кетишади ҳали. Лекин ким нима ёзса ёзсин, мана бу эл бор-ку ахир! Ўгуз хон эндиликда Ота Унгур хазинасига тенг, ўт-сув, манглай ёзиги, хоқонлар ва ҳатто азройил маҳв эта олмайдиган бир хазина борлигини яхши англарди.

Ер юзининг ярмига беклик қилиб турган улусининг бу ерлардаги вазияти унга азоб берарди.

* * *

Қайдан келганликлари номаълум, кўпсонли, фаразгўй, урушқоқ бир тўп ҳақидаги ваҳима шундоқ кўз олдида содир бўлмоқда эди. Ўлкада уларнинг хавфи кимнингдир тилидан атаян кўпиртириларди. Турсалар ҳам, ўтирсалар ҳам ҳеч қуюшқонга сифмайдиган, ясоғу низомларга бўйсунмайдиган шу оломон ҳақида гапирадилар.

Турган мана шу кентидан кунботардаги денгиз қирғоқларигача бұлған ҳудуллар ороллардан муттасил оқиб келаётган күчлар билан тұлиб бормоқда эди. Ҳеллинлар янги келган бұлсалар-да, денгизнинг эң күркем ерларида илдиз отмоқда эдилар. Ассур, Лидия, Фракия, Миср... Бир эмас, икки эмас, юзлаб... Бу тифизликда ўзига ер ажратиб яшамоқ учун яйлоқ-қишлоқ ҳәти кифоя эмас эди. Майли, шаҳарларга жойлашғанлари ҳамоно оқин тұхтайди, умидлари ярим йүлда қолиб кетади.

У ўз түйгуларини ким билан баҳам күрсін? Дардини айтиб, йигитларнинг құлинисовитишни истамасди. Ҳали ҳитит, фракия, хури ва ураялар орасидаги яширин музокаралардан, чопарларнинг Қуий Осиё деб аталадиган бир ҳудудни муттасил алғов-далғов қилиб, унга тузоқ қуишиларидан хабарсиз эди у.

Шаҳар ҳам аралаш-қураш эди. Ўғуз эли маҳаллий аҳоли билан тотувлашиб кетган, муқаддас жойлар құриқланар, мол-мұлк дахлсизлиги ҳар бир кишининг күнглигатаскін бахш этар, бироқ очкұзларнинг ҳам сон-саноғига етиб бўлмасди. Уңдайларга шафқат йўқ эди.

Бир куни шаҳарнинг кунботарида, Ўғуз хон чодиридан ўнг томонда яшайдиган яхудийлардан аскарларнинг қўй-эчки ўғирлаб кетишганини эшитиб қолди:

— Дарҳол эгасига қайтарилсин... — деб буюрди.

Эртаси кун чодирга бир яхудийни бошлаб кирдилар. У тиз чўкиб:

— Буюк хоқоним, — деди кўзи ёшланиб. — Бу шаҳарга кўкларнинг қарғиши теккан экан. Номи машҳур хоқонларимиздан бу ерга босиб келмагани қолмаган. Қай бири келса талон-торож қиласи, вайрон этиб кетади. Иккинчи томондан эса тинимсиз ер силкинишлари. Ҳар келган кимса ўзининг кимлигини күрсатади. Сизгача ҳеч ким ўғирланган молни қайтармаган эди. Бугун қайтарилган моллар сенга қурбон бўлсин. Бу адолат, бу низом билан ер юзини оласан. Сизга ҳеч ким қарши тура олмайди.

Ўғуз хон сўради:

— Сен ким бўласан?

— Мен бир яхудий савдогариман.

— Менинг йигитларимдан хафа бўлғанлар кўпми бу ерда?

— Йўқ! Буюк хоқон! Сенинг йигитларнинг дунёнинг эң

кўзи тўқ, олижаноб кишилари. Бироқ ишингизда мустаҳкам бўлинг. Қўшнилар бирлашиб, сизга қарши юриш бошламоқчи.

— Келиб кўрсингларчи. Алоҳида-алоҳида ҳар бирининг устига бостириб боришга вақтимиз йўқ. Ҳаммасини биргаликда янчид ташлаймиз.

Яхудий деди:

- Биз тожирлар билмайдиган нарса йўқ.
- Кўп жойларда бўлганмисан?
- Дунёнинг ярмини кўрганман.
- Чинга ҳам борганмисан?
- Йўқ, Ўғуз дарёсидан, Бешсувдан қайтганман.
- Чин томонда ҳам Бешсув бор, Бешбалиқ дейдилар.
- Йўқ, мен Инжу дарёсигача борганим йўқ.
- Бизнинг тилимизни қайдан ўргангансан?
- Бу тилни билмасам ишим юришмасди.

Тожир Ўғуз хонни қизиқтириб қолган эди. Шунча жойларни кезиб чиққан бўлса, демак, билими ҳам кўп.

— Шаҳрингизни олганимиз учун хафамисан биздан?

— Йўқ десам, қўрқоқча чиқарасан. Ҳа десам, ўзимни алдаган бўламан. Бу елвизак бир жой. Эгаси кимлигини ҳам билиб бўлмайди. Ким кучли ва одил бўлса, ўшаники.

Ўғуз хон тожир кўзларининг ич-ичига боқди. Кўзига ўқ каби қадалиб турган бу нигоҳларга савдогар дош бера олмади. Сочлари узун, губорсиз, тиниқ юзи шу ёшга етганда ҳам нурланиб турган, ўтирган ҳолида ҳам салобати билан анча-мунча ақдларни шошириб қўядиган хоқон ҳузурига келганига пушаймон бўлди.

— Чопқинчи, талончи, бегона юртларга кўз тикканлардан эмасмиз биз! Чиндан бу ерга қадар ер юзининг ярми бизники. Кимни ишғол этибмиз экан? Зотан, биздан бошқа киши яшамайди кўрган ерларимизда. Ҳеч кимнинг молини зўрлаб олганимиз йўқ. Энг катта яғмо — руҳни яғмолашдир. Биз кишиларнинг руҳини ўзига қайтармоқ, Кўк Тангрини танитмоқ билан сизларни майда қўғирчоқ маъбадлардан озод этишни хоҳлаймиз. Шу йўл билан ҳар бир кишига мустақиллик берамиз.

Яхудий кўзини пирпиратганича:

- Сизни тушунаман, — деди.

Ўғуз хон илк дафъа кўришиб турган бир савдогар би-

лан нега бу қадар юракдан гаплашганлигини ўзи билмасди. Ўзиникилардан бирига эмас, меҳмонга юрагини очиши ғалати эди:

— Ўн минглаб кишини еридан қўзғатиб, ер юзининг бу чеккасидан нариги чеккасига олиб борган нарса нима, биласанми? Тирикчилик дейсиз, тўғрими? «Нон топиш фами», — дейсиз, шундоқми? Йўқ! Ҳеч бири эмас. Тирикчилик учун бундан каттароқ ерларимиз бор, ҳозир ўша ерда ҳам яшаяпмиз. Емак-ичмакка ҳасрат қолганимиз йўқ. Эл беҳуда кўчмайди. Буни яхши бил! Биз адолат ва интизом олиб борамиз. Сен кўрган бу низомлар ота-боболаримиз низоми, бизнинг низомимиз, келажакда фарзандларимизнинг низоми бўлади. Уни сизларга мажбур этмаймиз. Биз Тангрининг нуридирмиз. Дунёнинг нажоти Тангричиликдадир! Сизлар бу сон-саноқсиз ясама бутлардан чекинмадингиз, тўғрими? Лойдан, ёғочдан, сомондан, теридан, итдан, мушукдан, хуроздан тангричалар ясад, жонсиз бутларга, кароматгўй руҳларга топингланлар ер юзининг буюк сарвати бўлмиш бизларни нега менсимасликларини ўзлари ҳам ўйлаб қурадиларми ҳеч? Менинг ишим бир руҳоний жангдир. Тупроқ, мол-дунё, олтин илинжи эмас. Буни яхши билиб қўй!

Меҳмоннинг кўзи ола-кула бўлиб кетган эди. Қаршисидаги инсон зинҳор шунчаки бир эл бошлиғи, оддий бир хоқон эмаслигини сезган эди. Тутила-тутила деди:

— Сен Исройл ўғилларининг ярасига тегиб кетдинг, Улугъ Хоқон! Ахир биз ҳам азалдан ягона Оллоҳга топиниш тарафдори эдик.

— У ҳолда бизнинг йўлимиз бир эканлигини етказ Фаластинга, Мисрга, — деди Ўғуз хон.

Яхдий савдогари ўзига берилган инъомларни кўриб шошиб қолди. Аммо уларни олмаслик ҳам тўғри бўлмаслигини англади.

Ўғуз хон гапини якунлаб:

— Қўшниларимизнинг тузоқларидан янги хабарлар бўлса, бизга етказ, — деди.

Яхдий бош эгганича чодирдан чиқди. Қучоги тұла эди.

Меҳмонни кузатиб қўйган соқчилар унинг қаерда туришини билиб қайтишди.

Хоқоннинг ҳукми билан меҳмоннинг гапларини аниқлаш учун изқувар хуфиялар ўлкага тарқаб кетишиди.

ҚАМАРЛАР БИЛАН СУЛХ

Ўлканинг турли бурчакларидан ҳар куни янгидан-янги хабарлар келарди. Ҳурри қўшинлари оёққа туриб, манзил сари илгарилаб борардилар. Кунботардан фриклар ҳам йўлга чиққан эдилар. Жанубдаги қўшнилар ҳам тўплана бошлаган эдилар. Қаерда учрашишлари ҳали аниқ эмасди. Аниғи – ўғузларни шаҳардан қувиб юбормоқчи эдилар: «Улар қалъя ичидаги жанг қилишни эплай олмайдилар. Ташқарига чиқмай туриб, сувларини кесиб қўйиб, қўл-оёқсиз қолдирамиз ва маҳв этамиз».

Ўғуз хон Антакияни бўшатиб, қўшинини Самандоққа бошлаб борди. Қўшинини уч қисмга булиб, бир бўлугини Кун хон бошчилигига фрикияга қарши йўллади ва улар ҳали йўлда экан, тўпланишга улгурмай туриб қўққисдан ҳужум қилишни топширди.

Ой хон бошчилигидаги иккинчи бўлук кунчиқарга йўл олди. Улар ҳурриларни Фиротга етмасдан улкан саҳрова қарши олиб, тоғлардан ошиб яширинишга улгурмасдан ўққа тутишлари лозим эди.

Учинчи бўлук билан Ўғуз хон Самандоғда бу жанглар якунини кутмоқчи эди.

Илк тўқнашув ўн кун ўтгач содир бўлди. Кун хон душманни қарши олишга ошиқиб, уларни Торос дараларида қириб ташлашни мўлжаллаган, орти чўл бўлган кичик-кичик тепаликлар орасида қўққисдан улар билан юзмай юз келди. Ҳар икки томон жанг осонгина якунланади деб ўйлар ва шу истак билан бир-бирларига омонсиз ташланар эди. Бироқ ушбу ilk ҳужумда Кун хон ортда ўтиради. Душман ўғуз йигитларининг усулини ўрганиб олган эди. Уларнинг отлиқ дасталари жангта кирмай ортга чекинган, зирҳли либос кийиб олган оғир пиёда бўлуклари тошбақа юриш қилиб ўқ ёмфиридан омон чиққан эди. Эвазига ора-сира зирҳ панасидан отилган ўқлар ўғуз суворийлари талафотини орттириб борарди. Кун хон вазиятни яхшилаш учун суворийларни баланд тепаликлар ортига олиб ўтди. Фриклар ҳам ўз қароргоҳларини тикдилар. Жанг узоқ давом этиши, кўп қонлар тўкилиши аниқ эди. Кун хон:

– Байроқ, туғларни кўтаринг, карнайлар, довуллар бетиним чалиниб турсин, – деди. – Бу овозлар душманнинг ўтакасини ёриб юборади.

Құшин бошлиқлари түпланишди. Ҳамма вазиятни күриб туарди. Үzlари учун нотаниш бүлган бу жойларда жанг мушкул тус олган эди. Ҳититларнинг бошқа яширип бүлуклари ҳам бор-йүқлиги номағым эди. Кенгаш узоқ давом этди. Эски усуллардан бошқа усул топа олмадилар. Ярим тунда қароргоҳга сукунат чүкди, гулханлар үчирилди, құшин яширинча күчиб кетди, аммо кунчи қарга әмас, душман томонига. Суворийлар тепаликлар ортига яшириндилар. Душман уйғониб қаршисини бўмбўш кўрди ва саф очилди. Ҳудди шу пайт Кун хон суворийлари ён томондан уларнинг устига ёпирилишди, үқлар ёмғирдек ёғди, бироқ ҳититларнинг түпланганини кўриб қочаётгандек чўл томон от сурдилар. Уларнинг изидан тушган ҳитит суворийлари гўё ажалдан қочгандек Онадўлининг Ичкарисига елиб бораётган ўғузларни шавқ билан қувиб борардилар. Бир тепа ошиб ўтилди, икки... беш тепа. Сўнгра сездирмасдан Ўғуз суворийлари секинлашди. Фриклар «душманимиз ҳолдан тойди» деган севинч билан уларга яқинлашиб борди. Қувҳо-қувнинг шу лаҳзасида душман суворийларнинг катта бир бўлими охири нима булишини сезгандек тепалар ортига ажралиб қолди. Ўғуз суворийлари ҳеч ким эплай олмайдиган иш – ортга қаратса ўқ узишни бошлаб юбориши. Орадан ярим соатлар ўтгач душманинг суворий құшини чўлнинг қонли жароҳатларига айланиб қолган эди. Жони омон қолганлар тум-тарақай қоча бошлашди. Суворийлар пароканда бўлганини қўрган душман пиёдаларининг ҳам парчалашиб кетиши аниқ эди. Кун хон ортга, душман қароргоҳига бурилганида қўққисдан бошқа бир суворийлар құшини унинг олдини кесиб чиқди. Бироқ улар жанг қиласидиганга ўхшамасдилар. От устида ёнбош ўтириб олган эдилар. Ҳеч ким садоқта қўл чўзмасди. Қаршидан оқ байроқ кўринди ва, муҳими, Ўғуз қүшинларига тугма таниш бўлган сурнай овози эштилди. Урушнинг тугаганлигини билдирувчи садо эди бу! Кун хон «Тұхтанг!» дея қўлинни баланд кўтарди. Қаршидагилар ҳам шундай ишора қилдилар. Оқ байроқнинг ёнидан бошқа бир байроқ ҳам очилди. «Ё Тангрим! Йиллар бўйи биз излаган қамарларнинг байроғи-ку бу!» – деб ўйлади Кун хон.

Қамар элбеги ёнида байроқлар ва икки йигити билан отини илгари сурди. Кун хон ҳам икки йигити билан унга

пешвоз чиқди. «Душманнинг биттасини тугатмай иккинчисига дуч келдик», – деган ҳаёлга борса-да, ичиди ғалати бир севинч ҳам бор эди. Қандайдир бир кутилмаган воқеа содир бўладигандек эди.

Юзма-юз келдилар. Жимгина, гап-сўзсиз. Биринчи бўлиб қаршидаги отлик тилга кирди:

– Мен Қамар бошлиғи Тўхтамишман.

– Мен Ўғуз хоқон ўғли Кун хонман.

– Бизни излаб юрибсиз, биламан. Бироқ отанинг ўчи ўғилдан олинмайди. Кечаси довуллар сасини эшишиб уйқум қочди, душманлар орасида ўзимизникилар билан урушиб юриш ор келди менга. Ўртамизда қон тўкилса, бир-бири миз билан бу ерда жанг қилсак, Тангримиз бизни кечирмайди, – деди.

– Тангри сенга ёр бўлсин!

– Бугун ҳититларни тузоққа туширганингизни куриб руҳим янгиланди. Эски пайтларни ўйладим. Суворийларимга «тўхтанг!» дедим. Ўғуз хон билан ярашмоқ пайти келди. Агар у сўзимизни ерда қолдирмаса.

– Хоқон отам ҳам шу фикрда. Бу бегоналар орасида нимани ҳам бўлишар эдик?

Ҳар икки томондан ҳам ҳайқириқ садолари янгради. Тўхтамиш бек эгар устидаги хуржунидан мешни олиб, шароб сузди. Кун хон олди, сўнг Тўхтамиш ниманидир ўйлаб шаробни ерга тўкди.

Кун хонга қараб:

– Сен суз, – деди.

Кун хон:

– Сенга ишонаман. Сен суз, – деди.

Қадаҳлар тулдирилди. Тўхтамиш ханжарини олиб билагини тилди, Кун хон ҳам буни такрорлади. Қўлларини кесиштириб шароб устига тутдилар. Қон шаробга томди. Аввал қадаҳни Тўхтатмиш олди: «Бирлигимиз, зафарларимиз учун». Сўнгра Кун хон олди: «Ўғуз ва Қамар элларининг бирлиги учун». Кейин иккаласи баробар: «Онт ичдик!» – деди.

Томонлар бирлашиб, қоришиб кетди, шу-шу улар орасида жанг бўлмади. Тўхтамиш фрик қўшинига элчи жўнатди, нима дегани номаълум, фриклар қайтиб кетишиди. Кун хон ҳам отасига жанг ва қамарлар билан сулҳдан хабар бериб чопар жўнатди.

Кун хон Самандоқقا қайтар экан, йўл-йўлакай укасига мадад бериш учун шошилди. Бироқ йўлда Ой хон хурриларни тор-мор этиб, ортга қайтиб келаётганини эшилди.

Энди Самандоқقا мисли кўрилмаган бир шўлан булиши аниқ эди.

* * *

Қамар эли билан Ўғуз элиниң узоқ давом этган жангларига нуқта қўйилган эди. Ўғуз хон терисига сифмасди. Афтидан, сулҳдан кўра қўпроқ Кун хоннинг зафаридан курсанд, боши кўкка етган эди. Икки эл бир-бирининг таъқибидан кўп азоблар чеккан, охирида ҳар иккиси ҳам фалаба қилган эди.

Тўхтамиш:

— Сиздан қочмасак, бу ерларни кўрмасдик, — деди.

Ўғуз хон кулди:

— Биз ҳам сизни изламасак, бу ерларни юрт қила олмасдик.

Неки бўлса бўлди. Ростини айтганда, бу бир шўхлик эди. Бу қувҳо-қув шунчаки бир гап эди. Бу икки элниң узоқ йўлларни босиб ўтиб, ушбу ўлкага келиб ерлашувларида ораларидаги совуқчиликнинг деярли таъсири йўқ эди. Муҳими бу эмас эди. Муҳими хотирада қолганлари эди, қон хотираси, бу ўлкалардаги ўзларига яқин уруғларга қўл узатиб, уларни исканжадан чиқармоқ эди. Тарих ушбу юришни ўз хотирасига муҳрлаб қўйса-да, бундай юришлар минг йиллар аввал ҳам бўлган эди. Буни Ўғуз хон ҳам, навқирон меҳмони ҳам яхши биларди. Бир-биirlарининг қасмоқлаган яраларига тегиб кетмай, ушбу сулҳ севинчи ичида суҳбатлашмоқда эдилар. Қардошларнинг қачон бошланганлиги номаълум ўзаро қирғинлари, кечиб ўтилган йўллар, йўқотишлар, чекилган азоблар энди, кечага қадар бир-бирига душман ҳисобланган эл ва қўшин бошлиқларининг елкама-елка ўтирганлари ушбу шўланда англаб бўлмайдиган бир ўйин бўлиб туюларди.

Қамарлар Этил, Ёйиқ дарёларидан Улусувга қадар кўп юришлар қилган эдилар. Уларнинг мақсади ва истаклари мана энди маълум бўлган эди. Охирида ҳамма нарса ягона инонч танловига келиб тақалмоқда эди.

Тұхтамиш билан Күн хон тенгдош әдилар. Тұхтамиш отаси үрнида бұлган Үфуз хон ҳузырида үз үрнини билар, күпроқ тинглаб үтиради. Аммо бу қисқа сұхбатдан туғылған бир ҳарорат унинг қиёфасига ҳам аллақандай ўқтамлик бағш этган әди: ичидагиларни Үфуз хонга самимият ила изҳор этарди:

— Отам сизнинг мардлигингиз ва зафарларингизга хайрхоқ әди. Бироқ: «Ин ончимизга құл чўзмасин», — дерди. Фазабга минарди бу сўздан. Кейинроқ бу ердаги тангри-бозликин кўргач, ўзгариб қолди, менимча. Лекин сир бой бермасди. Фақат бир бора: «Наҳотки, Үфуз хон ҳақ бўлса», — деб шивирлаганларини эшигтан әдим. Умри охирлаб қолган әди. Мени сизнинг ҳузурингизга отамнинг руҳи бошлаб келди.

— Отанг мен таниган мардларнинг энг марди әди.

— Мен отамнинг нега ўзгариб қолганини пайқадим. Бобил юришидан сўнг у: «Юзлаб, минглаб тангри ҳам бўлар эканми?» — деган әди тутила-тутила... — Бу Тангри амалидан кўра кўпроқ ердагиларнинг ишига ўхшайди...

Ниманидир эслаб жилмайди:

— Айниқса, Бобил маъбадларida кечалари тангрилар олдига таом қўйилиши, уларни «тўйдириш» отамнинг асабини бузар әди. Ҳар қандай киши бу таомларни кимлар ейишини билар, аммо ўзини бутунлай бошқа нарсага ишонтиради. «Битта тангри юз кишининг улушини ейди. Шунақсанги мечкай яратган ҳам бўлар эканми? Уларнинг бирортаси бирор марта үз олдига тузиб қўйилган емакларга қўл теккизганини ҳеч бир кимса кўрганми? Тангри улушини маъбад хизматкорлари, коҳинлар еб, Тангри уйини жингалаксоч саёқ қизларнинг сикиртусига айлантириб олганлар», дер әди. Мен ҳам кўрдим буларни ҳаммасини. Ва худди сен каби Кўк Тангрига юз тутдим.

Чодир шодиёна ҳайқириқлардан ларзага келди. Тұхтамиш чин юракдан, хаёлчан гапирмоқда әди:

— Йўлимни топдим, кўнглим тинчили. Бироқ улусимиз парчаланди. Элни ер юзининг у бошидан бу бошига олиб бориш мумкин экан, лекин бир ёғоч бутта сиғинишдан ажратиб бўлмас экан.

У Үфуз хоннинг ярали ерига тегиб кетган әди.

— Мени ҳам шу дард қийнайди. Ин ончимни ўзgartирмайман дея душман томонига ўтиб кетган кишиларимиз-

нинг ҳисобини ҳам йўқотиб қўйдим. Жангда ёв билан ел-кама-елка туриб, бизга қарши келадилар. Бегона аёлларнинг иссиқ қучогига сотилиб кетганлар ҳам бўлди. Бу – Чиннинг усули. У ердаги улусни ҳамма нарсадан асрарик, бироқ аёллардан асрай олмадик.

Тўхтамиш кулди:

– Худди менинг ҳам эллин қизига уйланганимни билган каби гапирмоқдасиз.

Ўғуз хон қаҳқаҳа урганча тахтга ястанди. Шу кеча шўлан тонг отгунча давом этди. Тўхтатмишни яхши таниб олган, кўнглига тегиб кетмаслигини ҳис этган Ўғуз хон қўлини унинг қўлига қўйиб сўради:

– Қизиқ бир саволим қолди. Кўққисдан нега учеб кетдингиз? Итил бўйидан ғойиб бўлдингиз. Бунинг сабаби нима?

Бўлиб ўтганлар энди Тўхтамишни ранжитмасди. Хоқоннинг сўзларини ўтиг каби қабул қиласарди.

– Биз Қора денгизнинг шимолидан айланиб келдик. Бу қадимдан ўзимиз билган ва ўтган йўл эди. Камдан-кам кишиларимиз денгизнинг кунботар соҳилидан ўтиб келган.

Сўнгра узун соchlарини елкаларидан ортга йифиб, йирик кўзларини Ўғуз хоннинг очиқ ҳавода тобланиб мисга айланган юзларига тикканича деди:

– Бизнинг йўқотиб қўйганингиз яхши бўлди. Юртимизни ташлаб келганимиз сиздан қочганимиз эмас эди. Ички низолар бузди бизни. Ота-боболарим тинчлик истардилар. Бир бўлсак, ер юзи бирлашади, бизга бас кела-диган куч қолмайди, дер эдилар. Қамар хоқони булиш учун ҳамиша оталаримизни пинҳона тўқнаштириб келган бир уруғ бошлиғи бунга қарши чиқди. «Бу денгизни, кен-тларимизни, кунботарга очилган йўлларимизни, кўркам юртларимизни саҳродан келганларга берамизми?» – деди. «Чўлдан келганлар ҳам ўзимизники, – дейишиди оталарим. – Улар бўлмаса, Чин бутун ер юзини эгаллаб олади, бизни ҳам ўз қулига айлантиради». Унда мен ёш бола эдим. Эсимда қолганлари – шу . Қамар иккига бўлинниб кетди. Элнинг пойтахтини, тахтини қўлга киритиш учун беклар юзма-юз келишди. Бу жангда оталарим ҳам, унга қарши турганлар ҳам ҳалок бўлдилар. Улус бошсиз қолди. Зотан, сизнинг куч-кудратингизни яхши билган, жанг қилишни истамаган қамарлар юзма-юз келиб қирилиб кетишдан

кўра тинчилик ўрнатилгунга қадар жанубга чекинишни афзал деб билди. Эл-улус кўчгандан сўнг атрофида ёлғиз дўстлари қолган отам ҳам хон боболаримизнинг қўрғонларини эгасиз қолдириб, жанубга юрди ва кўчга этиб олди. Ҳитит бўйида қурултой чақирилиб, отам хоқон этиб сайланди. Шундан сўнг қамарлар яхлит ҳолида ушбу ўлка эгасига, Осиёнинг бегига айланди, аммо бўлиниш барҳам топмади. Бир қанотимиз душманга айланиб, Лидияга қўшилди.

Ўуз хон унинг сўзини бўлди:

— Биз ҳам бу ерларга сизни қувиб келганимиз йўқ. Сиз билан юзма-юз келишни истамаганмиз. Каспий бўйлаб эндик жанубга.

Тўхтамиш учун бу янгилик эди, елкасидан тоғ афдарилигандек бўлиб деди:

— Биз сиздан аввал келиб йўлларингизни тозаладик. Олдиндаги кучларга қолса, бу ерга келиб ўрнашмоғингиз қийин бўларди. Ёлғиз ўзимиз ҳаммасини маҳв этдик. Энди қаршидаги денгиздан ўтиб, кунботардаги тарқоқ, ваҳший тоифалар устига юриш қила оласиз. Биз асурларни, манларни, урарларни, ливияликларни ҳам тиз чўктирган эдик. Аммо бизнинг парчаланиб, тарқаб кетишимиз сиз келгунга қадар уларни жонлантириб қўиди. Van сатрапи отамнинг ҳузурига қизи ва бир карвон тұхфа билан келди. Отам уни кечирди. Мени қўшиб: «Олиб бор, уни ўз тахтига ўтқаз», — деди. Отамнинг буюклиги ҳасаддан ўлдириб бўлган эди уни. Йўлда эса Азройил жонини олди. Юзқора бўлиб қайтишдан ўлим афзал!..

Ўуз хон:

— Аммо сизнинг мададингиздан фойдаланганларнинг ҳар бири минг йиллардан бери бу жойларда, ўз қадими юртларида яшаб келган уруғларни жазолайди. Уйларига ўт қўяди. Авлодларини қиради. Сиз ўзингизни ўйлаб, ўз илдизингиздан бўлган бу мазлумларни унутиб қўйдингиз. Биз эса Тангри мадади ила Қазилиқни ошиб ўтиб, уруғдошларимизнинг ўчини олдик, душманларини янчдик. Энди бизнинг бирлигимизни қўриб янада оғирроқ ахволга тушадилар. Бизларга, дашт одамига ўхшамайди булар. Ширин тилларига алданмаслик керак.

Ўуз элида тўйлар, шўланларнинг безаги бахшилар эди. Бугун улар ҳам икки буюк элнинг сулҳини мадҳ этарди-

лар. Бола-чақа, катта-кичик саройни босган эди. Охирида эл буюкларидан Гұжа Дада олди созни.

Қани у нима деди экан:

*Күтлүк құшиқлар танладим,
Бошда келган сұзим – эллар.
Күкдан боққан күзим Кундир,
Ердан боққан күзим – эллар.*

*Күпди Тангри төглариндан,
Кечди Инжу боғлариндан,
Қолмиш эски чөглариндан
Ер юзинде изим – эллар.*

*Хойда Тангри, войда Тангри,
Азадаю түйда Тангри,
Топинганим күкда Тангри,
Ер юзинде бизим эллар.*

* * *

Ұғуз хон келган жойларини ёқтириб қолди. Дарёси, денгизи, яйловлари, жануб ва кунботарга кеттан йүлла-ри... Қамарлар билан сұлҳан сұнг Тұхтатмишнинг айрилиб кетишини истамас эди. Кейин эса тұрт денгизни ёқалаб Осиёнинг энига, узунасига юриш қылдилар. У пайтларда фақат Онадұлининг Одалар денгизи соҳилларини Осиё дер эдилар. Ұғуз әлиниң қыличи ва сұзи қаршиисида дош берадиган топилмади.

Чопарлари, хуфиялари ер юзининг ҳар бир пучмоидан муттасил хабар келтириб, хабар әлтар эдилар. Дунё-нинг юраги Ұғуз хоннинг чодирида тепар эди.

ШОМ УСТИДАН МИСРГА ЮРИШ

Янги йилга иккى ой қолганида Жанубға юриш бошланди. Тоғларни ҳамон қор босиб ётарди. Бироқ Ливан тоғларининг күнчиқар этаклари бүйлаб Шом сари ястаныб ётган даралар илиқ эди. Кундузи дам олиб, кечалари осмондан мұлжал олиб йүл босардилар. Тұхтатмиш Шом үлкасидан тортиб Мисрга қадар бүлған худудларда яшайдиган ҳар бир эл, ҳар бир тоифаны танир эди. Йүл буйи бу ҳақда Ұғуз хонга сұзлаб борарди.

Құққисдан Шомга ҳужум қымаслик ҳам унинг маслаҳати эди. Шомга кирмадилар. Эрта тонгда, чүлларнинг

олатўронлигига, ҳали кўкда олмадек-олмадек юлдузлар чақнаб турган бир пайтда шаҳар кунчиқаридаги тоққа кўтарилилар. Тўғрироғи, қўшиннинг олд бўлуклари ва хоқон тоғнинг ясси нишаблигига қороргоҳ тикди. Бироқ қўшиннининг катта қисми тоғ этакларида жойлашди. Шаҳар кўзини очганида Ўғуз байроби Шомнинг тепасида, муқаддас деб ҳисобланган тоғда ҳилпираб турганини кўрди. Хоқон ёз демай, қиши демай йиллар бўйи давом этиб келаётган одатига кўра қуёшни от устида қарши олди. Ўт-ўлан битмагани учун Қоратоғ кун шуълаларида куйиб қорайиб қолган улкан кўмир тепасига ўхшарди. Бу қорайган тоғ кўлкасида ўзи қора чумоли инига, ясси томли уйлар орасидаги узуқ-юлуқ йўллари қора камарга ўхшаган шаҳар мудраб ётарди. Дунёнинг қор-музларини, нариги соҳили кўринмайдиган дарёларини, неча кунлаб йўл боссанг ҳам кўлкасидан чиқиб бўлмайдиган ўрмонларини, боши-охири йўқ ўтлоқларини кўрган Ўғуз хон Тангри бандасини бу бўм-бўш чўлларга, жон асари бўлмаган тоғларга боғлаб турган кучнинг сирини билишга уринарди. Тангри буюкдир. Бу тоғни, унинг этагидаги қадимий кентни қўриб туриш учун бу ерга бир илоҳий руҳ ато этган. Кишиларни тўғри йўлга даъват этувчи ялавочлар, элчилар, набилар жўнатган.

Тангрининг илк бандаларидан мерос бўлиб қолганми бу муқаддаслик? Бу ерлар Унинг номи билан боғлиқ эканлигини айтиб ўтмаганмилар, ахир? Хўш, унда илк аёл гуноҳга ботган гўзал гўшалар, «учмоғ ери – жаннат қайдадир?» Бу ерни «учмоғ» эмас, тамуғ – жаҳаннам десак тўғрироқ бўлмайдими? Фақат маҳаллий аҳоли Одам деб атайдиган илк инсон шу ерда яшаганми? Тангрининг бошқа бир элчиси – Довуднинг ҳам сўнг маскани шу ерда дейдилар.

Куёш жамол очар экан, Ўғуз хоннинг юраги Тангри элчиларига меҳр-муҳаббат билан тўлиб-тошли. Томирларида, шубҳасиз, турк қони оқарди, бироқ ушбу лаҳзаларда бутун Тангри элчилари бир-бири билан қондан ташқари юзлаб бошқа тугунлар, бошқа дардлар, бошқа фикрлар билан ҳам боғлиқ эканлигини ҳис этди. Эҳтимол, қуёшдан оқиб келаётган нур қатимлари ёки шунга ўхшаш бошқа муқаддас ришталар боғлаб турарди уларни. Тангри элчилари Тангри амали билан яратилган жонзорлар кўкларнинг буюк амрларидан, покиза туйғулардан, тўғриликдан

нақадар узоқ эканини кўрганларида шошиб қоладилар ва: «Тангрим, бизга оғир иш буюрдинг, бизни қийин йўлга солдинг», – дейдилар. Элчилар яккам-дуккам, низомни бузиб шарру шайтонга топинганлар эса минг-минг. Улуг Тангрим, ўз қўлинг билан ўз амрингни бузганларни ҳам яратиб қўйганингга тушунмаймиз. Бу бир саҳву хатоми? Сен ҳам янгишсанг агар, унда фоний бандалар нима қилсин, қайси йўлни танласин? Шу лаҳзада Ўгуз хон келиб-кетган бутун Тангри элчилари ўзи билан ёнма-ён, елкама-елка турганликларини, унинг туйгуларини ўқиб турганликларини хаёл қилмоқда эди. Ўгуз хоннинг юраги Улуг Тангрига олқиши билан тўлиб-тошган эди. Уни ҳам буюк кишилар сафида яратгани учун, юз минглаб инсонларга зиё, ризқу рӯз, макон, бошпана бергани учун, кечиб ўтган йўлларида раҳнамо бўлгани учун, элларни яккаю ягона Тангри йўлига согани учун эди бу олқиши. Бу йўлда Ўгузга бўйин эгмаганларни айбдор деб билмасди. Уруш ер юзининг оғир удумларидан эди ва буни тушунса бўларди. Бироқ Тангрига бўйсунмаганларни кечирмоқ – Тангри хукмидан қочмоқ демак эди... Буни тушуниб бўлмайди!

Ана шундай туйгулар оғушида тонг юзига юз тутиб сўйлади Ўгуз хон. Қани нелар сўйлади экан:

Гўзал Тангрим, қора ерни, мовий қўкни, ой ва кунни, нур ва зулматни, йўқсул ва бойни сен яратдинг. Сонсиз жозотларни сен тўратдинг, ҳаёт бердинг. Сенга сифиндим, умидим сендандир. Отимни ҳам, руҳимни ҳам, йўлимни ҳам сен бердинг.

Йўлингдан чиқсам, қиличимга чопилай.

Кунчиқардан кунботарга сенинг зиёнг ила келдим.

Айбсизларнинг қонини тўккан бўлсам, жонимни ол.

Тўра берган киши – сен юритдинг бу ишни.

Эшигимиздан ва ичимииздан ёлғон кечмасин.

Бизни ақлу хушдан маҳрум этма.

Бизни юксак даргоҳингга, ҳисоб кунингга қора юз билан элтма.

Севган кишиларингни тўшагида ўлдирма.

Тошқин сувларимиз сарин, ёнар ўчогимиз иссиқ, эккан тупроқлармиз бўлиқ бўлсин.

Яратганингни баҳтиёр қил.

Эркли, кўркли, бошларнинг боши, сифинганим, Юксак Тангрим!..

* * *

Тангридан Ўгуз хоннинг тахайюли нурланди: «Бу муқаддас ерга уруш очмайман», — деди. Қүшин бошлиқларига фармонни етказдилар: «Йўлимиз Миср сари, бу кентга уруш очмаймиз. Кучимизни кўргач, ўzlари пешвоз чиқадилар!..»

Шу зайлда уч кун кутдилар. Аммо бу шунчаки димиқиб кутиш эмасди. Ўгуз суворийлари бўлук-бўлук бўлиб, кун-тун чўлларда пойга қилишар, Шом атрофини шиддат билан айланишар, кечалари тоғ устига шомликларнинг ўтакасини ёрувчи минглаб гулханлар ёқишар, кун чиқиши билан карнайлар, довуллар чалинар, отлар кишинар, туялар бўкиради.

Сон-саноқсиз қўшинлар кўрган, юришлар, жангларда кексайган Шом шаҳри бунақасини илк бор кўриб турарди. Бошларини қоплаб олган бу қуюн уларнинг юрагига ваҳима солар, қаршилик кўрсатиш фойдасиз эканлигини тушуниб турардилар. Кентга кириш, шомликлар билан кўришиб-гаплашиш, талон-торож этиш тақиқланган эди. Учинчи кун кечқурун кент беклари тўпланиб, Ўгузга элчи жўнатдилар. Олисдан отдек келадиган ўн хачирга ўқ-ёй юклиб келишарди. Шомда ёйни «адла» дейишарди. Ўқ-ёй жўнатиш сулҳ аломати эди. «Ёрдам беряптиларми, демак урушни истамайдилар». Шомликлар шундай демоқчи эдилар.

Ўгуз хонга Шом ёйлари маъқул келди. У элчиларга деди:

— Катталарингизга етказинг, сиз билан жанг қилмоқчи эмасман. Куч-қудратимизни кўриб турибсиз. Бундай бир қўшинга Шом қарши тура олмайди. Биз довруғи дунёни тутганларни ҳам тиз чўқтирганмиз. Бу ердаги муқаддас Тангри ялавочларининг мақбаралари, маъбадларини зиёрат қилиб, Мисрга ўтиб кетамиз. Шомдан хирож ҳам олмайман. Истасангиз ўқ-ёй беришингиз мумкин.

Сўзи ишончли бўлсин учун Кун хонни ҳам бир бўлук алллар билан элчиларга қўшиб Шомга жўнатди. Ўғлиниг, у билан кетган йигитларнинг шомликларга қаттиқ таъсир қилишини, уларнинг юрагига ваҳима солишини биларди. Аммо шу йўл билан сулҳни яхши қарши олганини билдириб қўймоқчи эди.

Ўгуз хоннинг элчиларга берган жавобини шом ҳукмдорига Кун хон яна бир бор такрор этди. Отасининг Тангри элчиси эканлигини, ер юзидағи инсонларнинг барчасини

Ягона, Улуф Күк тангрига топинтирмоқ учун юрганини, шунинг учун ҳам ўзидан олдин ўтган ялавочлар номи билан боғлиқ бўлмиш бу шаҳарга тегинмаслигини, бутун топиноқларни мұқаддас деб билишини етказди. Отам самовий инончларга тоқат қиласы, бироқ маҳлуқотлар қули билан «яратилган» бутлар, санамларнинг мұқаддаслаштирилишига тоқат қила олмайди, деди.

Кун хоннинг отаси ҳақида берган маълумоти Шомда аввалдан ўғузлар ҳақида тарқатилган хабарларга мос келмасди. Уларни ваҳший, эътиқодсиз, низомсиз, саҳройи деб тасаввур қиласы әдилар. Унинг ғалабасидан қўркувга тушган, енгилишга кўзлари етган кичик, бироқ ўзини дунёнинг устуни деб билган ўлка ҳукмдорлари ўз ожизликларни яшириш, унинг номига қора чаплаш учун минг хил йўл ахтарар әдилар. Бироқ Ўғузнинг жангда бу қадар ҳалоллик билан мұқаддас, тангрисол низомларни ҳимоя қилишини кўриб, дамлари ичига тушиб кетар, унинг қаршиисида довдираб қолардилар. Ўғуз хоннинг мұқаддас ерларни зиёрат этиш, қурбонлик қилиш хоҳиши шомликларни гангитиб қўйди.

Улар яна юз юқ ёй, ўнта чопқир бадавий от жўнатдилар.

Ўғуз хон: «Бу ёйларни бўлиб-бўлиб жўнатсангиз, аскарларимизга етмайди. Бу ҳали қўшинимнинг ҳаммаси эмас. Биз бу ерда қўшинимизнинг орти етиб келишини кутиб турибмиз», – деди.

Шом ҳукмдори хоқонни мұқаддас маъбадларга, Тангри элчилари мангу ором олиб ётган зиёратгоҳларга таклиф этди. Хоқон шомликлар билан яхши муомалада бўлди, очилиб суҳбатлашди, қурбонликлар тарқатди. Маҳаллий аҳоли кўнглини олиш учун барча чоралар кўрилди. Шомликлар от устида савлат тўкиб турган, соchlари узун, пешоналарига ер юзининг эгаси бўлиш қисмати ёзилган салобатли Ўғуз аскарларини кўрганда улар дунёнинг у чеккасидан бу чеккасигача нега енгилмай келганлигининг сабабини англадилар. Шом ҳукмдори Ўғуз хонга бўйин-сунганилигини билдириди, қўл ташлашиб аҳдлашдилар. Шундан сўнг маслаҳат қилиб, Шом ҳукмдори номидан Миср фиръавнига хабар жўнатдилар:

– Жангга кириб қўшинни увол этма. Уларга бас келиб бўлмайди. Курол билан эриша олмаганларингизга ширин тил, бож-хирож билан эриша оласиз.

Шом ҳукмдори Ўғуз хонга Миср фирмъавни билан муносабатлар ҳақида гапирап экан, фирмъавн ақлли, мулоҳазакор киши эканлигини айтиб, у билан жангсиз иш битишига ишонтириди. Отлар, алплар ҳордиқ чиқариб бўлгач, Ўғуз хон Мисрга йўл олди, Кун хон бошчилигига тўққиз минг кишилик қўшинни олдиндан жўнатди. Улардан ҳам аввал Мисрга бир элчи дастаси юборилди. «Ўғлимнинг кичик бир дастаси устингизга босиб бормоқда. Ўзим йўлдаман. Ё итоат эт, ёки жангга чиқ!..»

Ўғуз хон хуфиялари келтирган маълумотлардан, Шом ҳокими билан сұхбатлардан фирмъавн қўшини қудратли эканлигини билиб олган эди. Шунинг учун ҳам ўз қўшинини аслидан кўра кўпроқ қилиб кўрсатмоқчи эди.

Мисрнинг алоқалари кучли эди. Узоқ-яқин элларда рўй берадиган воқеаларни, шимолдан келган бу отлиқ қўшиннинг юришларини синчилаб кузатмоқда эдилар. Фиръавн отлиқ қўчманчиларнинг ўз ўлкаларига қилган аввалги юришларини ҳам унутмаган эди. Булар ҳам ўша тоифадан бўлса, куч билан бас келиб бўлмайди. Тил тошишмоқдан бошқа йўл йўқ. Шом ҳукмдори Ўғуз хонга айтгани каби фирмъавн урушга ҳавасманд эмас, билим ва китоб муҳлиси эди. Миср коҳинлар ёрдамида йўқолиб кетган қадимий сир-асрорларни, эҳромларда, тош, гил, папирусларга ёзиб қолдирилган битикларни ўқиттиришга, хилқатнинг, ҳаётнинг, эллар ва тилларнинг илдизини, улар қайси даврда ва қаерда яратилганини билишга қизиқарди. Бир қарасанг, Нил дарёси қайдан бошланишини излаб қолар, бир қарасанг, қўшни ҳалқларнинг низом ва урфодатларини ўрганишга тушиб кетарди. Шом ҳукмдорининг ўз қўшниси ҳақида айтиб берган бир воқеаси Ўғуз хоннинг хотирасида мухрланиб қолган эди. Фиръавн Мисрни ер юзининг маркази, мисрликларни энг қадимий ҳалқ, тилларини эса барча тилларнинг отаси деб ҳисоблар экан. Бироқ фракияликларни кўриб-ўргангандан сўнг фикри ўзгаради. Шом ҳукмдори кула-кула ўз меҳмонига яна бир воқеани айтиб берган эди. Фиръавн Миср ва Фракия тилларидан қай бири қадимийроқ, бошқа тилларга асос эканлигини аниқлаш учун ҳали тили чиқмаган бир мисрлик ва бир фракиялик гўдакни танлаб олиб, ҳеч ким кирмайдиган хилват бир жойда сақлаган экан.

Кунларнинг бирида нима деб тил чиқарганликлари-

ни билиш учун уларнинг олдига кириб борганида, гўдакларнинг ҳар иккиси ҳам баробарига: «Нон!» – деб қичқирибди. Иккаласи ҳам бу сўзни айни бир тилда айтган экан.

Ўғуз хон: «Буларнинг биздан, бизнинг тилимизнинг ўтмишидан ҳеч бир хабарлари йўқ. Бизни унутиб юборганлар ёки шу қадар биқиниб олганларки, атрофларида нималар содир бўлаётганини кўрмайдилар. Мисрдан ҳам қадимиyroқ бўлган сумарчани ҳам ёддан чиқарганлар. Бизнинг кўкдан келган илк инсонлар эканлигимизни, кўк тилида гапиришимизни ҳам билмайдилар. Бизнинг кўк нуридан туғилганимиздан хабарлари йўқ. Шўриликлар лойдан бут ясай-ясай ўзларини ҳам шундоқ яралган деб тасаввур қиласидилар. Яратган эса уларни шунчаки отларим, қўйларимнинг туёғи остидаги тупроқдан яратган. Ҳолингизгавой сизларнинг!.. Буюк Тангри, уларнинг кўзига зиё бер», – дея ўйларди.

Фиръавн анча заковатли киши эди. Ким билан қарши турганини ҳис этарди. Ўғузларнинг бу ерда илдиз отиб қолмасликларини биларди. Ростини айтганда, ўзи ҳам Миср сир-асрорларини ўрганган сари кўкларга топинишдан ўзга йўл йўқлигини англаб етган эди. Яширинча у ҳам яратганинг бирлигига имон келтирган эди. Тил, билим иштиёқи уни чақирилмаган меҳмонлар билан дўстлашишга даъват этарди. Гўё бу келаётганлар унинг душмани эмас эди. Шунинг учун ҳам катта ҳадялар, қадими Миср ашёлари билан тўлдирилган сандиқни олиб, ўзи Кун хонга пешвоз чиқди. Уни Миср сарой удумига кўра хоқоннинг ўғли мақомида эмас, хоқон мақомида қабул қилди. Бу билан ота ва ўғил ўртасига совуқлик солиш ўз йўлига, яна бир томондан, илгари босиб келаётган кўшиннинг олдини олмоқчи, бу кўшин низомини, кучини кўргач, мисрликларни оғир аҳволга тушиб қолишдан халос этмоқчи эди.

Фиръавн Кун хонни узоқ тинглади. Кечиб келган йўлларига қизиқди. Таржимон ўз йўлига, Кун хоннинг тилидан эшигтан сўzlари унинг энг қадими тил борасидағи изланишларини боши берк кўчага солиб қўйди.

Кун хон чопар орқали вазиятни отасига етказди. Ўғуз хон Мисрга бориб ўтирмади. Ўғли уч йиллик хирожни бир йўла олиб, йигитларининг бир неча йиллик кийим-кечагига, хизмат ҳақига етадиган мўл-кўл армуғонлар билан ортга қайтди.

Бу юришдан Ўғуз хон англашилмас түйгулар билан қайтмоқда эди. Ростдан ҳам йўл тугадими, олдинда борадиган жой қолмадими? Довруқ-шони ер юзининг нариги чеккасигача ёйилган Ассурларнинг, Мисрнинг кучи шу холосми? Минг йиллардан бери атиги шу куч билан барча қўшниларини қўрқув ичида, ҳукмлари остида тутиб келишганми? У барча бу ўлкаларни ўзига боғлаганлигидан, турк қиличи остига ўтказганлигидан фуур турарди. Шу билан бирга ичида бир бўшлиқ ҳам бор эди. Йўл тугаса, ҳаёт ҳам тугайди деб биларди у. Кўк Тангри номини ер юзига ёйганидан, ясама бутлар, бутхоналар шунчаки инсон ўзини ўзи алдашидан бошқа нарса эмаслигини англатиб бўлганидан сўнг қиласидан бир иши қолмаган эди...

ЯНГИ ЎРТЛАР

Баалбак тоғларидан ошиб, Озар кўли соҳилларига тушиб борганларида қўққисдан Ўғуз хоннинг ёдига Ёмғир тоши тушиб қолди. Қам Ота қумли саҳрода адашиб кетган карвон билан бирга абадий фойиб бўлган тошни нега энди, бу кўлнинг сувларига боқиб турганида эслаб қолди экан? Ўлканнинг барча давлатлари, ҳалқларининг телба бир эҳтирос билан бу кўлга ва унинг атрофларига эга бўлиш учун чопишмаларини қўрганлиги сабаблими? Бу саволларга Ўғуз хоннинг ўзи ҳам жавоб топа олмас эди. Бироқ унга шундоқ туюлардики, фақат бу ердаги қўшни элларнинг эмас, балки бутун дунё тарихининг йўллари шу кўлга келиб туташади, ўзининг тасаввурга сифмас даражада узоқликлардан, ақлга сифмас олис йўлларни босиб келиб, охироқибатда шу ерга қароргоҳ тикиши ҳам Озар кўлининг жозибаси билан боғлиқ экан... Йўқ, буни фақат жозиба деб бўлмасди. Тангри элчиси ўзидан кейин келасидан замонларда ҳам тарихнинг энг буюк йўллари ана шу ерда кесишишини англаб етган эди. Шу боис ҳам эл учун ана шу кўл атрофида заҳмат чекиш лозимлиги ҳақида ўйларди. Қадимий юртларига такрор қайтиб келишлари озарлар бегининг йиллар бўйи чеккан азобларини унуттирган эди. Улусдан сезилмайгина ажralиб қолган қари-қартанглар, ҳомиладор аёллар, жангга кира олмайдиганлар, алпан, озар, кангар, талас уруғларидан келиб чиққанлар Қазилиқ этакларини, Озар кўли билан Қора денгиз орасидаги ерларни юрт тутган эдилар.

* * *

Қароргоҳлари гүзал ердан танланган эди.

Тепаликлар устидан Озар күли, унинг ичидаги ороллар, ортдан қүёш чиқиб келганды эса күлнинг нариги томонидаги тоғларнинг қоп-қора чизгилари яққол күзга ташланиб турарди. Яйловни бошдан-охир Ўгуз улуси, эл-юрти қоплаб олган эди.

Қазилиқ тогининг этакларида солдирган Алп қалъаси, турли ўлкаларда тикланган кентлар ўз йўлига, бироқ қўшниларни кўздан қочирмай кузатиб туришга энг қулай манзил ана шу ер эди. «Ич элларнинг Бош кенти»... Ўгуз хон чодиридан сал нарида янги қалъа қурилиши бошланди. «Мен шундоқ ҳам пахса уйда ўтира олмайман. Ҳали тупроқда кўп ётамиз. Тош қафасга солинсан ҳам, ичидаги бир кечалик чодир қуриб оламан. Бош устимда қўкка ўхшаш олтин бошли чодиримни, унинг томирсимон чигларини, оёғим остида яйлов чаманларига ўхшаган гиламларни кўрмасам ақлимни йўқотиб қўяман. Бироқ булар абадий эмас. Қўшнилар қўққисдан устимга бостириб келишлари мумкин. Кексалар, ёш болалар учун ишончли маъбадлар қурмай туриб юриш қила олмаймиз. Эл низоми, кўч ўз йўлига, бироқ ҳаётнинг ҳам ўз низоми бор. Алплар ҳам кексаяди, юришларга ярамай қолади.

Узоқ йиллар кўчдан узилиб қолгани учун бир эркак ва аёл гина қилишди. Янги туғилган чақалоқни тутдилар қўлимга. Ҳомиладор аёлнинг бошқа иложи қолмаган экан. Кўчдан ажраб қолиб, туғиб, сўнгра яна элга етиб олган эканлар. Шунинг учун керак бўлса бир қалъа, керак бўлса беш қалъа қуриш, душман кўз тикиб турган аёлларимизни, қизларимизни, чолу кампирларни шу қалъаларда муҳофаза қилишимиз лозим».

Гўё шу сўзга маҳтал турган эканлар. Яйловларда, Ўгуз ўтиб келган йўллар устида, қўл етмас қояларда Ўгуз қальалари ипдаги маржондек қатор-қатор қад ростлади.

Жангсиз кечган бир неча йил ичидаги Ўгуз эли кўпайди, катталашди, ўлкада энг улкан кучга айланди. Мисрдан ҳититларга қадар ҳамма жойдан бож-хирож оқиб келар, йилдан йилга кўпайиб яйловларга сифмай қолган мол-ҳоллар, сурувлар, от йилқилари қўшниларнинг бозорларини тўлдиради эди. Элни ҳар қанча яхлит сақлашга уринса-да, кўчиб кетаётганлар ҳам ортиб бормоқда эди.

Кичик беклар, ўлпончилар, жангчилар, элчилар, экинчилар, савдогарлар ошиб борган сари деҳқон эл тупроққа қаттиқроқ ёпишарди. Бу шунаңанги бир давр эдики, эндиликда барча құшнилар унга мансуб бўлган кишиларни ҳам унинг номи билан атаб, ҳаммасини ўғуз дея бошланган эдилар.

* * *

Бу пайтда Кунчиқарда – Манна ва Мидияда ғалати воқеалар содир бўлмоқда эди.

Ассурлар билан бўлиб ўтган жангдан сўнг Манна сиртдан уларга тобе бўлса-да, зимдан бу тобеликдан чиқиш йўлини ўйларди. Улар билан биргаликда жант қилган мадар тоифалари ҳам ҳозирча унга бўйсунсалар-да, давлат сифатида ўзларини қандоқ тутишлари номаълум эди. Ўғуз хоннинг ҳузурига мадар элчиларининг бири келиб бири кетар, ундан мадад сўрадилар. Жангсиз тура олмайдиган йигитлар бориб мадарларга, бошқа қўшниларнинг қўшинларига таълим берар, бир йилдан сўнг ўргатган кишилари ўзларининг душманларига айланишини фаҳмламас эдилар.

Ассурлар ўғузларга бас кела олмаганларидан сўнг, манлар ва мадарларнинг кучайишига умид билан боқар, «зўрайишса бир-бирини чўқийди, биз эса ёддан чиқамиз», – деган фикрда эдилар. Ҳар қадамда Ўғуз хонга эгилиб-букиладиганлар ўзларининг унга ҳеч қандай боғлиқлик жойлари йўқдек қилиб қўрсатиш ҳийлаларидан ҳам қайтмасдилар. Айни пайтда илдизи бақувват турк уруғларининг куч-қудрати олдида ожиз эдилар... Мадарлар ҳам манларнинг йўлини тутар, бўй етиб қолганларни Ўғуз элига ҳайдар, «бориб жанг қилиш ва қўшинга бошчилик этиш сирларини ўрганинг, ўғуз гўзалларига уйланиб қайтинг», – дер эдилар. Табиийки, бу шогирдлик фақат қўшин тузилишини ўрганишдангина иборат эмас эди. Самимий, очиқ кўнгил Ўғуз бекларининг ичига кириб, сирларини билиб олиш душманлар учун янада фойдали эди. Улар элга кириб келар экан, айрилиб кетишни истамай, ўғузга қўшилиб-қоришиб кетганлари ҳам бўларди, ўзлари мафтун бўлиб қолган гулжамол ўғуз қизларига уйланиб, уларни олиб кетганлар ҳам.

Шу тариқа Ўғуз эли билан Манна ва Мидия ўртасида эл-улус яқинлигидан ташқари юзлаб-минглаб хонадонлар-

нинг қариндош-уругчилиги ҳам яранмоқда эди. Мидия шоҳларидан аксариятининг ўғуз сутини ичганлиги, ўғуз лафзида гапириши ана шундан эди.

* * *

Эл удумига кўра юришларда бегонани, хун душманни ҳам чўнтағи қуриб қолган пайтда зўрга солмас эдилар. Хирож баҳорнинг охирларида йифиларди. Ўғуз хоннинг солиги енгил эди. Хирож унинг устунлигини кўрсатувчи бир удум эди. Ассурлардан тортиб Ҳитит, Фаластин, Миср, Бобил... ўлканинг барча буюк эллари унга хирож берарди. Бу ўғуз хон ўлканинг энг буюги эканлигидан бир нишона эди. Муҳими ҳам шу эди. Атиги битта от, битта түя бўлсада хирож берилиши шарт эди. Хирож бермай қўйганинг ҳолига маймуналар йиғларди. Катта жанглар нари турсин, ўғуз бекларининг майда ҳужумлари, юришлари, талонлар уларнинг дунё билан боғланган ришталарини узиб ташлар, бошларига қора қунлар тушар эди.

Кўпчилик элдаги бу мўл-кўлликни инонч билан боғлар, «Ёлғиз Тангрига топинмоқ элни йўқчиликдан кутқарди, юрга ризқ-рўз кўқдан ёғмоқда», — деган фикрда эди. Урушга, талон-торожга кўз тикканлар сафи йилдан йилга камайиб борарди.

* * *

Жангсиз ўтган йилларда хоқоннинг қишлови Кур-Ораз бўйи, яйлови эса Гўйча қўлидан бошлаб Қора денгизу Одалар дengizgacha bўlgan яйловлар эди. Жангни қўмсаб қайнаган қонларини ов билан совутар эдилар. Найза, қилич, камонбозлик мусобақалари тинимсиз ўtkазib туриларди. Сурувлар, йилқилар, қайтабонларнинг тўл пайти¹ юришга ўхшаш бир севинч олиб келарди.

Яйловга чиқар эканлар, чаман дengiziga қўнган мингминглаб оппоқ чодирлар тоғ этакларини яшнатиб юборарди. Ўчоқлардан тутун кўкка ўрлар, чаманларга дастгоҳлар қурилар, палос-гилам, арқон тўкувчилар камалакдек ранг-баранг ипларини ўтлоқларга ёйиб ташлар, жун қирқувчиларнинг қордек оппоқ жун хирмонлари чодирлар олдига ёзилган дастурхонга ўхшаб кетарди. Ўрмонларда камон учун ўқлар йўнишар, йигитлар эгар кўрмаган

¹ Тўл пайти – қўзилаш пайти

тойларни, бурундуқ күрмаган бүталарни, бўйинтурук күрмаган новвосларни қўлга ўргатар эдилар. Зотдор отларни саралаб кўпайтириш, қўшнилардан от танлаб олиш ва айирбошлиш ҳам доимий қизиқарли машгулотлари эди. Хоқонлик ҳаёти бутун жаҳду жалоли билан давом этарди.

Темирчилик чодирлари ҳам тирбанд, отларни тақалашиб, ўроқ-чалғи, қилич-қалқон ясаш эл-улуснинг кундалик зарурий юмушлари эди.

Ўуз эли ярим кўчманчилик ичидаги экин-тикин учун ҳам вақт топар, ҳар бир ишнинг ўз ўрни, ўз пайти бор эди.

* * *

Ўуз хоннинг вориси, бўлгуси тўра боши, элнинг билак кучи Кун хон эди. Отаси тўkkанини у йикқан эди. Ўуз хоннинг навқирон чоғларидек унинг ҳам отини босадиган от, қиличини чопадиган қилич йўқ эди.

Миср юришидан сўнг отасининг ёши қайтиб, оғирлашиб қолганини кўриб: «Олти ўғил ўстирдингким, ҳар бири бир суюнган тогинг бўлсин», — деда хоқонлик юкини ўз елкасига олган эди. Кўшинга бошчилик қиласар, эл низомини кузатар, юрт сарҳадларининг дахлсизлигини таъмин этарди.

Сумира унга кетма-кет уч ўғил туғиб берди. Тўнгич ўғлига Алп Эр Тўнга деб ном кўйган эди. Ўуз хоннинг бусевикили набираси ҳар куни бир арпа бўйи ўсиб, йигит ёшига етди. Юксак Тангри уни кўнглининг чоф пайтида яратган эди. Келбати, ақлу фаросати, кўнглининг очиқлиги билан ўсмирлик чоғидаёқ элда от чиқарган эди. Манна ва Мидиядан келган ўсмирлар билан биргаликда қиличбозлик, найза улоқтириш, камонбозлик мусобақаларида қатнашар, хоқон отаси, бобоси каби унинг шон-шуҳрати ҳам қўшни ўлкаларга ёйилган эди.

* * *

Улутурк ўғли Кўркут элнинг бош баҳиси, донишманди, ўтмиш ва келажакдан дарак бергувчи, ҳар муҳтоҷнинг корига ярайдиган, ҳамма бирдек меҳр кўйган, еру кўк ва барча жонзотларнинг тилини билгич бир инсон эди.

Кўркут Кун хон билан бирга улфайган эди. Ўсмирлик пайларида ёвқурлиги билан эл ичидаги ном чиқарган эди. Борган сари қўли қиличдан кўра кўпроқ кўбизга чўзила-

диган бўлди. Чечанлиқда тенги йўқ эди. Сўз айтиб, соз чалмоқ, қўшиқ айтмоқ бутун руҳини эгаллаб олди. Улуғ хон Ота Битикчининг китобларини сўйлар, қўшиқларини куйлар эди. Кейин ўзи ҳам битикчи бўлиб етишди. Сўзи, чолғуси билан элларга, юртларга зиё сочар эди. Одамларнинг кўнглидан жой олди. Кишиларнинг юзига қараб бошига тушадиганларни айтиб бергувчи бўлди. Кўкка боқиб манглай ёзигини, ерга боқиб тупроқ унумини айтар эди. Номи чиқиб, донг таратди. Дардмандлар ундан мадад сўрарди. Шодон шодлигини у билан бўлишарди. Барчага хуш туйгулар баҳш этиб, элнинг донишманди, башоратчиси бўлиб танилди. Жангдан бўш пайтида Кун хон куннинг кўп қисмини Кўрқут билан ўтказар, унинг суҳбатини жон қулоғи билан тингларди. Ўғуз хон буни кўрган ва ҳис этган, Кун хонга, «Мендан кейин Кўрқутни ҳузурингга олиб, саройнинг бош баҳхиси қилиб қўясан, дея васият қилган, васиятимни бажармасанг, Тангри кечирмайди», – деган эди.

Кўрқут Тангрини севган, Тангри ҳам уларни севган, номи яратган маъносини англатувчи баёт уруғидан бўлиб, ўт-ўланлар, дархтлар, гулларнинг ҳам тилини биларди. Элнинг ҳам қами, ҳам шомони, ҳам элчиси, ҳам ҳакими эди. Йўқ, фақат шомон эмас эди. Кишиларни дори-дармон билан эмас, сўз билан даволар эди. Сўзини, қўбизини тинглаш учун узоқ-яқиндан кишилар оқиб келарди. Ўғуз йигитларининг мардлиги ҳақида сўз сўйлар, қўшиқ куйлар эди. Ўғуз хоннинг Кўк Тангридан келган сўзларини-да ҳар анжуманда куйлаб, элга ёёдиган ҳам шу эди. Тўғрилиги, донолиги учун ёшлигиданоқ эл маслаҳатчисига айланган эди. Эл йигинлари Кўрқутсиз ўтмас эди. У соз чалар, тилак тиларди. Тилаклари тилдан тилга кўчиб юарди:

*Қорли қора тоғларинг йиқилмасин!
Қўлкали қора оғочларинг кесилмасин!
Жўшиб оқсан кўркли сувинг қуримасин!
Қанотларингнинг учи қирилмасин!
Чопар экан, учқур отинг қоқилмасин!
Савашгандা қора пўлат тиғ қиличинг кертилмасин!
Тортишар экан, ола кўн теринг йиртилмасин!
Оқ лачакли онанг жойи учмоғ ўлсин!
Оқ соқолли отанг жойи учмоғ ўлсин!
Ҳақ ёндирган чироғинг ёниб турсин!*

Ёшга тұлған сари Құрқут бирөвга дада бўлди, бирөвга ота. Карвон йўли бўйлаб сўзи, сози, овози машҳур бўлди. Кунчиқардан кунботаргача номи ёйилди. Ўзи шундоқ яшаб ўтди, Құрқут Ота сўзи минг йиллар оша келган қутсол, тўралик сўзларига чеврилди.

Туғилган гўдаларга ҳам у от берарди, аразилиарни ҳам у яраштириб қўярди. Эл, уруғ беклари, у дуо қилмаса, ҳеч ишга қўл урмас эди.

ЎГУЗ ХОННИНГ ТУШИ

Кунларнинг бирида Ўғуз хон бир туш кўрди. Бир олтин ёй ерда чирмашиб ётган эмиш. Бу учи кўринмагани каби нариги учи ҳам кўринмасмиш. Ёйнинг кириши энланиб бир йўлга айланган эмиш, Ўғуз хон ана шу йўлдан от чоптириб бораётган эмиш. Аммо йўлнинг охирига етиб бўлмас эмиш. Ёй кунчиқардан кунботарга узаниб ётган эмиш. Ёйга ёнма-ён уч кумуш ўқ жойланган эди. Ўқлар шимолга отилган эмиш, кўз илғагунча учиб борар, бироқ улар учган манзилнинг ҳам охири кўринмас эмиш. Уйқудан уйғонди. Орадан ўтган давр мобайнида илк бора шунга ўхшаш тушни кўп йиллар аввал Улутуркдан эшитгани ёдига тушди. У пайтлар жанг-жадаллар роса қизиган бир давр бўлиб, негадир Улутурк айтган бу тушни Ўғуз хон таъбирлаб ўтирган эди. Бироқ кекса маслаҳатчининг баъзи сўзлари ҳамон хотирасида эди: «Хоқоним! Тушим сиз учун хайрли бўлсин. Тушда неки берилган бўлса, ўнгидан келсин. Ёй – хоқонликнинг, ўқ куч-кудратнинг рамзидир. Тангри ер юзини сизнинг наслингизга, уруғингизга бахш этган». Нега Улутуркнинг бу туши унутилди экан? Балки шунинг учун ҳам бу кеча тушида ёйнинг кириши бўйлаб от чоптириб борар экан, бир чеккада оқ от устида, оппоқ либосда кулимсираб турган кекса Улутуркни ҳам кўргандир. Унинг боқишиларида ҳам изтироб, ҳам ўзи кўрсатган йўлнинг тўғрилигига инонган кишининг арқайинлиги бор эди.

Ўғуз хон маслаҳатчиларию фармонбардорларини йиғиб, уларга тушини айтиб берди, уларнинг фикрини тинглади. Булар ҳам Улутуркнинг гапини сўзма-сўз такрорлаганларини кўриб гангиб қолди.

Ўша пайтларда Улутурк элнинг тузуги деб жон куй-

диарди. Тўраларга риоя этилиши, ҳар бир киши ўз ўрнини билиши лозимлигини хоҳларди. Ер юзини қоплаб олган бир элда ҳар уруғ, ҳар тоифанинг ушбу ўқлар қаби аниқ ўрни бўлиши лозим эди. Ўша пайтдан бошлаб Ўғуз хоннинг йўллари узоқ-узоқларга тушди ва Улутуркнинг хаёлига келмаган юртлар, улуслар билан боғланди.

У тушида қўрган бу ўқ-ёй элнинг бутун келгуси қисматининг калитидир. У ўғилларига билдириласдан йўллар устига бир олтин ёй, уч олтин ўқ яширтирди. Сўнгра уларни ҳузурига чақириб деди:

— Боринг, ов овланг, қуш қушланг, бизнинг улушимизни ҳам олиб келинг.

Катта ўғиллари ов ортидан бораркан, бир учи тупроқдан чиқиб турган олтин ёйни кўриб қолдилар, уни ердан чиқариб олиб, оталарига олиб келдилар.

Кичик ўғиллари ҳам мўл ўлжа билан қайтишар экан, уч олтин ўқ топиб олдилар.

Ўғуз хон ўғиллари келтирган нарсаларни қўлга олиб деди: «Тангрининг амри шу экан. Сизнинг ўртангизда танлов ўтказиш менинг зиммамда эди. Бу ишни Тангрининг ўзи амалга оширди».

Сўнгра узоқ йиллар Ўғуз элига раҳнамо бўлиб қоладиган тўра ҳақида сўзлади:

— Ёй бир хоқонлик, бошлиқлик рамзидир. Қайси томонга мўлжал олинса ўқ ҳам ўша ерга тушади. Ёй мўлжалчидир, ўқ эса элчи. Ёй фармон берувчиидир, ўқ — эшитувчи. Ёй отувчиидир, ўқ отилувчи.

Олтин ёйни уч катта ўғилларига бераркан, уларга: «Ўғилларим, бу кундан бошлаб сиз Бўзўқ номландингиз. Бу олтин ёй каби бўлинг. Ўқларни лозим бўлган ерга отинг. Қўшиннинг ўнг қанотини бошқариш сизнинг зиммангизга тушади. Саройда менинг ўнг томонимда ўтирасиз», — деди.

Уч олтин ўқни уч кичик ўғлига берди. Уларга «Уч ўқ» номини берар экан, «Сизлар ҳам шу ўқлар каби бўлинг», деди. Сўл қанотни бошқаришни уларга топширас экан, ўзининг сўл томонига ўтқазди. Шу тариқа кичик ўғилларини катта ўғилларининг қаноти остига киритди. «Сизнинг фарзандларингиз ва тўраларингиз ҳам шу тақсимотга риоя этади, ҳар бир киши ўз ўрнини билади», — деди.

Ўғуз хон сўз сўйлади, қани нелар сўйлади экан:

Сиз бир бўлсангиз, эл ҳам боқиб бир бўлар.
Бир қўлнинг нимаси бор, икки қўлнинг саси бор.
Ҳаёт тутар, ёғий тугамас.
Қардош эгарли отга ӯшшар.
Ёвга очма кўнглингни, Тангри берсин кунингни.
Тўра сувдир, басир куч – ўт.
Тўра билан оғу ют, Тангрининг йўлини тут.
Уч нарса билакдан кучни олади. Бири – шошмоқ,
бири – ялқовлик, бири – кин.
Ёғийдан уятсиз қочади.
Тил айтарин билмаса, осмонларда бўлсанг ҳам сени
ерга эндирап.
Нодон билан ўт кечсанг, сўнгда заҳар ичарсан.
Ёзда эгил, қишида егил.
Мардлик чекинса, тириклик бекинар.
Қаттиқ тутса ўғлини ота, ўғил ниятига етар.
Олқишинг олқиши, қарфишинг қарфиши бўлсин.
Ақл ёшда эмас, бошда.
Гулдан илон оғу йигар, ари эса бол.
Юкнинг оғири – туз, ишнинг оғири – номус.
Ўт тутунсиз, йигит гуноҳсиз бўлмас.
Хатосиз ўқ, енгилмас билим бўлмас.
Тўғри юрган тез юрар.
Ёғочнинг эгилгани – сингани, йигитнинг эгилгани –
ўлгани.
Қайда бирлик, ўша ерда тириклик.
Мен сизга тўра бердим, Улуф Тангрим мададкорингиз
бўлсин!..

* * *

Ўузларнинг Қофқоз шимолида майдонга чиқишилари,
кatta-кичик халқларни бирин-кетин тиз чўктириб, Мисрга
қадар ўлканинг энг катта кучи ва давлатига айланишлари
шу қадар тез ва фавқулодда содир бўлдики, ҳатто энг таж-
рибали, ҳийлагар хукмдорлар ҳам бунинг сабабини би-
лишга улгуролмай қолдилар.

Ўуз қиличининг шуъласи чақмоқ каби ҳамманинг
кўзини қамаштириб қўйган, кўзларини очганларида эса
кеч бўлган эди: барча шухратли қўшинлар тор-мор этил-
ган, барча мағлуб ўлкалар бу йилдирим суръатли оқинни
яна қайта қўрмаслик учун бож-хирожларини ортиғи би-

лан берар, ўгузларга яқинлашиш, улар билан қариндош тутиниш, уларнинг ичига кириш учун йўл излардилар.

Модомики Ўуз от устида, юришда экан, душман бошига отилган тош эди: ҳеч ким унга яқин кела олмас, на қўшинининг ҳисобини билган бор эди, на бошқариш усулени. У бир афсона бўлиб, бу афсона янгидан-янги ранглар, янгидан-янги оҳанглар билан ўлкадан ўлкага тарқамоқда эди. Кўпинча камалак каби ҳар бўлтути алоҳида рангда бўлган суворийлари ҳақидаги сұхбатлар тилдан тушмас эди. Бу сұхбатларни эшитганларнинг аксарияти Ўуз отларини чиндан ҳам қанотли деб билар эдилар. Бу отлар силлиқ қояларга чиқа олар, тоғдан тоққа учеб ўтар, дарёлар устидан сакрай оларди. «Ўуз камончиларининг ўқлари эса нақ мўъжизанинг ўзи». Гүёки бу ўқлар сеҳрли бўлиб, ҳар қандай масофадан нишонга аниқ тегади, деган гаплар ҳам тарқаган эди.

Хуллас, ўгузлар барча учун бир сир бўлиб, бу сирни очмоқ мушкул эди. Чунки уларни бирон-бир жойда топиш, яқин бориш мумкин эмасди. Шу сабабли фанимлар Ўуз қанотларини йифиб ўз инига ёки хоҳлаган инларидан бирига қайтишини кутар, кутганда ҳам панада туриб овини пойлаган овчининг сабру тоқати билан кутардилар.

Фалатким, ўгузлар ўлкага ҳоким бўлиб, қўшнилар билан душманчиликка чек қўйганларидан кейин ўзлари ўз душманларига айландилар. Чўлларга, йўлларга, жангларга ўрганган юраклар қотиб тошга айланмоқда эди. Юриш, жанг-жадал иштиёқи қийнар эди алпларни. Ажойиб жангчилар ажойиб дехқонга, ажойиб хунармандга айлана олмас эдилар. Эл бир турғунлик ичida чўкиб борарди...

Душманларнинг кутганлари ҳам худди шу эди...

Илк зарба ўғуздан ажраб кетиб ассурларга қўшилган Кун хоннинг аввалги қайнатаси, қипчоқ begi Эргўғондан тушди...

* * *

Эргўғон ўсмирлигиданоқ Ўуз хонга қўшилган, унинг аскари, кейинроқ эса қуролдоши бўлганидан фурур туряди. Сўнгра Кун хон унинг қизи Селжонни танлагани, қариндош тутинганлари уларни янада яқинлаштирган эди. Истаса Ўуз хон учун жонидан кечарди. Бироқ етти ўғилининг ягона синглиси бўлган Селжоннинг камситилиши

уни букиб қўйган эди. У ассур қизи Сумиранинг хоқон томонидан қабул қилинишини тушунар эди. Лекин Кун хон-чи? Нега бу ёғий қизи Ўгуз қуролдошларидан бири-нинг ёлғиз қизидан устун бўлиши керак? Бўйдоқ ўғилла-ридан бирига олиб берса бўлмасмиди ўша қизни? Душман ўз қизини ворисга беришни хоҳлади, бу табиий, аммо душман сенга яхшиликни раво кўрармида? Ворис-нинг уйланганлигини билмасмиди улар. Билишарди албатта! Била-қўра Ўгузни парчалаб ташлаш, орага хун со-лиш учун Кун хонни танладилар. Бас, унда нега Ўгуз хон ўзи енгган душманининг оғзига урмади, нега «сен шарт қўя олмайсан, мағлуб бўлдингми, энди менинг шартла-римга кўнасан», демади?

Бу Эртўғоннинг хаёлидан чиқиб кетмайдиган, кечакундуз унга азоб берган саволлар эди. У кин сақлайдиган киши эди. Узундан-узоқ юришлар, жанг-жадаллар юра-гини тошга айлантириб қўйган эди. Бироқ уни Ўгузнинг душман ҳукмдори билан аҳдлашиб қариндош тутингани-дан кўра кўпроқ қизининг фарзандсизлиги қийнар эди. «Тангрининг элчиси Тангри амрига қарши борадими? Чиндан ҳам элчи бўлса, илтижо қилсин, Тангри унга не-вара берсин эди. Бермаган бўлса, бунда менинг қизим-нинг гуноҳи нима?»

Ўз жангчи дастасини, қариндош-уруғларини олиб чи-киб кетган эди. Ўгуз хондан қасос оладиган кун келиши-ни кутарди. Бир томондан ассур суворийларига таълим берар, иккинчи томондан Ўгуздан ранжиганларни ўз ёнига тўплашга уринарди. Орадан йиллар кечди, Ўгуз хон ўлка-дан ўлкага ўтди, шуҳрати ортди, боши осмонга етди, унга яқинлашмоқ имконсиз ишга айланди. Бинобарин, унинг норозилигидан қатъи назар, ассурлар билан ўгузлар ора-сига тушишнинг имкони йўқ, ҳамон бу давлатлар бир-бирига лозим эди. Жанглар тугади. Ўлкада тинчилик ўрна-тилгандан сўнг Сумиранинг ора-сира ўғли Алп Эр Тўнга билан биргалиқда бобосини кўргани келишини эшитган-да Эртўғоннинг юраги таскин топди. Тангри бу фарзанд-ни нега Селジョンга бермасдан Сумираға берди? Нега Ўгуз-нинг қанотига яна бир қанот қўшди? Қасос йўли топил-ган эди. Тангри янглиш йўл тутганини, унга ҳақсиз жабр қылганини болани йўқотиш билан кўрсатиб қўймоқчи эди Эртўғон.

Яйловга чиқишдан икки ойча илгари Сумира ёнида ўғли ва бир даста қўриқчиси билан отасиникига зиёратга бориб, байрам қилиб қайтмоқда эди. Эртўғоннинг улар қаршисидан кесиб чиқиб, фаним қизининг кўз олдида унинг ўғлини қонга ботиришига ҳеч ким монелик қила олмасди... Озар кўлининг шимоли-ғарбидағи Ассурдан Ўгуз ўлкасига келадиган йўлнинг тошлар орасидан ўтадиган хилват бир жойида Алп Эр Тўнга бир неча жангчиси билан уларнинг қаршисидан чиқди. Ўғузнинг ўн аскарига бир ўзи бас кела оладиган бир жангчи эди Эртўғон. Қўй суруви каби қувиб бўғизламоқчи эди уларни. Алп Эр Тўнга ҳали жанг кўрмаган бир ўсмир бола эди. Бироқ кўз очганидан бери Кун хон билан бирга эди. Қилич чопиш, ўқ отиш сирларини отасининг энг сара йигитларидан ўрганиб олган эди. Нотаниш бир кимса ўз қаршисида қоя каби кўндаланг бўлганини кўриб шошиб қолди.

— Эй Ўғузнинг невараси, — деди унга Эртўғон, — душмани бор киши ҳам шундоқ бемалол йўлга чиқадими?

Алп Эр Тўнга фуурорли эди. Ўлимдан ҳам қўрқмас эди.

— Отамнинг душманлари отам билан гаплашади, — деди. — Менинг душманим йўқ. Бир тараф онамнинг юрти, бир тараф отамнинг.

— Мени айтишмадими сенга? Фақат отангнинг эмас, унинг бутун наслининг душмани бўлган Эртўғонни!

— Йўқ, айтмаган эканлар! Афтидан, сени душман ўрнида кўришмаган. Аммо сен ўзингни нима деб ҳисоблассанг ҳисоблайвер. Бу ерда отам йўқ, мен борман. Онамни низога аралаштирма. Қасдинг бўлса, мен билан урушгин.

Эртўғон юракдан қаҳқаҳа урди:

— Ёш боланинг нимаси билан урушшаман? Бу уруш дейилмайди. Ўгуз хонни доғлаш учун бўғиб ўлдирман сени.

— Майли, — деди у. — Оталарим айтганидек, Тангрининг амридан қочиб бўлмайди!

Сумира хотун қичқириб юборди:

— Бу нима деганинг, болам. Жанг кўрибсанми сен? Бирор душманга юзма-юз келганмисан ўзи? Керак бўлса биз ҳаммамиз жанг қиласиз.

— Йўқ, она! — деди Алп Эр Тўнга. — Тушимда аён бўлган. Бу жанг йўлимнинг бошланишидир. Хоқон боммнинг Тангриси асрайди мени!

Сумира хотун ўғлини қайтара олмаслигини билиб,

йиғлаб юборди. Ҳар иккала томондаги аскарларнинг чек-кароқда туриб уларни кузатищдан бошқа иложлари қолмаган эди. Бу йигитларнинг аксарияти бир-бирини танир эди. Биргаликда от чоптириб, қилич чопган, бир бурда нонни бирга баҳам кўрган эдилар. Улар бир-бирлари билан юзма-юз келишни истамас, бироқ Эртуғонни ҳам ниятидан қайтаролмас эдилар. Қари шер билан ёш бўри юзма-юз келган эди. Қиличлар тұқнашди ва дастлабки зарбадан маълум бўлдики, бола деб билганлари Алп Эр Тўнга мўрт ёғоч эмас, асл жанг таълимини кўрган йигит экан. Ёшлиги унинг иккинчи қороли эди. Эртуғон бир-икки зарба билан қаршисидаги болакайни ер тишлатишига амин эди. Бунинг устига, қаттиқ ғазабда эди. Ана шу ғазаб уни алдаб қўйган эди. Ҳар зарбага бор кучини берар, зарбаси бехуда кетганида ичидан нимадир узилиб тушгудек бўларди.

Алп Эр Тўнга учун эса бу бир эрмак бўлиб, ич-ичдан севинар, кучини синаб куриш учун имкон топилганидан хурсанд эди. Айни пайтда бобосини, отасини ҳақорат қилган, ассурлар каби соқол ўстирганлиги учун ёлдор шерга үхшаб қолган бу жаврақининг дамини кесиб қўйиш учун эҳтирос билан олишар, унга Тангри элчисининг невараси билан бу алфозда гаплашишнинг оқибати нима бўлишини кўрсатиб қўймоқчи эди. Остидаги от ҳам севимли соҳибининг бу шаҳдини ҳис этган, у билан бир вужудга айланган, эгасининг ишорасини кутмасданоқ майдонда жавлон урап, Алп Эр Тўнгани зарбадан олиб қочар, сўнг эса қўққисдан рақибининг устига сапчирди.

Соатлаб қилич чопищдан толиқмаган Эртуғон ўзи кутмаган бу олишувдан толиқди ва толиққанини ҳис этгани заҳоти Алп Эр Тўнганинг узун, бақувват қўллари солган қилич кўз ўнгидаги ялтираб тушди-да, елкасидан қўкрагигача бўлиб юборди. Қўли ёнига осилиб қолди. Отининг туёқлари остига қулаб тушди.

Ҳар иккала томондан файритабий «оҳ» нидолари янгради. Кимнингдир севинч, кимнингдир ўқинч нидоси эди бу. Сумира хоним ҳамон йиғларди.

Алп Эр Тўнганинг бу илк жангдаги ғалабаси эл орасига яшиндек тарқади.

Ўғуз хон гўё уйқудан чўчиб уйғонгандек бўлди, ёшгина неварасини ўзга элга шу ҳолда жўнатиш оқибати нима бўлиши мумкинлигини англаш етган эди у. Бу жанг бош-

ҳача ҳам тугаши мумкинлигини ўйлаганда совуқ тер босарди уни.

«Бошланди», – деб кўнглидан ўтказди у. Бу ниманинг бошланиши эди? Ўгузнинг ўғузга қўл кўтаришинингми ёки Алп Эр Тўнга олдида турган йўлнингми – буни ҳеч ким билмасди. Шундан сўнг Озар кўли қирғоқларида, Олаттоф ва Саволон яйловларида яшайдиган ярим кўчманчи бекликларнинг норозиликлари бошланди. Ҳаммалари бир уруғдан эдилар, ўғузларнинг келиши уларни қувонтирган, зулмдан халос этган эди. Бироқ инсон унутгувчидир. Ўтган кунларнинг фалокатларини тасаввур эта олмайди, улар ўғузлар келиб ўрнашганларидан сўнг ўз ерларининг торайиб қолганидан хафа эдилар.

Ўғузларнинг ўз ораларида ҳам зиддиятлар туғилар ва у тобора чуқурлашиб борарди.

Юришларда teng бўлган улус эндиликда экинчига, ярим кўчманчи чўпонга, чорвадорга, қўшинга ва юқори табақага бўлинганидан сўнг вазият ўзгарган эди. Қўшин боқиманда аҳволга тушиб қолган эди. Қўшин бошлиқлари билан юрт, тупроқ эгаси бўлган беклар, бу беклар билан деҳқонлар орасидаги норозилик кучайиб борарди.

Ер, мол-мулкка бўлган иштаҳа очилиб кетган эди. Ҳар бир киши янада кўпроқ нарсага эга бўлишни хоҳлар, охироқибатда айбни хоқондан кўтаради.

Бу ҳаво аста-секин хоқон хонадонига ҳам кириб бормоқда эди. Ўгуз хоннинг ўз ўғиллари ва неваралари ҳам хоқоннинг қўлига боққанларича, ўзларига мерос сифатида нима тегишини билмоқчи эдилар. Ўлка шу қадар кўп, ҳаммага улуш тегиши лозим. Нега тақсимот қилинмаслиги керак? Ҳар ким ҳам хоқон бўла оладими? Шундоқ ҳам Кун хоннинг оргидан ўғли Алп Эр Тўнга етишиб келмоқда.

Ўғуз хон вазиятни тушунар эди. Унинг олдида ўғиллари оғиз очиб бир нима дея олмасдилар. Лекин ундан кейин нима бўлади? У яратган буюк салтанатни асраб қолишга умид борми?

Юрагини ана шундай қайгулар қоплаб олганида Ўгуз хон тез-тез Қам Ота билан бўлиб ўтган сухбатларини эслаб кетарди. «Ҳа, чиндан ҳам кўқдан келганларнинг насли кесилган. Булар тупроқдан яралганлардир. Йиллар бўйи қанотли отлар устида елдириб юрдим буларни. Тангри йўллаган қанотли сўзлар билан руҳларини юксалтиришга

интилдим. Аммо бир жойда тұхтаб, бир парча тупроқ топған заҳоти тиззаларигача лойга ботиб қолдилар. Үз аслярига қайтдилар. Энди ҳеч ким уларни бу тупроқдан тортиб чиқара олмайды». Тұғри айтган экан Қам Ота: «Хали инсон фарзандининг тубан кетиши охирига етгани йүқ». Умри қисқариб, Тангри тилини унутмоқда, қадимги дунёси құлаб тушмоқда, үтмишнинг йүллари бекилиб қолмоқда. Майдалашиб, Тангридан узоқлашмоқда. Қачонгача давом этади бу? Минг йилми, икки минг йилми... Аммо кунларнинг бирида ҳукман ортта қайтиш, юксалиш бошланади. Сув тубига етгандан кейингина оёқларини ерга тираб юқори қалқадилар. Менинг сұзларимни үшанда англаң етадилар. Тұраларимиз, тузукларимиз үшанда эътибор қозоңади. Тангрини ана үшанда ҳис этадилар ва Тангри сари шиддатли бир интилиш бошланади.

Бу фикрларини үғиллари билан бўлиша олмасди. Энг катта қайфуси уларнинг бирлигини асраб қолмоқ эди. Дунё моли, ғалаба нашидаси уларни бир-бирига қарши қилиб қўйишидан кўрқар эди. Бироқ оға-инилар ўртасидаги ихтилоф янада теранлашиб бормоқда эди.

Уларнинг дарди нима үзи? Оталаридан кейинги тақдирларими? Ота ота-да, ахир, ҳаммасига бир кўз билан қарайди. Кун хон ҳали буни эплай оладими? Бунинг устига бошқа-бошқа оналардан бўлган катта оғалар билан кичик инилар ўртасидаги тортишув давом этарди...

Ўгуз хон шошилмоқда эди. Каспийнинг шимолидаги эллар бирлашган бўлса-да, жануб алғов-далғов эди. Ўқчи дарёсидан кунботарга чўзилиб кетган чўллар, Каспийнинг жануби ишончсиз жойлар эди.

«Шунча ерлар кифоя эмасми сенга?» – деб сўрайдилар мендан, дея ўйларди Ўгуз хон. – Биз бегона тупроқларга кўз тикканимиз йўқ. Фақат ўз уруғларимизга эга бўлмоқ, элларимизнинг дахлсизлигини қўримоқ, Тангри каломини ёймоқ истадик, холос. Чўлларда озод, қальясиз-деворсиз яшар экан дея ҳар ўтган бизни топтамасин дедик! Үз ўринларини кўрсатиб қўйдик! Ўз билганларича яшасинлар-у, лекин бизнинг йўлимизни кесиб чиқмасинлар.

Ана шундай ният билан Ўгуз хон сўнгги юришининг тархини чизарди. Бу юриш Мидиядан ўтиб, Каспийнинг жанубидаги кентларни элга боғлаши, Ўгуз дунёси доираланмоғи лозим эди. Бироқ ёз ўтгандан сўнг у қўққисдан ўз

қарорини ўзгартирди. Бу юришга Кун хонни жұнатди. Бу томдан тушган қарор әмас әди. Ўғуз хон юришга ҳозирлик күраётган эң қызғин бир пайтда ўғиллари орасидаги мубо-хаса янгидан авж олди. Оталари билан ким кетадио ким қолади – маълум әмасди. Қўшиннинг қайси бўлуги қолади? Саволдан савол туғилар әди. Тақсимот орқали ўғилларимни абадий бир-бирига боғладим, уларнинг ва уларга тегишли бўлган қариндош-уруғларнинг ўрнини қатъий аниқлаб бердим, дея ўйлаб юрган Ўғуз хон бу хабардан гангид қолди.

Ўғилларини чақирилди. Хоқон чодирига кириб келган оға-инилар оталарининг ўз олтин тахтига ўтирганини кўриб бошда шошиб қолдилар. Сўнгги пайтларда Ўғуз хон камдан-кам ҳолларда тахтга чиқар әди. Чодирга тўшалган гиламлар, ошланган кўй ва айиқ терилари устида, илиқ ва юмшоқ тўшамаларда ўзини янада роҳатли ҳис этарди. Тахтга чиқиб ўтирибдими, демак қандайдир жиддий сабаб бор. Оға-иниларнинг ҳар бири қўркув оғушида оталари нима демоқчи эканини, қандай қарорга келганлигини кутар эдилар.

Ўғуз хон анча ёшга кирган, ҳар бири бола-чақа соҳиби бўлган, элнинг таянчи ҳисобланган, юзлаб жанглардан ёргу юз билан чиққан ўғилларига жой кўрсатмади, ўтиринг, демади. Чақмоқ чаққан кўзларини ҳар бир ўғлининг кўзига қадаб чиқди. Сўнгра қўққисдан бақириб юборди:

– Нима истайсиз? Дардингиз нима сизнинг?!

Үйда, оила ичиди Ўғуз хон камдан-кам ҳолларда ғазабланарди. Айниқса, кейинги пайтларда унинг бундоқ бақиригини ҳеч ким эшитмаган әди. Оға-инилар бошларини қуи солиб турардилар. Ҳеч ким дамини чиқармасди. Ўғуз хон яна бақириб, улар ниманинг устида баҳслашаётгандарини сўради.

Кун хон юриш арафасида отаси билан инилари ўртасига совуқчилик тушишини истамасди. Бу аҳволда йўлга чиқиб бўлмас әди. Шунинг учун ҳеч нарсани яширмади, вазминлик билан:

– Мен ҳеч нарса истамайман, – деди. – Бироқ иниларим хоқонликдан ўз улушларини олишни хоҳлайдилар. «Бу қадар катта элни бир жойдан бошқариб бўлмайди. Отамиз ҳар биримизнинг еримизни кўрсатиб берсин, ўша жойга бориб ўтирайлик. Отамизнинг ҳам юки енгиллашсин», – демоқда улар.

Ўғуз хон баҳс нимадан бошланганини билар, худди ана шу сўзларни кутмоқда эди. Ҳеч нарса демай таҳт ёнига қўйилган ошланган оқ терини олиб ёйди... Бу Ота Мағорада Қам Ота унга баҳш этган тери харита эди. Терига битилган чизгиларга, ишораларга бир муддат боқиб турди. Энди бу чизгиларнинг сирлиги қолмаган эди. Бу йўлларни охиригача кечиб ўтган, унда қўрсатилган элларнинг барчасини қўлга киритган эди. Ўғуз хон бу тери харитани кўрган ондаёқ унинг маъносини тушунган, ҳозир ҳам янглишмаганига ишончи комил эди. Бу харитада фақат уларга тааллуқли бўлган жойларнинг шакллари чизилган эди. Тангрининг амири ва улуши шу экан.

У ғазаб билан сапчиб оёққа турди. Ёшига хос бўлмаган шаҳдам одимлар ташлаб ўғилларининг олдига келди. Ханжарини чиқариб, тери харитани олти бўлакка бўлди-да, уларнинг башараларига улоқтириди.

— Олинг, — деди, — истагингиз шу эди! Сиз элни шундоқ парча-парча қўрмоқчи экансиз, майли! Беш панжангизни оғзингизга тиқинг, олиб кетинг ҳар бирингиз ўз парчангизни. Бу ҳолингизни кўрган душман сизни яккалаб олиб, биттама-битта янчиб ташлайди! Тангри элчисининг ўғиллари шу ақл билан яшасалар, қўшин бошлиқларим, бекларим не аҳволда! Олинг бу лахтакларни. Бироқ Тангри бунинг учун жазо беради сизларга. Менинг бирлаштирганимни ўз пушти камаримдан бўлганлар парча-парча қилсалар, бу эл-улус минг йилдан кейин ҳам бошини кўтариб ўзига кела олмайди! Яхшиямки, менинг ионончимни, осмонни парчалай олмайсизлар!..

Сўнгра уларга яна бир бор ғазаб билан қараб чиқиб, чодирни тарқ этди.

У Кун хоннинг юришга чиқишини кутмасдан сарой аъёнлари ва қуриқчи суворийлар бўлими билан биргаликда қароргоҳдан йўлга тушди. Қишини Муғонда ўтказиб, кейинги ишлар режасини белгилаб олиши лозим эди. Кун хоннинг яйловлардан, Оқботандан ўтадиган йўли олис ва машаққатли эди... Ўғуз хон ўғилларидан ғазабланган бўлсада, таҳт вориси Кун хоннинг жуда ўткир жанг салоҳиятига, ҳеч нарсадан тап тортмаслигига ишонар эди.

Кун хоннинг Оқботандан Хуросон ва Кобул элларигача бўлган юртларни ром этиб, хоқонлик итоатига киритиши учун тўрт йил кетди. Бироқ бу ўлкаларнинг ҳеч бири-

да сүнгги сўзни ўзи айтмади; аввало уларнинг элчилари-ни отасининг хузурига жўнатар экан, «Ҳукмни отам чиқарсин», – деди. Кун хонга бас кела олмаган ёғийлар ортга чекиниб бораркан, Инжу бўйларидан, Янгикентдан Ўфуз хонга бир-бирига ўхшамаган хабарлар келмоқда эди. Эл низомини қўrimoқ учун унинг ортга қайтишини истар эдилар. Ўғлидан муттасил хабар олиб туриш учун Ўфуз ушбу йилларда ёзни Саволон билан Дамованд оралиғида-ги яйловларда ўтказиб келмоқда эди.

Алоҳида-алоҳида қалъалар учун жанглар бўлса-да, Мидия яхлит ҳолида Кун хон қўшинига қарши чиқмаган, ўрталарида катта жанглар содир бўлмаган эди. Бу юриш мадар улусларининг айни кўнглидан бўлгандек қўринарди. Кейинги воқеалар ҳам Кун хон билан Тутуқ ўртасидаги дўстлик ўткинчи эмаслигини кўрсатди, Кун хоннинг юриши натижасида мадарлар ўз сарҳадларини қунботарга суриб, ерларини кенгайтириб олган эдилар. Бу сафарда Ўфуз қўшини Инжу дарёси сари борадиган йўллар очган эди.

Қўшиннинг зафарли юришлари, Кун хоннинг улкан ғалабалар билан қайтиши каттакон шўлан билан қутланди. Шўлан тугагач, Ўфуз хон қўшин бошлиқлари ва бекла-рига деди:

– Биз ниятимизга етдик. Мисргача бўлган барча ўлкалар бизга бож беради. Уруғимиздан бўлғанларни қулликдан халос этдик. Эндиликда Чиндан Кунботар дентизигача чўзилган бир элимиз бор. Бироқ биздан қочганлар Инжу бўйидаги юртларимизга суқилиб кирмоқда. У ерларни бош-сиз қолдира олмаймиз. Юртларимизни қўrimoқ ва яхлит тутиб турмоқ қийин бўлади. Олдинда минг йилларча давом этадиган олис бир жанг ва бунёдкорлик йўлимиз турибди...

Сўнгра Ўгуз хон тагин нелар деди:

Эккан бичар¹, қўнган кўчар.

Эл отган тош узоқ кетар.

Минг ошчи, бир бошчи.

Номдор киши номидан қўрқар, номсиз киши Тангри-дан қўрқмас.

Орт покланар, от покланмас.

Иончизига иончини билдиromoқ ўксизга тўн кийди-моқдир.

¹ Бичмоқ – ўрмоқ, кесмоқ

Ахиллик билан арслон тутилар, куч билан този тутилмас.
Ота-она бергани ёқимли, Тангри бергани түйимлидир.
Тубан ерда тепача ўзини тоғ санар.

Йўл – кетганники, от – минганники, қилич – тутганникидир.

Қўл қилмаганни тил қилар.

Тангри кўрсатган йўл тўғридир.

Каттасини билмаган Тангрисини билмас.

Элини севган Тангрисини севар.

Тангри сизга ёр бўлсин.

Кўркли Тангрим! Мехрингни улусимдан, элимдан дариф тутма!

Шундан сўнг хоқон Кун хоннинг ўғли Алп Эр Тўнгани улкан суворий қўшини билан Хуросон устидан Янгикентга, Иккичойорасига жўнатди. Бу кейинчалик бутун турк оламига довруқ таратадиган ўша Алп Эр Тўнга эди. У ҳали парс-тазик бирликларининг Кунчиқарга юришини тўхтатиб қолар, Афросиёб шаҳрининг тамалини қўяр, отаси кексайиб қолганда ортга, Ич Ўгузга қайтиб, узоқ муддат тағин бу элни ушбу ўлканинг энг буюк давлати каби қўриб сақлар эди.

Ганжанинг, кейинчалик шуҳрат топган бир қатор Озарбойжон шаҳарларининг бунёд этилишини унинг номи билан боғлайдилар. Қазвин ҳам унинг қизидан қолган ёдгорликдир. Алп Эр Тўнга ўз хоқонлигининг энг қудратли бир пайтида томирида Ўгуз қони оқса-да, бир маҳаллар Бобилдан келиб шу атрофларда ўрнашиб қолган ёт элликларнинг фатвосига учган Мидия шоҳининг хиёнати туфайли бир зиёфатда заҳарланади, Озар кўли яқинлигида ҳаётдан кўз юмади, ўлими бутун турк-ўгуз дунёсини ларзага солади, номи минг йиллар оша мардлик рамзига айланаб қолади. Ҳозир эса хоқонлигининг баҳори эди, Алп Эр Тўнганинг ўзи эса Эртўғонни енгиш билан шон-шуҳрат йўлига эндингина қадам қўйган, дўстлари, йўлдошлари, суворий қўшини билан Ич Ўгуздан чиқиб, номини фақат катталардан эшишиб келгани ота юртларига йўл олган эди.

Ўгуз хон тағин янгидан тузук берди, ораларида гавғо чиқмасин, чорвалари, мол-мулклари қоришиб кетмасин дея йигирма тўрт фарзандининг номига тамгалар ясадти. «Бу сизларга васиятим бўлсин, бир умр унутманг», – деди. «Сўз ҳам, улуф киши ҳам бир неъматдир, унутманг, юқорида

Тангри, қўйида ер бўлганлиги учун ўзим тахтга чиқиб ўтиредим, ер юзининг тўрт гўшасидаги улусларни низомга солдим, янгидан қурдим, уларни қўриб-асраш, юксалтириш, тўраларимизни бузмаслик, Тангрини, эл-юртимизни, будунимизни севмак сизнинг бурчингиздир! Унутманг, биз Тангрининг қўшинимиз. Турк Тангриси ер-сувларни яратганда бизни унинг низомини қўрийдиган беклар қилиб юборган. Сиз бир бўлсангиз, очун ҳам бир бўлади, бирлингиз бузилса, элимизнинг ва ер юзининг ҳам низоми бузилади», — деди.

* * *

Баҳорга келиб Ўғуз хон зерикди. Эркўн, Ота Унгур, Хонтангри хаёлидан кетмас, тушларига кириб чиқарди. Яйловга чиқар экан, Саволонда илк бора қароргоҳ қурган еридаги эски муқаддас маъбадларни эслатадиган қальвани зиёрат этмоқчи, у ерда қурбонлик қўлмоқчи эди. «Хонтангри олисда қолди. Энди Саволон қурбонгоҳимиз бўла қолсин!» — деган фикрда эди. Тўр бошига — тахтга Кун хонни ўтқазиб, ўзининг Тангрига юкинмак пайти етган эди: «Алп Эр Тўнганинг ўрнига ўзим кетсан бўлар экан», — деб ўйларди.

Баҳор арафасида Ўғуз хон Саволонга бормоқчи эканликларини айтиб, ҳозирлик кўришни буюрди. Нега Саволонни танлаган эди? Қазилиқ тоғларини ошиб келган пайтида дастлабки ёзлаган жойи бўлгани учунми? Фарқи нима, бу атрофда чодир қуриб ором олмаган яйлови кам эдими? Энг юксак тоғ бўлгани учунми? Озар бўйидаги найза чўққили Оғри ҳам юксак эди-ку. Бироқ Оғри яйловларида қола олмаган, кўнглига ўтиргмаган эди. Унинг қоп-қора тошлардан бўлак нарсаси йўқ эди. Аммо Гўйча, Олатоғ, Саволон бошқа гап... Ўрмонлари, чашмалари, дарёлари, одамни яширадиган ўтлоқлари...

Шунинг учун ёқтириб қолганмиди Саволонни? Қўққисдан қалъя-мағорада ўзини меҳмон қилган Мағ, унинг Саволон этагидаги кентда кўргани муқаддас тош ҳақидағи гаплари ёдига тушди. Бирдан англаб етдики, уни Саволонга бошлаб келган нарса умрининг фурубида яна бир бора Мағ билан кўришмоқ истаги экан. «Тирикмикан? Бизнинг зафарларимиздан хабари бормикан? Ахир биз унинг истакларини рўёбга чиқардик. Яқин улусларни зул-

мдан кутқариб, бирлаштирилдик, душманларини тиз чўқтирилди... Булар ҳақда эшитганмикан?» Шу ният билан Ўғуз хон Саволонга чопар жўнатди.

Анжуманлар, ўзанларнинг тароналари олис далалар ҳавосини олиб келса-да, бўри увлашига ўхшаш куйлар, қўшиқлар кўнглини қоплаб олган булатларни ҳайдаб юборса-да, ичидаги сим-сим изтироб босилмас эди. У Тангри нинг элчилик амрини ўринлатган, «Бир Тангри, бир эл, бир хоқон» даъватини бутун ер юзига ёйган, ҳамма жойга жорий этган эди. Барча юришларда Тангри унинг мададкори бўлиб келган эди.

Шундай хаёллар билан қўчини Кур – Ораз қўшилмасидан олиб ўтиб шимол сари илгарилаб борар экан, чопар Саволондан бош эгиб қайтди. Қалъя-мағора бўшаб қолибди. Тўғрироғи, бир неча ёш мағ яшаётган экан у ерда. Ўғуз учрашган кекса Мағ эса чиқиб кетибди.

– Нима бўлибди, ўлибдими? – деб сўради Ўғуз хон.
– Йўқ, буюк Хоқон!
– Қаерда экан унда?
– Мағорани тарк этиб кетди, – дедилар, – Кунчиқар томонга, Каспийнинг нариги тарафига...

Бу хабар Ўғуз хоннинг йўлинни ўзgartирди. Денгиз сари юз буриб, унинг қирғоғидан жанубга илгарилади... Неча йиллар бўйи Мағни эсламади, ундан хабар олмади, у билан учрашмади? Ахир кўп замонлар аввал Қам Ота айтган ўша самовий жойлардан бири ҳам ана шу мағора эди-ку. Афтидан, Қам Ота билғанларни бу кекса Мағ ҳам биларди. Нега ундан инсоннинг яралиши ҳақида нималар билишини сўраб олмади? Энди эса Қам Ота қаторида уни ҳам йўқотган эди.

Фақат энди, орадан йиллар ўтиб кетгач, Ўғуз хон ичida атиги бир дафъа кўришгани ўша одамга нисбатан яқинлик, соғинч тўйди. Ер юзида кўрганларини, дунёнинг, улусларнинг келажаги билан боғлиқ фикрларни биладиган бир одам изларди. Бу одам эса бош олиб кетган эди. Кунчиқарга кетиб қолган эди. Ўғуз хон жилмайди: «Бу қанақанги жой алмаштириш бўлди? Мен бу ерга юрт солдим, у эса юртидан кетиб қолибди. Мен ўтиб келган жойларга йўл олибди. Бу қанақаси бўлди? Мендан ранжиридикан? Ёки бу ерлардаги ишини битди деб ҳисобладими? Балки бу даланинг экинчиси келгунча бошқа далани эк-

кани кетгандир?! Тангри элчиси! Бундан кўра Тангри экинчиши дегани яхшироқ эди. Элчи бўлиб нима олиб келдим? Сўз, Тангрининг ҳикмати. Адолат, инонч, Тангри ва яратилмишга сомелик... Бутун умрим бўйи бу уруғни инсон шуурига сепдим. Бироқ, афтидан, Тангри бизга у қадар баракотли дала бермаган экан».

Кун бўйи от сурди. Тоғлар кўринганда юраги таскин топди. Денгизга, кунчиқарга юзланиб тўхтади. Атроф кўз илғамас мовий осмонларга тулашиб кетган, шабадада тўлқинланиб ётган ям-яшил ўтлоқ эди. Ингичка дарё болудзорлар оралаб бурала-бурала денгиз томон оқиб ётарди. Дарёниг сўл қирғоидаги юксакликка қўл чўзиб сўнгти сўзларини сўйлади:

— Чодиримни ўша ерга тикинг. Ҳаёт тугайди, йўл қолади... Мени шу ерга тупроққа қўясиз. Мақбаримни дентиз кўриниб турадиган қилиб қурасиз. Бу тупроқларда абадий яшаб қоладиган тамғамиз бўлсин! Бу ерга ҳар тонг дентизнинг нариги томонидан Орол кўлининг, Хонтангри-нинг шабадалари эсиб туради...

Бу сўзларни айтар экан, Ўғуз хон ўз жасади устида юксаладиган Қурғон ота-боболари руҳини чақириб олишига, улар билан учрашишига, бу ердан юксалиб Тангри ҳузурига парвоз этишига ишонар эди.

Қўқисдан Ўғуз хон Ота Мағорадан бошлаб дунё бўйи борган ҳар бир ерида учратган топиноқлар, маъбадларни хотирлади. Буларнинг барчасидан мақсад нима? Уларда қандай сирлар яширинган? Топганлари, билганлари унинг умрига умр қўшдими? У сирларнинг абадий яшаб қолишини истаганида Тангрининг ўзи ҳифзу ҳимоя қиласарди уларни. Балки топиноқларни кўпроқ Тангрига яқин жойлар деб билгандирман! Йўқ, бу янглиш фикр. Кўк Тангри осмон остидаги ҳамма жойда мавжуд. Унга яқинлашмоқ учун маъбадларга тўпланиш бехуда. Аксинча, маъбадлар инсонни Тангридан узоқлаштиради. Тангри инсоннинг ўз ичиладир. Шунинг учун жасади устида юксаладиган Қўргон ҳам бир кун инсон фарзандининг топиноқларидан бирига айланади. Бу фикрларини ўғиллари, яқинлари билан бўлишган Ўғуз хон ичининг нур билан, тасалли билан тўлганини ҳис этди ва:

— Охирги гапимни эшитинг, — деди. — Энди Тангри мени ўз ҳузурига чорламоқда.

Қилич – тутганники, от – минганиники, йұл – юрганники, яранмиш – Тангриникидир.

Тангрини ҳамд эт, күнглингга қулоқ тут.

Келдик үқ каби, кетармиз йұқ каби.

Мард йигит мангу ўлмас.

Тангри тұранишни бүғади, Куёшу юлдузлар яна туғади.

Сүйлаб туриб, құқ билан түлиқ күзини юмди. 116 йил яшаб үтди.

Ұғуз хон рұхыға

Орадан минг йиллар үтди. Сүзинг – тилимизда, қонинг – томиримизда, кучинг – руҳимизда... Яшамоқдамиз! Сен очган йұллар қайта бекилгани йұқ.

У йұллар абадий Сенинг уруғдошларингники, қонингни ва руҳингни ташиб келаётган миллатингникидир. Бу йұлдан кимлар кечмади?! Алп Эр Тұнга, Мете, Атила, Җағрибек, Тұғрулбек, Алп Арслонбек, Чингизхон, Амир Темур, Фотиқ Султон Мұҳаммад, Шоқ Исмоил Хатойи, Шоқ Аббос, Нодиршоқ... Улар бұлмаса дунё тарихи қай ахволга тушиб қоларди? Биз ҳамон яшәпмиз... Бироқ худди сен күрган каби... Кунчиқарда Чиннинг мағв этиш, сингдириб юбориш сиесати ичидә, шимолда қилбарак чиркинлигига булашиб, жанубда сохта «орий» ҳийлагарларнинг чалкаш күчаларида, кунботорда руҳоният каззобларининг муштига мушт үқталиб... Биз дунёни қурдик, лекин дунё биздан құл тортмайды... Минг йиллардан бери руҳимизни синдиришдан, бизни харжлашдан чарчамайды дунё... Биз ҳам тугамадик, тугамаймиз ҳам... Яңидан бер бизга үша бирлик руҳини! Қайтар бизга үша күкден келган тангрисоллигимизни! Қайдасан, Тангрининг буюк элчиси?

Сұнг. Турклик, құрқлик, ростлик йұлида, яраттанға ва яратилғанға севги йұлида фикр қылған, байроқ туттан, қилич чопған, ёзув ёзған, сұз айтған барча кишиларни Улуғ Тангри ularнинг амали ва мартабасига күра ярлақасин.

МУНДАРИЖА

Кириш	3
Биринчи бўлим	
Турк тангриси	6
Ёмғир тоши	14
Чин маҳбуси	21
Тангри тогига юриш	25
Туш	46
Ўгузнинг уйланиши	49
Ота ва ўғил	55
Чин бармоги	68
Онанинг туши	70
Қоңли бир жанг бўлди	76
Хоқонликнинг илк йиллари	78
Табғач – ҳийла уяси	83
Чин юриши	89
Ўгуз хон тўраси	98
Топиноқ қайғуси	104
Қутлугнинг қайтиши	131
Оз эрлари билан бирлашув	140
Эски тарихнинг якуни	142
Иккинчи бўлим	
Буюк кўчиш	145
Сандик	148
Бошқурд юриши	163
Фош бўлган сир	167
Илк ва охирги мағлубият	173
Бегона юрт аёллари ёрдами	176
Бўз бўри билан суҳбат	185
Эски ва янги юрт	192
Саволонда илк ёз	199
Кар киши	219
Ассоурлар билан жанг	237
Қамарлар билан сулҳ	282
Шом устидан Мисрга юриш	289
Янги юртлар	296
Ўгуз хоннинг туши	302

СОБИР РУСТАМХОНЛИ

КҮК ТАНГРИ

Р о м а н

Озарбайжончадан Усмон Кўчкор таржимаси

«Sharq» нашриёт-матбаа
акциядорлик компанияси
Бош таҳририяти
Тошкент – 2010

Муҳаррир *Рустам Бойтӯра*
Бадийи муҳаррир *Феруз Башарова*
Рассом *Хуршид Зиёхонов*
Техник муҳаррир *Л. Хижова*
Саҳифаловчи *Ш. Соҳибов*
Мусаҳҳихлар: *Ж. Тоирова, Ш. Хуррамова*

Босишига руҳсат этилди 25.11.2009 й. Бичими 84x108/^{32*} «Times Tad»
гарнитураси. Офсет босма. Шартли босма табоби 16,80. Нашриёт-ҳисоб
табоби 16,66. Адади 3000 нусха. 613-сон буюртма. Баҳоси келишилган
нархда.

**«Sharq» нашриёт-матбаа
акциядорлик компанияси босмахонаси,
100000. Тошкент ш., Буюк Турон кўчаси, 41-й.**